

K A N D U N G A N

**JAWAPAN-JAWAPAN LISAN BAGI PERTANYAAN-
PERTANYAAN** (Halaman 1)

RANG UNDANG-UNDANG:

Rang Undang-undang Perbekalan 2000 (Halaman 15)

USUL:

Anggaran Pembangunan 2000 (Halaman 15)

Waktu Mesyuarat Dan Urusan Dibebaskan Daripada
Peraturan Mesyuarat (Halaman 82)

AHLI-AHLI DEWAN RAKYAT

Yang Berhormat Tuan Yang di-Pertua, Tun Mohamed Zahir bin Haji Ismail, S.S.M., P.M.N., S.P.M.K., D.S.D.K. J.M.N.

Yang Amat Berhormat Perdana Menteri, Dato Seri Dr. Mahathir bin Mohamad, D.K.(Brunei), D.K.(Perlis), D.K.(Johor), D.U.K., S.S.D.K., S.S.A.P., S.P.M.S., S.P.M.J., D.P.(Sarawak), D.U.P.N., S.P.N.S., S.P.D.K., S.P.C.M., S.S.M.T., D.U.M.N., P.I.S. (Kubang Pasu)

“ Timbalan Perdana Menteri dan Menteri Dalam Negeri, Datuk Seri Abdullah bin Haji Ahmad Badawi, S.P.M.S., D.G.P.N., D.S.S.A., D.M.P.N., D.J.N., K.M.N., A.M.N. (Kepala Batas)

Yang Berhormat Menteri Pengangkutan, Dato’ Seri Dr. Ling Liong Sik, S.P.M.P., D.G.S.M., D.P.M.P., D.P.M.S. (Labis)

“ Menteri Kerja Raya, Dato’ Seri S. Samy Vellu, S.P.M.J., S.P.M.P., D.P.M.S., P.C.M., A.M.N. (Sungai Siput)

“ Menteri Perusahaan Utama, Dato’ Seri Dr. Lim Keng Yaik, S.P.M.P., D.G.P.N., D.P.C.M. (Beruas)

“ Menteri Tugas-tugas Khas dan Menteri Kewangan, Tun Dato’ Daim Zainuddin, S.S.M., S.P.M.S., D.H.M.S., S.S.A.P. (Merbok)

“ Menteri Tenaga, Komunikasi dan Multimedia, Datuk Amar Leo Moggie anak Irok, D.A., P.N.B.S. (Kanowit)

“ Menteri Perdagangan Antarabangsa dan Industri, Dato’ Seri Rafidah Aziz, S.P.M.P., S.P.M.T., D.P.M.S., A.M.N. (Kuala Kangsar)

“ Menteri Pertahanan, Dato’ Sri Mohd. Najib bin Tun Haji Abdul Razak, S.S.A.P., S.I.M.P., D.S.A.P., D.P.M.S., P.N.B.S., D.U.B.C.(T). (Pekan)

“ Menteri Sains, Teknologi dan Alam Sekitar, Dato Law Hieng Ding, P.N.B.S., K.M.N., P.B.S., P.B.J. (Sarikei)

“ Menteri Luar Negeri, Datuk Seri Syed Hamid bin Syed Jaafar Albar, S.P.M.J., S.P.D.K., D.P.M.J., S.M.J., A.M.N. (Kota Tinggi)

“ Menteri Perdagangan Dalam Negeri dan Hal Ehwal Pengguna, Tan Sri Dato’ Haji Muhyiddin bin Haji Mohd. Yassin, P.I.S., B.S.I., S.M.J., P.S.M., S.P.M.J. (Pagoh)

“ Menteri Kesihatan, Datuk Chua Jui Meng, D.I.M.P., S.I.M.P., S.M.J., P.I.S. (Bakri)

“ Menteri Perpaduan Negara dan Pembangunan Masyarakat, Dato’ Dr. Siti Zaharah binti Sulaiman, D.S.A.P., D.I.M.P. (Paya Besar)

“ Menteri Penerangan, Tan Sri Dato’ Seri Mohd. Khalil bin Yaakob, P.S.M., S.S.A.P., S.I.M.P., D.S.A.P., J.S.M., S.M.P. (Kuantan)

“ Menteri Kebudayaan, Kesenian dan Pelancongan, Dato’ Abdul Kadir bin Haji Sheikh Fadzir, P.G.D.K., D.S.D.K., A.M.K. (Kulim-Bandar Baharu)

“ Menteri Sumber Manusia, Datuk Dr. Fong Chan Onn, D.M.S.M. (Selandar)

“ Menteri Perumahan dan Kerajaan Tempatan, Dato’ Ong Ka Ting, D.P.M.P. (Pontian)

- Yang Berhormat Menteri Pembangunan Usahawan, Datuk Mohamed Nazri bin Abdul Aziz, D.M.S.M., A.M.P., B.K.T. (Chenderoh)
- “ Menteri Pembangunan Luar Bandar, Dato’ Haji Azmi bin Khalid, D.P.M.P., S.M.P., P.J.K. (Padang Besar)
- “ Menteri Belia dan Sukan, Dato’ Hishammuddin bin Tun Hussein, D.S.A.P., D.P.M.J. (Tenggara)
- “ Menteri di Jabatan Perdana Menteri, Tan Sri Bernard Giluk Dompok (Kinabalu)
- “ Menteri di Jabatan Perdana Menteri, Dato’ Dr. Rais bin Yatim, D.S.N.S. (Jelebu)
- “ Menteri Pertanian, Datuk Effendi bin Norwawi (Kuala Rajang)
- “ Timbalan Yang di-Pertua, Dato’ Haji Muhamad bin Abdullah, D.I.M.P., S.M.P., P.J.K. (Maran)
- “ Timbalan Yang di-Pertua, Datuk Lim Si Cheng, P.I.S. (Senai)
- “ Timbalan Menteri Penerangan Dato’ Haji Mohd. Khalid bin Mohd. Yunus, D.S.N.S. (Jempol)
- “ Timbalan Menteri Luar Negeri, Datuk Dr. Leo Michael Toyad, P.G.D.K., J.B.S. (Mukah)
- “ Timbalan Menteri Kesihatan, Datuk Seri Drs. Suleiman bin Mohamed, S.S.S.A., D.P.M.S. (Titiwangsa)
- “ Timbalan Menteri Perumahan dan Kerajaan Tempatan, Datuk Peter Chin Fah Kui, P.G.B.K. (Miri)
- “ Timbalan Menteri Perdagangan Antarabangsa dan Industri, Dato’ Kerk Choo Ting, D.P.M.P. (Taiping)
- “ Timbalan Menteri Kewangan, Dato’ Chan Kong Choy, D.S.A.P., D.P.M.S. (Selayang)
- “ Timbalan Menteri Perdagangan Dalam Negeri dan Hal Ehwal Pengguna, Dato’ S. Subramaniam, D.P.M.J., D.S.N.S., S.M.J. (Segamat)
- “ Timbalan Menteri Pertahanan, Datuk Mohd. Shafie bin Haji Apdal, P.G.D.K. (Semporna)
- “ Timbalan Menteri di Jabatan Perdana Menteri Datuk Douglas Uggah Embas, P.G.B.K., P.B.S., A.B.S., A.M.N. (Betong)
- “ Timbalan Menteri Kewangan, Dato’ Dr. Haji Shafie bin Haji Mohd. Salleh, D.S.S.A., S.M.S., S.S.A., K.M.N. (Kuala Langat)
- “ Timbalan Menteri Dalam Negeri, Dato’ Chor Chee Heung, D.S.D.K., A.M.N., J.P. (Alor Setar)
- “ Timbalan Menteri Tenaga, Komunikasi dan Multimedia, Datuk Tan Chai Ho, P.J.N., K.M.N., A.M.N. (Bandar Tun Razak)
- “ Timbalan Menteri di Jabatan Perdana Menteri, Dato’ Hajah Shahrizat binti Abdul Jalil, D.I.M.P. (Lembah Pantai)
- “ Timbalan Menteri Pembangunan Luar Bandar, Dato’ G. Palanivel, D.S.S.A., S.S.A., P.J.K. (Hulu Selangor)
- “ Timbalan Menteri Belia dan Sukan, Datuk Ong Tee Keat, P.J.N., S.M.S. (Ampang Jaya)

- Yang Berhormat Timbalan Menteri Pengangkutan, Tan Sri Ramli bin Ngah Talib, P.C.M., S.P.C.M., A.M.N., J.P. (Pasir Salak)
- “ Timbalan Menteri Pertanian, Dato’ Seri Mohd. Shariff bin Haji Omar, D.G.P.N., D.M.P.N., P.P.T. (Tasek Gelugor)
- “ Timbalan Menteri Sains, Teknologi dan Alam Sekitar, Dato’ Zainal bin Dahalan, P.J.K., K.M.N., J.S.M., D.P.M.S. (Sabak Bernam)
- “ Timbalan Menteri Dalam Negeri, Dato’ Zainal Abidin bin Zin, D.P.M.P., P.M.P. (Bagan Serai)
- “ Mulia Timbalan Menteri di Jabatan Perdana Menteri, Tengku Dato’ Seri Azlan ibni Sultan Abu Bakar, S.P.T.J., D.S.A.S. (Jerantut)
- “ Timbalan Menteri Kerja Raya, Tuan Mohamed Khaled bin Haji Nordin P.I.S. (Johor Bahru)
- “ Timbalan Menteri Perusahaan Utama, Datuk Anifah Aman (Beaufort)
- “ Timbalan Menteri Tanah dan Pembangunan Koperasi, Dr. Tan Kee Kwong (Segambut)
- “ Timbalan Menteri Perpaduan Negara dan Pembangunan Masyarakat, Dr. Tiki anak Lafe (Mas Gading)
- “ Timbalan Menteri Kebudayaan, Kesenian dan Pelancongan, Dato’ Dr. Ng Yen Yen (Raub)
- “ Timbalan Menteri Sumber Manusia, Dr. Abdul Latiff bin Ahmad (Mersing)
- “ Timbalan Menteri Pendidikan, Dato’ Hon Choon Kim, D.S.N.S. (Seremban)
- “ Setiausaha Parlimen Kementerian Pertanian, Dato’ Abu Bakar bin Taib, D.S.D.K., S.D.K., B.C.K., K.M.N., P.J.K. (Langkawi)
- “ Setiausaha Parlimen Kementerian Dalam Negeri, Datuk Seri Abu Zahar bin Isnin, D.G.S.M., D.M.S.M., A.M.N. (Jasin)
- “ Setiausaha Parlimen di Jabatan Perdana Menteri, Puan Hajah Khamsiyah binti Yeop, P.P.T., A.M.N., A.M.P., P.M.P. (Gerik)
- “ Setiausaha Parlimen di Jabatan Perdana Menteri, Tuan Haji Noh bin Haji Omar, K.M.N., A.S.A., P.J.K., J.P. (Tanjong Karang)
- “ Setiausaha Parlimen Kementerian Pengangkutan, Tuan Ir. Donald Lim Siang Chai (Petaling Jaya Selatan)
- “ Setiausaha Parlimen Kementerian Kerja Raya, Tuan Yong Khoo Seng, K.M.N. (Stampin)
- “ Setiausaha Parlimen Kementerian Kewangan, Tuan Hashim bin Ismail, P.P.N., P.I.S. (Ledang)
- “ Setiausaha Parlimen Kementerian Tenaga, Komunikasi dan Multimedia, Tuan Chia Kwang Chye (Bukit Bendera)
- “ Setiausaha Parlimen Kementerian Perdagangan Dalam Negeri dan Hal Ehwal Pengguna Tuan Wong Kam Hoong, K.M.N. (Bayan Baru)
- “ Setiausaha Parlimen Kementerian Kesihatan, Tuan S.R. Anpalagan (Telok Kemang)
- “ Setiausaha Parlimen Kementerian Tanah dan Pembangunan Koperasi, Dr. Robia binti Dato’ Kosai (Muar)

- Yang Berhormat Setiausaha Parlimen Kementerian Perpaduan Negara dan Pembangunan Masyarakat, Tuan S. Veerasingam, P.M.P., A.M.P., A.M.N. (Tapah)
- “ Setiausaha Parlimen Kementerian Pembangunan Usahawan, Tuan Rizalman bin Abdullah, J.P. (Tenom)
- “ Setiausaha Parlimen Kementerian Pembangunan Luar Bandar, Puan Hajah Rohani binti Haji Abdul Karim, P.B.S., P.P.B., (Santubong)
- “ Setiausaha Parlimen Kementerian Pendidikan, Dato’ Mahadzir bin Mohd. Khir (Sungai Petani)
- “ Tuan A. Bakar bin Haji Othman (Jerlun)
- “ Tuan Haji Abdul Fatah bin Haji Haron, S.M.K. (Rantau Panjang)
- “ Tun Abdul Ghafar bin Baba, S.S.M. (Batu Berendam)
- “ Tuan Haji Abdul Hadi bin Haji Awang (Marang)
- “ Tuan Haji Abdul Hamid bin Abdul Rahman (Sungai Benut)
- “ Tan Sri Dato Seri Dr. Abdul Hamid Pawanteh, P.S.M., S.P.M.P. (Kangar)
- “ Dato’ Haji Abdul Kadir bin Annuar, S.P.M.J., K.M.N., P.I.S., B.S.I., A.M.N. (Pulai)
- “ Tuan Abd. Rahman bin Yusof (Kemaman)
- “ Tan Sri Datuk Patinggi Abdul Taib Mahmud, S.P.M.J., S.P.M.T., S.S.S.A, S.S.A.P., S.S.D.K., P.S.M., S.P.M.B., D.G.S.M., P.K.C, D.P. (Kota Samarahan)
- “ Dato’ Dr. Abdullah Fadzil bin Che Wan, D.P.C.M., P.C.M. (Bukit Gantang)
- “ Datuk Wira Abu Seman bin Haji Yusop, B.K.T., J.P., D.M.S.M., K.M.N., D.C.S.M. (Alor Gajah)
- “ Tuan Haji Ahmad Husni bin Mohd. Hanadzlah, P.P.T., A.M.P. (Tambun)
- “ Datuk Ahmad Zahid bin Hamidi, D.M.S.M., P.P.T., P.J.K. (Bagan Datoh)
- “ Raja Dato’ Ahmad Zainuddin bin Raja Haji Omar (Larut)
- “ Tuan Alexander Nanta Linggi, A.B.S. (Kapit)
- “ Tuan Alwi bin Jusoh (Pasir Puteh)
- “ Tuan Haji Amihamzah bin Ahmad (Lipis)
- “ Datu Amirkahar bin Tun Datu Haji Mustapha (Marudu)
- “ Tuan Haji Badrul Hisham bin Abdul Aziz, A.S.A. (Hulu Langat)
- “ Tuan Billy Abit Joo, K.M.N. (Hulu Rajang)
- “ Tuan Chang See Ten, P.I.S. (Gelang Patah)
- “ Tuan Haji Che Ghani bin Che Ambak, P.J.K. (Setiu)
- “ Puan Chew Mei Fun (Petaling Jaya Utara)
- “ Puan Chong Eng (Bukit Mertajam)
- “ Tuan Chow Kon Yeow (Tanjong)
- “ Dato’ Haji Fadzil bin Md. Noor, D.S.D.K. (Pendang)

Yang Berhormat Tuan Fong Kui Lun (Bukit Bintang)

- “ Puan Fong Po Kuan (Batu Gajah)
- “ Tuan Fu Ah Kiow (Mentakab)
- “ Tuan Goh Kheng Huat (Nibong Tebal)
- “ Dato Goh Siow Huat (Rasah)
- “ Dato’ Dr. Hasan bin Haji Mohamed Ali, D.I.M.P., S.M.S. (Parit Buntar)
- “ Tuan Hassan bin Mohamed (Besut)
- “ Tuan Henry Sum Agong, A.K. (Bukit Mas)
- “ Dato’ Hew See Tong, D.P.M.P., J.P. (Kampar)
- “ Tuan Ho Cheong Sing, P.M.P., A.M.N. (Ipoh Barat)
- “ Tuan Hoo Seong Chang (Kluang)
- “ Tuan Husam bin Haji Musa (Kubang Kerian)
- “ Tuan Haji Ismail bin Noh (Pasir Mas)
- “ Tuan Jacob Dungau Sagan, J.B.S., K.M.N., P.P.B. (Baram)
- “ Dato’ Dr. Haji Jamaludin bin Dato’ Mohd. Jarjis, D.I.M.P., (Rompin)
- “ Dr. James Dawos Mamit, P.P.B., P.P.S. (Mambong)
- “ Tuan Jawah anak Gerang (Lubok Antu)
- “ Tuan Jimmy Lim Donald (Sri Aman)
- “ Tuan Joseph Mauh anak Ikeh (Selangau)
- “ Datuk Seri Panglima Joseph Pairin Kitingan, P.G.D.K., P.N.B.S., S.S.A.P., S.P.D.K. (Keningau)
- “ Tuan Joseph Salang Anak Gandum (Julau)
- “ Tuan Juslie bin Ajirol (Libaran)
- “ Dato’ Kamarudin bin Jaffar, B.C.M, D.S.N.S. (Tumpat)
- “ Tuan Kerk Kim Hock (Kota Melaka)
- “ Tan Sri Dato Dr. K.S. Nijhar, P.S.M., S.P.M.J., J.M.N. (Subang)
- “ Tuan Kong Cho Ha (Lumut)
- “ Datuk Lau Ngan Siew, A.D.K., K.M.N., P.G.D.K. (Sandakan)
- “ Tuan Lee Kah Choon (Jelutong)
- “ Puan Lim Bee Kau, A.M.K., B.K.M., P.J.K. (Padang Serai)
- “ Tuan Lim Hock Seng (Bagan)
- “ Tuan Liow Tiong Lai, S.M.P. (Bentong)
- “ Dato’ Loke Yuen Yow, D.P.M.P., A.M.P. (Tanjong Malim)
- “ Tuan Mah Siew Keong (Teluk Intan)
- “ Tuan Haji Mahfuz bin Haji Omar (Pokok Sena)
- “ Puan Hajah Mastika Junaidah binti Husin (Arau)
- “ Tuan Haji Mat Basir bin Rahmat (Parit)
- “ Dr. Maximus Johnity Ongkili, A.S.D.K., J.P. (Bandau)

- Yang Berhormat Datuk Haji Mohamad bin Haji Aziz, P.N.J., S.M.J., K.M.N., P.I.S., B.S.I., A.M.N., P.P.N. (Sri Gading)
- “ Tuan Mohamad bin Sabu (Kuala Kedah)
- “ Tuan Mohamed Nasir bin Che Daud (Kuala Krai)
- “ Tuan Mohamed Sayuti bin Said, P.P.T., P.J.K., P.P.N. (Kuala Selangor)
- “ Datuk Haji Mohd. Ali bin Haji Hassan, P.J.N., S.M.J., K.M.N., P.I.S., A.M.N., P.P.N. (Tebrau)
- “ Tuan Mohd. Amar bin Abdullah (Pengkalan Chepa)
- “ Tuan Mohd. Apandi bin Haji Mohamad (Jeli)
- “ Datuk Seri Panglima Mohd. Salleh bin Tun Md. Said Keruak, P.G.D.K. (Kota Belud)
- “ Datuk Mohd. Sarit bin Haji Yusoh (Temerloh)
- “ Tuan Mohd. Yusoff bin Mohd. Nor, P.P.N., J.M.N. (Machang)
- “ Dato’ Mohd. Zain bin Omar, D.S.P.N., K.M.N., P.J.K, P.J.M. (Balik Pulau)
- “ Dato’ Ir. Mohd. Zin bin Mohamed, D.P.T.J., J.P. (Shah Alam)
- “ Tuan Moktar bin Radin, A.D.K., A.S.D.K. (Kinabatangan)
- “ Tuan M. Shukrimun bin Shamsudin (Kuala Nerus)
- “ Tuan Muhamad bin Mustafa (Peringat)
- “ Tuan Haji Muhyidin bin Haji Abd. Rashid (Hulu Terengganu)
- “ Tuan Mustafa bin Ali (Dungun)
- “ Datuk Napsiah binti Omar (Kuala Pilah)
- “ Tuan Nasharudin bin Mat Isa (Yan)
- “ Tuan Ng Lip Yong (Batu)
- “ Datuk Osu bin Sukam, S.P.D.K., P.G.D.K., D.A. (Papar)
- “ Datuk Peter Tinggom anak Kamarau, P.P.B., P.P.C., K.M.N., P.N.B.S., J.B.S., A.M.N., P.B.S. (Saratok)
- “ Tuan Philip Benedict Lasimbang, A.S.D.K. (Penampang)
- “ Puan P. Komala Devi, P.P.T. (Kapar)
- “ Datuk Railey bin Haji Jeffrey, P.G.D.K., J.M.N. (Silam)
- “ Tuan Ramli bin Ibrahim (Kota Bharu)
- “ Mulia Tengku Tan Sri Razaleigh Hamzah, D.K., P.S.M., S.P.M.K., S.S.A.P., S.P.M.S. (Gua Musang)
- “ Tuan Richard Riot anak Jaem (Serian)
- “ Tuan Robert Lau Hoi Chew, J.B.S. (Sibu)
- “ Tuan Ronald Kiandee, A.S.D.K. (Beluran)
- “ Datuk Ruhanie bin Haji Ahmad, D.M.S.M., P.I.S. (Parit Sulong)
- “ Tuan Saupi bin Daud (Tanah Merah)
- “ Datin Paduka Hajah Seripah Noli binti Syed Hussin, D.S.S.A. (Sepang)

Yang Berhormat Dato' Shahnnon bin Ahmad, D.S.D.K., K.M.N. (Sik)

- “ Tuan Shaziman bin Abu Mansor, A.N.S. (Tampin)
- “ Tuan Shim Paw Fatt, J.P. (Tawau)
- “ Tuan Haji Siam bin Haji Kasrin, K.M.N., P.I.S. (Batu Pahat)
- “ Datuk Song Swee Guan, P.G.B.S. (Bandar Kuching)
- “ Dato' Suhaili bin Abdul Rahman, D.I.M.P., A.S.D.K. (Labuan)
- “ Puan Sukinam Domo (Batang Sadong)
- “ Datuk Seri Amar Dr. Haji Sulaiman bin Haji Daud, S.I.M.P., D.A., D.S.S.A., P.N.B.S., J.B.S. (Petra Jaya)
- “ Dr. Syed Azman bin Syed Ahmad Nawawi (Kuala Terengganu)
- “ Tuan Taib Azamudden bin Md. Taib, J.B.S., A.M.N. (Baling)
- “ Tuan Tan Kok Wai (Cheras)
- “ Dr. Tan Seng Giaw (Kepong)
- “ Datin Paduka Dr. Tan Yee Kewangan, D.S.S.A. (Kelang)
- “ Puan Teresa Kok Suh Sim (Seputeh)
- “ Tuan Thong Fah Chong (Ipoh Timur)
- “ Dato' Dr. Ting Chew Peh, D.P.M.S., D.P.M.P. (Gopeng)
- “ Dato' Tiong King Sing, D.S.S.A., J.P. (Bintulu)
- “ Dato' Tiong Thai King, (Lanang)
- “ Datin Seri Dr. Wan Azizah Wan Ismail (Permatang Pauh)
- “ Tuan Haji Wan Junaidi bin Tuanku Jaafar, J.B.S., P.B.S. (Batang Lupar)
- “ Tuan Wan Nik bin Wan Yussof (Bachok)
- “ Tuan Wilfred Madius Tangau, J.P., A.D.K. (Tuaran)
- “ Dato' Yap Pian Hon, D.P.M.S., A.M.N., P.J.K. (Serdang)
- “ Dr. Yee Moh Chai (Tanjong Aru)
- “ Datuk Yong Teck Lee, P.G.D.K., P.J.N. (Gaya)
- “ Datuk Dr. Haji Yusof bin Haji Yacob, P.G.D.K., A.D.K. (Sipitang)
- “ Datin Paduka Hajah Zaleha binti Ismail, D.P.M.S., S.M.S, K.M.N (Gombak)
- “ Tuan Zawawi bin Haji Ahmad (Padang Terap)
- “ Dato' Zulhasnan bin Rafique, D.I.M.P., A.M.N. (Wangsa Maju)

MENTERI/TIMBALAN MENTERI (SENATOR)

- Yang Berhormat Menteri di Jabatan Perdana Menteri, Dato' Paduka Dr. Haji Abdul Hamid bin Haji Othman, D.H.M.S., S.I.M.P., D.S.D.K., J.S.M., K.M.N., P.P.T
- “ Menteri Tanah dan Pembangunan Koperasi, Tan Sri Datuk Kasitah Gaddam, P.S.M., P.G.D.K., J.S.M.
- “ Menteri di Jabatan Perdana Menteri, Datuk Pandikar Amin Haji Mulia
- “ Menteri Pendidikan, Tan Sri Dato' Musa bin Mohamad, P.S.M., D.P.M.N., D.P.C.M. (Senator)
- “ Timbalan Menteri Pendidikan, Datuk Abdul Aziz bin Shamsuddin

DEWAN RAKYAT**PEGAWAI-PEGAWAI KANAN*****Setiausaha Dewan Rakyat***

Datuk Mohd. Salleh bin Haji Hassan

Ketua Penolong Setiausaha

Zamani bin Haji Sulaiman
Haji Mustakin bin Selamat
Shahrom bin Haji Hasan

Penolong Setiausaha

Haji Mustafa bin Abdul Rahman
Ruhana binti Abdullah
Riduan bin Rahmat

BENTARA MESYUARAT

Mejar (B) Abdul Halim bin Haji Ali
Mejar (B) Zakaria bin Salleh
Mejar (B) Kamaruddin bin Abdullah

PETUGAS-PETUGAS CAWANGAN DOKUMENTASI

Azhari bin Hamzah
Monarita binti Mohd. Hassan
Hajah Shamsiah binti Mohd. Yusop
Mohd Saleh bin Mohd. Yusop
Mohamed bin Osman
Hajah Norishah binti Mohd. Thani
Shamsina binti Janor
Ramlah binti Mohd. Yusuff
Jamilah Intan binti Haji Bohari
Khairul Azi la binti Haji Khairuddin
Nurziana binti Ismail
Noor Effarizan binti Mat Satib
Taharah binti Mohamed
Nik Elyana binti Ahyat
Mashitah binti Kamaruddin
Abu Bakar bin Hasan
Alias bin Md. Nor

PETUGAS-PETUGAS CAWANGAN MESIN CETAK

Kamal bin Oyub
Haji Latif bin Ismail
Kamaroddin bin Mohd. Yusof

MALAYSIA
DEWAN RAKYAT
Rabu, 8 Mac 2000

Mesyuarat dimulakan pada pukul 10.00 pagi

DOA

[Tuan Yang di-Pertua *mempengerusikan Mesyuarat*]

JAWAPAN-JAWAPAN LISAN BAGI PERTANYAAN-PERTANYAAN

1. **Dato' Goh Siow Huat [Rasah]** minta Menteri Perpaduan Negara dan Pembangunan Masyarakat menyatakan apakah tindakan kerajaan untuk mengatasi masalah sosial di kalangan bekas pesakit psikiatrik yang telah diberi rawatan di hospital dan memperolehi pelepasan (*discharge*), tidak dapat penjagaan yang sempurna daripada ahli keluarga dan didapati merayau-rayau ke merata tempat dan mengganggu ketenteraman orang awam.

Setiausaha Parlimen Kementerian Perpaduan Negara dan Pembangunan Masyarakat [Tuan S. Veerasingam]: Tuan Yang di-Pertua, untuk makluman Ahli Yang Berhormat, Kementerian Perpaduan Negara dan Pembangunan Masyarakat Malaysia melalui Jabatan Kebajikan Malaysia sentiasa prihatin terhadap masalah sosial yang berlaku di negara ini. Namun demikian, masalah sosial di kalangan bekas pesakit psikiatrik yang dikatakan semakin meningkat sejak kebelakangan ini adalah merupakan satu fenomena sosial yang perlu ditangani bersama oleh semua pihak secara lebih profesional seperti Majlis Kesihatan Mental Malaysia, Jabatan Psikiatrik, Kementerian Kesihatan, badan-badan bukan kerajaan, ahli-ahli masyarakat dan ibu bapa.

Pada masa ini, kementerian melalui Jabatan Kebajikan Masyarakat Malaysia membantu Kementerian Kesihatan menangani masalah ini melalui program dan aktiviti pemulihan yang terdapat di pusat harian Bukit Tunku, Jalan Sheih, Kuala Lumpur sebagai rumah perantaraan bekas pesakit otak/jiwa Wilayah Persekutuan. Sebagai usaha pencegahan, pelbagai aktiviti dan program yang dijalankan melalui program Kemantapan Keluarga dan Gerakan Keluarga Bahagia bagi mengeratkan lagi hubungan kekeluargaan dan sekaligus dapat mengurangkan tekanan bekas pesakit psikiatrik ini.

Sehubungan ini, usaha yang dijalankan ini sewajarnya dilihat sebagai tanggungjawab sosial bersama di antara agensi-agensi kerajaan dan bukan kerajaan. Oleh itu, kementerian sentiasa mengalu-alukan penglibatan orang ramai dan badan-badan bukan kerajaan, mempertingkatkan aktiviti bagi menangani masalah ini. Kementerian juga sering mengadakan operasi bersepadu dengan agensi-agensi kerajaan yang lain bagi menangani masalah orang papa, kutu rayau yang berkeliaran tanpa pengawasan ibu bapa, ahli keluarga mengikut Akta Orang Papa 1977.

Tuan Wan Nik bin Wan Yussof: Terima kasih, Tuan Yang di-Pertua. Mengenai pesakit psikiatrik ini, adakah pihak kerajaan sedar bahawa pakar-pakar psikiatrik yang ada di negara kita yang bertugas di hospital-hospital kerajaan khususnya, mempunyai kepakaran yang tinggi ataupun kemahiran untuk menangani isu-isu pesakit psikiatrik ini. Tetapi, adakah kerajaan sedar pesakit psikiatrik yang telahpun mengalami proses perawatan (*discharged*) daripada wad-wad hospital ini, selepas daripada itu didapati merayau-rayau dan tidak dinafikan juga ia melibatkan ketenteraman awam, sampai ke satu peringkat mereka ini sanggup berbogel di khalayak ramai, dengan izin. Oleh kerana itu, langkah yang sedemikian, saya rasa pihak psikiatrik sendiri perlulah mengambil satu pendekatan yang terbaik bagi mengatasi *stress* yang semakin meningkat dalam negara yang serba maju ini. Sekian, terima kasih.

Tuan S. Veerasingam: Tuan Yang di-Pertua, saya memang bersetuju dengan Yang Berhormat. Di Hospital Bahagia dan lain-lain buat masa ini apabila pesakit psikiatrik apabila mereka *discharged*, dengan izin, mereka dibawa ke rumah keluarga atau kepada ibu bapa. Kalau mereka tidak diterima, hospital-hospital sekarang bawa mereka balik ke hospital seperti Hospital Tanjung Rambutan dan lain-lain tempat di mana mereka dibenarkan tinggal dan bercucuk tanam di kawasan itu dan juga membantu pesakit-pesakit lain. Tetapi yang keluarga terima, mereka dibenarkan pulang dan jika ada orang yang merayau-rayau, apabila kementerian saya dengan agensi lain mengambil tindakan, mereka dibawa ke Desa Bina Diri di Mersing, mereka ditempatkan di sana. Tetapi saya memang sedar masalah sedang berlaku juga dan kita perlu bantuan daripada banyak pihak termasuklah NGO-NGO supaya mereka dapat membantu kita. Kementerian saya bersedia untuk memberi peruntukan ataupun lain-lain untuk menangani masalah ini. Terima kasih.

Dato' Goh Siow Huat: Terima kasih, Tuan Yang di-Pertua. Soalan tambahan. Saya ingin merujuk kepada kes membunuh diri seorang pesakit psikiatrik yang telah terjun dari atap bangunan yang berlaku di negeri Pulau Pinang pada 8 Februari dan wabak ini telah mengambil masa tiga jam mengikut siaran surat khabar. Tetapi tiada langkah-langkah menyelamat pesakit ini seperti memasang jaring atau meletakkan tilam di kawasan luar bangunan itu. Jadi, soalan saya apakah unit atau pasukan yang sebenarnya bertanggungjawab untuk menyelamatkan pesakit psikiatrik ini?

Tuan S. Veerasingam: Jika ada masalah-masalah seperti ini beberapa kementerian terlibat khususnya macam Kementerian Perumahan dan Kerajaan Tempatan apabila ada bangunan-bangunan tinggi. Jadi, apakah tindakan-tindakan yang perlu diambil untuk menjaga keselamatan, bukan sahaja orang-orang pesakit jiwa, ada juga kadangkala antara keluarga ada pergaduhan, pada masa itu sahaja ada orang terjun daripada bangunan-bangunan tinggi. Jadi, apabila kita ada bangunan-bangunan yang tinggi seperti ini kita akan mengadakan undang-undang supaya ianya selamat bagi penduduk-penduduk atau yang tinggal dalam bangunan-bangunan tinggi seperti ini.

2. **Tuan Ronald Kiandee [Beluran]** minta Menteri Pertanian menyatakan jumlah pengeluaran beras negara berbanding dengan import bahan berkenaan sejak 1990. Apakah usaha kementerian untuk meningkatkan pengeluaran beras bagi mengurangkan import di masa akan datang.

Timbalan Menteri Pertanian [Dato' Seri Mohd. Shariff bin Haji Omar]: Tuan Yang di-Pertua, jumlah pengeluaran beras negara berbanding dengan import bahan berkenaan bagi tahun 1990 sehingga 1999 adalah seperti berikut:

Tahun	Pengeluaran (juta tan metrik)	Import (tan metrik)
1990	1.2	330,000
1991	1.24	404,292
1992	1.29	452,167
1993	1.35	359,949
1994	1.378	343,481
1995	1.372	437,248
1996	1.438	561,983
1997	1.367	644,155
1998	1.256	650,024
1999	1.470	614,046

Sebagaimana Yang Berhormat sedia maklum sasaran taraf sara diri beras negara adalah sekurang-kurangnya 65% menjelang tahun 2010. Selaras dengan dasar ini kementerian akan terus menggalakkan penanaman padi secara berskala besar dan komersial di samping memohon kerjasama kerajaan-kerajaan negeri untuk menggazetkan kawasan-kawasan jelapang-jelapang padi utama sebagai zon pengeluaran padi yang kekal. Pada masa yang sama usaha-usaha akan dipergiatkan lagi untuk meningkatkan kecekapan dan keberkesanan pengurusan kawasan-kawasan

tersebut menerusi pelaksanaan projek-projek kelompok, mini estet dan estet serta penyediaan khidmat sokongan terutamanya dalam bidang penyelidikan dan pembangunan ke atas *variety* padi yang bermutu tinggi dan teknologi terkini.

Kementerian juga menggalakkan pihak swasta termasuk usahawan tani untuk terlibat dalam pengeluaran padi secara besar-besaran di kawasan-kawasan yang sesuai terutamanya di Sabah dan Sarawak. Bagi tujuan ini, selain daripada kemudahan-kemudahan infrastruktur kerajaan akan menyediakan insentif-insentif yang sesuai.

Tuan Ronald Kiandee: Terima kasih dengan jawapan dari Timbalan Menteri yang berkenaan. Soalan saya sejauh mana penglibatan pihak swasta dalam penanaman padi setakat ini?

Dato' Seri Mohd. Shariff bin Haji Omar: Tuan Yang di-Pertua, penglibatan pihak swasta belum lagi memberangsangkan. Walau bagaimanapun, sekarang ini terdapat pihak swasta terutama nya di negeri Sarawak yang akan membangunkan tanah di Sarawak untuk tujuan penanaman padi secara berskala besar. Kementerian memang menggalakkan penyertaan pihak swasta. Adalah diharapkan lebih banyak lagi pihak swasta yang akan melibatkan syarikat mereka dalam pengeluaran padi secara besar-besaran bagi menambahkan lagi pengeluaran padi dalam negara kita.

Tuan Hassan bin Mohamed: Soalan tambahan. Apakah pihak kerajaan berhasrat untuk menaikkan subsidi padi sebagaimana yang telah diisytiharkan oleh Kerajaan Negeri Terengganu?

Dato' Seri Mohd. Shariff bin Haji Omar: Tuan Yang di-Pertua, pada masa sekarang subsidi harga padi yang diberikan pada petani-petani adalah melebihi 45% daripada harga padi. Pihak kementerian pada masa sekarang belum berhasrat untuk menaikkan subsidi harga padi, kerana peningkatan subsidi harga padi ini bukan bermakna pengeluaran padi itu akan bertambah. Peningkatan subsidi harga padi tidak bererti padi dalam negara kita akan bertambah. Bukan bermakna bila kita tambah subsidi harga padi ini bererti pengeluaran padi itu akan bertambah. Sebenarnya kita akan melibatkan kos yang tinggi, mungkin akan menyebabkan harga beras akan naik. Buat masa sekarang kerajaan masih lagi kekal dengan skim harga padi yang berjalan sekarang. Belum ada cadangan untuk dinaikkan subsidi harga padi.

3. **Tuan Mohd. Yusoff bin Mohd. Nor [Machang]** minta Perdana Menteri menyatakan apakah nisbah pemegang-pemegang jawatan Hakim Mahkamah Agung, Mahkamah Tinggi yang ada sekarang dari segi kaum.

Setiausaha Parlimen di Jabatan Perdana Menteri [Tuan Haji Noh bin Haji Omar]: Tuan Yang di-Pertua, nisbah pemegang-pemegang jawatan Hakim Mahkamah Persekutuan, Mahkamah Rayuan dan Mahkamah Tinggi di seluruh dunia sekarang ini adalah seperti berikut:

<i>Mahkamah</i>	<i>Melayu</i>	<i>Cina</i>	<i>India</i>	<i>Lain-lain</i>
Mahkamah Persekutuan – (termasuk Ketua Hakim Negara, Presiden Mahkamah Rayuan, Hakim Besar Malaya, Hakim Besar Sabah dan Sarawak)	6	1		
Mahkamah Rayuan – (Hakim-hakim)	5	10	1	Sik – 1 Kadazan - 1
Mahkamah Tinggi Malaya, Sabah dan Sarawak – (Hakim- hakim)	32			
Mahkamah Tinggi – (Pesuruhjaya Kehakiman)	4			

Sekian, terima kasih.

Puan Fong Po Kuan: Soalan tambahan. Saya ingin tahu, apakah kerajaan mempunyai cadangan untuk meminda Perkara 122B, Perlembagaan, agar perlantikan hakim-hakim tertinggi di negara kita ini adalah tidak di atas nasihat Perdana Menteri untuk menunjukkan bahawa kehakiman ini adalah adil dan bebas daripada pengaruh politik?

Tuan Haji Noh bin Haji Omar: Tuan Yang di-Pertua, inilah isu yang selalu dimainkan oleh parti-parti pembangkang. Apabila keputusan-keputusan mahkamah dibuat, jika tidak menyebelahi pihak mereka, mereka kata mahkamah tidak adil. Kalau mungkin bila mereka menang baru dia kata adil. Jadi, Tuan Yang di-Pertua, yang bertanya ini seorang peguam, saya hendak minta supaya Yang Berhormat dan ahli-ahli pembangkang khususnya supaya betul-betul memahami sistem perlembagaan di negara kita.

Malaysia mengamalkan sistem kerajaan yang mempunyai tiga badan berasingan iaitu *legislative executive* dan juga *judiciary* atau kehakiman. Ketiga-tiga badan ini adalah bebas di antara satu dengan lain di dalam melaksanakan tugas dan fungsi masing-masing. Sehingga hari ini badan kehakiman telah dapat melaksanakan tugas dan fungsinya dengan bebas dan saksama tanpa pengaruh dari mana-mana pihak luaran. Sistem mahkamah yang berperingkat-peringkat di negara ini iaitu Mahkamah Rendah, Mahkamah Tinggi, Mahkamah Rayuan dan Mahkamah Persekutuan membolehkan mana-mana pihak yang tidak berpuas hati dengan sesuatu keputusan kehakiman yang dibuat oleh sesuatu mahkamah merayu kepada mahkamah yang lebih atas. Dengan sistem ini adalah susah dan tidak berkesan sekiranya ada pihak luaran yang bercadang untuk mempengaruhi atau campur tangan di dalam proses tersebut.

Sebagai contoh, kalau satu-satu keputusan dibuat oleh Mahkamah Tinggi, hakimnya seorang. Kemudian, tidak puas hati dengan keputusan Mahkamah Tinggi, boleh rayu pula di Mahkamah Rayuan, hakimnya sekurang-kurangnya tiga – sudah empat hakim mendengar satu kes. Tidak puas hati lagi dengan keputusan Mahkamah Rayuan, dia boleh merayu pula kepada Mahkamah Persekutuan – sekurang-kurangnya tiga lagi hakim akan dengar. Jadi, satu-satu kes ini kalau tidak puas hati minimum tujuh hakim boleh dengar, mana ada ruang kita hendak boleh mempengaruhi ketiga sampai tujuh orang hakim. Di samping itu juga, pihak yang dituduh bebas hendak melantik sepuluh *lawyer*kah, dua puluh *lawyer*kah, *lawyer* yang hebat-hebatkah, boleh lantik. Jadi...[*Disampuk*] Ya? Ha, termasuk Yang Berhormatlah kalau hendak jadi...[*Ketawa*] Dulu daripada Karpal Singh. Jadi, ertinya saya hendak beritahu pembangkang jangan mainkan isu ini, isu yang boleh menyebabkan rakyat marah dengan kerajaan semata-mata mungkin orang ramai tidak berapa faham mengenai proses prosedur rayuan di mahkamah-mahkamah ini. Jadi, kalau hendak sebut adil, sudah tentulah, yang menang dia kata adil, yang kalah dia kata tidak adil. Kadang-kadang dalam kes mahkamah orang buat salah pun boleh lepas, jadi yang buat salah lepas dia kata adil, yang mana tak salah, bila dia dibebaskan maka adillah bagi mereka. Jadi, adil ini *very subjective*. Terima kasih. [*Tepuk*]

Tuan Mohd. Yusoff bin Mohd. Nor: Tuan Yang di-Pertua,

Dato' Dr. Haji Jamaludin bin Dato' Mohd. Jarjis: Machang, bagi boslah.
[*Ketawa*]

Tuan Mohd. Yusoff bin Mohd. Nor: Tuan Yang di-Pertua.....

Tuan Yang di-Pertua: Yang Berhormat, ini soalan dia, Yang Berhormat.

Tuan Mohd. Yusoff bin Mohd. Nor: Apa yang disebutkan oleh Setiausaha Parlimen tadi, memang pada teori memang betul, mungkin betul-tetapi masalahnya apa yang timbul sekarang ialah masalah pandangan orang ramai terhadap kehakiman sekarang. [*Tepuk*] Pada, apabila Perlembagaan mula-mula digubalkan, sebenarnya perlantikan kehakiman ini terserah kepada Ketua Hakim Negara, kemudian pada satu ketika diubah supaya Perdana Menteri dapat menamakan sesiapa dia hakim-hakim. Ini

yang jadi masalah sekarang. Jadi, saya rasa itulah yang ...kalau boleh...[*Disampuk*] kalau boleh, Perlembagaan asal itu dipraktikkan balik dan supaya orang ramai tidak merasa bahawa kehakiman ini telah boleh dicampur tangan oleh orang-orang politik. Itu sahaja. Saya minta penjelasan daripada Setiausaha Parlimen.

Tuan Haji Noh bin Haji Omar: Tuan Yang di-Pertua, dia kata teori dan praktikal. Yang Berhormat ini mempraktikkan undang-undangkah? Yang kata, yang tahu praktikal ini hakim. Yang Berhormat bukan hakim, mana Yang Berhormat tahu dia pengaruhi tidak. Inilah yang bahaya. Bahaya pembangkang ini dia mendengar *hearsay evidence*. Dengar cerita-cerita tu kemudian hebahkan kepada rakyat. Yang Berhormat hakimkah? Saya dah kata dah tadi. Jadi, masalahnya hari ini Yang Berhormat, Yang Berhormat kata teori dan praktikal. Kita teori tetapi yang praktisnya hakim-hakim. Jadi, saya ingat tidak adil kalau Yang Berhormat cuba mengambil tugas hakim seolah-olah Yang Berhormat tahu bahawa hakim ini sebelum membuat satu-satu keputusan, dia ini dipengaruhi oleh pihak-pihak tertentu. Sebenarnya saya telah nyatakan tadi, ada banyak peringkat yang kita boleh buat seperti kes-kes yang sedang kita dengar.

Tuan Yang di-Pertua, kadang-kadang pembangkang ini dia cakap suruh demokrasi tetapi dia pun kadang-kadang tidak demokrasi. Dia dulu dok sokong sangat Amerika, saya hendak beritahu dia Amerika...

Tuan Haji Mahfuz bin Haji Omar: [*Menyampuk*]

Tuan Haji Noh bin Haji Omar:Presiden Amerika boleh melantik hakim. [*Disorak*] Tak, saya hendak ambil satu contoh.

Beberapa Ahli: Jawab, jawab.

Tuan Haji Noh bin Haji Omar: Saya dah jawab.

Tuan Haji Mahfuz bin Haji Omar: Jawab tak betui.

Tuan Haji Noh bin Haji Omar: Jadi, Tuan Yang di-Pertua...

Tuan Haji Mahfuz bin Haji Omar: Ini bukan *standard* Setiausaha Parlimen

...

Tuan Haji Noh bin Haji Omar: Tuan Yang di-Pertua,

Tuan Yang di-Pertua: Minta Yang Berhormat Pokok Sena, duduk. Ya, cukuplah, cukuplah.

Beberapa Ahli: [*Menyampuk*]

Tuan Haji Noh bin Haji Omar: Tuan Yang di-Pertua, saya hendak nyatakan, ini yang masalah, pemasalah dengan pembangkang. Dia hendak dengar cakap dia, bila kita cakap dia tak mahu dengar. Inikah yang dikatakan demokrasi. [*Tepuk*] Kalau betul-betul, dengarlah!

Tuan Yang di-Pertua: Cukuplah, cukuplah.

Tuan Haji Noh bin Haji Omar: Dengar saya jawab!

Tuan Yang di-Pertua: Yang Berhormat...

Tuan Haji Noh bin Haji Omar: Jadi Tuan Yang di-Pertua, hakim-hakim Mahkamah Tinggi, Mahkamah Rayuan dan juga Mahkamah Persekutuan dilantik oleh Yang di-Pertuan Agong yang bertindak di atas nasihat Perdana Menteri selepas berunding Majlis Raja-Raja seperti yang telah diperuntukkan di bawah Article 122(b) Perlembagaan Persekutuan. Manakala perlantikan Pesuruhajaya Kehakiman pula adalah dibuat oleh Yang di-Pertuan Agong yang bertindak di atas nasihat Perdana Menteri selepas berunding dengan Ketua Hakim Negara. Di dalam memberi nasihat berkenaan, Perdana Menteri pula akan berunding dengan Ketua Hakim Negara mengikut Article 122(b)(ii) Perlembagaan Persekutuan.

4. **Puan Chew Mei Fun [Petaling Jaya Utara]** minta Menteri Perumahan dan Kerajaan Tempatan menyatakan:-

- (a) apakah rancangan kerajaan dalam memperbaiki kelemahan prestasi Alam Flora yang menggantikan tanggungjawab kerajaan daerah dan perbandaran di Kuala Lumpur, Selangor, Pahang, Trengganu dan Kelantan mengutip sampah sarap serta membentuk kawasan penghijauan; dan
- (b) memandangkan status Alam Flora masih memegang peranan sementara sebelum projek pengutipan sampah sarap diswastakan (*Interim takeover, prior to privatization of solid waste*), maka sampai bilakah status sementara Alam Flora akan berakhir.

Timbalan Menteri Perumahan dan Kerajaan Tempatan [Datuk Peter Chin Fah Kui]: Tuan Yang di-Pertua, untuk jawab;

- (a) pada masa ini Alam Flora melaksanakan pengambil-alihan secara *interim* pengurusan sisa pepejal di Kuala Lumpur, di pihak berkuasa tempatan di Selangor dan juga di negeri Pahang. Bagi meningkatkan prestasi Alam Flora kerajaan telah meminta pihak berkuasa tempatan terlibat menubuhkan unit kawal selia untuk memastikan Alam Flora memberikan perkhidmatan pada tahap prestasi yang ditetapkan. Di samping itu, kementerian ini, kerajaan negeri dan juga pihak berkuasa tempatan berkenaan mengadakan mesyuarat dari masa ke semasa dengan pihak Alam Flora untuk memantau perkhidmatan yang diberikan.
- (b) Pelaksanaan secara *interim* pengurusan sisa pepejal oleh Alam Flora bertujuan supaya pihak konsortium dapat membuat persediaan seperti mengumpulkan maklumat berkaitan perkhidmatan yang diberikan, mengenal pasti kawasan operasi dan membuat perancangan sebelum penswastaaan dilaksanakan kelak. Di samping itu, kerajaan sedang mengkaji beberapa isu yang berkaitan dengan penswastaaan seperti perundangan, penyediaan perjanjian konsesi dan struktur tariff yang akan dikenakan. Kerajaan akan melaksanakan penswastaaan sebenar selepas perkara-perkara ini diselesaikan nanti.

Puan Chew Mei Fun: Terima kasih, Tuan Yang di-Pertua. Soalan tambahan. Adakah kerajaan sedar bahawa apabila kami membuat aduan kepada Alam Flora, alasan yang selalu kami terima adalah itu bukan tugas Alam Flora. Kerja itu boleh dijalankan sekiranya kerajaan bayar. Misalnya, mereka hanya mengutip sampah di dalam tong sampah dan sampah di luar tong adalah kerja Jabatan Kesihatan. Mereka juga hanya mengutip sampah di tong sampah taman rekreasi manakala sampah di dalam taman rekreasi adalah kerja jabatan taman rekreasi. Oleh itu, saya ingin meminta penjelasan dari Yang Berhormat Timbalan Menteri adakah alasan tersebut yang diberi oleh mereka adalah betul dan apakah peranan Alam Flora. Selain daripada itu, adakah Alam Flora di bawah pemerintahan kerajaan tempatan peringkat negeri atau kementerian? Terima kasih.

Datuk Peter Chin Fah Kui: Ya, terima kasih Yang Berhormat. Beginilah. Secara umumnya perkhidmatan pihak Alam Flora dari segi kutipan sisa pepejal dan kerja-kerja operasi tapak pelupusan adalah memuaskan tetapi memang ada aduan-aduan yang disebutkan oleh Ahli Yang Berhormat tadi dan tidak dapat diselesaikan atas sebab-sebab yang berkenaan seperti pekerja-pekerja yang terlibat dalam hari itu dan kecuaiannya sesuatu pekerja dan sebagainya. Ini kita akui, kalau ada aduan macam ini yang tidak dipedulikan oleh Alam Flora, saya minta Yang Berhormat hubungi

dengan pihak kementerian atau saya sendiri pun boleh, supaya kes-kes ini kita boleh ambil tindakan terhadap pekerja-pekerja yang berkenaan tetapi keseluruhannya kita rasa pihak pekerja...pres tasi kutipan itu adalah - baiklah dan tidak banyak aduan-aduan seperti *standard*nya dan sebagainya tidak memuaskan. Itu saya rasa kita dapat terjaminlah.

Mengenai macam mana atau cara mana kita hendak mempertingkatkan lagi prestasi ini, saya rasa itu juga adalah berkaitan dengan pihak-pihak penduduk setempat. Kalau pihak-pihak setempat ini dapat memberikan maklum balas yang lebih terperinci dan selalunya dibuatkan, saya rasa ini kita boleh ambil tindakan yang ketat dan memantau dengan lebih berkesan, maka pihak Alam Floralah akan menaikkan prestasi kerja mereka.

Tuan Chang See Ten: Terima kasih, Tuan Yang di-Pertua. Soalan tambahan. Saya ingin mendapat penjelasan daripada Yang Berhormat Datuk Timbalan Menteri tentang memandangkan banyak masalah-masalah timbul oleh kerana pihak kerajaan menswastakan pembedungan dijalankan oleh IWK dan sekarang kerajaan terpaksa ambil balik fungsi IWK, adakah pihak kementerian tidak akan memperkenalkan Akta Pelupusan Sisa Pepejal supaya fungsi ini dapat terus dijalankan oleh pihak berkuasa tempatan kerana ini adalah memang fungsi utama untuk menjalankan kerja-kerja kebersihan dan pembedungan terutama kerja mengangkat sampah-sarap sejak pihak berkuasa tempatan diwujudkan masa negara kita ini menggunakan '*Town Board Enactment*' sejak tahun 50-an. Sekian, terima kasih.

Datuk Peter Chin Fah Kui: Tuan Yang di-Pertua, adalah dua masalah yang berkaitan..yang diuraikan oleh Yang Berhormat berkaitan, satu, pembedungan. Untuk makluman Ahli Yang Berhormat pihak kerajaan tidak ambil alih kerja pembedungan. Hanya kita hendak bincang dengan pihak IWK untuk mengambil alih saham-saham yang diperolehi oleh pihak-pihak yang berkenaan dalam IWK. Ini bermakna IWK masih wujud dan hanya pemegang saham itu adalah lain dan bagi undang-undang mengenai pengurusan sisa pepejal, ini sedang disemak oleh pihak Jabatan Peguam Negara dan apabila akta ini disediakan kita akan membentangkan kepada Parlimen ini untuk dibahaskan oleh Ahli-ahli Yang Berhormat dan kita bolehlah apabila akta ini dibahaskan di dalam Dewan ini saya rasa semua ahli-ahli boleh ambil bahagian dan membuat pandangan yang tegas kepada akta tersebut, macam mana kita boleh menjalankan tugas-tugas untuk mengutipkan sisa-sisa pepejal dan lain-lain kerja berkenaan dengan lebih baik dan lebih berkesan.

[Soalan No. 5 - Datuk Song Swee Guan (Bandar Kuching) tidak hadir]

6. **Tuan Ramli bin Ibrahim [Kota Bharu]** minta Menteri Tenaga, Komunikasi dan Multimedia menyatakan kenapa perlunya kerajaan melantik firma perunding (Booz-Hamilton) dari Amerika Syarikat untuk mengkaji pelaksanaan Akta Komunikasi dan Multimedia sedangkan kita mempunyai firma tempatan. Berapakah kos pembiayaannya kepada firma tersebut bagi penyelidikan jangka pendek dengan skop penyelidikan yang terbatas itu.

Setiausaha Parlimen Kementerian Tenaga, Komunikasi dan Multimedia [Tuan Chia Kwang Chye]: Tuan Yang di-Pertua, untuk makluman Yang Berhormat, kementerian telah mendapatkan kebenaran Perbendaharaan untuk melantik Syarikat Booz Allan dan Hamilton Malaysia Sdn. Bhd. bagi menjalankan kajian strategi pelaksanaan pembangunan industri komunikasi dan multimedia. Pemilihan ini adalah berdasarkan atas sebab-sebab kepakaran mereka dalam bidang komunikasi dan multimedia, tempoh masa untuk menyiapkan kajian yang pendek – iaitu selama tiga bulan tempohnya bermula 1 September hingga 31 Disember 1999 dan nilai kos kajian yang berpatutan iaitu sebanyak RM1.2 juta. Selain itu juga, syarikat ini mempunyai pejabat tempatannya di Kuala Lumpur. Sekian, terima kasih.

Tuan Ramli bin Ibrahim: Tuan Yang di-Pertua, terima kasih atas jawapan tersebut. Kita dengar banyak ucapan-ucapan yang dibuat oleh pihak kerajaan mengatakan pihak pembangkang yang selalu diperalatkan oleh kuasa-kuasa asing.

Apakah tidak dengan perlantikan firma asing sebagai konsultan dalam pelaksanaan undang-undang komunikasi seperti ini, boleh dianggap sebagai kerajaan diperalatkan oleh kuasa asing. Yang kedua, Tuan Yang di-Pertua....

Tuan Yang di-Pertua: Cukup, cukuplah, cukup, Yang Berhormat. Satu sahaja soalan Yang Berhormat. Cukuplah. Yang Berhormat, sila.

Tuan Chia Kwang Chye: Tuan Yang di-Pertua, dalam jawapan saya mungkin tidak jelas. Syarikat ini seperti yang dikata mempunyai kepakaran dalam bidang multimedia dan komunikasi ini dan bidang ini memang dalam segi *convergence* ini memang satu bidang yang boleh kata *advance*, jadi oleh sebab itu dalam masyarakat yang patut memerlukan teknologi yang tinggi, kita perlu semua kepakaran khususnya dari *industry knowledge*. Dan oleh sebab itu kita memilih satu syarikat yang pakar dalam bidang ini dan ada kakitangan-kakitangan dan perunding tempatan supaya ada *knowledge* atau *technology transfer* dalam kajian ini. Sekian, terima kasih.

Dato' Dr. Haji Jamaludin bin Dato' Mohd. Jarjis: Soalan tambahan, tentang akta yang kita baru luluskan. PAS baru mengatakan bahawa kita memilih satu firma perunding dari Barat tetapi dengarnya belah sana pun ada juga baru-baru pergi ini...pergi ke Florida, pergi ke Barat juga untuk hendak buka dia punya *site*, mengapa tak buat sendiri, mengapa rujuk kepada Barat juga.

Kebetulan saya, Yang Berhormat, ini setakat kita menyatukan akta kita ini supaya dapat diusahakan isu-isu yang berasaskan media, setakat mana kejayaan kita ini berbanding dengan negara-negara lain di mana kita menyatukan semua kementerian ini dalam satu akta berbanding dengan negara-negara di Asia Barat ataupun di Barat sendiri. Di mana kedudukan kita ini dari segi pelaksanaan kalau dibandingkan dengan negara-negara lain. Saya bertanya begini kerana saya mengatakan bahawa kita mungkin hanya *the few*, dengan izin, negara di dunia ini yang menyatukan akta-akta di bawa media ini. Minta sedikit pandangan Yang Berhormat.

Tuan Chia Kwang Chye: Tuan Yang di-Pertua, dalam segi multimedia dan komputer dan komunikasi memang ada satu *trend convergencenya* dan *convergence* ini merupakan satu *trend* yang begitu *advance*, jadi kita perlu apa jua kepakaran atau pengetahuan dari mana-mana pihak dan Malaysia telah menjadi satu negara yang utama di dunia khususnya di rantau ini mewujudkan empat undang-undang atau akta-akta siber untuk menjayakan Malaysia sebagai satu tempat di mana multimedia dan *convergence* adalah satu pembangunan yang begitu baik untuk negara kita. Sekian, terima kasih.

7. **Tuan Tan Kok Wai [Cheras]** minta Perdana Menteri menyatakan apakah tindakan Kementerian berhubung 11 isu dan syor yang terkandung dalam Agenda Wanita Untuk Perubahan yang menerangkan kegagalan Kerajaan menangani banyak masalah wanita selepas Kemerdekaan 42 tahun dan banyak isu yang belum diambil tindakan lagi oleh Kerajaan.

Timbalan Menteri di Jabatan Perdana Menteri [Dato' Hajah Shahrizat binti Abdul Jalil]: Tuan Yang di-Pertua, untuk makluman Yang Berhormat, Kerajaan Barisan Nasional dari awal lagi telah mengambil berat terhadap pembangunan wanita, dan sehingga hari ini tahap pencapaian mereka amatlah membanggakan sekali. Salah satu contoh kemajuan wanita ialah dalam bidang pendidikan. Kadar celik huruf di kalangan wanita telah meningkat sejak tahun 1970 daripada 49.6% kepada 96% pada tahun 1996. Pencapaian di peringkat ijazah pertama telah menunjukkan peningkatan yang membanggakan di mana pada tahun 1995, pelajar wanita merupakan 51% daripada jumlah keseluruhan pelajar berbanding dengan 48% pada tahun 1990 dan 42% pada tahun 1985.

Melalui program kesihatan pula, kadar jangka hayat wanita telah meningkat daripada 71.6%, pada tahun 1983 kepada 74.1 pada tahun 1996. Sepertimana yang Yang Berhormat sedia maklum dalam perkhidmatan awam kita, kini terdapat seramai 3 orang pegawai wanita yang telah diberi kepercayaan menerajui 3 kementerian penting

sebagai Ketua Setiausaha. Pencapaian ini menunjukkan Kerajaan Barisan Nasional sentiasa pro-aktif dan terus-menerus berusaha menambahkan peluang bagi wanita untuk meningkatkan pencapaian dalam apa jua bidang yang diceburi. Kepentingan dan kebajikan wanita juga turut diberi penekanan dengan penggubalan akta baru seperti Akta Keganasan Rumahtangga 1994 ataupun pindaan terhadap akta-akta sedia ada seperti Akta Penjagaan Wanita dan Gadis 1993.

Saya telah mengambil inisiatif mengadakan perjumpaan dengan beberapa pertubuhan bukan kerajaan termasuk beberapa pertubuhan yang terlibat dengan penyediaan agenda perubahan wanita. Saya akan terus meningkatkan kerjasama dengan mana-mana pertubuhan demi membangunkan wanita. Sebenarnya, apa yang dikatakan 11 isu di bawah *Women Agenda For Change*, bukanlah perkara baru kerana ianya sentiasa mendapat perhatian kerajaan dan merupakan isu-isu yang telah pun diketengahkan melalui dasar wanita negara pada tahun 1989 lagi dan juga pelan tindakan pembangunan wanita pada tahun 1997. Insya-Allah, apa jua isu wanita, sama ada isu tradisional atau terkini seperti kesan globalisasi dan *information teknologi* ke atas wanita Malaysia akan diberi perhatian yang serius dan ditangani dengan lebih berkesan lagi.

Puan Chong Eng: Tuan Yang di-Pertua, saya memang bersetuju bahawa pencapaian wanita dalam bidang pendidikan, kesihatan dan lain-lain bidang telah meningkat tetapi itu tidak boleh dikatakan adalah usaha di bawah Kementerian Yang Berhormat kerana ini masing-masing di bawah kementerian yang berlainan. Yang terpenting ialah apakah masalah yang *urgent* sekali yang dihadapi oleh kaum wanita pada hari ini dan sepanjang tahun ini. Masalah yang terpenting ialah bagaimana wanita hendak membahagikan masa mereka untuk kerja dan juga untuk menjaga keluarga. Dan sekiranya kerajaan betul-betul mengambil berat maka kerajaan mesti menangani masalah yang dihadapi oleh kaum wanita iaitu mengadakan ...*[Disampuk]*

Tuan Yang di-Pertua: Cukup Yang Berhormat.

Puan Chong Eng: Saya hanya hendak menghuraikan sedikit tentang apa usaha yang dijalankan.

Tuan Yang di-Pertua: Cukuplah Yang Berhormat. Cukuplah tu.

Puan Chong Eng: Okay. Soalannya.

Tuan Yang di-Pertua: Cukuplah.

Puan Chong Eng: Adakah usaha di bawah kementerian Yang Berhormat untuk betul-betul menangani masalah-masalah yang dihadapi oleh kaum wanita khususnya kaum ibu dan

Tuan Yang di-Pertua: Cukuplah Yang Berhormat. *[Disampuk]*

Dato' Hajah Shahrizat binti Abdul Jalil: Tuan Yang di-Pertua, saya nampak daripada cara Yang Berhormat tanya itu, nampak gaya Kerajaan Barisan Nasional telahpun berjaya membangunkan wanita Malaysia, *[Tepuk]* sampai beliau tidak tahu apa hendak tanya. Jadi, saya rasa bolehlah *'we can pat our back'*lah, buat masa ini, bahawa kerajaan Barisan Nasional, kita bekerja sebagai satu pasukan, mana-mana kementerian, kita tidak kira tetapi sebagai satu kerajaan di bawah Barisan Nasional, kita mengambil berat semua isu-isu wanita. Saya tidak tahulah pihak pembangkang, saya nampak ada yang kayuh ke kanan, ada yang kayuh ke kiri, ada parti yang hendak bawa, berhasrat dengan kata gula-gula mereka membawa wanita ke zaman jahiliah hingga wanita tidak boleh keluar daripada rumah. *[Disampuk]* Saya hendak syorkan kepada Ahli-ahli Yang Berhormat, tanyalah kepada rakan seperjuangan Ahli Yang Berhormat, ke mana mereka hendak bawa wanita Malaysia ini *[Tepuk]*

Tuan Haji Mahfuz bin Haji Omar: Parti mana hendak bawa wanita ke zaman jahiliah?

Dato' Hajah Shahrizat binti Abdul Jalil: Saya boleh sebut parti - saya ingin menyatakan di sini bahawa sebagai Timbalan Menteri yang diberi tanggungjawab untuk menjaga hal-ehwal wanita, saya begitu bimbang dan khuatir tentang sikap setengah-setengah parti pembangkang yang sanggup membawa wanita ke zaman jahiliah. Saya harap mereka akan tukar sikap mereka. *[Disampuk]*

Tuan Haji Mahfuz bin Haji Omar: Tuan Yang di-Pertua, saya minta dia jelaskan, parti pembangkang mana?

Tuan Mohd. Apandi bin Haji Mohamad: 36(6)

[Beberapa Ahli Pembangkang PAS bangun]

Tuan Yang di-Pertua: Cukuplah.

Beberapa Ahli Pembangkang: *[Menyampuk]*

Puan Hajah Mastika Junaidah binti Husin: *[Bangun]*

Tuan Yang di-Pertua: Arau, sila.

Tuan Mohamad bin Sabu: Jangan cakap macam itu.

Tuan Husam bin Haji Musa: Soalan tambahan, Tuan Yang di-Pertua.

Puan Hajah Mastika Junaidah binti Husin: Terima kasih, Ahli-ahli Yang Berhormat, saya harap sabarlah tu.

Beberapa Ahli Pembangkang: *[Menyampuk]*

Tuan Yang di-Pertua: Sudah.

Datuk Ruhanie bin Haji Ahmad: Jangan buat macam samseng.

Tuan Yang di-Pertua: Cukuplah. Arau sila.

Puan Hajah Mastika Junaidah binti Husin: Terima kasih.

Beberapa Ahli Pembangkang: *[Menyampuk]*

Tuan Haji Mahfuz bin Haji Omar: Itu satu tuduhan yang melampau. Siapa parti pembangkang yang hendak bawa wanita ke zaman jahiliah kecuali UMNO.

Tuan Yang di-Pertua: Cukuplah. Yang Berhormat nanti sekejap, ada hendak soal ni? *[Disampuk]* Nanti sekejap.

Beberapa Ahli Pembangkang: *[Menyampuk]*

Tuan Yang di-Pertua: Yang Berhormat nanti dulu. Yang Berhormat sekalian mintalah jikalau hendak mengeluarkan apa-apa

Beberapa Ahli Pembangkang: *[Menyampuk]*

Tuan Yang di-Pertua: Nanti sekejap, jangan

Tuan Ronald Kiandee: 14 orang panas telinga. *[Ketawa]*

Tuan Yang di-Pertua: bawalah point of order.

Beberapa Ahli Pembangkang: *[Menyampuk]*

Tuan Yang di-Pertua: Bagi siapa-siapa bangun, dia ada point of order. Kita akan selesaikan.

Raja Dato' Ahmad Zainuddin bin Raja Haji Omar: Takkan panas telinga, kot! Duduklah.

Tuan Haji Mahfuz bin Haji Omar: 36(6) Tuan Yang di-Pertua.

Tuan Yang di-Pertua: Nanti sekejap Arau.

Tuan Haji Mohamad bin Sabu: *[Menyampuk]*

Tuan Yang di-Pertua: Ya! 36(6).

Tuan Haji Mahfuz bin Haji Omar: 36(6).

Tuan Haji Noh bin Haji Omar: Sudah point of order tu, yang lain duduklah. Tidak faham peraturankah? Sudah duduklah. Yang sana peraturan, yang lain duduk. Guna peraturan mesyuarat dah.

Beberapa Ahli Pembangkang: *[Menyampuk]*

Tuan Yang di-Pertua: Yang Berhormat seorang sahaja yang boleh

Beberapa Ahli Pembangkang: *[Menyampuk]*

Tuan Haji Mahfuz bin Haji Omar: Point of order.

Tuan Yang di-Pertua: Bagi tinggal seorang sahaja yang bangun. *[Disampuk]* Itu peraturan ya.

Tuan Haji Mahfuz bin Haji Omar: Peraturan Mesyuarat 36(4) dan 36(6):

36(4) “adalah menjadi kesalahan bagi ahli-ahli Dewan menggunakan bahasa kurang sopan, biadap; dan

36(6) seseorang ahli tidak boleh mengeluarkan sangkaan jahat terhadap sesiapa ahli-ahli lain.”

Saya minta Yang Berhormat tarik balik.

Tuan Yang di-Pertua: Ya.

Tuan Haji Mahfuz bin Haji Omar: Tarikh balik.

Tuan Yang di-Pertua: Biarlah, nantilah saya bagi keputusan. *[Ketawa]* Tidak apalah jikalau sekiranya hendak bantah apa-apa buatlah secara mengikut peraturan *[Ketawa][Tepuk]*

Beberapa Ahli Pembangkang: *[Menyampuk]*

Tuan Yang di-Pertua: Cukuplah.

Tuan Tan Kok Wai: Tuan Yang di-Pertua, hari ini ialah Hari Wanita Antarabangsa *[Disampuk]* Soalan ini tepat pada tarikhnya tetapi jawapan *[Disampuk]* memang tidak tepat itu. *[Disampuk]*

Tuan Yang di-Pertua: Ini ada satu peraturan, point of order, nantilah saya putuskan dulu. *[Disampuk]* Ahli-ahli Yang Berhormat, sebenarnya perkataan ini pada fikiran saya tidak patutlah diucapkan. *[Tepuk]* Pada fikiran saya, saya sendiri fikir dengan setulus ikhlasnya memikirkan tidak patut diucapkanlah. Saya mintalah Timbalan Menteri tarik baliklah perkataan itu. *[Tepuk]*

Dato' Hajah Shahrizat binti Abdul Jalil: Tuan Yang di-Pertua, saya minta maaf, walaupun saya hormat kepada Tuan Yang di-Pertua, tetapi sebagai seorang wanita saya rasa, saya tidak boleh tarik balik perkataan itu. *[Tepuk]* *[Disampuk]* Oleh kerana setahu sayalah makna ‘jahiliah’ itu adalah kurang pandai, jadi pada pendapat saya

Seorang Ahli: *[Menyampuk]*

Dato' Hajah Shahrizat binti Abdul Jalil: saya tidak buat mana-mana tohmahan kepada mana-mana individu. Saya menyatakan bahawa kebimbangan dan kekhuatiran saya bahawa ada setengah pihak terutamanya di kalangan parti pembangkang yang mahu mengajak wanita ke zaman jahiliah maknanya zaman yang kurang pandai, maknanya pendekatan yang mereka ambil itu, saya khuatir oleh kerana *[Disampuk]* kerajaan di bawah Barisan Nasional, kita memberi pengikliran yang setinggi-tingginya kepada wanita Malaysia. Jadi, pada hari ini saya

Tuan Yang di-Pertua: Yang Berhormat Timbalan Menteri, konsep ‘jahiliah’ itu pada kalangan orang Melayu ialah pada masa dulu yang mana orang-orang di

Timur Tengah itu menanamkan anak perempuan mereka hidup-hidup. *[Tepuk]*
Konsep itu ada Yang Berhormat. Jadi, kalau begitu, saya mintalah Yang Berhormat menarik balik perkataan itu. *[Tepuk]*

Dato' Hajah Shahrizat binti Abdul Jalil: Tuan Yang di-Pertua, saya ingin mentafsirkan apa-apa yang diperkatakan oleh Tuan Yang di-Pertua, kalau zaman dahulu, di

Tuan Yang di-Pertua: Keputusan saya mengikut Peraturan Mesyuarat 43 ialah muktamad, Yang Berhormat. Saya mintalah Yang Berhormat, ya!

Dato' Hajah Shahrizat binti Abdul Jalil: Sebelum saya menarik balik, oleh kerana hormat kepada Tuan Yang di-Pertua, saya ingin menyatakan di sini bahawa kalau zaman dahulu wanita ditanam hidup-hidup tetapi *[Disampuk]* semangat

Tuan Yang di-Pertua: Cukuplah, Yang Berhormat. Keputusan Tuan Yang di-Pertua itu

Dato' Hajah Shahrizat binti Abdul Jalil: Saya hendak minta – biar saya habiskan apa yang saya hendak kata sebelum saya tarik balik.

Tuan Haji Mahfuz bin Haji Omar: Saya rasa tidak ada hak untuk dia.

Tuan Yang di-Pertua: Cukuplah Yang Berhormat. *[Disampuk]* Yang Berhormat tidak tarik balik. Saya minta tarik balik Yang Berhormat.

Beberapa Ahli Pembangkang: *[Menyampuk]*

Dato' Hajah Shahrizat binti Abdul Jalil: Tuan Yang di-Pertua, oleh kerana saya hormat Tuan Yang di-Pertua, bukan kerana saya peduli sangat kepada pembangkang, *[Disampuk]* tetapi oleh kerana saya hormatkan Tuan Yang di-Pertua dan kerusi yang Tuan Yang di-Pertua duduk itu saya bagi pihak Kerajaan Barisan Nasional tarik balik tetapi saya hendak *on record* bahawa kita di Barisan Nasional memberi penghormatan yang paling tinggi kepada wanita Malaysia. *[Tepuk]*

Tuan Yang di-Pertua: Cukuplah tu.

Tuan Tan Kok Wai: Soalan tambahan.

Tuan Yang di-Pertua: Saya bagi kepada Arau tadi, Yang Berhormat. Biarlah bagi kepada wanita sahaja.

Dato' Mahadzir bin Mohd. Khir: Tuan Yang di-Pertua, boleh saya buat penjelasan sedikit. *[Disampuk]*

Tuan Yang di-Pertua: Tidak boleh Yang Berhormat. *[Ketawa]*

Tuan Mohamad bin Sabu: Ala... apa bodoh orang tua ini!

Tuan Yang di-Pertua: Arau sila teruskan.

Dato' Mahadzir bin Mohd. Khir: Tuan Yang di-Pertua, boleh tidak, saya pohon mendapat untuk membuat penjelasan.

Raja Dato' Ahmad Zainuddin bin Raja Haji Omar: Point of order 36(6), Tuan Yang di-Pertua.

Tuan Yang di-Pertua: 36(6) point of order dulu, Yang Berhormat. Yang lain diminta duduk ya.

Raja Dato' Ahmad Zainuddin bin Raja Haji Omar: 36(6) Sangkaan jahat, saya dengar dari Kuala Kedah tadi sebut perkataan 'bodoh'. Minta tarik balik. Tolong tarik balik. *[Ketawa]*

Tuan Mohamad bin Sabu: Oh, tidak bodoh, kurang cerdas. *[Ketawa]*

Raja Dato' Ahmad Zainuddin bin Raja Haji Omar: Serupa tu.

Tuan Yang di-Pertua: Sudahlah Yang Berhormat. Yang Berhormat Arau sila teruskan.

Puan Hajah Mastika Junaidah binti Husin: Terima kasih, Tuan Yang di-Pertua. Soalan tambahan. Sebelum mengemukakan soalan tambahan, saya ingin menyebutkan rasa sedih sayalah kerana soal wanita ini nampak gayanya, walaupun Timbalan Menteri tadi menyebutkan sedikit [*Disampuk*] saya hendak kemukakan soalanlah ni. Apa yang berlaku tadi memperlihatkan ada yang tidak hormat kepada wanita. [*Disampuk*] [*Tepuk*]

Tuan Yang di-Pertua, memang kita wanita Malaysia berbangga kerana dalam persidangan di Beijing, isteri kepada Yang Amat Berhormat Perdana Menteri, Yang Berbahagia Datin Paduka Dr. Siti Hasmah Mohamad Ali, telahpun diberikan penghormatan untuk menyampaikan ucapan di Persidangan Wanita Sedunia di Beijing, ini menunjukkan pengiktirafan kepada pencapaian wanita di Malaysia, yang mana ada tuduhan mengatakan bahawa wanita di Malaysia terabai. [*Disampuk*]

Mengenai 11 isu yang dikemukakan, adakah Yang Berhormat sedar bahawa 11 isu yang dikemukakan ini telahpun dibincangkan ataupun terkeluar semasa sebelum pilihan raya. Saya menghargai hasrat NGO-NGO yang mengemukakan 11 isu ini untuk perhatian kerajaan tetapi adakah Yang Berhormat sedar bahawa isu ini juga diambil kesempatan oleh parti pembangkang tetapi mereka sebenarnya tidak berjaya untuk menolak Barisan Nasional.

Dan saya ingin bertanya kepada Yang Berhormat, apakah usaha-usaha kerajaan untuk memberikan kesedaran kepada satu kaum lagi selain daripada kaum wanita iaitu kaum sebelah kita, kaum yang kita sayang dan mereka juga sayang kepada kita, kaum lelaki, bagaimana mereka dapat menghargai dan bersama-sama menghayati perjuangan kaum wanita tidak sebagaimana parti pembangkang. Terima kasih. [*Ketawa*]

Dato' Hajah Shahrizat binti Abdul Jalil: Tuan Yang di-Pertua, saya setuju dengan apa yang dikatakan oleh Ahli Yang Berhormat bagi Arau, saya pun hendak menasihati semua sayang dan jagalah wanita ini [*Disampuk*] janganlah kita dihina ataupun tidak diberi tempat yang sewajarnya.

Tuan Yang di-Pertua, sepertimana Ahli Yang Berhormat tanya tadi, *Women Agenda For Change* ini mereka telahpun mengutarakan beberapa isu sepertimana yang saya katakan telahpun ditangani oleh pihak kerajaan. Namun begitu, sebagai sebuah kerajaan yang bertanggungjawab saya mengambil berat isu-isu yang diketengahkan ini, saya mengambil berat dan saya telahpun membuka ruang kepada semua NGO, walaupun saya tahu ada di antara kepimpinan NGO itu bukan menyokong kerajaan tetapi atas nama kebaikan wanita Malaysia saya membuka pintu saya untuk perbincangan dengan semua NGO wanita supaya isu-isu wanita itu dapat ditangani dengan sebaik-baiknya. Cuma saya minta janganlah ada di antara kita yang ingin mempolitikkan isu wanita, oleh kerana Kerajaan Barisan Nasional tidak pernah menghina atau mengeneipkan isu-isu, prestasi dan status wanita. Terima kasih.

8. **Datuk Yong Teck Lee [Gaya]** minta Menteri Kewangan menyatakan adakah Kementerian merancang untuk mengurangkan hari perjudian daripada tiga hari seminggu kepada satu hari atau dua hari seminggu. Jika ya, bila.

Timbalan Menteri Kewangan [Dato' Chan Kong Choy]: Tuan Yang di-Pertua, pada keseluruhannya dan berdasarkan kepada implikasi sosial dan agama, telah menjadi dasar kerajaan tidak menggalakkan pertumbuhan aktiviti perjudian. Kerajaan telah mengambil tindakan untuk mengawal serta mengurangkan aktiviti perjudian dan di antara kawalan yang dikenakan adalah kerajaan tidak lagi mengeluarkan lesen-lesen baru bagi semua bentuk perjudian dan mengenakan syarat bahawa orang Islam tidak dibenarkan memasuki pre-mis-permis perjudian.

Sepertimana Yang Berhormat sedia maklum, aktiviti perjudian tidak dapat dihapuskan sama sekali dan sekiranya diberhentikan aktiviti perjudian tanpa lesen akan

terus berleluasa dan boleh mengancam ekonomi serta keselamatan negara. Walau bagaimanapun, kawalan yang ketat dan kajian untuk mengurangkan aktiviti perjudian sentiasa dilaksanakan seperti cadangan yang dibuat oleh Yang Berhormat.

Datuk Yong Teck Lee: Tuan Yang di-Pertua, saya dengar ucapan itu, tetapi soalan saya belum dijawab. Banyak kali sudah terjadi begini. Saya hanya ingin tahu adakah hendak dikurangkan tiga hari seminggu kepada satu hari ataupun dua hari seminggu, ya ataupun tidak? *[Tepuk]*

Dato' Chan Kong Choy: Tuan Yang di-Pertua, saya sudah jawab soalan ini iaitu cadangan Yang Berhormat akan dipertimbangkan.

Dr. Tan Seng Giaw: Tuan Yang di-Pertua, Rompin, sebab di negerinya banyak lesen perjudian. *[Ketawa]* Dia sensitif sekarang, sangat sensitif sekarang.

Dato' Dr. Haji Jamaluddin bin Dato' Mohd. Jarjis: *[Bangun]*

Tuan Yang di-Pertua: Yang Berhormat, soalnya?

Dr. Tan Seng Giaw: Saya tidak nampak, soalnya di mana negeri itu yang dapat lebih banyak lesen perjudian di seluruh negara.

Tuan Yang di-Pertua: Yang Berhormat, cukuplah itu.

Dr. Tan Seng Giaw: Ya, bolehkah Yang Berhormat sebutkan bilangan lesen untuk perjudian semua jenis dan anggaran kasar hasil daripada lesen-lesen perjudian, banyak persoalan kerana saya nampak nombor ekor itu setiap kali saya nampak semua kaum ada, bukan kerana Cina, Melayu ataupun India sahaja, semua kaum pun ada. Ini

Tuan Yang di-Pertua: Cukuplah, cukuplah!

Dato' Chan Kong Choy: Tuan Yang di-Pertua, saya tidak mempunyai angka terperinci di sini dan saya akan memberi jawapan secara bertulis kepada Yang Berhormat.

9. Datuk Seri Panglima Mohd. Salleh bin Tun Md. Said Keruak [Kota Belud] minta Menteri Tenaga, Komunikasi dan Multimedia menyatakan apakah kerajaan berhasrat untuk menyelaraskan tarif elektrik di antara Semenanjung Malaysia, Sabah dan Sarawak yang pada masa ini ternyata berbeza. Sekiranya kerajaan sememangnya berhasrat sedemikian, apakah langkah-langkah yang telah dan akan dilaksanakan untuk mencapai matlamat tersebut.

Timbalan Menteri Tenaga, Komunikasi dan Multimedia [Datuk Tan Chai Ho]: Tuan Yang di-Pertua, kerajaan tidak berhasrat untuk menyelaraskan tarif elektrik di antara Semenanjung Malaysia, Sabah dan Sarawak. Ini adalah berdasarkan prinsip yang digunakan pada masa ini iaitu kadar tarif harus melambangkan kos bekalan elektrik. Kos bekalan elektrik adalah berbeza di antara Semenanjung Malaysia, Sabah dan Sarawak. Sekian, terima kasih.

Tuan Lim Hock Seng: Tuan Yang di-Pertua, terima kasih, soalan tambahan. Baru-baru ini TNB ada meminta kepada kerajaan supaya menimbangkan kenaikan tarif elektrik di negara kita, saya ingin tahu dari Yang Berhormat Timbalan Menteri apakah keputusan kerajaan dan sama ada kerajaan pada dasarnya akan menaikkan tarif ini.

Datuk Tan Chai Ho: Tuan Yang di-Pertua, setakat ini kementerian ini tidak menerima permintaan kenaikan tarif elektrik dari pihak TNB.

Tuan Hoo Seong Chang: Tuan Yang di-Pertua, terima kasih. Kalau kerajaan tidak berhasrat untuk menyelaraskan tarif elektrik, mungkin hasrat kerajaan adalah untuk menstabilkan tarif elektrik. Pada saya satu unsur penting ialah untuk menentukan kestabilan tarif elektrik ialah peranan IPP di negara kita. Jadi, saya ingin tahu berapa IPP yang sedang beroperasi di negara kita dan apakah harga yang dijual kepada TNB setakat ini. Sekian, terima kasih.

Datuk Tan Chai Ho: Tuan Yang di-Pertua, untuk makluman Ahli Yang Berhormat, terdapat sebanyak 12 syarikat penjana bebas iaitu IPP di seluruh negara. Di samping itu, masih ada empat syarikat penjana bebas yang berlesen tetapi belum beroperasi.

Tuan Yang di-Pertua, mengenai harga tenaga yang dibeli oleh TNB, saya ingin memaklumkan Ahli Yang Berhormat bahawa harga seunit per kilowatt tenaga yang dibeli oleh TNB dari setiap IPP adalah berbeza mengikut, dengan izin, *power purchase agreement* iaitu PPA yang dimeteraikan atau ditetapkan di antara IPP dengan Tenaga Nasional Berhad.

Tuan Yang di -Pertua: Masa untuk pertanyaan-pertanyaan bagi jawab lisan selesai.

[Masa untuk Pertanyaan bagi Jawab Lisan telah cukup dan Jawapan bagi Pertanyaan No. 5 dan 10 hingga 22 dijilid dalam buku yang berasingan]

RANG UNDANG-UNDANG

RANG UNDANG-UNDANG PERBEKALAN 2000

Bacaan Kali Yang Kedua

DAN

USUL

ANGGARAN PEMBANGUNAN 2000

Aturan Urusan Mesyuarat dibacakan bagi menyambung semula perbahasan yang ditangguhkan atas masalah “Bahawa Rang Undang-undang Perbekalan 2000 dibacakan kali yang kedua sekarang” dan “Bahawa Usul yang berikut ini dirujuk kepada Jawatankuasa sebuah-buah Majlis.”

“Bahawa Dewan ini, mengikut Seksyen 4(3) Akta Kumpulan Wang Pembangunan 1966, membuat ketetapan iaitu satu jumlah wang sebanyak tidak lebih daripada dua puluh empat bilion enam ratus tujuh puluh empat juta dua ratus sembilan puluh dua ribu (RM24,674,292,000) dibelanjakan daripada Kumpulan Wang Pembangunan bagi tahun 2000, bagi tujuan-tujuan dan butiran-butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Belanja wan Persekutuan, 2000 yang dibentangkan sebagai Kertas Perintah 14 Tahun 1999 adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan lapan dan sembilan senarai tersebut, dan bahawa Usul yang telah diluluskan oleh Dewan ini pada 20 Disember 1999 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2000 adalah dibatalkan hendaklah disahkan.” *[7 Mac 2000]*

Tuan Yang di-Pertua: Diminta Yang Berhormat bagi Batu Gajah menyambung ucapan.

11.05 pagi.

Puan Fong Po Kuan [Batu Gajah]: Terima kasih, Tuan Yang di-Pertua. Sehingga 8 Oktober 1999 sebanyak 165 buah negara telah memberi raktifikasi kepada konvensyen tersebut. Pada 5 Julai 1995 Malaysia telah memberikan raktifikasi kepada konvensyen penghapusan semua bentuk diskriminasi terhadap wanita yang menjamin hak-hak kemanusiaan wanita berdasarkan prinsip-prinsip persamaan antara wanita dan lelaki. Akan tetapi raktifikasi Malaysia terhadap konvensyen tersebut adalah dengan penyimpanan *reservation*, dengan izin, ini secara langsung memperlihatkan

ketidakrelaan Malaysia untuk melaksanakan tanggungjawab konvensyen tersebut secara keseluruhan. Penyimpanan

Tuan Yang di-Pertua: Yang Berhormat, ya ada apa Yang Berhormat?

Tuan Haji Noh bin Haji Omar: Minta penjelasan.

Tuan Yang di-Pertua: Dia minta penjelasan Yang Berhormat.

Puan Fong Po Kuan: Tuan Yang di-Pertua, saya tiada masa lagi, saya tidak memberi laluan, maaf ya. Penyimpanan *reservation*, dengan izin, adalah perkara 2(f) yang berbunyi dengan izin, *'to take all appropriate measures including legislation to modify or abolish existing laws, regulations, custom and practices which constitute discrimination against women.'* Penyimpanan atau *reservation* telah menunjukkan sejauh mana kerelaan dan kesediaan Kerajaan Barisan Nasional untuk menghapuskan diskriminasi terhadap wanita. Dengan singkat tindakan tersebut, *remove the obligation of Malaysia to implement the convention as a whole*, dengan izin.

Tuan Yang di-Pertua, ini adalah pendirian Kerajaan pimpinan Barisan Nasional di sini menyahut untuk pembangunan wanita dengan dasar-dasar wanita negara. Pada masa yang sama, tidak rela melaksanakannya. Saya dengan ini menyeru kerajaan agar menyetujui *reservation*, dengan izin, atau menerima keseluruhan konvensyen tersebut, tambahan pula saya ingin mencadangkan pemindaan kepada Perlembagaan Malaysia.

Sebentar tadi ada perbincangan mengenai isu wanita dimaklumkan oleh Yang Berhormat Timbalan Menteri bahawa Kerajaan Barisan Nasional memberi setinggi-tinggi penghormatan kepada kaum wanita, akan tetapi di sini sekarang saya ingin mencadangkan beberapa akta yang perlu dipinda agar untuk menunjukkan Kerajaan Barisan Nasional benar-benar memberi pengiktirafan kepada kaum wanita. *[Tepuk]*

Cadangan-cadangan yang dikemukakan di sini bukan kali pertama

Tuan Haji Che Ghani bin Che Ambak: Penjelasan, sekejap, sedikit sahaja.

Tuan Yang di-Pertua: Ada yang bangun, Yang Berhormat, ya.

Puan Fong Po Kuan: Maaf ya, saya tidak beri laluan. Maaf, maaf. Seruan-seruan ini bukanlah kali pertama dikemukakan tetapi ia telah tidak diambil tindakan, oleh sebab sedemikian saya mengambil kesempatan ini untuk mengemukakan di Dewan yang mulia ini, pada hari wanita antarabangsa hari ini. Cadangan saya adalah untuk meminda Perlembagaan yang utama sekali adalah dengan memperuntukkan dengan nyata atau *explicit*, dengan izin, perkara mengenai sama rata di antara kaum wanita dan kaum lelaki atau ketiadaan perbezaan atas jantina.

Yang kedua, dengan meminda Perkara 8(2), Perkara 14 dan Perkara 15 Perlembagaan Malaysia. Perlembagaan Malaysia dengan jelas memperuntukkan di dalam Perkara 8 dengan tajuknya 'Sama Rata' yang memperuntukkan semua orang adalah sama rata di sisi undang-undang dan berhak mendapat perlindungan yang sama di sisi undang-undang akan tetapi di Perkara 8(2) memperuntukkan, *"kecuali sebagaimana dibenarkan dengan nyata oleh Perlembagaan, ia tidaklah boleh ada perbezaan terhadap warga negara semata-mata oleh sebab agama, kaum keturunan atau tempat lahir..."*.

Di dalam Perlembagaan ini kita jelas melihat bahawa dengan sahnya Kerajaan Barisan Nasional membenarkan diskriminasi di dalam undang-undang tertinggi negara dengan memperuntukkan Perkara 15 Perlembagaan Malaysia mengenai kewarganegaraan dengan cara pendaftaran bagi isteri dan anak warga sahaja.

Sering kali kita mendengar keluhan dari wanita yang bersuami asing mengenai kedudukan atau status suami asing yang di Malaysia. Tiada peruntukan di dalam Perlembagaan Malaysia kepada wanita yang bersuami asing. Keadaan adalah sebaliknya kepada lelaki beristeri asing dengan peruntukan di bawah Perkara 15. Pernah ditanya kepada Pegawai Imigresen mengapa keadaan sedemikian kepada

wanita yang bersuami asing, jawapannya adalah kerana 'wanita haruslah mengikut tradisi, mengikut suaminya.'

Tradisi ini harus dikikis dengan membenarkan pemindaan kepada Perkara 15, tambahan pula isteri asing juga mempunyai kesulitan untuk memperolehi permit masuk kerana permohonannya adalah bergantung kepada suaminya.

Tuan Yang di-Pertua, pernah sekali saya membuat satu permohonan bagi pihak seorang wanita asing yang bersuamikan warganegara Malaysia yang telah berkahwin sejak tahun 1985 tetapi masih berada di Malaysia atas pas lawatan sosial kerana suaminya tiada di sampingnya untuk menandatangani permohonan untuk permit masuk tersebut. Jadi, saya pun memohon agar cadangan ini akan dipertimbangkan dan dikaji.

Mengenai satu perkara lagi iaitu Perkara 14(1)(b) Perlembagaan Malaysia yang memperuntukkan bahawa jika isteri asing dan anak adalah dilahirkan di luar negeri, anak tersebut adalah warganegara secara kuatkuasa undang-undang. Keadaan ini telah tidak diperuntukkan kepada warganegara wanita Malaysia yang bersuami asing dan anaknya dilahirkan di luar negeri. Kelemahan undang-undang dalam memberi perlindungan kepada masyarakat terutamanya kaum wanita jelas terlihat pada masa kini.

Memang wujud undang-undang untuk memberi perlindungan, apakah undang-undang itu ada mempunyai perlindungan yang sempurna? Saya di sini menyeru agar kerajaan mengkaji semula akta dan membuat pemindaan yang bersesuaian dalam keadaan yang segera agar perlindungan wanita yang benar dan sempurna dapat diberikan kepada kaum wanita.

[Timbalan Yang di-Pertua (Dato' Haji Muhamad bin Abdullah) *mempengerusikan Mesyuarat*]

Akta Keganasan Rumahtangga 1994 sebentar tadi Yang Berhormat Timbalan Menteri ada menyatakan bahawa kerajaan ada memperuntukkan akta tersebut, akan tetapi akta tersebut walaupun baru berkuatkuasa kurang daripada empat tahun dan ia mengambil masa dua tahun selepas ia digubal baru ia dikuatkuasakan telah menerima banyak keluhan dan seruan dari organisasi wanita mengenai ketidaksempurnaan akta tersebut. Oleh itu saya menyeru agar akta tersebut juga dikaji.

Satu lagi ialah mengenai Kanun Keseksaan dan *Criminal Procedure Code*, dengan izin, Tuan Yang di-Pertua, kedua-dua kanun ini harus dikaji semula juga dan dibentangkan cadangan pemindaan yang bersesuaian. Kes yang berlaku terhadap Ahli Yang Berhormat bagi Seputeh baru-baru ini telah memperlihatkan kelemahan kanun ini di dalam memberi perlindungan kepada bukan sahaja kepada kaum wanita, tetapi juga kepada kaum lelaki iaitu di bawah Seksyen 509 Kanun Keseksaan yang akan melambatkan siasatan yang seterusnya melambatkan perlindungan diberi kepada pengadu. Menurut statistik polis 1998 adalah dilaporkan bahawa ada 4.1 kes rogol dilaporkan setiap hari, jika diambil kira kes yang tidak dilaporkan adalah dianggarkan seorang wanita dirogol setiap 1.7 jam. Adalah di sini dicadangkan agar kerajaan memberi bantuan seperti kaunseling, sokongan moral serta kewangan kepada mangsa rogol.

Adalah perlu juga diambil perhatian agar Seksyen 375 Kanun Keseksaan dicadangkan dipinda. Pada masa ini di bawah Seksyen 375 tersebut beban bukti kes adalah di atas mangsa rogol tersebut. Mangsa adalah dikehendaki untuk melalui proses pembuktian kesnya dengan memberi keterangan di antaranya bahawa mangsa tidak ada memberi kebenaran '*against her will, without her consent*', dengan izin. Kita boleh lihat betapa banyak tamparan tekanan jiwa dan mental ketika melalui proses memberi keterangan di mahkamah.

Mengenai Kod Amalan Untuk Mencegah Dan Membasmikan Gangguan Seksual di Tempat Kerja. Di Dewan yang mulia ini, saya mencadangkan bahawa kod amalan untuk mencegah dan membasmi gangguan seksual di tempat kerja tersebut

dijadikan satu akta, gangguan seksual boleh berlaku di Dewan yang mulia ini, sudah pasti keadaan adalah amat serius di luar Dewan ini. Kanun Keseksaan yang sedia ada hanya meliputi keadaan gangguan seksual berbentuk fizikal dan tidak melibatkan secara lisan seperti yang diperuntukkan oleh kod amalan tersebut.

Mengenai sistem pendidikan negara, berkaitan dengan sistem pendidikan negara kita, saya mencadangkan satu pembaharuan terhadap sistem tersebut. *Our education system needs a revamp*, dengan izin. Keghairahan ibu bapa untuk menghantar anak-anak mereka ke pusat tuisyen adalah satu faktor di mana pihak kementerian seharusnya mengkaji semula sistem pendidikan tersebut. Keadaan ini berlaku, apakah disebabkan oleh ibu bapa, anak-anak, guru-guru sekolah atau keseluruhan sistem pendidikan tersebut. Kekurangan masa di rumah bersama ahli keluarga secara tidak langsung akan membawa kepada masalah sosial.

Untuk melahirkan satu generasi muda yang berwawasan intelek arif, kementerian mesti membentuk satu corak sistem pendidikan menggalakkan anak-anak murid yang berkebolehan dalam membuat analisis di atas sesuatu fakta dan seterusnya berani untuk menyuarakannya dengan memberi cadangan, idea atau kritikan, *'melentur buluh biar dari rebungunya'*. Dengan ringkas, *'the culture of fear to speak'* harus dikikis dari anak-anak murid, lebih corak perbincangan di dalam kelas-kelas daripada mereka di suap maklumat sahaja akan membantu membentuk generasi muda yang akan menjadi pemimpin yang lebih terbuka.

Sistem pendidikan harus menggalakkan penyuaran pandangan. Oleh itu, Akta Universiti dan Kolej Universiti haruslah dimansuhkan. Saya risau di masa depan akan lahir pula generasi yang bercorak menganggu sahaja tanpa cadangan, dalam erti kata yang singkat, generasi yang boleh dipanggil sebagai *'pak turut'* atau *'yes man'* yang telah sedia wujud. Saya risau ini akan bertambah jumlahnya. Tambahan pula masalah pelajar yang mencapai keputusan

Dato' Ir. Mohd. Zin bin Mohamed: *[Bangun]*

Timbalan Yang di -Pertua [Dato' Haji Muhamad bin Abdullah]: Ya, ada yang berdiri Yang Berhormat, minta penjelasan.

Puan Fong Po Kuan: Saya tiada masa, saya ada lagi point. Minta maaf.

Timbalan Yang di -Pertua [Dato' Haji Muhamad bin Abdullah]: Ya, dia tidak beri Yang Berhormat.

Puan Fong Po Kuan: Tambahan pula masalah pelajar yang mencapai keputusan peperiksaan khususnya Sijil Tinggi Persekolahan Malaysia yang baik harus diberi tempat di universiti mengikut kursus yang diminatinya. Ini adalah kerana telah dilaporkan di dalam surat khabar bahawa pelajar mencapai keputusan cemerlang 5A telah dinafikan tempat di dalam fakulti perubatan di universiti tempatan, alasan yang diberi oleh kementerian adalah kerana ia gagal untuk memenuhi pencapaian markah ko-kurikulum.

Buku bantuan penilaian aktiviti ko-kurikulum sekolah menengah harus dikaji semula, diambil kira berapa banyakkah penekanan diberi oleh pihak sekolah tentang aktiviti di tingkatan 6. Berapa ramai pelajar yang berkebolehan di dalam mewakili negara dan memperolehi johan untuk mendapatkan markah 20. Berapakah jawatan yang ada untuk menjadi kapten pasukan sekolah, untuk memperolehi markah 10%. Pelajar di tingkatan 6 bertungkus lumus belajar tidak memberi apa-apa harapan tetapi hanya untuk mendapat satu tempat di universiti di bidang yang diminati yang akhirnya mereka ini adalah golongan intelek yang akan mengambil alih pimpinan negara di masa-masa yang akan datang.

Masalah keciciran pelajar juga baru-baru ini menjadi isu perbincangan, pelajar yang tercicir yang dilihat di sini adalah golongan tercicir dari sekolah kerajaan dan bukan untuk memasuki ke sekolah persendirian.

Saya percaya keciciran pelajar ini sentiasa berlaku tetapi yang perlu dikaji di sini bukan sahaja bagaimana untuk mengelakkan keciciran pelajar tetapi juga membantu mereka yang telah tercicir tetapi ingin memasuki semula ke sekolah kerajaan selepas insaf dan sedar akan pentingnya pendidikan.

Timbalan Yang di-Pertua [Dato' Haji Muhamad bin Abdullah]: Sila gulung, Yang Berhormat.

Puan Fong Po Kuan: Tuan Yang di-Pertua, saya akan cuba. Pelajar yang telah tercicir, apakah langkah yang sedia ada oleh Kementerian Pendidikan untuk membantu mereka yang ingin kembali ke sekolah. Jabatan Pendidikan Negeri Perak langsung tidak membantu mereka, pihak sekolah asalnya juga turut menafikan tempat untuk mereka, tidak perlu dinyatakan pihak sekolah yang lain, ibu bapa budak tersebut akan merayu dari satu sekolah ke sekolah yang lain untuk satu tempat untuk anaknya. Bila merayu kepada pihak Jabatan Pendidikan, dimaklumkan bahawa pihak sekolah yang membuat keputusan di dalam hal ini, diberinya satu borang sokong atau tidak untuk ditandatangani oleh guru besar. Masalah di sini adalah kerana guru besar, ada di antaranya enggan menerima kembali anak muridnya atas bukan kerana ada masalah disiplin, kerana risau ia akan menurunkan prestasi peratusan pencapaian keputusan peperiksaan.

Satu lagi adalah di mana guru besar dengan terang-terangnya memaklumkan seorang ibu bahawa anaknya tidak boleh balik untuk menyambung pelajarannya setelah berhenti satu tahun. Yang tercicir ...

Timbalan Yang di-Pertua [Dato' Haji Muhamad bin Abdullah]: Masa Yang Berhormat sudah habis, Yang Berhormat.

Puan Fong Po Kuan: Tuan Yang di-Pertua, jika diberi setengah minit lagi, dengan izin.

Timbalan Yang di-Pertua [Dato' Haji Muhamad bin Abdullah]: Bolehlah setengah minit! *[Ketawa]*

Puan Fong Po Kuan: Yang tercicir dan ingin kembali ke sekolah telah dihadkan oleh peraturan yang dikeluarkan oleh kementerian mengenai had umur, memang benar sama ada budak yang tercicir tersebut boleh mengikuti kelas atau tidak, itu adalah hal yang berasingan, ini adalah hak untuk pendidikan, yang tercicir tersebut telah insaf, tidak diberi peluang, mungkin akan terperangkap dalam gejala sosial yang tidak baik, yang merana masyarakat kita di masa yang akan datang.

Saya berharap Kementerian Pendidikan akan mengambil langkah untuk mengkaji serta menyasat keadaan yang berlaku ini. Sikap Setiausaha Parlimen Kementerian Pendidikan yang bersikap *defensive*, ketika saya membangkitkan isu ini amat mengecewakan saya. Saya dengan ini menyeru sistem pendidikan diadakan pembaharuan.

Timbalan Yang di-Pertua [Dato' Haji Muhamad bin Abdullah]: Sudah lebih daripada setengah minit. *[Ketawa]*

Puan Fong Po Kuan: Terima kasih, Tuan Yang di-Pertua.

Timbalan Yang di-Pertua [Dato' Haji Muhamad bin Abdullah]: Tebrau.

11.16 pagi

Datuk Haji Mohd. Ali bin Haji Hassan [Tebrau]: Terima kasih. Assalamualaikum wr. wb., selamat pagi, terima kasih saya ucapkan kepada Datuk Yang di-Pertua kerana telah memilih saya dengan tepat dan adil untuk mengizinkan saya berucap bagi membahaskan Rang Undang-undang Perbekalan 2000 yang telah dibentangkan oleh Menteri Kewangan tempoh hari. Saya bersyukur ke hadrat Allah s.w.t. kerana dengan izinNya saya telah dipilih oleh pengundi kawasan Parlimen Tebrau dengan satu majoriti yang terbesar seluruh negara hampir 36,000. *[Tepuk]*

Saya tidak duga sama sekali. Walaupun tokoh-tokoh pembangkang datang berceramah, berucap berapi-api, yang mengeluarkan kata-kata yang tak baik, menyebut nama-nama peribadi seseorang, dia berucap macam dia tak salah, orang lain semuanya salah sahaja. Akhirnya rakyat telah buat keputusan yang tepat dan baik yang memberikan kemenangan kepada parti Barisan Nasional 100% di negeri Johor dan dapat memerintah negara sekali lagi dengan majoriti 2/3. Kita bersyukur ke hadrat Allah s.w.t. Oleh sebab masa hanya singkat untuk dibenarkan saya berucap oleh Datuk Yang di-Pertua, maka saya dengan lebih awal mengisytiharkan bahawa laluan untuk Ahli Yang Berhormat lain adalah ditutup lawannya. Harap ada dalaman Datuk Yang di-Pertua.

Datuk Yang di-Pertua, Alhamdulillah, bersyukur kita ke hadrat Allah s.w.t. masih lagi mengurniakan nikmat iman dan Islam kepada kita semua dan menaungi bumi Malaysia yang tercinta dengan nikmat keamanan, keharmonian dan kesejahteraan. Umat Islam di negara ini seharusnya berbangga dan berasa beruntung kerana usaha-usaha memartabatkan Islam tidak pernah luntur bahkan semakin rancak terutama kita selepas kemerdekaan.

Hari ini kita dapat lihat betapa pembangunan kemajuan Islam begitu menyerlah di serata tempat dan di pelok negara tanpa menghalang seseorang dari merasai nikmat kemanisannya. Sesungguhnya pembangunan Islam yang pesat di negara ini sama ada dari segi pentadbiran, pendidikan, perundangan dan perekonomian dan sebagainya tidak mungkin dapat diuraikan di dalam pembentangan saya pada hari ini namun sekurang-kurangnya ia dapat menjelaskan beberapa kekeliruan dan tanggapan sesetengah pihak di mana kerajaan tidak pernah bersikap berpeluk tubuh atau berlepas tangan daripada perjuangan mendaulatkan Islam sebagaimana yang diamanahkan oleh Allah s.w.t.

Pembentangan saya hari ini dapat menjelaskan kepada kita seterusnya mencetuskan kejayaan betapa perlunya kita bersama-sama berganding bahu dalam meneruskan usaha-usaha pembangunan dan kemajuan Islam di negara ini. Di sini saya tegaskan bahawa tanpa kesatuan dan kesungguhan sesama kita nescaya cita-cita meninggikan kalimah Allah akan menjadi sia-sia dan angan-angan kosong. Pada ketika itu tidak mustahil nikmat keamanan dan keharmonian yang selama ini kita kecapai akan ditarik oleh Allah s.w.t. lantas jadilah kita menerima nasib seperti negara-negara yang lain berkeadaan huru hara dan kacau bilau di mana rakyatnya menjadi hina, tersiksa dan pelarian di tanah air sendiri.

Datuk Yang di-Pertua, Malaysia sememangnya merupakan sebuah negara Islam yang sedang membangun dan seiring mendapat perhatian dunia. Ini tidak lain kerana pembangunan ekonomi dan kestabilan politiknya sekalipun penduduknya terdiri dari pelbagai kaum, bangsa dan agama ke arah negara ini terserlah apabila ia berjaya menjadi contoh....

Tuan Hassan bin Mohamed [Besut]: *[Bangun]*

Timbalan Yang di-Pertua [Dato' Haji Muhamad bin Abdullah]: Yang Berhormat, ada yang berdiri tapi dia dah sebut awal-awal

Datuk Haji Mohd. Ali bin Haji Hassan: Saya dah sebut awal-awal, tak faham ke bahasa saya tadi.ganggu kacaulah...

Timbalan Yang di -Pertua [Dato' Haji Muhamad bin Abdullah]: Ya, saya hanya memaklumkan sahaja. Sila teruskan.

Datuk Haji Mohd. Ali bin Haji Hassan: Sampai setakat mana tadi? Kelak dalam memajukan Islam dan meninggikan taraf hidup rakyatnya yang beragama Islam tanpa menyekat kebebasan beragama bagi penganut-penganut agama lain dan tanpa menindas mana-mana kaum di negara ini. Negara ini sedang berusaha gigih ke arah mewujudkan sebuah masyarakat majmuk beridentitikan nilai-nilai Islam. Ini berasaskan kesedaran betapa pembangunan fizikal atau material tanpa disertai dengan pembangunan rohani lambat laun akan menjurangkan negara ke jurang kehancuran.

Lantaran sikap negatif dan salah laku 'menyerekatkannya'. Dalam erti kata lain, rakyat di negara ini akan diacu mengikut acuan Islam dan nilai-nilai murni sejagat serta pembangunan akan ditimpa nanti tidak akan berpisah dari dasar-dasar yang digariskan oleh Al-Qur'an dan Sunnah. Pendek kata, pembangunan fizikal dan ekonomi dalam menempuh alaf baru....

Tuan Hassan bin Mohamed: [*Bangun*]

Timbalan Yang di-Pertua [Dato' Haji Muhamad bin Abdullah]: Ada yang berdiri lagi Yang Berhormat.

Datuk Haji Mohd. Ali bin Haji Hassan: ...alaf baru adalah seiringan dengan pembangunan rohani....

Timbalan Yang di-Pertua [Dato' Haji Muhamad bin Abdullah]: Dia tidak bagi.

Datuk Haji Mohd. Ali bin Haji Hassan:rakyat dan pemimpin lain. Yang Berhormat Datuk Yang di-Pertua, pembangunan Islam di Malaysia kini jelas terbukti jika dibandingkan perkembangannya sekarang dengan kedudukan Islam pada zaman awal pertumbuhannya di Nusantara iaitu abad ke 12 yang lampau dan kemudian di awal kemerdekaan negara Islam bukan sahaja telah mendapat tempat dalam dasar pentadbiran negara malahan semua arah tuju negara dan proses pembangunannya beransur-ansur dipandu ke arah sasaran yang bertaut dengan nilai-nilai Islam sejagat. Kebanyakan dasar, strategi dan pelaksanaan umpamanya tidak semua dilabelkan dengan perkataan Islam tetapi maksud dan terasnya adalah berasalkan ajaran Islam, berpandukan Al-Qur'an, Sunnah, Qiyas dan Ijmak Ulama.

Datuk Yang di-Pertua, masjid adalah tempat umat Islam mendirikan solat wajib lima waktu secara berjemaah di samping menjadi tempat beramal, masjid juga menjadi tumpuan umat Islam menjalankan pelbagai aktiviti yang berhubungkait dengan kepentingan dan kemajuan masyarakat Islam. Pentingnya, peranan masjid ini menjadikan masjid lebih terhormat daripada bangunan lain di bumi Allah ini. Masjid adalah rumah Allah yang menjadi milik semua orang Islam dan lambang agama Islam yang suci. Pada zaman Rasulullah s.a.w. dan khalifah Al-Rasyidin, masjid dan surau-surau dijadikan satu pusat pertemuan untuk melakukan ibadat, tempat bermuzakarah, tempat membina insan, merancang strategi, tempat pembelajaran agama dan lain-lain lagi.

Apalah salahnya kita mengimbas kembali zaman kegemilangan masjid pada waktu lampau dan mengharapkan unsur-unsur itu pada waktu sekarang apabila kita teliti, jika masjid dijadikan pusat aktiviti Islam, pengaruh masjid dapat melampaui semua institusi di Malaysia ini. Masjid dapat dijadikan pusat tuisyen, pusat perhimpunan ilmiah dan lain-lain lagi dan janganlah dijadikan masjid dan surau tempat menyalahkan umat Islam dan jadikan rumah Allah yang mulia ini tempat memfitnah, mengumpat dan mengata dengan perkataan yang boleh mengaibkan seseorang. Allah amat mengetahui segala perbuatan kita semua.

Datuk Yang di-Pertua, menyedari dari hakikat inilah maka kerajaan telah berusaha supaya memberikan peruntukan yang besar bagi memakmur dan mengimarahkan institusi masjid di Malaysia. Saya ingin menyeru pihak-pihak yang berkenaan agar melaksanakan usaha yang lebih gigih lagi demi menjalankan masjid dan surau sebagai institut masyarakat yang sebenarnya. Di samping itu juga usaha mempromosi masjid sebagai institusi masjid perlu dijalankan dengan lebih agresif lagi agar rakyat dan masjid menjadi begitu sehati.

Datuk Yang di-Pertua, di samping itu institusi pengajian agama di Malaysia semakin pesat membangun baik daripada kerajaan ataupun swasta, institusi ini bakal melahirkan insan-insan yang kamil dan rabbani. Kita patut mengambil berat tentang sukatan-sukatan pembelajaran di institusi-institusi ini. Kita tidak mahu melahirkan pelajar-pelajar yang hanya *exam oriented*, dengan izin yakni berorientasikan peperiksaan tetapi dapat melahirkan insan yang dapat berkongsi satu mempergunakan

ajarannya untuk masyarakat. Kita sering berbangga dan mengagungkan peninggalan masa silam betapa pada ketika itu penghayatan ilmu dan amalan keagamaan telah menjadikan generasi tersebut menimba tamadun yang tinggi tanpa mengklasikan aspek-aspek keimanan dan kemanusiaan.

Satu usaha yang lebih gigih perlu dilihat dan dilaksanakan supaya kita bukan saja menjadi umat yang bangga dengan keagongan sejarah tetapi yang lebih membanggakan lagi kita menjadi umat yang mencipta sejarah. Biar kita mewujudkan seramai mungkin Ibn Sina iaitu seorang ilmun agama yang juga pada ketika yang sama seorang pakar perubatan dan juga Hassan Al-Hatim iaitu ilmun agama yang juga seorang ahli fizik, optik ataupun mata. Tegasnya tidak berlaku pemisahan di antara kecemerlangan keilmuan dan penghayatan agama dengan disiplin-disiplin ilmu yang lainnya. Saya nampak usaha ini sedang berjalan namun ditingkatkan sebab kita adalah umat yang berlawanan, hanya dengan kita akan berjaya menempuhi cabaran globalisasi.

Datuk Yang di-Pertua, dalam konteks yang sama juga memandangkan Kementerian Pendidikan berhasrat mewajibkan pendidikan prasekolah harus turut memastikan usaha melahirkan generasi yang saya sebutkan tadi dimulakan di peringkat ini. Kata pepatah, *'melentur buluh biar dari rebungnya.'* Aspek latihan guru prasekolah ini perlu diberikan perhatian serius supaya mereka benar-benar dapat menghayati organisasi ini semua.

Datuk Yang di-Pertua, sekarang saya hendak menyentuh beberapa perkara yang berkait dengan kementerian-kementerian yang berkenaan. Yang pertama saya menyentuh kepada Kementerian Kesihatan berhubung dengan masalah pesakit-pesakit dialisis atau pencuci darah yang sekarang ini begitu banyak sekali dialami di negara ini. Saya ingin mencadangkan kepada kerajaan supaya dapat memperuntukkan satu peruntukan yang besar supaya dapat membelikan alat-alat pencuci darah bagi pesakit dialisis di hospital-hospital kerana pada hari ini alat-alat itu amat kekurangan dan banyak pesakit-pesakit yang tidak mampu untuk membayar di hospital-hospital swasta dan kerana sebab itulah rasa saya peruntukan yang khas dapat diberikan bagi tujuan yang saya sebutkan tadi.

Yang kedua Yang Berhormat berhubung dengan kes mahkamah. Saya ingin menyentuh berhubung dengan perceraian di mahkamah yang memakan masa yang agak lama. Sebagaimana yang kita sedia maklum banyak kes yang ditangguh, banyak kes-kes kecil seperti kes jalan raya, kes-kes melanggar undang-undang lalu lintas, kes tunjuk perasaan, kes dera dan sebagainya, kes kemalangan dan sebagainya tidak termasuk kes-kes besar seperti pembunuhan, kes dadah, kes tipu syarikat dan lain-lain lagi.

Maka saya ingin mencadangkan di Dewan yang mulia ini supaya diadakan satu mahkamah khas untuk membicarakan kes yang kecil dengan dilantik lagi tambahan pegawai-pegawai undang-undang seperti majistret dan sebagainya termasuk pendakwa yang akan dapat menyelesaikan dengan segera, maka dengan ini juga dapat mengurangkan perbelanjaan yang besar bagi mengendalikan satu kes-kes sekiranya ia memakan masa yang lama terpaksa dibayar dengan wang yang banyak kepada mereka yang terlibat dalam perceraian termasuk hakim, pendakwa, saksi, kakitangan lain dan sebagainya, ia akan memakan belanja yang besar.

Yang Berhormat Datuk Yang di-Pertua, kedua, berhubung dengan masalah laluan empat hala kepada enam hala di kawasan laluan ke Pasir Gudang di kawasan saya Yang Berhormat. Tempat pelabuhan ini adalah satu kawasan tempat yang mana sebahagian besar ekonomi negara bergantung kepada kawasan Pasir Gudang kerana di mana terletak industri-industri besar yang telah dibangunkan begitu pesat sekali di kawasan Pasir Gudang dan ini melibatkan banyak kenderaan-kenderaan, banyak lori dan sebagainya dan pernah berlaku kalau berlaku beberapa kemalangan ia akan memakan masa yang lama untuk lalu lintas menyelesaikan masalah di jalan yang tersebut. Maka saya minta pihak Yang berkenaan supaya dapat menyejajarkan membuat lorong enam atau lapan di kawasan lebuh raya Pasir Gudang.

Datuk Yang di-Pertua, satu lagi saya tahniah atas pengecualian duti setem atas surat cara pindah milik dan seterusnya dilanjutkan tempoh hari oleh kerajaan mulai Januari 2000. Timbul masalah, Datuk Yang di-Pertua, ialah bayaran pembeli yang lambat membuat bayaran kepada pemaju maka pemaju telah mengenakan satu interest yang besar. Sebenarnya ia bukan salah kepada pembeli tetapi kerana sebahagian daripada pembeli itu memohon pinjaman kerajaan dan sebahagiannya memohon dari pihak bank. Jadi, bank dan kerajaan lambat membayar kepada pemaju, bila lambat bayar kepada pemaju, jadi yang pembeli dikenakan interest yang tinggi. Saya ingat ada satu undang-undang supaya mana-mana pinjaman yang lambat diterima oleh pemaju bukan disebabkan oleh pembeli tetapi disebabkan oleh kerajaan mengeluarkan pinjaman yang lambat dan juga pemaju maka ia kenakan interest kepada pembeli. Jadi, saya mohon kerajaan dapat menelitikan perkara ini dan dijadikan satu undang-undang tidak dikenakan interest kepada pembeli.

Dan satu lagi saya menyokong ada cadangan untuk mewujudkan siaran tambahan saluran di TV yang ada sekarang TV1 dan TV2 dan seterusnya dicadangkan TV3 khas untuk hal-hal agama sahaja. Ini bertujuan, saya ingat baik, kita dapat memberikan pendidikan agama yang sebenar melalui TV dan juga kita dapat mengenakan hukum-hukum fardhu ain, fardhu kifayah, memuatkan rancangan bagi mengeluarkan fatwa-fatwa yang sebenar supaya tidak mengelirukan umat Islam dengan berbagai fatwa daripada orang yang tertentu sekarang ini maka dengan adanya program ini ia dapat mengeluarkan beberapa fatwa yang telahpun diputuskan oleh Majlis Fatwa.

Timbalan Yang di-Pertua [Dato' Haji Muhamad bin Abdullah]: Minta gulung Yang Berhormat.

Datuk Haji Mohd. Ali bin Haji Hassan: Gulung ya?

Timbalan Yang di-Pertua [Dato' Haji Muhamad bin Abdullah]: Gulung.

Datuk Haji Mohd. Ali bin Haji Hassan: Baru nak lipat.

Tuan Yang di-Pertua, ucapkan terima kasihlah kerana mengizinkan juga – pembentukan jalan luar bandar. Terima kasihlah ada RM201,000,000 telah diperuntukkan dalam Belanjawan 2000 tetapi Tuan Yang di-Pertua, saya ingat tidak cukup kerana jalan luar bandar ini banyak lagi termasuk negeri Johor tetapi Alhamdulillah, Kerajaan Negeri Johor telah memperuntukkan melalui Kumpulan Prasarana KPRJ dan sebahagian besar telah diselesaikan tetapi kita harap Kerajaan Pusat juga dapat membantu dalam menyelesaikan jalan ini.

Satu lagi saya hendak mencadangkan kepada TV – adakan satu program khas untuk pendidikan dianggap sebagai tuisyen. Kini Tuan Yang di-Pertua, ada ibu bapa yang tidak mampu menghantar tuisyen tetapi kalau melalui TV dapat ditetapkan satu masa mengadakan tuisyen. Jadi, anak-anak kita yang ibu bapa tidak mampu untuk hantar tuisyen dapat melihat daripada TV ditetapkan satu jam dalam ilmu-ilmu yang tertentu seperti Ilmu Hisab, Fizik, Kimia dan sebagainya maka dijadikan sebagai satu rancangan khas untuk anak-anak kita supaya anak-anak kita yang ada di seluruh negara dapat melihat pendidikan daripada saluran TV.

Timbalan Yang di-Pertua [Dato' Haji Muhamad bin Abdullah]: Terima kasih Yang Berhormat, sudah habis Yang Berhormat.

Datuk Haji Mohd. Ali bin Haji Hassan: Okay. Tuan Yang di-Pertua, saya ucapkan banyak terima kasih kepada Tuan Yang di-Pertua.

Timbalan Yang di-Pertua [Dato' Haji Muhamad bin Abdullah]: Hulu Langat.

11.36 pagi

Tuan Haji Badrul Hisham bin Abdul Aziz [Hulu Langat]: Terima kasih Tuan Yang di-Pertua. Izinkan saya menyentuh beberapa perkara walaupun telah disentuh oleh rakan-rakan yang lain dan memberikan sedikit pandangan.

Saya mulakan Tuan Yang di-Pertua, dengan kes-kes penderaan di kalangan pembantu rumah asing yang sekali lagi nampaknya telah mengegarkan masyarakat Malaysia. Saban hari ada sahaja kes sedemikian yang dilaporkan dan keadaannya semakin banyak, semakin mengerikan.

Saya ucapkan syabas kepada pihak media - di mana saya berasal dahulu, yang sangat sensitif dan prihatin mengenai masalah ini. Media arus perdana telah memainkan peranan yang sangat besar menonjolkan kes-kes penderaan terhadap pembantu rumah. Malah sebelum insiden ini pun, pihak media telah banyak kali memaparkan kisah-kisah menyayat hati di kalangan masyarakat kita.

Kes-kes penderaan sedemikian telah membawa imej yang amat buruk kepada negara kita seolah-olah negara ini adalah budaya masyarakat kita dan bersifat menyeluruh sedangkan yang mendera hanyalah segelintir dan kesnya terpinggir pula. Gejala ini boleh menjejaskan hubungan dua hala negara kita dengan negara asal pembantu rumah berkenaan yang pada dasarnya adalah jiran-jiran kita berlaku.

Selain daripada menunding jari dan menyerahkan kepada kerajaan atau kementerian-kementerian tertentu, apakah peranan dan sikap kita sebagai anggota masyarakat terhadap kes-kes seperti ini? Jika kita boleh menawan hati para pengundi dan orang ramai kenapa kita tidak berupaya menjadikan anggota-anggota masyarakat kita sebagai masyarakat yang penyayang dan berperikemanusiaan?

Jika ada pihak yang boleh mengalih pandangan masyarakat untuk membenci kerajaan, kenapa mereka tidak berusaha untuk membenci kekejaman. Jika mereka mencari keadilan kenapa keadilan yang sama tidak disematkan kepada masyarakat untuk meletakkan pembantu rumah sebagai manusia biasa. Jika dahulu orang Melayu tidak memegang bendera roket, tetapi kini ada pihak yang memuliakan bendera yang sama. Kenapa kita tidak jijik kepada kekejaman dan memandang mulia sesama manusia. Ada banyak lagi persoalan yang boleh ditimbulkan tetapi jelaslah sebagai organisasi di luar kerajaan tidak banyak yang boleh dilakukan.

Oleh itu, Tuan Yang di-Pertua, saya mencadangkan agar kita kembali kepada kerajaan. Kerajaan harus mempunyai peraturan yang lebih ketat terhadap penggunaan perkhidmatan pembantu rumah asing. Antaranya izinkan saya mencadangkan:

Pertama, ejen-ejen hendaklah bertanggungjawab terhadap pekerja yang dibekalkan. Mereka wajar diwajibkan menemui pembantu berkenaan sebulan sekali untuk mendapatkan laporan, ejen-ejen juga harus dapat mengesan pergerakan pekerja berkenaan. Untuk memastikan mereka tidak bertukar majikan atau tersadai di rumah-rumah urut atau pusat-pusat pelacuran. Para ejen wajib mengetahui sama ada pekerja berkenaan telah bertukar pekerjaan atau sebaliknya. Sekiranya kita meletakkan pembantu rumah ini setaraf dengan manusia biasa seperti mereka yang berjawatan doktor, pembantu jururawat-jururawat, jurutera dan sebagainya, pasti kita juga dapat mengawasi dan memantau mereka. Doktor, jururawat dan jurutera asing dapat dikawal, kenapa pembantu rumah tidak dapat dikawal.

Kedua, kerajaan sama ada melalui Kementerian Dalam Negeri atau Jabatan Buruh harus memantau juga para majikan pembantu rumah berkenaan. Keupayaan majikan dan status majikan harus dititikberatkan. Peraturan yang membenarkan hanya suami isteri bekerja yang boleh menggaji pembantu rumah asing harus dikuatkuasakan sepenuhnya. Kes-kes yang berlaku kebelakangan ini membuktikan bahawa penderaan dilakukan oleh rakan-rakan sekatil yang bukan suami isteri. Peraturan sudah ada, kenapa pelaksanaannya tidak kukuh?

Ketiga, hukuman berat dan benar-benar serik harus dikenakan terhadap majikan yang mendera para pembantu rumah. Jika hukuman wang ringgit tidak dapat menakutkan para majikan, silalah kenakan hukuman penjara mandatori. Saya balik kepada perwakilan belia. Walaupun baru sebulan melepasi usia belia yang didefinisikan oleh Dasar Pembangunan Belia Negara, iaitu mereka yang berusia 15-40 tahun, izinkan saya menyentuh sedikit mengenai peranan dan perwakilan belia.

Menurut Rancangan Malaysia Ketujuh (1996-2000), adalah dianggarkan bahawa pada tahun ini, jumlah belia di negara kita ialah 10.93 juta orang. Ini bermakna para belia menjangkau hampir 50% daripada keseluruhan penduduk negara kita dan jumlah ini semakin meningkat. Sumbangan mereka kepada negara dan pembangunan negara amat besar dalam dua perspektif berbeza tetapi berkaitan. Pertamanya, mereka telah berbakti kepada masyarakat dalam bidang kesukarelaan dan kedua, dalam perspektif kekuatan dan keistimewaan dari sudut organisasi. Banyak sekali yang telah mereka lakukan.

Lihatlah betapa banyaknya gerakan atau persatuan belia yang wujud di negara kita. Saban hari, ada sahaja program yang melibatkan belia. Mereka bergerak dalam pasukan pakaian seragam, menjadi sukarelawan, pembimbing dan penggerak organisasi dan sebagainya. Mereka juga menjadi benteng negara dalam bidang keselamatan, budaya, perpaduan, kesenian, jatidiri dan sebagainya. Wajar sekalilah pemimpin-pemimpin mereka ada di antaranya yang berada di Dewan yang mulia ini dan juga di Dewan-dewan Undangan Negeri. Terima kasih juga kepada kerajaan yang telah menjadikan seorang pemimpin belia sebagai Menteri Belia dan Sukan di negara ini.

Izinkan saya mencadangkan agar para belia diberi pengiktirafan yang lebih tinggi, antaranya Tuan Yang di-Pertua, ialah:

- Wakil-wakil belia diberi kesempatan sebagai anggota delegasi negara ke perhimpunan-perhimpunan dan persidangan antarabangsa yang sesuai - bukan sahaja di dalam malahan juga di luar negara;
- Wakil-wakil belia dijemput menjadi Ahli Mesyuarat Pembangunan Daerah;
- Wakil belia dilantik sebagai Ahli Majlis Kerajaan Tempatan;
- Mewujudkan Majlis Perundingan Belia di setiap daerah;
- Wakil belia turut dilantik menjadi anggota Lembaga Pengarah atau Penasihat (di mana sesuai) agensi kerajaan di semua peringkat; dan
- Kementerian dan Kerajaan Negeri menubuhkan Majlis Perundingan Belia sebagai forum para belia bertindak sebagai penyampai dan penerima maklumat.

Saya cukup yakin, sekiranya diberi kesempatan dalam ruang-ruang seperti yang dicadangkan ini, para belia akan mempunyai keyakinan yang lebih tinggi terhadap peranan dan tanggungjawab masing-masing. Saya cukup yakin, bahawa para belia ini kelak akan dapat menyuarakan pendirian dan buah fikiran mereka melalui forum rasmi dan diiktiraf di samping dapat menyuarakan masalah dan kritikan mereka.

Dengan kesempatan menjadi wakil dalam badan-badan yang disyorkan tadi, para belia dapat menjadikannya sebagai latihan kepimpinan mereka pada masa hadapan serta dapat pula menyesuaikan diri dengan pelbagai lapisan masyarakat yang dianggotai. Dengan menjadi Ahli Majlis di kerajaan tempatan atau Ahli Mesyuarat Pembangunan Daerah para belia dapat mengikuti perjalanan, perancangan dan pelaksanaan program-program belia yang berkaitan. Walaupun masa ini, Pegawai Belia Daerah menganggotai Mesyuarat Pembangunan Daerah, wakil dari pertubuhan belia masih lebih relevan. Maklumat dan arahan dapat disampaikan terus kepada pihak belia tanpa perlu menunggu penyaluran pihak kedua, iaitu Pegawai Belia Daerah.

Buat masa ini, belia baru mendapat tempat dalam JKKK sahaja. Lihatlah betapa berkesannya para belia kita dalam JKKK di kampung-kampung. Sebagai AJK jawatankuasa berkenaan, mereka selalunya diberi amanah sebagai Pengerusi Biro Belia. Oleh kerana para belia telah membuktikan keupayaan dan peranan mereka di JKKK, sekarang sudah sampailah masanya untuk kita memberikan peluang ke tahap

yang agak lebih tinggi lagi. Adalah diharapkan perakuan Majlis Belia Malaysia melalui Persidangan Dewan Tertinggi pada 23 Januari lalu yang mahukan perwakilan belia dimartabatkan akan dapat tercapai sepenuhnya.

Tuan Yang di-Pertua, izinkan saya menyentuh sedikit mengenai bayaran perkhidmatan di hospital-hospital swasta. Perkhidmatan hospital swasta di negara ini sudah menjadi lumrah. Hospital ini telah berjaya menarik pihak-pihak yang berkemampuan sebagai pelanggan - sekaligus mengurangkan jumlah pesakit di hospital-hospital kerajaan. Ini adalah perkembangan yang sangat sihat supaya hospital kerajaan dapat pula memberi perkhidmatan yang terbaik kepada rakyat je lata.

Persoalan yang hendak saya bawa mengenai hospital swasta ini ialah bayaran atau caj yang dikenakan. Memang kita sedar, orang akan berkata, kalau tidak mampu hospital swasta pergilah ke hospital kerajaan. Tetapi ada rawatan-rawatan tertentu yang lebih efisien didapati dari hospital swasta kerana proses menunggu giliran di hospital kerajaan terlalu lama atau perkhidmatan berkenaan hanya ada di hospital swasta. Mahu atau tidak, orang ramai terpaksa juga menghadap hospital swasta ini.

Di sinilah masalah mereka bermula kerana bayaran terlalu tinggi. Sudahlah bayaran perkhidmatan tinggi, bayaran bilik dan penggunaan bilik-bilik rawatan juga luar biasa. Saya sendiri pernah mendapatkan rawatan di hospital swasta dan kos rawatan untuk pembedahan mengeluarkan batu karang sebesar 2 cm menelan belanja lebih daripada RM17,000. Saya ucapkan terima kasih kepada rakan-rakan di Dewan yang mulia ini yang telah membantu meringankan bebanan melunaskan bayaran tersebut. Manakan tidak tinggi bayarannya, Tuan Yang di-Pertua. Bayaran bilik sahaja melebihi RM200 semalam sedangkan di hotel-hotel lima bintang pun, kita ditawarkan RM100 sahaja semalam.

Perkakasan bantuan pembedahan (*disposal*) seperti kertas tisu, sarung tangan plastik, kertas dan plastik pelapik dikenakan caj lebih daripada RM2,000. Jika perkakasan tersebut demikian mahalnya, bayangkanlah caj-caj perkhidmatan yang lain. Malang sekali bagi seorang pakcik yang saya temui di hospital berkenaan, walaupun mengalami penyakit yang sama, pesakit ini terpaksa pulang tanpa mendapat rawatan. Bil-bil caj rawatan pula dihantar setiap hari atau paling lewat dua hari sekali. Baru sahaja sedar dari bius, pesakit sudah pengsan sekali lagi.

Saya berharap Kementerian Kesihatan dan pihak-pihak lain dapatlah menasihatkan hospital-hospital swasta ini janganlah mencari keuntungan melalui malapetaka yang dihadapi oleh para pesakit. Hospital-hospital ini harus juga memikirkan tanggungjawab sosial masing-masing di samping mencari keuntungan.

Bagaimanapun bukan semua hospital demikian halnya. Ada juga hospital seperti Hospital Mata Tun Hussein Onn yang mempunyai dana atau skim tersendiri untuk membantu pesakit-pesakit tertentu khususnya orang tua. Saya pernah merujukkan seorang ketua kampung dari kawasan saya untuk pembedahan mata di hospital berkenaan, yang akhirnya pesakit ini dikenakan caj rawatan kira-kira 20% sahaja.

Saya menyentuh sedikit perkara yang telah banyak disentuh oleh rakan-rakan, iaitu 'carca marba' di ASTRO program. Walaupun sudah banyak diperkatakan mengenai rancangan-rancangan di ASTRO, saya masih tertarik mengenai stesen penyiaran ini. ASTRO Ria saluran yang kononnya dikhaskan untuk rancangan-rancangan berbahasa Melayu, jelas tidak mencapai matlamat yang sebenarnya.

Penggunaan Bahasa Melayu di saluran ini amat 'carca marba'. Orang Melayu tidak lagi kelihatan mulia di ASTRO Ria jika hanya pandai berbahasa ibundanya. Mereka mesti cakap mat saleh dengan slanga. Mereka mesti berpelukan dan bercium. Pakai baju kebaya dan baju kurung tidak cun. Pakai mini 'sekerat' atau lebih baik tidak pakai langsung kelihatan anggun. Nak tahu mutu Bahasa Melayu di stesen ini, dengarlah kata-kata juruacaranya dalam rancangan Piramida yang berbunyi: "OK guys, let's see what's next" ataupun "Guys try your best", ini Bahasa Melayu di ASTRO Ria.

Dua tahun yang lalu, Ahli-ahli Parlimen dibawa melawat ke pusat penyiaran tersebut. Maka di sana mereka diperkenalkan kepada peneraju-peneraju utama, termasuklah seorang berketurunan Melayu yang menjadi Ketua ASTRO Ria. Khabarnya ketua berkenaan baru dua hari dilantik dan tidak berapa lama selepas Ahli-ahli Parlimen pulang, ketua berkenaan hilang jawatannya, benarkah itu? Saya harap pihak Kementerian berkenaan dapat meninjau perkara ini. Khabarnya juga, selepas itu, peneraju utama ASTRO Ria adalah bukan Melayu. Ini jugalah khabarnya menjadi punca 'carca-marba' bahasa di ASTRO Ria, sehinggakan pernah salah satu pengisian programnya ialah 'Christmas Countdown' ataupun 'Membilang Hari Menjelang Hari Krismas.' Ini semua Tuan Yang di-Pertua, memerlukan pembetulan.

Seperkara yang ingin saya sentuh ialah mengenai Kementerian Pendidikan. Izinkan saya membuat syor ini walaupun sudah ada Ahli Yang Berhormat lain yang menyentuh mengenai tajuk yang sama, Yang Berhormat Timbalan Menteri Pendidikan ada di sini. Buat masa ini, kerajaan-kerajaan negeri turut mempunyai sekolah-sekolah agamanya sendiri. Pentadbirannya diletakkan di bawah Jabatan Agama negeri masing-masing. Lazimnya sekolah-sekolah agama berkenaan tidak mempunyai guru yang secukupnya. Di samping itu, banyak juga guru yang tidak mendapat pendidikan formal sebagai pendidik.

Oleh kerana guru tidak mencukupi sedangkan bilangan murid banyak, maka pihak sekolah terpaksa mengambil sendiri guru-guru yang tidak terlatih. Mereka ini tidak digaji atau diberi elaun oleh pihak Jabatan Agama Negeri, malah elaun mereka dibiayai oleh pihak sekolah berkenaan. Senario ini melibatkan beberapa perkembangan yang kurang sihat. Pertama, guru-guru tidak mahir. Kedua, mereka tidak mendapat ganjaran sewajarnya yang boleh mengakibatkan mereka beralih mencari pekerjaan lain atau membuat kerja-kerja sambilan. Ini semua boleh menjejaskan mutu pengajaran. Akibatnya lagi pelajar-pelajar tidak mendapat pendidikan terbaik.

Sekolah Agama kelolaan negeri-negeri juga mempunyai sukatan pelajaran yang berlainan. Sekolah di Terengganu, umpamanya menggunakan sukatan pelajaran yang tidak sama dengan sekolah di Selangor. Akibatnya pelajar dari Terengganu tidak dapat diterima oleh sekolah di Selangor apabila berlaku perpindahan sama ada kerana keluarga bertukar tempat kerja ataupun sebagainya. Begitu juga pelajar dari Melaka sukar mendapat tempat di negeri lain umpamanya Kedah. Kesan yang lebih buruk daripada perkembangan ini ialah ada pelajar-pelajar tidak dapat meneruskan pengajian masing-masing semata-mata kerana perbezaan sukatan pelajaran. Hendak masuk ke sekolah kebangsaan pun tidak boleh juga kerana sukatan/silibusnya lagi jauh berbeza. Akhirnya terpaksa masuk ke sekolah swasta. Itupun kalau ibu bapa mereka mampu.

Oleh yang demikian saya berharap Kerajaan Pusat dapat mencari kaedah menyelesaikan masalah ini terma suklah meletakkan sekolah-sekolah tersebut di bawah Kementerian Pendidikan. Tujuan meletakkan sekolah ini di bawah satu bumbung hanyalah untuk memartabatkan sekolah itu sendiri. Di samping itu dengan latihan formal dan gaji yang setaraf dengan sekolah-sekolah biasa, mutu pendidikan dapat dipertingkatkan.

Timbalan Yang di-Pertua [Dato' Haji Muhamad bin Abdullah]: Sila gulung Yang Berhormat.

Tuan Haji Badrul Hisham bin Abdul Aziz: Ya, Dato'. Dengan meletakkan sekolah-sekolah agama di bawah Kementerian Pendidikan mobiliti pelajar-pelajar terjamin. Begitu juga dengan guru-guru yang boleh bertukar di seluruh negara. Dengan mobiliti ini kita dapat menyekat guru-guru daripada meletakkan jawatan semata-mata kerana terpaksa mengikuti suami ataupun isteri yang bertukar kerja.

Yang terakhir Tuan Yang di-Pertua, barangkali setengah minit juga. Skim Cepat Kaya. Skim Cepat Kaya atau pernah juga disebut sebagai Skim Ganda Wang Anda nampaknya masih belum lenyap di negara kita. Sebaliknya kini, mungkin belajar daripada sebuah parti di negara ini, mereka berselindung dengan nama Islam. Jika

dulu, skim-skim berasaskan piramid ini menjanjikan pulangan wang ringgit yang berganda kini dijanjikan pulangan yang lebih menarik. Ada yang bakal mendapat habuan motosikal dengan hanya membayar 25% daripada harga biasa. Begitu juga dengan ganjaran sebuah kereta yang boleh diperolehi dengan bayaran 45% atau 50% sahaja. Skim-skim ini bermula dengan cantiknya iaitu apabila piramid masih kecil. Tetapi apabila piramid membesar, lebih banyak penyertaan diperlukan dan tempoh menanti juga semakin lama akhirnya skim ini akan runtuh. Demikianlah kita pernah mendengar 'Skim Labu Peram' dan 'Pak Man Telo' serta yang lain-lain. Kini skim-skim itu kembali lagi.

Kerajaan hendaklah bertindak tegas membendung gejala ini kerana skim ini tidak menggalakkan orang bekerja sebaliknya hanya menunggu tempoh pelaburan mereka matang. Di samping itu, kutipan wang pelaburan juga besar jumlahnya. Saya berharap kerajaan dapat bertindak segera jangan tunggu lebih ramai orang menjadi gila. Sekian terima kasih.

Tuan Mohd Apandi bin Haji Mohamad: Jeli, Jeli...

Timbalan Yang di-Pertua [Dato' Haji Muhamad bin Abdullah]: Parit, Parit. Sila Parit.

11.55 pagi

Tuan Haji Mat Basir bin Rahmat [Parit]: Assalamualaikum wr. wb.

Timbalan Yang di-Pertua [Dato' Haji Muhamad bin Abdullah]: Waalaikumsalam wr. wb.

Tuan Haji Mat Basir bin Rahmat: Tuan Yang di-Pertua, saya dari Parit ingin mengambil bahagian dalam perbincangan belanjawan tahun 2000. Inilah ucapan sulung saya dalam Dewan yang mulia ini bagi mewakili kawasan saya iaitu Parit. Parit penduduknya ialah 70% orang-orang Melayu dan sebahagiannya ialah orang bukan Melayu, Cina dan India. Penduduknya ialah sebagaimana yang tuan-tuan maklum orangnya peramah dan suka bermesra. Cuma janganlah anggap orang Parit ini orang yang sombong, orang yang bongkak dan sebagainya sebagai mana satu pantun tuan-ya, satu pantun,

Parit bukan sebarang parit,

Dato' Dr. Haji Jamaluddin bin Dato' Mohd. Jarjis: *[Menyampuk]*

Tuan Haji Mat Basir bin Rahmat: Ini Parit.

Parit bukan sebarang Parit,

Parit tempat air meleleh,

Orang-orang Parit bukannya orang-orang yang lekeh,

Di sana banyak orang yang soleh. [Tepuk]

Tuan Yang di-Pertua, negara kita Malaysia adalah di antara negara yang paling subur di dunia yang dikurniakan oleh Allah s.w.t. dengan berbagai-bagai sumber alam semulajadi. Alangkah untungnya orang-orang yang bernama orang Malaysia dapat mendiami negeri seperti ini. Sejak merdeka sampailah ke hari ini. dahulu Perikatan sekarang UMNO atau Barisan Nasional. Di zaman Perikatan dulu rasa saya bolehlah dikatakan mewah juga kerana barang-barang murah dan rezeki melimpah-limpah. Buah-buah tempatan tidak laku dijual kerana terlalu banyak dan orang-orang kampung banyak sedekahnya. Kalau berjiran boleh dikatakan hari-hari merasa mereka bersedekah. Sekarang tiada lagi amalan seperti itu. Semuanya dijual contohnya seperti buah durianlah.

Parit memang negeri dusun durian. Durian busuk pun hari ini dijual ataupun durian jeruk hantu ataupun mangko. Buah-buah kurang, tanaman tidak menjadi dan berbagai-bagai lagi barangkali ini adalah amaran Allah s.w.t. yang tersebut di dalam al-Quran *[Membaca sepotong ayat]* Yang bermaksud,

“Negeri yang baik yang dipimpin oleh manusia-manusia takwa akan mengeluarkan tumbuh-tumbuhan yang begitu hebat tetapi negeri yang dipimpin oleh manusia yang tidak takwa begitu derita sekali hendak mengeluarkan hasil. Bahkan bunga banyak tetapi tidak menjadi”

Tuan Yang di-Pertua, kalau kita melihat ekonomi di bandar memang tidak kelihatan yang miskin, rumah semuanya besar-besar, kereta besar-besar tetapi kalau kita ke kampung masih ada lagi manusia yang makan sehari sekali dan tinggal di gobok buruk bahkan ada yang makan kanji yang tidak ada berperisa ataupun bubuh renciah ataupun rempah dan sebagainya.

Di dalam zaman para sahabat terdapat sahabat-sahabat yang kaya sebelum menjadi pemimpin iaitu Abu Bakar, Umar, Usman dan Ali tetapi setelah jadi pemimpin mereka miskin kerana kekayaannya dibelanjakan untuk kepentingan rakyat. Umar ibnu Khattab khalifah Islam yang kedua pernah tidak makan seminggu. Seorang raja, seorang pemimpin seorang khalifah tidak makan kerana tiada apa-apa yang hendak dimakan. Lalu sahabat bertanya, mengapa kelihatan pucat hari ini ya Amirul Mukminin? Tidak apa, tidak ada apa-apa sebenarnya.

Lalu sahabat menyiasat ke rumahnya didapati rumahnya tiada apa-apa. Hatta sebiji gandum pun tidak ada. Sahabat mengesyorkan,

“Ya, Amirul Mukminin, di Baitulmal kan ada. Macam-macam barang ada, tepung ada, beras pun ada, daging, susu, keju dan berbagai-bagai lagi. Ambillah siapa pun tidak tahu.” “Wallahhi. Demi Allah barang-barang tersebut adalah kepunyaan rakyat.”

Begitu telusnya pemimpin dahulu sampai sudah beribu-ribu tahun pun mereka sudah meninggal masih diingat, masih terkumat kamit mulut manusia mengingatinya.

Tuan Yang di-Pertua, membelanjakan harta rakyat dan wang negara adalah amanah Allah S.W.T. Satu sen pun tidak boleh hilang. Ini akan ditanya di hadapan Allah S.W.T sebagaimana firmanNya [*Membacakan sepotong ayat*]

“Kamu akan ditanya bertubi-tubi daripada Allah, daripada mana kamu dapat kekayaan”.

Inilah yang ditakuti oleh kita semua. Dalam zaman Saidina Umar ibni Khattab, bahkan Umar sendiri berjumpa dengan seorang gulam iaitu seorang budak lelaki pengembala kambing. Wahai gulam aku hendak membeli kambingmu ini, boleh? Tidak boleh tuan. Mengapa? Ini bukan kambing saya tuan tetapi kambing ini kepunyaan tuan saya. Juallah seekor dua, bukan nampak. Ya, tuan saya tidak nampak tetapi Allah nampak. Sebenarnya Saidina Umar bukan hendak beli tetapi acah sahaja, kerana hendak menguji budak tersebut. Begitulah amanahnya umat di zaman dahulu. Dari bawah sampai ke atas, mereka pegang amanah Allah sungguh-sungguh. Semoga iktibar ini menjadi panduan kepada kita semua.

Tuan Yang di-Pertua, mengenai rasuah. Saya tidaklah hendak menuduh kepada sesiapa cuma kita mengingatkan bahawa jika sekiranya kita kaya dan menjadi jutawan hasil dari rasuah dan makan wang rakyat Allah tidak menerima amalan-amalah kita. Allah akan biarkan di akhirat nanti, Allah tidak mahu menegur sapa sedangkan seluruh manusia mendapat pertolongan daripada Allah sebagaimana firman Allah [*Membacakan sepotong ayat*]

“Allah tidak akan menegur sapa pada orang ini dan tidak mahu berkata-kata bahkan tidak mahu membersihkan mereka. Bagi mereka adalah azab yang amat pedih”

Alangkah malangnya manusia-manusia yang ingin disanjung-sanjung oleh manusia, pada hal di sisi Allah tidak berguna walaupun satu sen.

Tuan Yang di-Pertua, mengenai politik. PAS tetap mengatakan bahawa politik adalah sesuatu yang suci. Hanya politik yang kotor kerana manusia yang mengotorkannya. Politik bermakna mentadbir dunia dengan al-Quran dan al-Sunnah. Atau dengan lain perkataan [*Membaca sepotong ayat*] Mendirikan agama dan politik dunia dengan al-Quran, dengan agama oleh kerana itu PAS bercakap di mana-mana tidak kira di dalam masjid atau di mana sahaja sekalipun sebab politik sesuatu yang suci bahkan dalam zaman Rasulullah s.a.w. sendiri, masjidlah tempat perbincangan dengan hal-hal keselamatan, ekonomi, perpaduan, sosial dan sebagainya.

Berlainan dengan politik sekular jatuh-menjatuh, penyelewengan, pembohongan, penipuan dan sebagainya. Sebab itu politik sedemikian tidak boleh, dan dilarang di dalam masjid.

Timbalan Yang di -Pertua [Dato' Haji Muhamad bin Abdullah]: Rompin berdiri Yang Berhormat.

Dato' Dr. Haji Jamaluddin bin Dato' Mohd. Jarjis: Point of order ini.

Timbalan Yang di -Pertua [Dato' Haji Muhamad bin Abdullah]: Rompin berdiri.

Dato' Dr. Haji Jamaluddin bin Dato' Mohd. Jarjis: Point of order 36(6).

Timbalan Yang di -Pertua [Dato' Haji Muhamad bin Abdullah]: Ya, point of order 36(6).

Tuan Haji Mat Basir bin Rahmat: Saya tidak tuju kepada sesiapa sebenarnya.

Timbalan Yang di -Pertua [Dato' Haji Muhamad bin Abdullah]: Duduk dulu Yang Berhormat.

Tuan Haji Mat Basir bin Rahmat: Saya tidak tujukan kepada sesiapa.

Timbalan Yang di -Pertua [Dato' Haji Muhamad bin Abdullah]: Duduk dulu Yang Berhormat.

Dato' Dr. Haji Jamaluddin bin Dato' Mohd. Jarjis: Bagilah saya

Timbalan Yang di -Pertua [Dato' Haji Muhamad bin Abdullah]: Duduk dulu Yang Berhormat biar saya buat keputusan. Duduk Yang Berhormat.

Tuan Haji Mat Basir bin Rahmat: Baru sekali dapat bercakap.

Timbalan Yang di -Pertua [Dato' Haji Muhamad bin Abdullah]: Point of order.

Dato' Dr. Haji Jamaluddin bin Dato' Mohd. Jarjis: Oleh kerana Yang Berhormat kata tidak menuju kepada sesiapa, saya tidak perlu teruskanlah.

Tuan Haji Mat Basir bin Rahmat: Terima kasih, Tuan Yang di-Pertua, saya ingin menyentuh Dewan orang ramai iaitu balai raya. Baru-baru ini ketika umat Islam menyambut ketibaan Aidilfitri kami di kalangan orang-orang PAS ingin menggunakan Dewan tetapi dihalang oleh JKK. Bermakna JKK lebih *power* daripada wakil rakyat. Oleh itu, kami mencadangkan agar tukar sahaja nama Dewan orang ramai kepada Dewan orang UMNO. Senang.

Dato' Dr. Haji Jamaludin bin Dato' Mohd. Jarjis: [*Bangun*]

Tuan Haji Mat Basir bin Rahmat: Tolonglah, masa tidak ada.

Dato' Dr. Haji Jamaluddin bin Dato' Mohd. Jarjis: Sebab Yang Berhormat menuduh.

Tuan Haji Mat Basir bin Rahmat: Itu bukan tuduh.

Dato' Dr. Haji Jamaluddin bin Dato' Mohd. Jarjis: Kalau di Terengganu begitu juga Yang Berhormat.

Tuan Haji Mat Basir bin Rahmat: Itu hakikat.

Dato' Dr. Haji Jamaluddin bin Dato' Mohd. Jarjis: Kami hendak buat Tadika dalam balai raya pun tidak diberikan dah di Terengganu. Kalau Yang Berhormat umumnya bersetuju saya bersetuju tetapi di Terengganu macam mana Yang Berhormat.

Tuan Haji Mat Basir bin Rahmat: Sebenarnya Terengganu baru lagi. Mana macam itu.

Dato' Dr. Haji Jamaluddin bin Dato' Mohd. Jarjis: Tetapi dia buat apa Yang Berhormat tidak bersetuju itu.

Tuan Haji Mat Basir bin Rahmat: Jadi kalau tulis situ dewan orang UMNO makna kami tidak minta sudah. Kami tidak akan minta. Tidaklah payah orang PAS meminta lagi. Di mana logiknya UMNO tidak membenarkan untuk menggunakannya sedangkan dewan-dewan orang ramai didirikan adalah hasil dari duit rakyat. Orang PAS juga bayar cukai.

Tuan Yang di-Pertua, UMNO sentiasa menuduh parti pembangkang khususnya PAS memutarbelitkan ayat-ayat al-Quran. Kita hendak tanya, manakah ayat-ayat Quran yang diputarbelitkan oleh PAS itu. Surah mana? Ayat mana? Ayat yang ke berapa?

Oleh kerana UMNO kkuatir takut hilang pengaruhnya, sebab itu mereka putar belitkan kenyataan. Ahli-ahli Parlimen PAS boleh dikatakan 85% daripada al-Azhar, Baghdad, Jordan, Indonesia, Mekah bukan senang hendak tafsirkan Quran kerana hendak tahu ilmu alat seperti nahu saraf, balaghah, bayan, badik dan maani. Bukan senang hendak tafsirkan al-Quran. Rasulullah melarang keras mentafsirkan al-Quran dengan pendapatnya sendiri sebagai mana sabdanya [*Membaca sebuah Hadis*]

“Barang siapa yang mentafsirkan al-Quran dengan pendapat sendiri maka tempatnya ambillah, dalam neraka”.

Jadi bagi orang-orang PAS masalah ini sangat berhati-hati, kami sangat berhati-hati.

[Timbalan Yang di-Pertua (Datuk Lim Si Cheng) *mempengerusikan Mesyuarat*]

Tuan Yang di-Pertua, saya ingin menyentuh mengenai biasiswa atau pinjaman biasiswa sekarang. Sekarang tidak ada lagi biasiswa. Murid-murid telah dibebankan dengan hutang. Setahu saya di zaman Perdana Menteri yang pertama, zaman Perdana Menteri yang kedua dan ketiga tidak ada pinjaman biasiswa seperti sekarang. Yang paling sedih sekali ialah apabila pelajar tersebut tamat daripada pengajiannya, sama ada dapat kerja atau tidak dapat kerja selama enam bulan mesti bayar balik. Belum tentu pelajar yang balik itu tentu dapat kerja. Kadang-kadang sampai bertahun-tahun baru dapat, itu pun sementara sahaja, kerja sementara.

Oleh itu kita merayu kepada kementerian yang berkenaan supaya dapat menghapuskan pinjaman tersebut. Dunia kata negara kita adalah negara yang paling kaya. Segala sumber ada. Dengan kokonya, dengan kelapa sawitnya, dengan minyak. Kalau kita bandingkan dengan Arab Saudi, minyak 0.50 sen segelen sedangkan di Malaysia ini minyak RM5, RM6 segelen.

Tuan Yang di-Pertua, menyentuh tentang Tabung Haji. Sepatutnya kerajaan tidak boleh sekat pemergian seseorang ke tanah suci. Mereka pergi untuk beribadat. Zaman mutakhir hari ini ibadat pun disekat. Ibadat di masjid disekat, di surau pun disekat. Ini sudah keterlaluan. Pemergian mereka ke tanah suci itu telah berlaku sejak zaman berzaman bukannya perkara baru. Banyak yang meninggal dunia hari ini kerana tidak sempat hendak menunaikan haji kerana menunggu kuota.

Timbalan Yang di-Pertua [Datuk Lim Si Cheng]: Yang Berhormat Parit, ada Yang Berhormat bangun.

Tuan Haji Mat Basir bin Rahmat: ..menunggu kuota. Oleh itu saya berharap kerajaan bertolak ansur tentang perkara ini. Janganlah memikirkan dari segi keuntungan semata-mata.

Tuan Wan Nik bin Wan Yusoff: Ini hendak tanya sikit sahaja. Siapa yang sekat sebenarnya dalam perkara yang berbangkit tadi?

Tuan Haji Mat Basir bin Rahmat: Yang menyekat sebenarnya Tabung Haji ini orang UMNOlah. *[Ketawa] [Tepuk]*

Timbalan Yang di-Pertua [Datuk Lim Si Cheng]: Yang Berhormat, Yang Berhormat Timbalan Menteri bangun, Yang Berhormat Rompin bangun.

Dato' Dr. Haji Jamaluddin bin Dato' Mohd. Jarjis: Yang Berhormat hendak kan satu kaedah kita yang baik...

Seorang Ahli: Sangka an jahat tu.

Seorang Ahli: Minta penjelasan

Dato' Dr. Haji Jamaluddin bin Dato' Mohd. Jarjis: Saya akan menghormati Yang Berhormat, tetapi tolong jangan tuduh saya.

Tuan Haji Mat Basir bin Rahmat: Habis cakap UMNO.

Dato' Dr. Haji Jamaluddin bin Dato' Mohd. Jarjis: Lepas ini saya bangun, saya akan tuduh Yang Berhormat pula.

Tuan Haji Mat Basir bin Rahmat: Cakap UMNO salahkah?

Dato' Dr. Haji Jamaluddin bin Dato' Mohd. Jarjis: Tidak, PAS cakap sahaja, dia cakap lain dia buat lain. Tadi Yang Berhormat cakap di balai raya – *[Seorang Ahli bercakap dengan Yang Berhormat Parit]* janganlah nasihat apa-apa, ada penasihatkah?

Beberapa Ahli: *[Ketawa]*

Dato' Dr. Haji Jamaluddin bin Dato' Mohd. Jarjis: Janganlah, bagilah peluang Yang Berhormat, dia wakil rakyat di kawasan dia, dibagikan mandat oleh rakyat dia, bukan kawasan Yang Berhormat bagi mandat kat dia.

Seorang Ahli: Tadi baru bagi kuliah subuh kat dia.

Dato' Dr. Haji Jamaluddin bin Dato' Mohd. Jarjis: Ah, saya bersetuju Yang Berhormat kita mesti bersikap adil, demokratik, tetapi tunjuk, jangan cakap sahaja.

Tuan Haji Mat Basir bin Rahmat: Tuan Yang di-Pertua, Yang Berhormat tidak bagi laluan.

Dato' Dr. Haji Jamaluddin bin Dato' Mohd. Jarjis: Minta penjelasan Yang Berhormat, saya menghormati Yang Berhormat.

Tuan Haji Mat Basir bin Rahmat: Dia tak bagi laluan tu. Nanti saya tarik baliklah cakap UMNO tu.

Dato' Dr. Haji Jamaluddin bin Dato' Mohd. Jarjis: Terima kasih.

Tuan Haji Mat Basir bin Rahmat: Tarik balik, tarik balik.

Dato' Dr. Haji Jamaluddin bin Dato' Mohd. Jarjis: Saya hormat Yang Berhormat. Saya terima kasihlah, saya hormat Yang Berhormat *[Ketawa]*

Tuan Haji Mat Basir bin Rahmat: Sebenarnya Kerajaan Pusat.

Dato' Zainal Abidin bin Zin: Minta penjelasan.

Timbalan Yang di -Pertua [Datuk Lim Si Cheng]: Yang Berhormat, Yang Berhormat Arau bangun.

Puan Hajah Mastika Junaidah binti Husin: Ya, Yang Berhormat bagi peluang.

Tuan Haji Mat Basir bin Rahmat: Sekarang ini tidak ada masa.

Puan Hajah Mastika Junaidah binti Husin: Saya cuma hendak tanya sikit sahaja Yang Berhormat. Fasal kuota ini.

Tuan Haji Mat Basir bin Rahmat: Saya tidak ada masa ini.

Puan Hajah Mastika Junaidah binti Husin: Yang Berhormat tu memang, memang selalunya PAS ini tak layan wanita ini.

Timbalan Yang di-Pertua [Datuk Lim Si Cheng]: Dia tak beri laluan.

Dato' Zainal Abidin bin Zin: Minta penjelasan.

Timbalan Yang di-Pertua [Datuk Lim Si Cheng]: Ya, Timbalan Menteri.

Dato' Zainal Abidin bin Zin: Minta penjelasan, minta penjelasan ya.

Timbalan Yang di-Pertua [Datuk Lim Si Cheng]: Ya.

Dato' Zainal Abidin bin Zin: Yang Berhormat bagi Parit ini berucap mengatakan kuota telah ditetapkan oleh orang UMNO atau pun kerajaan. Saya mendengar Yang Berhormat Ketua Pembangkang bercakap dalam Dewan ini mengatakan kuota ini bukan ditetapkan kerajaan kita, ditetapkan oleh Kerajaan Arab Saudi. *[Tepuk]* Sememangnya keterangan oleh Ketua Pembangkang itu benar. Jadi Yang Berhormat memalukan Ketua Pembangkang ni. Saya minta buat pembetulan, biar sama-sama bercakap betul dan itu adalah kebenaran.

Tuan Haji Mat Basir bin Rahmat: Sebenarnya yang swastanya, bukan yang kerajaannya, yang swasta.

Dato' Zainal Abidin bin Zin: Yang kuota ini sebenarnya tak ada swasta. Kuota ini yang ditetapkan oleh Arab Saudi. Kuota ini yang kita kelolakan, yang swasta kelolakan - kuota, kuotalah. Dia bukan kira. Itu biar bagi sama supaya rakyat tak keliru dengan ucapan Yang Berhormat ni.

Timbalan Yang di-Pertua [Datuk Lim Si Cheng]: Yang Berhormat bagi Parit, boleh gulung.

Tuan Haji Mahfuz bin Haji Omar: Sikit sahaja. Yang Berhormat bagi Parit, adakah Yang Berhormat sedar bahawa baru-baru ini Menteri di Jabatan Perdana Menteri ada menyebut bahawa kerajaan akan memastikan bahawa pemegang-pemegang pasport merah yang menunaikan fardu haji pihak kerajaan akan menghantar pihak imigresen untuk mengenal pasti mereka ini, dan ini satu ugutan dan satu ancaman terhadap mereka, sedangkan pemegang pasport merah ini mereka pergi dengan kebenaran, visa yang diberikan oleh Kerajaan Arab Saudi. Ini menunjukkan bahawa Kerajaan Barisan Nasional sendiri yang cuba menghalang daripada orang yang mendapat visa untuk pergi menunaikan fardu haji.

Seorang Ahli: Setuju, saya setuju.

Timbalan Yang di-Pertua [Datuk Lim Si Cheng]: Yang Berhormat Timbalan Menteri tunggu..

Dato' Zainal Abidin bin Zin: Saya hendak bagi penjelasan

Timbalan Yang di-Pertua [Datuk Lim Si Cheng] Tunggu jawapan daripada Yang Berhormat Parit.

Tuan Haji Mat Basir bin Rahmat: Jadi saya setuju dengan pendapat rakan saya daripada Pokok Sena.

Seorang Ahli: Terus, teruskan.

Tuan Haji Mat Basir bin Rahmat: Jadi oleh kerana masa....

Dato' Zainal Abidin bin Zin: Tak, ini penjelasan, penjelasan saya.

Timbalan Yang di-Pertua [Datuk Lim Si Cheng]: Timbalan Menteri yang minta.

Tuan Haji Mat Basir bin Rahmat: Sudah tak ada masa, ini sudah kira hendak menggulung dah ni.

Timbalan Yang di-Pertua [Datuk Lim Si Cheng]: Gulunglah. *[Ketawa]*

Tuan Haji Mat Basir bin Rahmat: Jadi bagi saya kalau ada sekiranya terkasar bahasa saya, umpamanya bertentangan dengan pendapat tuan-tuan, saya minta maaf. Jadi di antara kita sesama kita tidak ada perbalahan apa-apa. Saya sebenarnya alhamdulillah tak ada apa-apa. Tuan-tuan janganlah marah dan saya pun tak marah tuan-tuan. Kalau dahulu saya masuk dalam Dewan ini memang saya terpegun dan begitu gerun sekali tetapi apabila sekarang saya dah masuk, saya tak ada apa-apa lagilah.

Timbalan Yang di-Pertua [Datuk Lim Si Cheng]: Yang Berhormat ucap.

Tuan Haji Mat Basir bin Rahmat: Oleh kerana itu saya tamatkanlah ucapan saya ini dan saya ucapkan terima kasih kepada Tuan Yang di-Pertua.

Timbalan Yang di-Pertua [Datuk Lim Si Cheng]: Yang Berhormat bagi Mentakab.

Seorang Ahli: Mentakab tak cakap lagi ke, oh, belum. *[Ketawa]*

12.15 tgh.

Tuan Fu Ah Kiow [Mentakab]: Tuan Yang di-Pertua, saya ucapkan terima kasih di atas peluang yang diberi untuk mengambil bahagian dalam perbincangan Belanjawan tahun 2000. Saya juga ingin mengucapkan tahniah dan syabas kepada kerajaan, Kementerian Kewangan yang telah berjaya membentangkan satu belanjawan dalam satu suasana ekonomi yang kan bertambah baik dan terbukti bahawa daripada berbagai petanda ekonomi seperti pertumbuhan yang positif selama lima suku tahun berturut-turut daripada petanda bahawa ada peningkatan permintaan sama ada luar atau dalam negeri dan juga daripada indeks peningkatan, indeks Kuala Lumpur bahawa ekonomi negara memang telah pulih dan fakta ini tidak boleh dinafikan oleh mana-mana pihak maka saya merasa kesal bahawa kerana pihak pembangkang sentiasa memperkecil-kecilkan usaha dan kejayaan Kerajaan Barisan Nasional dalam memulihkan ekonomi negara.

Tuan Yang di-Pertua, namun demikian kita perlu mengambil iktibar daripada pengalaman kita yang pahit semasa kita menghadapi krisis ekonomi kita perlu terus bersikap terbuka dan bersedia untuk membuat apa-apa perubahan yang perlu dalam sistem ekonomi kita untuk memastikan pertumbuhan yang kita alami sekarang akan terus berterusan dan secara *sustainable*, dengan izin.

Tuan Yang di-Pertua, pasaran sekuriti merupakan satu komponen yang amat penting dalam pasaran modal. Suruhanjaya Sekuriti telah pun dipertanggungjawabkan untuk membangunkan industri sekuriti di negara kita secara teratur, secara sihat dan ke arah kematangan. Saya, walaupun saya sedar bahawa Suruhanjaya Sekuriti sentiasa merangka dan juga melaksanakan program-program untuk mempertingkatkan perundangan tentang industri ini dan juga mengambil langkah-langkah kawalseliaan dan juga penguatkuasaan dan juga pendidikan pelabur tetapi saya berpendapat masih ada beberapa aspek yang perlu diberi perhatian.

Tuan Yang di-Pertua, salah satu ciri industri sekuriti di Malaysia yang saya anggap kurang menyenangkan ialah bahawa *volatility* yang terlalu tinggi, khususnya di Bursa Saham Kuala Lumpur. Kita dapati kadangkala indeks Bursa Saham Kuala Lumpur dan juga harga setengah-setengah kaunter boleh berubah terlalu banyak, kerana indeks boleh berubah hampir 7% dalam satu minggu dan ada kadang-kala harga kaunter-kaunter tertentu boleh menaik atau menurun sehingga *up limit* atau

down limit dua kali satu hari. Dan juga didapati harga kaunter tertentu boleh naik walaupun syarikat tersebut di bawah lindungan Akta 176.

Ini semua membayangkan bahawa unsur spekulasi di Bursa Saham Kuala Lumpur adalah terlalu tebal dan saya anggap ini adalah satu ciri-ciri yang kurang sihat. Tuan Yang di-Pertua mungkin salah satu sebab yang mengakibatkan *the volatility* yang terlalu tinggi ialah cara orang tempatan, rakyat tempatan melabur iaitu biasanya kebanyakan mereka tidak mengasaskan kepada fundamental dan sebaliknya berasaskan kepada, dengan izin, tips, khabar angin dan sebagainya untuk membuat satu keputusan dalam pelaburan. Ini adalah sesuatu yang perlu dibetulkan dalam kalangan pelabur.

Sehubungan ini saya berpendapat pihak Suruhanjaya Sekuriti perlu meningkatkan lagi usaha dalam segi pendidikan pelabur dan saya difahamkan Suruhanjaya memang telahpun menjalankan beberapa kursus cuma saya dapati kursus ini biasa diberi kepada pelabur-pelabur institusi, mereka yang profesional dan kursus ini tidak disampaikan kepada pelabur awam atau orang awam.

Jadi, saya ingin mencadangkan bahawa Suruhanjaya Sekuriti memperbanyakkan kursus tersebut kepada orang awam dan memastikan caj untuk kursus tersebut adalah rendah dan mampu dibayai oleh orang awam. Saya juga ingin mencadangkan bahawa BSKL atau Suruhanjaya Sekuriti menubuhkan satu pusat maklumat supaya maklumat mengenai syarikat-syarikat, prestasi syarikat-syarikat selain daripada harga saham, lain-lain maklumat mengenai syarikat, mengenai program-program dan juga ramalan keuntungan syarikat disediakan oleh BSKL supaya orang ramai ada akses yang mudah untuk mendapatkan maklumat tersebut. Saya ingin cadangkan bahawa maklumat tersebut disediakan secara *on-line*, dengan cara itu kita akan dapat menyediakan maklumat dan supaya pelaburan di Malaysia boleh lebih berasas dan lebih profesional.

Tuan Yang di-Pertua, saya juga dapati ada syarikat-syarikat tersenarai kadang-kala membuat kenyataan akhbar mengenai dengan sesuatu projek yang tidak berasas atau membuat pengumuman tentang ramalan keuntungan yang tidak berasas dengan tujuan untuk meningkatkan harga di Bursa Saham. Ini boleh disifatkan sebagai suatu tindakan yang seperti tidak jujur semata-mata untuk meningkatkan harga di sesuatu kaunter sahaja.

Jadi, saya berharap pihak Suruhanjaya Sekuriti akan mengambil tindakan yang lebih tegas kepada syarikat-syarikat yang melakukan kesalahan tersebut untuk melindungi kepentingan pelabur tempatan khususnya pelabur-pelabur minoriti dan juga untuk mempertingkatkan lagi keyakinan pelabur-pelabur asing. Tuan Yang di-Pertua.....

Timbalan Yang di-Pertua [Datuk Lim Si Cheng]: Yang Berhormat, Yang Berhormat bagi Rompin bangun.

Dato' Dr. Haji Jamaluddin bin Dato' Mohd. Jarjis: Syabas kepada Yang Berhormat bagi Mentakab membawa isu memastikan supaya industri sekuriti negara ini terus berkembang dengan baik, dan juga mendapat pertumbuhan yang tinggi. Saya rasa sebelah sana pun main saham juga sekarang. So, nanti jangan dituduh pula kata bahawa syarikat saham ini meningkat, pasaran saham BSKL tinggi, sekarang ini saya rasa hand phone Ahli Parlimen PAS pun berbunyi juga beli tempahan, belian dan lain-lain juga. Kalau hari Isnin dia beli, hari Jumaat dia jual, ini PAS ni. Saya hendak bertanya adakah [Ketawa] Pokok Sena, dia tahu sebab dia baru telefon tadi.

Timbalan Yang di-Pertua [Datuk Lim Si Cheng]: Yang Berhormat.....

Dato' Dr. Haji Jamaluddin bin Dato' Mohd. Jarjis: Saya hendak bertanya kepada Yang Berhormat Mentakab, adakah Yang Berhormat.... sebab dia kacaulah ni. Yang Berhormat puas hati atau tidak, sebab tadi Yang Berhormat kata supaya tindakan dilaksanakan supaya diadakan suatu suasana pelaburan dalam pasaran saham, itu cadangan yang baik, tidak mahu mereka menyalahkan peraturan-

peraturan. Baru ini 27 orang, saya lupa jumlahnya, 17 atau 27, tindakan sudah diambil. Adakah Yang Berhormat berpuas hati yang menunjukkan kerajaan itu serius bukan hanya cakap sahaja, kita buat macam sebelah sana, cakap sahaja.

Tuan Fu Ah Kiow: Tindakan untuk mendakwa beberapa orang korporat baru-baru ini memang satu langkah yang patut dipuji sebab ia akan meyakinkan pelabur orang ramai bahawa sekuriti suruhanjaya ini memang serius dalam usaha mereka melindungi kepentingan orang ramai.

Tuan Yang di-Pertua, dalam perkara mempertingkatkan lagi perusahaan syarikat tersenarai, saya ingin mencadangkan supaya setiap syarikat dalam laporan tahunan mereka harus memberitahu kepada semua pemegang saham bagaimana mereka bercadang untuk menambah nilai pemegang saham iaitu apakah program-program dan strategi dalam tahun-tahun yang akan datang supaya nilai saham mereka akan ditambah iaitu ini usaha pewujudan nilai patut menjadi satu amalan di semua peringkat pengurusan syarikat tersenarai dan saya berharap ini dapat dimasukkan dalam kod etika atau kod etika pentadbiran iaitu *corporate governance* yang telah banyak diperkatakan oleh Suruhanjaya Sekuriti.

Sehubungan ini saya ingin tahu dan dapat penjelasan apakah perkembangan terakhir tentang pelaksanaan *corporate governance* di kalangan syarikat tersenarai, apakah sambutan daripada lembaga-lembaga pengarah daripada syarikat-syarikat tersebut.

Tuan Yang di-Pertua, satu ciri yang saya dapati mungkin perlu diperbaiki ialah di Bursa Saham Malaysia sekarang kita dapati para pelabur yang teramai dalam bursa saham ialah pelabur-pelabur runcit dan perseorangan, ini merupakan satu golongan yang biasa buat pelaburan yang kurang saintifik tidak berasas kepada fundamental, maka demi membangunkan industri sekuriti ke arah yang lebih matang, saya berpendapat kita perlu berusaha memperbanyakkan lagi pelabur institusi iaitu sama ada pelabur institusi tempatan ataupun pelabur institusi luar negeri atau asing.

Jadi, saya tidak ada angka berapa ramai pelabur merupakan pelabur runcit, mungkin pihak kementerian boleh beritahu kepada Dewan yang mulia ini, setakat ini, berapa peratusan pelabur yang merupakan pelabur runcit dan segala usaha perlu ditumpukan untuk menggalak lebih banyak lagi pelabur institusi dengan menggalak penubuhan tabung-tabung amanah sebab melalui pelaburan tabung-tabung amanah saya percaya tahap pelaburan kita akan lebih ke arah berprofesionalise dan berasas, dan ini adalah antara cara-cara kita dapat mengurangkan *volatility* di Bursa Saham Kuala Lumpur. Sehubungan ini....

Timbalan Yang di-Pertua [Datuk Lim Si Cheng]: Yang Berhormat, sila gulung, masa sudah cukup untuk Yang Berhormat, jadi saya mintalah.

Tuan Fu Ah Kiow: Okay, sekejap, lima minit ya.

Timbalan Yang di-Pertua [Datuk Lim Si Cheng]: Tidak boleh, satu minit.

Tuan Fu Ah Kiow: Tidak boleh lima minit, okay.

Akhirnya, satu perkara lagi saya ingin sentuh ialah tentang pengeluaran sijil untuk industri makanan halal. Tuan Yang di-Pertua, sebelum ini pengurusan dan pengeluaran sijil untuk industri makan halal ialah diuruskan oleh Jakim di mana caj cuma RM404 untuk setiap dua tahun setiap kilang, tetapi sejak perkara ini diswastakan caj telah meningkat sebanyak hampir 100-200 kali ganda iaitu untuk kaedah kini di bawah syarikat swasta, setiap item barangan makanan cajnya ialah RM1,000. Kalau ada pertukaran dalam *ingredient* dalam sesuatu makanan ia akan dikenakan satu caj RM250 untuk satu barangan makanan dan apa yang kita dapati ialah dalam caj dikenakan baru-baru ini oleh syarikat swasta maka syarikat yang mengeluarkan makanan tempatan yang halal akan kena bayar caj hampir 100-200 kali ganda kalau dibandingkan dengan caj lama.

Misalnya, satu syarikat yang mengeluarkan 30 barangan item barangan makanan kini caj untuk sijil halal ialah sebanyak RM30,000 setahun. Ini tentu merupakan satu caj yang terlalu tinggi dan kaedah ini akan menjejaskan usaha SMI untuk mengesport makanan halal dan saya percaya tujuan asal mengenakan sijil halal ialah untuk melindungi kepentingan umat Islam dan juga kalau ada pembangunan yang sistematik kita dapat menggalak dan meningkatkan makanan halal di pasaran antarabangsa. Tetapi saya berpendapat dengan penswastaaan aspek ini nampaknya telah ada lari dengan tujuan asal. Jadi saya minta pihak kementerian MITI memberi penjelasan dan apa yang dikatakan oleh saya kalau benar, saya minta perhatian untuk mengambil tindakan perbetulkan keadaan. Sekian, terima kasih.

Timbalan Yang di-Pertua [Datuk Lim Si Cheng]:Jeli.

12.27 tgh.

Tuan Mohd. Apandi bin Haji Mohamad [Jeli]: Terima kasih, Tuan Yang di-Pertua. Sebagai menunaikan tanggungjawab, [*membaca sepotong ayat al-Quran*] A1As ayat 4 dan 5,

“Saling pesan berpesan kepada kebenaran dan pesan berpesan kepada kesabaran.”

dan sebagai menunaikan tanggungjawab [*membaca sepotong ayat al-Quran*],

“Bertolong-tolonglah kamu kepada kebenaran dan juga kebajikan dan janganlah kamu bertolong-tolongan dalam pencerobohan terhadap ajaran Allah seperti menggalakkan lesen-lesen judi, lesen-lesen arak dan perkara-perkara maksiat. Takutlah kepada Allah, sesungguhnya seksa Allah sungguh pedih”.

Tuan Yang di-Pertua yang baik hati, saya minta kerana lima belas minit itu terlalu pendek, saya sampai 40 muka tidak ada gangguan, kalau hendak ganggu kita jumpa *debate prepare* perdana di mana-mana tempat.

Tuan Yang di-Pertua dan Ahli-ahli Dewan sekalian, Yang Amat Berhormat Perdana Menteri pada awal 1990-an telah berjaya menjual, telah menjaja idea MSC, dengan izin, di merata-rata tempat, syabas atas idea ini. Beliau bercita-cita untuk menjadikan perintis bagi dunia dalam mengimplimentasi dunia tanpa sempadan, halangan dan sekatan, maka dirancangan satu jalur 55 km x 15 km di negeri Selangor yang dikenali dengan 'Jaluran MSC'.

Di kawasan ini diharapkan semua pemikir elit IT, pengusaha-pengusaha kelas elit IT akan menjadikan jalur ini sebagai pengkalan mereka setidak-tidaknya pengkalan kedua selepas *silicon valley*. Maka diadakan mesyuarat yang pertama di Amerika Syarikat yang dihadiri oleh 90% Pengerusi Eksekutif atau Presiden atau Ketua Eksekutif syarikat-syarikat gergasi IT dunia. Ke mudian diadakan mesyuarat yang kedua yang pada kali ini tidak sangat dihadiri oleh Ketua-ketua Eksekutif syarikat gergasi IT dunia tetapi pemimpin-pemimpin pertengahan syarikat-syarikat gergasi IT ini sahaja.

Perjumpaan pertama mendapat liputan sangat meluas di muka-muka depan akhbar perdana negara kerana kegahan perjumpaan ini, tetapi pertemuan kedua kegahannya mula menurun di mana liputannya tidak sepertimana pertemuan pertama, tiba-tiba pertemuan ketiga sudah tidak kedengaran, apa hal ini? Nantikan jadi macam EAEC, dengan izin, East Asia Economic Caucus yang berapi-api satu ketika tetapi api '*hangat-hangat tahi ayam*'.

Tuan Yang di-Pertua dan Ahli-ahli Dewan yang mulia, daripada jawapan yang diberikan oleh Yang Berhormat Menteri Tenaga, Komunikasi dan Multimedia di dalam Dewan ini bahawa pelaburan yang banyak yang dijanjikan adalah pelaburan dari dalam negara dan sangat sedikit pelaburan dari luar negara. Yakni pelaburan dari dalam negara dijanjikan sebanyak RM2,793.9 juta manakala pelaburan dari luar negara dijanjikan sebanyak RM622.45 juta yakni sekitar 18%.

Ingat, ini janji belum pasti, pokoknya cita-cita Yang Amat Berhormat Perdana Menteri kurang berjaya kerana yang diharapkan ialah pelabur dari luar negara dan bukannya pelabur dari dalam negara. Microsoft melebarkan pengkalan keduanya selepas Seattle di Amerika Syarikat, bukan di Putrajaya, bukan di Cyberjaya tetapi di Karnatika yang tidak pernah bising pasal MSC pun. Dell, Steve Job dengan Lucent Technology dan Apple Macintosh mereka juga memilih India sebagai pengkalan kedua masing-masing. Kenapa Microsoft dan lain-lain yang dihebohkan untuk membuka pengkalan kedua di MSC tidak datang, apakah Microsoft silap atau kita tidak cekap.

Dalam diam-diam, Singapura mengumumkan program *Singapore Netnya* atau kadang-kadang disebut *Singapore-First* yang pada tarikh terkemudian daripada pengisytiharan MSC oleh Yang Amat Berhormat Perdana Menteri Malaysia. Dalam tempoh empat tahun lihat apa yang mereka capai, mereka boleh berbangga dengan Creative Technology milik Sun Han Woo, rakyat Singapura yang memulakan operasinya di *silicon valley*, yang menjadi pendahulu sistem suara dalam komputer. India boleh berbangga dengan Azim Hisham Premji yakni syarikat Wipro, orang yang terkaya di India sekarang bernilai US\$12 bilion. Taiwan dengan Standard Shih yakni Acer Computer, Paul Young dengan Yahoo yakni pemuda yang berusia 29 tahun yang bernilai US\$4 bilion, Jepun dengan Masayoshi Son yakni Softbank, pemuda berusia 42 tahun bernilai US\$75 bilion dan pada masa satu tahun lagi akan menjadi orang yang terkaya melepasi Bill Gates dan Shigata yakni syarikat Hikari Tsushin yang berusia 34 tahun.

Di mana rakyat Malaysia dalam peta *business IT* ini? Dalam majalah *Economist* dan *Times* pada akhir tahun 1999 menampakkan syarikat Malaysia jauh terperosok dalam *business IT* walaupun berbanding dengan syarikat-syarikat daripada Korea Selatan, Hong Kong, India dan Singapura. Inilah yang membimbangkan kita kerana apa, kita yang palu dahulu tetapi orang lain yang menari dahulu.

Tuan Yang di-Pertua dan Ahli-ahli Dewan yang mulia, yang sebenarnya *IT Genius, IT Creative, IT Innovative*, dengan izin, hampir mustahil boleh lahir dari negara yang mengamalkan demokrasi terhad, masih lagi terlekat dengan akta drakonion ISA, OSA, AUKU, debat perdana kita jumpa. Akta-akta ini tidak memungkinkannya wujud pemikir pengusaha cemerlang IT, lihat negara-negara yang benar-benar mengamalkan demokrasi tulen seperti Finland boleh berbangga dengan Nokia, India boleh berbangga dengan Wipro....

Dato' Dr. Haji Jamaludin bin Dato' Mohd. Jarjis: [*Bangun*]

Tuan Mohd. Apandi bin Haji Mohamad: Debat perdana kita jumpa, di UKM, di UM bila-bila masa.....

Dato' Dr. Haji Jamaludin bin Dato' Mohd. Jarjis: Sikit saja.

Timbalan Yang di-Pertua [Datuk Lim Si Cheng]: Yang Berhormat tak beri laluan.

Tuan Mohd. Apandi bin Haji Mohamad: ...Jepun - Softbank, Taiwan - Yahoo dan juga Amerika Syarikat, bahkan Singapura sendiri tidak melahirkan orang-orang yang terkedepan dalam bidang ini daripada *home grown*. Jadi kalau Malaysia hendak terkedepan maka sila kaji ISA, OSA, AUKU kerana ini semua perkosa minda dan jiwa rakyat.

Tuan Yang di-Pertua dan Ahli-ahli Dewan yang mulia, Yang Berhormat Menteri Kewangan dalam Belanjawan yang dibacakan pada 25 Februari 2000 yang sama sepertimana dibaca pada Oktober 1999, walaupun banyak anomali-anomali atau angkubah-angkubah ekonomi berubah pada muka surat 10 perenggan 14, ada menyatakan bahawa purata pendapatan bulanan isi rumah telah meningkat sebanyak 3.7% daripada RM2,392 pada 1998 kepada RM2,480 pada 1999. Di dalam keadaan jurang kumpulan kaya dengan kumpulan miskin luas, garis pengukur ini adalah kurang tepat. Saya hendak bertanya Dewan ini berapa ramaikah isi rumah di Rompin, Tambun, Batang Lupar, Kinabatangan, Tanjung Karang tidak termasuk YB-YB

mereka yang mempunyai pendapatan sebanyak ini. Guru besar sekolah rendah tidak mungkin - guru berijazah bekerja kurang lima belas tahun tidak mungkin yang dapat pendapatan ini. Hanya guru besar sekolah menengah, ketua jajahan, dan YB-YB di dalam Dewan ini yang pendapatan lebih besar daripada ini '*jangan menang sorak kampung tergadai*', jangan ambil mudah dengan data ini.

Begitu juga dengan paras kemiskinan. Kalau tidak silap saya paras kemiskinan dinaikkan sekali sahaja semenjak 1970 yakni RM300 seisi rumah kepada RM460 sedangkan inflasi tahunan sudah meningkat beratus kali ganda. Ini kayu pengukur yang kurang adil. Di Kuala Lumpur dengan pendapatan RM800 sebulan, di mana saudara boleh hidup? Di Pulau Pinang, di Johor Bahru, rumah sewa sahaja sudah sampai RM600 untuk rumah pangsa 2 bilik. Saya ingat di Rompin, Tambun, Kinabatangan, Tanjong Karang dan Batang Lupar, pendapatan RM460 seisi rumah dengan 5 ahli tidak mungkin mencukupi.

Justeru itu, kayu pengukur yang lebih tepat ialah angka ini berubah-ubah setiap tahun mengikut kadar inflasi dan tidak menggunakan kayu pengukur yang berusia hampir 2 dekad. Jadilah, yang terkini bukannya barangan muzium. Kalau pakai kayu pengukur lama, nanti syok sendiri kerana 2 tahun lagi tidak ada orang miskin, walhal hakikatnya beribu-ribu keluarga miskin di Rompin, Tambun, Batang Lupar, Kinabatangan, Jeli dan Tanjong Karang.

Tuan Yang di-Pertua dan Ahli-ahli Dewan yang mulia, Ahli Dewan Rakyat dipilih melalui pilihan raya yang diadakan 5 tahun sekali. Sudah tentu rakyat dan pengundi-pengundi mengharapkan sesuatu yang bermakna daripada Ahli Dewan Rakyat sekalian, seperti kehadiran di mesyuarat-mesyuarat Parlimen, menyuarakan masalah-masalah rakyat dan serius berfungsi di Parlimen. Ini termasuk untuk Yang Amat Berhormat Perdana Menteri, Timbalan Perdana Menteri, Menteri-menteri dan Timbalannya dan Ahli-ahli Dewan Rakyat, penyokong kerajaan dan Ahli-ahli Dewan Rakyat daripada Barisan Alternatif.

Di samping masyarakat Malaysia dahagakan perdebatan serius dan bermutu, di samping dapat melihat sendiri tentang perjalanan perdebatan di Parlimen ini kerana mereka hendak lihat bagaimana wakil-wakil yang mereka pilih berfungsi dan berperanan di Parlimen. Peluang ini tidak diperolehi oleh mereka melainkan Kerajaan Barisan Nasional yang ditonggak oleh UMNO membenarkan secara langsung sidang Parlimen atau sidang tertangguh sidang Parlimen kepada rakyat jelata. Insya-Allah, banyak syarikat di negara kita yang sanggup menaja siaran persidangan Parlimen ini.

Dato' Dr. Jamaludin bin Dato' Mohd. Jarjis: Point of order 35 (1).

Timbalan Yang di-Pertua [Datuk Lim Si Cheng]: Yang Berhormat, peraturan, peraturan.

Tuan Mohd. Apandi bin Haji Mohamad: Saya rasa tak betul tu. Tak betul.

Timbalan Yang di-Pertua [Datuk Lim Si Cheng]: Yang Berhormat.

Tuan Mohd. Apandi bin Haji Mohamad: Apabila siaran ini dibuat

Timbalan Yang di-Pertua [Datuk Lim Si Cheng]: Yang Berhormat, atas peraturan.

Tuan Mohd. Apandi bin Haji Mohamad: Point of order apa?

Timbalan Yang di-Pertua [Datuk Lim Si Cheng]: Ha, sebutkan.

Dato' Dr. Jamaludin bin Dato' Mohd. Jarjis: Yang Berhormat, bercakap tu mintalah pandang ke Pengerusi. *[Ketawa]*

Tuan Mohd. Apandi bin Haji Mohamad: Terima kasih kekanda Rompin.

Dato' Dr. Jamaludin bin Dato' Mohd. Jarjis: Ha, pusing tu..

Tuan Mohd. Apandi bin Haji Mohamad: Banyak lagi ini, terima kasih. Saya setuju.

Dato' Dr. Jamaludin bin Dato' Mohd. Jarjis: Apa, pusinglah sana.

Tuan Mohd Apandi bin Haji Mohamad: Saya setuju, okay. beralih pandangan, saya alih.

Dato' Dr. Jamaludin bin Dato' Mohd. Jarjis: Dia mengarah ke mari tertentu sana. *[Ketawa]*

Tuan Mohd. Apandi bin Haji Mohamad: Apabila siaran ini dibuat secara langsung akan membolehkan rakyat mengukur kebolehan dan kemampuan wakil-wakil yang mereka pilih dari segi prestasi, hujah-hujah dan kehadiran di Parlimen. Di samping Parlimen 99 akan menjadi lebih baik daripada Parlimen 64 yang dianggap sebagai Parlimen terbaik sepanjang Parlimen Malaysia. Perlu diingat Parlimen adalah institusi tertinggi untuk membuat, menggubal dan melulus undang-undang negara. Janganlah dinafikan hak masyarakat Malaysia untuk memantau dan mengikuti peluang ini.

Apa yang menyediakan kerajaan boleh mengadakan siaran secara langsung Perhimpunan Agung UMNO. Saya ingin bertanya kepada Dewan yang mulia ini – Mesyuarat Persidangan Parlimen atau Mesyuarat Agung UMNO yang lebih besar? Bayangkan betapa kebelakangnya negara kita dari sudut ini apabila negara-negara jiran seperti Thailand, Indonesia, Filipina telah mengadakan siaran penuh perjalanan Parlimen di kaca-kaca TV mereka untuk tontonan rakyat mereka. Jangan sebut negara-negara maju seperti Amerika Syarikat, Great Britain, Jepun dan lain-lain.

Saya sedih kerana saya banyak mendengar rintihan-rintihan daripada pegawai-pegawai kerajaan yang pernah hadir di sini, di Parlimen ini. Begitu juga wakil-wakil kedutaan yang sempat bertemu dengan saya dan pemerhati-pemerhati bebas yang mengatakan bahawa sidang Parlimen kita, minta maaf saya terpaksa sebut. Sidang Parlimen kita tidak ubah program bersiri “Pi Mai Pi Mai Tang Tu”. Malah ada yang sebut sampai satu peringkat macam Taman Didikan Kanak-kanak. Minta maaf Tuan Yang di-Pertua, sahabat-sahabat YB sekalian. Saya tidak tujukan perkara ini kepada sesiapa. Ini adalah rintihan mereka.

Jadi, untuk mengelakkan dari sidang Dewan Parlimen ini dipandang lekeh, mereka yang pernah hadir sidang Parlimen, maka adakanlah siaran langsung atau tertangguh sidang Parlimen agar setiap Ahli-ahli Dewan Rakyat mengambil sikap serius dan bersungguh-sungguh di dalam Parlimen. Kalau mereka tidak serius dan bersungguh-sungguh maka rakyat dan pengundi akan menghukum mereka.

Tuan Yang di-Pertua dan Ahli-ahli Dewan yang mulia, rakyat adalah aset negara. Ia lebih berharga daripada yang lain-lainnya, sebab itu rakyat hendaklah kita jaga sebaik-baiknya. Rakyat berhak untuk menentukan pemimpin yang berkenan di hati mereka. Mengikut ulama-ulama Islam, peringkat rakyat yang paling berharga ialah peringkat belia. Mereka inilah yang akan mencorak negara di hari muka. Era *baby boomers* sudah berlalu yakni era Bill Clinton, Paul Keating dan bekas guru saya, YB Rompin.

Tetapi sebaliknya berlaku di negara kita, kita perhatikan negara-negara luar belia-belia yang berumur 16 tahun dan kadang-kadang 18 tahun telah dibenarkan untuk menjadi pengundi. Bermakna negara-negara ini telah mengiktiraf bahawa rakyat-rakyat mereka yang berumur sama ada 16 tahun atau 18 tahun telah mencapai usia matang dan berhak menentukan pemimpin-pemimpin mereka. Di Malaysia, umur yang layak mengundi ialah 21 tahun. Ini bermakna kerajaan mengiktiraf rakyat Malaysia hanya matang apabila umur mereka sudah mencecah 21 tahun, walaupun Islam menggunakan akil baligh masa matang yakni kira-kira 15 tahun.

Dan mahkamah atau undang-undang Malaysia menjadikan umur 18 tahun sebagai umur yang layak menerima hukuman seperti orang-orang dewasa yang lain. Ianya juga bermakna rakyat Malaysia yang cerdik, yang belajar di universiti-universiti

Timbalan Yang di-Pertua [Datuk Lim Si Cheng]: Yang Berhormat.

Tuan Mohd Apandi bin Haji Mohamad: di tahun pertama, tahun kedua...

Timbalan Yang di-Pertua [Datuk Lim Si Cheng]: Yang Berhormat, sila gulung, masa...

Tuan Mohd Apandi bin Haji Mohamad:malah kadang-kadang....

Timbalan Yang di-Pertua [Datuk Lim Si Cheng]: Cukup Yang Berhormat.

Tuan Mohd Apandi bin Haji Mohamad: Okay, okay, 1 minit. Tahun kedua, malah kadang-kadang di tahun ketiga belum lagi matang. Ianya bermakna rakyat Malaysia yang berumur 21 tahun hanyalah sama cerdik dengan rakyat Iran yang berusia 16 tahun atau rakyat Indonesia yang berumur 18 tahun. Jadi, siapa yang memperlekeh atau memperkecilkan intelektual rakyatnya sendiri. Saya serahkan pada Dewan yang mulia ini untuk menjawabnya.

Jangan marah kalau saya katakan rakyat luar negara lebih cerdik daripada rakyat kita sendiri kerana ini silap kerajaan sendiri, bukannya salah anak dikandung tetapi salahlah ibu yang mengandung. Jadi, turunkanlah umur untuk layak mengundi daripada 21 tahun kepada 18 tahun seperti mana negara-negara yang lain. Janganlah takutkan mimpi ngeri 2004 hingga ini tidak menjadi realiti. Terima kasih, Tuan Yang di-Pertua dan Datuk-datuk yang budiman. *[Tepuk]* Habis dah, tidak ada lagi? Ada masa lagi?

Dato' Dr. Haji Jamaluddin bin Dato' Mohd. Jarjis: Dah lapuk dah. *[Ketawa]*

12.42 tgh.

Datuk Ahmad Zahid bin Hamidi [Bagan Datoh]: Terima kasih, Tuan Yang di-Pertua. Oleh kerana Jeli terlalu bersemangat, masa orang pun dia masuk kandang.

Tuan Yang di-Pertua, saya turut terpanggil untuk membahaskan ucapan Belanjawan yang telah dibentangkan oleh Yang Berhormat Menteri Kewangan baru-baru ini. Tahniah kepada Menteri Kewangan yang bukan sahaja mengekalkan elemen-elemen utama Belanjawan yang telah dibentangkan pada Oktober 1999 yang lalu tetapi juga terus menambah elemen-elemen baru untuk memenuhi rasa keperihatinan kerajaan kepada kumpulan sasaran yang memerlukan. Dalam ucapan pada kali ini, Tuan Yang di-Pertua, saya ingin menyentuh tentang dasar langit terbuka.

Meminjam berita yang datang daripada Tanah Merah kerana UFO telah mendarat di sana, di Kg. Gobek, saya fikir Yang Berhormat Tanah Merah telah didatangi oleh anasir luar....

Tuan Saupi bin Daud: *[Bangun]*

Timbalan Yang di-Pertua [Datuk Lim Si Cheng]: Yang Berhormat.

Datuk Ahmad Zahid bin Hamidi: Ya, Tuan Yang di-Pertua.

Tuan Saupi bin Daud: Saya minta Yang Berhormat bagi Bagan Datoh ini tarik balik kenyataannya *[Ketawa]* kerana ini tidak ada kena-mengena dengan dunia fantasi. Terima kasih. *[Ketawa]*

Datuk Ahmad Zahid bin Hamidi: Tanah Merah ini dulu sama dengan saya tetapi sekarang dia sudah mufarakah. Jadi, itu sebab lain sikit bahasa dia. Tuan Yang di-Pertua, di Tanah Merah, UFO telah mendarat mengikut berita yang datang daripada Kg. Gobek, jadi ada tanda "Y" di sana, ini tandanya malaikat sudah turun ke Tanah Merah sebab wakil rakyat telah berpindah tangan sekarang ini. *[Ketawa]*

Tuan Haji Is mail bin Noh: Minta laluan.

Datuk Ahmad Zahid bin Hamidi: Saya ingat, biar dululah. Nanti kita cerita dekat akhir-akhir.

Tuan Haji Ismail bin Noh: Saya minta sedikit saja. Pasal malaikat turun di Tanah Merah, ini adalah salah di segi agama ya. Minta tarik balik.

Datuk Ahmad Zahid bin Hamidi: Malaikat turun di mana-mana, insya-Allah. Tuan Yang di-Pertua, tentang dasar langit terbuka ini [*Ketawa*] saya fikir dasar ini adalah untuk mendapatkan maklumat dan juga memberikan pendidikan serta menyebarkan maklumat. Ia juga adalah perlu punya batasan-batasan dan sekatan-sekatan – soal maruah, soal kemerdekaan dan kepentingan nasional perlu dijadikan garis panduan di dalam melaksanakan dasar ini.

Pada 22 Februari 1998, apabila saya bercakap mengenai dasar langit terbuka dan saya menyentuh mengenai pelaksanaan program TV stesen satelit yang dikenali sebagai ASTRO. Ketika itu apabila saya menegur Pusat Penyiaran Asia (ASTRO) ini, saya dikatakan budak nakal. Kini, pada hari ini media telah membangkitkan isu ini. Dan kita lihat bahawa stesen ASTRO ini yang kini mempunyai 29 saluran termasuk 4 saluran berbahasa Cina, iaitu ASTRO AEC, TVBS, *Asia*, *Phoenix* dan *Wak Lai Toi* dan juga rancangan daripada India, *Vandaavil*.

Tuan Yang di-Pertua, pelanggan-pelanggan ASTRO ini sekarang berjumlah 310,000 orang yang berdaftar. Isi rumah 5 orang dalam sebuah rumah, ertinya akan ada jangkauan 1.5 juta dari segi penonton (*viewers*). Malah ASTRO adalah merupakan saluran alternatif kepada RTM, TV3 dan NTV7. Soalnya sekarang kita hendak tahu apa telah jadi pada stesen ASTRO ini? Dulu, apabila Ahli-ahli Parlimen diizinkan untuk melawat ke stesen berkenaan memang di depan, apabila taklimat diberikan memang ada orang Malaysia yang jadi tenaga utama.

Tetapi sebenarnya, tenaga-tenaga utama di belakangnya ialah bukan orang Malaysia. Citarasanya berbeda. Garapan pemikiran mereka berbeda. Minda *setting* mereka berbeza. Oleh kerana itu, saya fikir kerajaan harus membuat pemantauan ke atas program-program yang disiarkan oleh stesen tersebut supaya selari dengan peraturan dan budaya rakyat negara ini. Kawalan kemasukan rancangan luar adalah penting dalam isu mendidik generasi muda serta generasi pelapis supaya menghormati dan mengamalkan budaya hidup murni kerana budaya luar yang mempunyai unsur negatif amat mudah diperolehi melalui dasar langit terbuka yang tidak terkawal ini.

Tuan Yang di-Pertua, dasar langit terbuka yang terlalu bebas tidak dinafikan boleh mendorong dan merangsang pertumbuhan ke arah pencapaian masyarakat majmuk Malaysia yang berprinsip. Oleh sebab itu, pada hemat saya sama ada kita berada di dalam kerajaan, apatah lagi barisan pembangkang sama ada DAP atau parti-parti lain harus berpijak di alam nyata – di mana bumi dipijak, di situ langit dijunjung. Oleh kerana itu, berdasarkan kepada matlamat inilah, ASTRO sebagai sebuah stesen satelit telah dibenarkan oleh Yang Amat Berhormat Perdana Menteri dan Menteri Penerangan ketika itu untuk beroperasi.

Tetapi batasan-batasan lesen yang telah dikeluarkan ini telah digunakan dengan tujuan-tujuan semata-mata untuk memperolehi keuntungan dan tidak mengambil kira persoalan-persoalan yang menjurus ke arah memantapkan pembentukan generasi muda dan masyarakat majmuk yang berpijak ke alam masyarakat Malaysia yang sebenar. ASTRO telah mula mempamerkan bibit-bibit penerbitan dan penyiaran program yang kurang sesuai untuk ditonton oleh rakyat Malaysia yang mempunyai sejarah dan latar belakangnya yang tersendiri.

Oleh yang demikian, disyorkan satu badan penyelidik ditubuhkan untuk mengenalpasti sejauh mana kesan-kesan negatif yang diperolehi daripada program-program ASTRO yang membawa kepada pengaliran dan pengalihan kiblat. maka Tuan Yang di-Pertua, saya ingin mengesyorkan langkah-langkah berikut:

- (i) Syarat-syarat....

Timbalan Yang di-Pertua [Datuk Lim Si Cheng]: Yang Berhormat, Yang Berhormat dari Pokok Sena.

Datuk Ahmad Zahid bin Hamidi: Sila, sahabat.

Tuan Haji Mahfuz bin Haji Omar: Terima kasih Tuan Yang di-Pertua, dan terima kasih kepada rakan saya Yang Berhormat bagi Bagan Datoh. Adakah Yang Berhormat hanya bertujuan untuk menyarankan supaya satu badan penyiasat terhadap stesen ASTRO sahaja ataupun termasuk dalam stesen TV yang terdapat dalam negara kita. Sebab ada perkara-perkara yang ditentukan, yang dilakukan oleh stesen penyiaran TV dalam negara kita juga yang melanggar dalam Seksyen 3(a) dalam Kod Etika Pengiklanan, umpamanya seperti mana yang berlaku semasa musim pilihan raya baru-baru ini, yang saya kira bahawa pengiklanan-pengiklanan yang dibuat oleh stesen tempatan termasuklah RTM sendiri melanggar kod etika ini, dan ini suatu yang berlaku di luar daripada norma-norma kehidupan masyarakat Malaysia dan ini juga boleh mempengaruhi masyarakat Malaysia dengan iklan-iklan yang tidak begitu baik.

Datuk Ahmad Zahid bin Hamidi: Tuan Yang di-Pertua, saya ingat cukuplah itu, fahamlah, ini kerja kitalah. Itu pandangan negatif daripada pembangkang. Citarasa kita, itu adalah citarasa yang, bagi hemat kita untuk menjelaskan dan menjawab tohmahan-tohmahan dan fitnah yang dibuat oleh pembangkang.

Oleh sebab itu, saya ingin mencadangkan; pertama, syarat-syarat pemberian lesen penyiaran yang diberikan kepada ASTRO harus dikaji semula sesuai dengan semangat pembinaan bangsa Malaysia yang mantap dan beridentitikan ke Malaysiaan. Walaupun ada penyeliaan dibuat oleh Kementerian Tenaga, Komunikasi dan Multimedia bagi rancangan-rancangan luar, namun terdapat kelonggaran yang amat ketara. Peraturan rancangan asing yang boleh disahkan oleh siaran satelit ASTRO harus diperketatkan bagi menentukan kuota siaran asing memberi kesan yang positif terhadap jati diri generasi muda tanpa mengketepikan sistem langit terbuka.

Tuan Yang di-Pertua, yang kedua, saya ingin merujuk kepada Rencana Pengarang *Utusan Malaysia* pada hari ini yang meminta Kabinet mengambil kira beberapa pindaan dan pemantauan yang dibuat terhadap stesen ASTRO ini. Saya sebut,

”Ketika ini stesen TV satelit ASTRO menyediakan empat saluran untuk menyiarkan hal ehwal mengenai politik, sosial, budaya dari China, Hong Kong dan Taiwan. Satu saluran lagi khusus bahan siaran dari India. Empat saluran ini dianggap melampaui keperluan, tambahan pula isi kandungannya mengenai politik dan sosial yang tidak sesuai dengan masyarakat majmuk negara ini. Kritikan ini...”

Kata surat khabar itu, bukan saya,

“...tidak bermakna kita bersikap tertutup kepada gelombang baru dunia maklumat yang menilai menjadi pemangkin kepada perubahan pemikiran dalam arus globalisasi. Pentingnya kritikan ialah untuk membawa sesuatu ke arah kebaikan. Rakyat sebenarnya realistik dengan dasar langit terbuka yang menuntut mereka berfikir sedikit terbuka tetapi tidak bermakna tiada sekatan langsung terhadap anasir buruk dari luar.”

Tuan Yang di-Pertua, dengan itu saya ingin mencadangkan, yang kedua, ASTRO....

Timbalan Yang di-Pertua [Datuk Lim Si Cheng]: Yang Berhormat, Pokok Sena bangun lagi.

Datuk Ahmad Zahid bin Hamidi: Saya ingat selepas ini, hendak habiskan ayat ini.

Seorang Ahli: Minum kopi, minum kopi.

Datuk Ahmad Zahid bin Hamidi: Pergi kantin dahulu.

Yang kedua, ASTRO mesti diarah memberi ruang untuk menyiarkan program-program yang berunsurkan pendidikan sahsiah, akhlak, kenagaraan, industri,

pertanian dan pendidikan di mana rancangan yang beridentitikan Malaysia bagi mendidik anak-anak agar tidak meniru budaya luar dan dapat membentuk keperibadian mereka untuk terus cintakan agama, budaya dan negara sendiri.

Ketiga, ASTRO mesti diarah untuk mengutamakan rancangan tempatan.

Timbalan Yang di-Pertua [Datuk Lim Si Cheng]: Yang Berhormat, Pokok Sena.

Datuk Ahmad Zahid bin Hamidi: Okay.

Tuan Haji Mahfuz bin Haji Omar: Terima kasih Tuan Yang di-Pertua. Saya bersetuju dengan pandangan Yang Berhormat tadi bahawa keperluan kepada memastikan siaran ASTRO itu tidak pergi jauh membawa, memesong masyarakat Malaysia daripada budaya jati diri Malaysia. Tetapi sedarkah Yang Berhormat baru-baru ini, bahawa ada satu rancangan iklan, Coco-Cola menjelang Aidil Fitri dan Tahun Baru Cina baru-baru ini yang menyiarkan satu iklan yang sangat menjolok mata yang menggambarkan anak-anak muda yang sanggup meninggalkan ibu bapa dan keluarga untuk menghadiri satu parti liar setelah menerima isyarat sulit daripada rakan-rakan mereka. Saya kira bahawa iklan-iklan yang disiarkan, yang saya maksud di sini ialah disiarkan oleh rancangan TV tempatan kita. Sebab itu saya rasa bahawa.....

Datuk Ahmad Zahid bin Hamidi: Tuan Yang di-Pertua, cukuplah, saya faham.

Tuan Haji Mahfuz bin Haji Omar:cadangan itu dimasukkan sekali terhadap rancangan penyiaran TV tempatan.

Tuan Haji Mahfuz bin Haji Omar: Faham, faham.

Timbalan Yang di-Pertua [Datuk Lim Si Cheng]: Yang Berhormat, Bagan Datoh faham.

Datuk Ahmad Zahid bin Hamidi: Faham sangat. Saya setuju, saya akan ambil kira, sebab saya Pengerusi Jawatankuasa Media dan Pendidikan BBC yang dilantik oleh Rompin, kita pun prihatin itu. Yang setuju betul setuju, yang tak setuju kita lawan. *[Ketawa]* Lawan tetap lawan. *[Ketawa]*

Tuan Yang di-Pertua, yang ketiga, ASTRO mesti diarah untuk mengutamakan rancangan tempatan yang menggunakan Bahasa Kebangsaan supaya hubungan antara kaum dapat dirapatkan. Di samping itu, dapat membantu karyawan tempatan serta pengeluaran filem tempatan kerana ASTRO adalah pintu rancangan tempatan untuk keluar ke dunia global.

Keempat, penerbitan berita sendiri. Kerana ketika ini ASTRO banyak menyalurkan berita dari luar terutamanya dari China yang tidak relevan dengan nilai tempatan.

Kelima,

Puan Chong Eng: *[Bangun]*

Datuk Yong Teck Lee: Tuan Yang di-Pertua.....

Timbalan Yang di-Pertua [Datuk Lim Si Cheng]: Ada dua, Bukit Mertajam dan Gaya

Datuk Yong Teck Lee: Penjelasan.

Timbalan Yang di-Pertua [Datuk Lim Si Cheng]: Yang mana satu?

Datuk Ahmad Zahid bin Hamidi: Saya ingat kita bagi *lady's first*lah.

Datuk Yong Teck Lee: Okay, boleh. *[Ketawa]* *First* bermakna saya kemudian.

Puan Chong Eng: Terima kasih. Tuan Yang di-Pertua, saya tidak pernah lihat rancangan dalam ASTRO. Saya tidak tahu adakah Yang Berhormat bagi Bagan

Datoh beliau sendiri sudah tengok programnya. Tetapi saya berpendapat, saya tidak tahu pendapat Bagan Datoh dan mestinya berita yang dari negara China atau Amerika tidak relevan kepada negara ini, kerana ternampak ialah nilai-nilainya dan bukan di tempat mana dan di negara mana. Sekarang kita nampaknya banyak nilai yang diserap oleh generasi muda ialah daripada Barat, seperti Yang Berhormat bagi Bagan Datoh, setengah-setengah nilainya seperti demokrasi, untuk keadilan, ini semua dari Barat.

Datuk Ahmad Zahid bin Hamidi: Saya faham, faham.

Timbalan Yang di-Pertua [Datuk Lim Si Cheng]: Jadi, Yang Berhormat, apa tujuan.

Datuk Ahmad Zahid bin Hamidi: Saya ada tiga minit lagi, Tuan Yang di-Pertua.

Puan Chong Eng: Saya hendak penjelasan, apakah yang beliau tujukan, adakah negara mana atau pun nilai yang mana?

Datuk Ahmad Zahid bin Hamidi: Tuan Yang di-Pertua, ini yang saya cakap soal nilailah. Yang saya cakap ini soal nilai budayalah, nilai budaya yang datang daripada negara-negara yang saya sebutkan itu. Itu dia. Okay, saya minta Gaya.

Datuk Yong Teck Lee: Terima kasih Tuan Yang di-Pertua. Supaya orang ramai tidak salah faham akan tujuan kaji semula ASTRO ini, saya rasa perlu dijelaskan supaya kajian ataupun isu yang dibangkitkan oleh media massa hari ini bukan hanya mengenai empat saluran bahasa Cina dan satu saluran bahasa India. Bukan hanya itu. Kerana sudah banyak kali di surat khabar dan dalam ucapan Yang Berhormat tadi sudah tiga kali disebut bahasa Cina dan India. Maka orang ramai boleh salah faham akan hanya terhadap dua bahasa ini.

Datuk Ahmad Zahid bin Hamidi: Okay, faham.

Datuk Yong Teck Lee: Pada hal....

Datuk Ahmad Zahid bin Hamidi: Okay, faham, faham. Ada dua minit.

Datuk Yong Teck Lee: Pada hal.....

Datuk Ahmad Zahid bin Hamidi: Okay faham, ada dua minit lagi.

Datuk Yong Teck Lee: kerana apabila saya baca surat khabar ini – sebelum ini...

Timbalan Yang di-Pertua [Datuk Lim Si Cheng]: Bagan Datoh kata dia faham.

Datuk Yong Teck Lee: Tidak. Tetapi sebelum itu.

Timbalan Yang di-Pertua [Datuk Lim Si Cheng]: Pandangan daripada beliau.

Datuk Ahmad Zahid bin Hamidi: Yang Berhormat bagi Gaya, sekejap.

Datuk Yong Teck Lee: Sebelum itu, sedikit lagi Saya setuju supaya ada kajian ini kerana apabila saya baca surat khabar, isu ini dibangkitkan. Sebelum ini saya tidak begitu minat dengan ASTRO. Tetapi apabila saya baca Utusan Malaysia, saya.....

Datuk Ahmad Zahid bin Hamidi: Tuan Yang di-Pertua, ini masa saya. Saya ingat Gaya ini bercakap macam Barisan Nasional atau macam pembangkang ini?

Datuk Yong Teck Lee: Bukan. Saya ingin...

Timbalan Yang di-Pertua [Datuk Lim Si Cheng]: Sila duduk.

Datuk Ahmad Zahid bin Hamidi: Akhirnya.

Datuk Yong Teck Lee: Ini Yang Berhormat cakap kalau setuju, kita setuju, kalau tidak setuju kita setuju. Itu yang dia cakap. Tidak apa, saya ingin supaya ada.....

Datuk Ahmad Zahid bin Hamidi: Akhirnya, Tuan Yang di-Pertua, kerana masa terhad, saya fikir apa yang saya maksudkan tadi itulah, bukan soal bahasa, soal sumber itu, soal nilai tadi. Ya, dengan izin [*Bercakap dalam bahasa Cina*] Saya pun faham bahasa Mandrin, dengan izin.

Tuan Yang di-Pertua, akhirnya yang kelima. Apa yang kerajaan patut buat. Pencemaran telah dilakukan. Ini adalah satu fenomena biasa yang berlaku di mana-mana kementerian dan di mana-mana lesen yang telah diberikan. Tetapi saya harap kerajaan harus bertindak dengan segera. Saya mencadangkan agar Kementerian Tenaga, Komunikasi dan Multimedia juga Kementerian Penerangan tiba masanya untuk menggubal dasar komunikasi negara untuk menggarispandukan dasar-dasar komunikasi, memantau, menguatkuasakan termasuk menapis dan memberi peraturan kepada penyiaran bahan-bahan asing dalam semua saluran media.

Datuk Yong Teck Lee: Itu yang saya setuju, Tuan Speaker.

Timbalan Yang di-Pertua [Datuk Lim Si Cheng]: Yang Berhormat, ada dua orang bangun lagi.

Raja Dato' Ahmad Zainuddin bin Raja Haji Omar: Tuan Yang di-Pertua, boleh saya celah sedikit.

Puan Fong Po Kuan: [*Bangun*]

Datuk Yong Teck Lee: Saya minta penjelasan kerana tadi ada salah....

Timbalan Yang di -Pertua [Datuk Lim Si Cheng]: Yang Berhormat masa sudah cukup sebenarnya.

Seorang Ahli: [*Ketawa*]

Datuk Ahmad Zahid bin Hamidi: Yang Berhormat

Datuk Yong Teck Lee: Saya tidak ingin Yang Berhormat disalah anggap dan saya juga tidak ingin saya disalah anggap.

Raja Dato' Ahmad Zainuddin bin Raja Haji Omar: Tuan Yang di-Pertua, boleh saya celah sedikit?

Datuk Ahmad Zahid bin Hamidi: Ada masa lagi, Tuan Yang di-Pertua?

Timbalan Yang di -Pertua [Datuk Lim Si Cheng]: Ada.

Raja Dato' Ahmad Zainuddin bin Raja Haji Omar: Boleh saya celah sedikit?

Datuk Ahmad Zahid bin Hamidi: Kalau tidak ada masa, Tuan Yang di-Pertua, saya mengucapkan terima kasih kepada Gaya. Tadi saya usik sahaja, kepada Batu Gajah dan kawan-kawan saya yang lain.

Saya mohon menyokong. Terima kasih.

Datuk Yong Teck Lee: Ada banyak saluran seperti entertainment, mtv.

Timbalan Yang di-Pertua [Datuk Lim Si Cheng]: Yang Berhormat bagi Gaya!

12.59 tgh.

Tuan Robert Lau Hoi Chew [Sibu]: Terima kasih Tuan Yang di-Pertua beri peluang saya berucap sedikit. [*Ketawa*]

Tuan Yang di-Pertua,.....

Timbalan Yang di-Pertua [Datuk Lim Si Cheng]: Teruskan, Yang Berhormat bagi Sibu.

Tuan Robert Lau Hoi Chew: Ya terima kasih. [*Ketawa*]

Penyampaian semula belanjawan ini pada 25 Februari oleh Yang Berhormat Menteri Kewangan benar-benar menunjukkan kepada semua rakyat Malaysia dan dunia bahawa Kerajaan Barisan Nasional adalah jujur kepada rakyat Malaysia bersungguh-sungguh untuk berkhidmat kepada semua rakyat Malaysia dan berusaha untuk memastikan parti-parti pembangkang dan penyokong tempatan dan asing mereka tidak akan mencapai matlamat buruk mereka yang mana adalah negatif, merosak dan merbahaya kepada keharmonian kaum termasuk keharmonian agama, kestabilan politik dan kemakmuran ekonomi untuk negara kita.

Timbalan Yang di-Pertua [Datuk Lim Si Cheng]: Yang Berhormat, Yang Berhormat boleh sambung petang ini.

Tuan Robert Lau Hoi Chew: Terima kasih. Okay.

Timbalan Yang di-Pertua [Datuk Lim Si Cheng]: Ahli-ahli Yang Berhormat, Dewan ditangguhkan sekarang sehingga jam 2.30 petang.

Mesyuarat ditempohkan pada pukul 1.00 tengah hari.

Mesyuarat disambung semula pada pukul 2.30 petang.

[Timbalan Yang di-Pertua (Datuk Lim Si Cheng) *mempengerusikan Mesyuarat*]

Timbalan Yang di-Pertua [Datuk Lim Si Cheng]: Yang Berhormat Sib, sila sambung ucapan.

2.32 ptg.

Tuan Robert Lau Hor Chew [Sibu]: Terima kasih, Tuan Yang di-Pertua. Tuan Yang di-Pertua, pembangunan pertanian harus diutamakan di negara kita. Tuan Yang di-Pertua, saya puas hati melihat seorang Menteri Pertanian yang berwawasan, dedikasi dan inovatif telah dilantik dari Sarawak yang memenuhi rekod *trouble shooter*, dengan izin, dan pemulih kepada syarikat-syarikat yang bermasalah. Tindakan segera yang diambil oleh Yang Berhormat Menteri Pertanian terhadap masalah serius bot-bot ikan laut dalam asing yang mengeksploitasi sumber perikanan di laut dalam Sarawak menunjukkan tindakan segera dan dedikasi Yang Berhormat Menteri sebenar. Saya yakin Yang Berhormat Menteri baru akan menyelesaikan masalah ini dengan segeranya.

Pada masa yang sama saya mengucapkan tahniah kepada Kementerian Pertanian Persekutuan kerana telah merumus Dasar Pertanian Kebangsaan Ketiga yang mana akan menjadikan Malaysia *self-sufficient*, dengan izin, dalam makanan. Tuan Yang di-Pertua, saya berpuas hati melihat pelan induk yang komprehensif untuk menyelesaikan masalah banjir dan kawasan Sibu saya juga mengalami masalah banjir yang sama. Saya juga ingin merayu kepada Kementerian Pertanian Persekutuan untuk memberi insentif dan bantuan khas kepada perladangan padi secara besar-besaran di Sarawak demi untuk menjadi nyata impian untuk menjadi Sarawak jelapang padi Malaysia.

Tuan Yang di-Pertua, Sungai Rajang ialah sungai terbesar dan terpanjang di negara kita kini semakin cetek dan kapal-kapal MISC telah berhenti daripada datang ke Sibu. Saya ingin merayu khususnya kepada Yang Berhormat Menteri Pertanian tolonglah bantu mengatasi masalah ini kerana Yang Berhormat Menteri punya kawasan pun di samping pantai Sungai Rajang.

Tuan Yang di-Pertua, saya ingin mencadangkan konsep ‘lapangan terbang di dalam hutan’ dan ‘hutan di dalam lapangan terbang’ KLIA untuk dilaksanakan di seluruh bandar raya di seluruh negara kita. Majlis Perbandaran Sibu dan Majlis Luar Bandar Sibu bercita-cita untuk memula pelan kecantikan dan kami memerlukan bantuan kewangan dan teknikal segera daripada Kementerian Persekutuan Kerajaan Tempatan dan Perumahan. Projek terbengkalai bomba baru Sibu harus segera dipercepatkan. Kebakaran yang kerap berlaku di rumah-rumah panjang yang selalu menyebabkan kerugian yang besar haruslah diselesaikan dengan efektifnya sekali dan

buat selama-selamanya demi untuk menghindar penduduk-penduduk luar bandar kita daripada terus rugi.

Tuan Yang di-Pertua, cuti minggu pertama dan ketiga hari Sabtu yang diperkenalkan oleh Kerajaan Persekutuan dan Kerajaan Barisan Nasional Negeri telah mendapat sambutan semula. Walau bagaimanapun, kebanyakan daripada mereka berpendapat bahawa bekerja lima hari terus dengan masa bekerja yang lebih panjang dari hari Isnin ke Jumaat adalah lebih baik dan senang untuk merancang jadual bekerja dan temujanji-temujanji. Saya rasa Kerajaan Persekutuan dan Kerajaan Barisan Nasional Negeri harus menimbang cadangan ini.

Tuan Yang di-Pertua, saya ingin ucapkan tahniah kepada Kerajaan Barisan Nasional kerana telah menaikkan 10% daripada gaji mereka untuk semua kakitangan kerajaan termasuk mereka yang sudah pencen. Walau bagaimanapun, saya telah menerima banyak rayuan daripada kakitangan kerajaan bahawa 10% kenaikan haruslah berdasarkan gaji terkini dan bukan gaji asal. Saya berharap Kerajaan Persekutuan dapat menimbang rayuan mereka.

Tuan Yang di-Pertua, seperti IT, globalisasi dan liberalisasi rintangan perdagangan antarabangsa kita sudah tiba dan semuanya harus bersiap sedia untuk menunggu cabaran ini. Rakyat Malaysia menerima polisi kerajaan untuk melindungi industri-industri tempatan seperti industri pembuatan kereta dengan setinggi 300% duti import terhadap kereta-kereta import yang menyebabkan rakyat Malaysia, majoriti daripada mereka mampu untuk membeli kereta-kereta kebangsaan kita sendiri yang mana menguasai pasaran tempatan dan mampu untuk menembus pasaran-pasaran luar negara. Tetapi pengguna-pengguna Malaysia yang mana adalah majoriti daripada populasi mempertikaikan bahawa hak mereka untuk membeli kereta-kereta murah jika pilihan mereka telah ditarik dan mereka kagum dengan rakyat Amerika, Australia dan Eropah yang memandu kereta berjenama baik dengan harga yang berpatutan.

Maka, saya merayu kepada kerajaan untuk menurunkan duti import kenderaan agar dapat menggalak pembuat kereta tempatan kita untuk menjadi lebih cekap dan di dalam pembuatan kereta yang berkualiti pada harga yang kompetitif. Ramai rakyat Malaysia berpendapat perlindungan tinggi terhadap pembuat kereta tempatan harus ditamatkan secepat mungkin agar mereka akan lebih dapat bertahan untuk bersaing dengan mereka yang lain apabila globalisasi dan liberalisasi pasaran antarabangsa dikuatkuasa.

Tuan Yang di-Pertua, begitu juga dengan AP iaitu permit import untuk mengimport bahan buatan kapal seperti *marine steel plate*, dengan izin, haruslah dihapuskan segera demi untuk meningkatkan keupayaan bersaing kedua-kedua kilang keluli tempatan dan pembinaan kapal.

Tuan Yang di-Pertua, ucapan tahniah saya kepada Menteri Pelancongan Persekutuan yang baru yang telah mencadangkan agar cukai import terhadap semua barangan berjenama dihapuskan demi untuk menjadi Malaysia sebuah negeri membeli belah untuk pelancong-pelancong.

Tuan Yang di-Pertua, ucapan terima kasih dan penghargaan saya kepada Yang Berhormat Dato' Seri Menteri Pengangkutan kerana telah meluluskan pembinaan dua aero-bridges untuk Lapangan Terbang Sibiu yang mana sedang dibina ketika ini. Baru-baru ini, Shanghai Eastern Airlines mencadangkan kepada saya sebagai Pengerusi Majlis Perbandaran Sibiu dan wakil rakyat Sibiu bahawa landasan Lapangan Terbang Sibiu perlu dibesarkan demi untuk menampung pendaratan airbus selain daripada Boeing 737 kerana 80% daripada laluan untuk penerbangan carter terus di antara Bandar Kuching dan *Foochow City*, dengan izin, datangnya daripada Sibiu.

Sekali lagi saya merayu kepada Yang Berhormat Dato' Seri Menteri Pengangkutan untuk menimbang semula rayuan saya untuk membuka Lapangan Terbang Sibiu untuk *air company, airlines*, dengan izin, *airlines* asing terutamanya SIA dan menghubungkan ke Johor Bahru demi untuk menarik pelancong dari negara-negara jiran terutamanya dari Singapura.

Tuan Yang di-Pertua, akhir kata saya, sebagai wakil rakyat saya bangga melihat ekonomi kita di bawah Kerajaan Barisan Nasional yang telah dibimbing oleh Yang Amat Berhormat Perdana Menteri telah pulih semula. Saya berharap semua rakyat Malaysia termasuk mereka yang di dalam parti-parti pembangkang harus sedar bahawa keharmonian kaum, agama, kestabilan politik dan kemakmuran ekonomi ketiga-tiga tonggak asas pembangunan kebangsaan tidak jatuh dari syurga dengan sendiri mereka. Ianya adalah hasil daripada politik dan agama kaum yang betul serta polisi ekonomi Barisan Nasional dan kepimpinan ikhlas pemimpin-pemimpin Barisan Nasional yang diketuai oleh Yang Amat Berhormat Perdana Menteri memungkinkan mereka agar semua rakyat Malaysia menikmati buah daripada usaha Barisan Nasional.

Saya berdoa kepada Tuhan kerana telah memberikan Yang Amat Berhormat Perdana Menteri dan ahli pasukan di kedua-ke dua peringkat Persekutuan dan negeri sihat dan bijaksana untuk memimpin negara yang tercinta ke arah masa depan yang lebih baik di alaf baru yang mencabar ini.

Saya juga berdoa kepada Tuhan kerana memberi pemimpin pembangkang dan penyokongnya restu dan panduan agar mereka boleh memainkan peranan yang konstruktif di dalam usaha Barisan Nasional daripada mengambil konfrantasi yang negatif dan tindakan yang melampau yang mana adalah batu penghalang kepada pembangunan, kemajuan, kestabilan dan kemakmuran kebangsaan. Sekian, terima kasih.

Timbalan Yang di-Pertua [Datuk Lim Si Cheng]: Kuala Terengganu.

2.44 ptg.

Dr. Syed Azman bin Syed Ahmad Nawawi [Kuala Terengganu]: Terima kasih, Tuan Yang di-Pertua. Terima kasih kerana memberi peluang kepada saya untuk turut serta dalam membincangkan Belanjawan yang telah dibentangkan pada 25 Februari yang lepas. Sebelum itu sempena Hari Wanita Sedunia saya ingin membuat penegasan bahawa PAS amat menghormati kedudukan dan status wanita. Berlainan dengan propaganda kolot serta karut pemimpin-pemimpin UMNO serta Barisan Nasional, hak serta kedudukan wanita amat kami hargai.

Sebagai contohnya, isteri saya adalah seorang berkelulusan Ph.D dalam pendidikan. Lulus daripada England. Beliau menjadi pakar rujuk kepada kebanyakan kementerian yang ada di negara ini. Karier akademi isteri saya tidak pernah dikongkong walaupun saya menjadi MP PAS, beliau aktif dalam semua bidang. Untuk pengetahuan Yang Berhormat-Yang Berhormat daripada UMNO dan Barisan Nasional, dalam PAS sekarang ini kita mempunyai ribuan tenaga-tenaga profesional wanita sama ada dia seorang doktor, engineer, pakar nuklear dan sebagainya yang mana mereka begitu aktif dalam semua bidang dan mereka memberikan sokongan dan dukungan yang tidak berbelah bagi kepada Parti Islam Se-Malaysia (PAS).

Tuan Yang di-Pertua, negara kita telah berpengalaman hampir 10 tahun di mana telah mengalami *high economic growth*

Datuk Haji Mohamad bin Haji Aziz: [Bangun]

Timbalan Yang di-Pertua [Datuk Lim Si Cheng]: Yang Berhormat, Yang Berhormat Sri Gading bangun.

Dr. Syed Azman bin Syed Ahmad Nawawi: Insya-Allah, saya akan beri kemudian kerana masa terhad - dengan purata 8.5 % *real GDP growth* setiap tahun. Pertumbuhan ini menunjukkan bahawa telah berlaku kenaikan *real GDP size*, dengan izin, daripada RM81 bilion dalam tahun 1987 kepada RM197 bilion pada tahun 1997, iaitu dengan menggunakan *constant* 1987.....

Dato' Mahadzir bin Mohd. Khir: [Bangun]

Timbalan Yang di-Pertua [Datuk Lim Si Cheng]: Yang Berhormat, Setiausaha Parlimen bangun.

Dr. Syed Azman bin Syed Ahmad Nawawi: Saya akan beri *injury time*, Insha-Allah. Masa terhad.

Dato' Mahadzir bin Mohd. Khir: Tuan Yang di-Pertua, tadi pun banyak kali - kita banyak, sebelah sana beri *injury time*. *Injury time* selalu, kalau boleh

Timbalan Yang di-Pertua [Datuk Lim Si Cheng]: Yang Berhormat, sila duduk sebab dia masih belum bersedia untuk memberi laluan.

Dato' Mahadzir bin Mohd. Khir: Saya bangkit itu sebab tadi ada disebut, saya takut benda itu tidak sempat kita hendak

Timbalan Yang di-Pertua [Datuk Lim Si Cheng]: Sebenarnya ini kuasa dia juga, saya rasa Yang Berhormat.

Dato' Mahadzir bin Mohd. Khir: sebelum itu tidak sempat kita hendak bertanya sebab benda itu sudah terkeluar daripada apa yang saya hendak bertanya, untuk mendapat penjelasan.

Timbalan Yang di-Pertua [Datuk Lim Si Cheng]: Sila Yang Berhormat duduk, kecuali beliau memberikan laluan.

Dr. Syed Azman bin Syed Ahmad Nawawi: Terima kasih, Tuan Yang di-Pertua. Ada dua faktor yang menjadi *driving force* kepada pertumbuhan yang dianggap luar biasa pada waktu itu, iaitu pertumbuhan dalam pelaburan dan pertumbuhan eksport yang tinggi. Dalam erti kata lain, pertumbuhan yang tinggi ini dipengaruhi oleh, dengan izin, *investment flow*, yang kuat dalam aktiviti ekonomi terutamanya sektor pembuatan. Inilah aliran ekonomi yang berlaku selepas kemelesetan ekonomi pada tahun 1980-an. Ekonomi negara kita telah beralih daripada *agriculture and commodity base* kepada *industrial and service base*.

Persoalan yang ada sekarang selepas ekonomi dikatakan telah pulih apakah paras *sustainable growth* yang kita mampu. Bagaimanakah pula dengan kadar inflasi di negara kita? Persoalannya bukan kadar pertumbuhan GDP 5% ataupun 10%, ianya adalah persoalan bagaimana kita *sustain*, dengan izin, pertumbuhan ekonomi sama ada ianya 1%, 5% ataupun 10%.

Tuan Yang di-Pertua, adalah wajar kalau kita memberi perhatian kepada apa yang diutarakan oleh Pengerusi Eksekutif MIER, Dr. Mohamad Arif yang menyatakan, dengan izin, *what you see in the stock market is a false sense of comfort*. Beliau menambah lagi, *even companies under court protection, from their creditors are enjoying sharp price increases*, malahan FDI negara jatuh kepada RM9.04 bilion pada tahun 1999. Angka ini menunjukkan kejatuhan sebanyak 28.4% daripada 1998. Perkara inilah yang kita perlu sama-sama teliti, bukan sekadar melihat peningkatan di bursa saham. Kita berasa bangga dan terus menggembar-gemburkan bahawa ekonomi kita telah pulih tanpa kita melihat kepada kemelut sebenar yang sedang kita hadapi.

Tuan Yang di-Pertua, jika diteliti pertumbuhan ekonomi kita selama ini, adalah jelas bahawa destinasi eksport utama Malaysia ialah Amerika Syarikat iaitu 26%, Singapura 18%, negara-negara European Union 17% dan Jepun 9%. Angka ini menunjukkan bahawa kita bergantung lebih daripada 70% daripada eksport kita ke negara-negara tersebut. Ini akan memberi kesan dari sudut jangka panjang. Tambahan pula dalam era globalisasi ini sampai bilakah kita mahu terus bergantung kepada negara-negara tersebut.

Tambahan pula dianggarkan bahawa lebih daripada 80% daripada eksport kita adalah dikategorikan di bawah, dengan izin, *electronic and electrical goods* seperti semi conductors, air-condition, radio, televisyen dan peti ais. Angka ini menunjukkan bahawa negara kita telah menjadi sebuah *trading nation*, dengan izin, dan dagangan kita berkait rapat dengan 3 negara terbesar iaitu Amerika Syarikat, Eropah dan Jepun. Yang lebih ketara lagi dagangan kita dengan negara-negara ini dipengaruhi oleh sektor *electronic and electrical goods* iaitu lebih 60% daripada jumlah yang sebenarnya.

Tuan Yang di-Pertua, saya bersetuju dengan saranan daripada Yang Berhormat bagi Gaya yang menggesa agar kawalan modal di negara kita ditamatkan segera kerana *it has outlive its purpose*. Ini menjadi antara penyebab kepada pengurangan dalam FDI ke negara kita pada tahun lalu seperti kata Pengarah Eksekutif MIER, dengan izin, *'long term investors are concern because they see it the capital control as a policy reversal, they want consistency in policies'*.

Tuan Yang di-Pertua, dalam membicarakan persoalan ekonomi ini kita tidak dapat lari daripada *good governance* yang kini menjadi salah satu syarat dalam menentukan pertumbuhan ekonomi sesebuah negara berjalan dengan baik. Oleh itu, wajar imej pemimpin dan negara kita juga turut dipulihkan segera kerana ianya telah lama tercemar dengan teruknya terutamanya sejak berlaku krisis ekonomi dan politik di negara kita sejak beberapa tahun kebelakangan ini.

Sebagaimana yang saya sebut pada hari itu, Jeffrey Sachs daripada Harvard University yang juga merupakan seorang pengkritik IMF yang lantang, berkali-kali menyatakan bahawa reputasi Malaysia di peringkat antarabangsa adalah amat buruk kerana, dengan izin, *authoritarian political crack down*, berlaku di Malaysia. Beliau menambah lagi, *a lack of political freedom will hold Malaysia back from attracting its industry as the link between democracy and information rich society is important*.

Tuan Yang di-Pertua, Malaysia serta negara-negara di Asia Tenggara mempunyai populasi lebih daripada 500 juta penduduk. Ia mempunyai, dengan izin, *combine GDP*, lebih daripada US\$700 bilion. Kedudukan ini adalah amat penting dan berstrategi, perubahan politik, reformasi dan kepimpinan yang berlaku di rantau ini harus menjadi pengajaran kepada kita. Kita mesti berubah ke arah pemerintahan yang lebih telus serta lebih *accountable*.

Tuan Yang di-Pertua, sikap bermuka-muka serta *denial syndrome*, dengan izin, menjadi amalan yang jijik di kalangan setengah-setengah pemimpin negara. Mereka begitu lantang mengkritik tindak tanduk kuasa-kuasa besar terutamanya di Barat dalam hal ketidakadilan dalam hak asasi manusia, perdagangan dan urusan niaga kewangan dalam sistem pasaran bebas. Malangnya sikap ini tidak menyerlahkan *consistent* dalam amalan dalam negara dengan tidak adanya ketelusan terutamanya dalam soal menguruskan ekonomi negara serta soal hak asasi manusia.

Kenyataan-kenyataan seperti, dengan izin, *dictator of the market, I don't give a dam about stock market* ataupun *new colonist* begitu mudah bermain di bibir pemimpin. Namun, realitinya kenyataan-kenyataan demikian, dengan izin, *contain how ever embarrassing contradiction, they were the once responsible for the power of the market*. Seperti kata Raff Borch, Timbalan Setiausaha Amerika mengenai hal ehwal Asia Timur dan Pasifik, beliau menyatakan dengan izin, *'Malaysia engage in rhetorical exchange with us, the United Kingdom and Australia'*. Dalam masa yang sama menurut Borch, *'Malaysia brings in the best of the west, while criticizing the west and the United State almost integrally'*.

Tuan Yang di-Pertua, bagi saya sikap kepimpinan yang percaya penuh dengan sistem pasaran bebas tanpa menyediakan sebarang mekanisme yang berkesan untuk menghindarkan negara dari tipu daya, sabotaj dan manipulasi kapitalis antarabangsa telah menjadikan negara ini menghadapi masalah kewangan yang tidak stabil dan lebih jauh lagi tidak berkeupayaan menangani kegawatan yang dihadapi. Adalah amat perlu kita menyedari dan merenung dengan penuh bertanggungjawab mengenai falsafah kapitalisme yang berteraskan faham kebendaan. Keghairahan untuk mencapai pertumbuhan ekonomi tinggi yang berterusan telah mencetuskan sikap dan pemikiran rakyat yang lebih mementingkan kebendaan sebagai matlamat dan kayu ukur kejayaan tanpa mengira halal dan haram.

Dalam kata lain, faham kebendaan yang menjunjung konsep individualisme yang dihantui oleh sifat tamak dan haloba telah mewujudkan golongan kapitalis yang tandus dengan sifat kemanusiaan dan akhirnya hilang ketatasusilaan. Faham ini jugalah yang menghancurkan sistem pasaran bebas yang sedang dibina. Tambahan

pula kita sedang menghadapi cabaran globalisasi, bagaimana kita hendak menghadapi WTO yang mengetengahkan liberalisasi dalam perbankan, telekomunikasi serta industri automatif.

Tuan Yang di-Pertua, saya mencadangkan agar kita – pihak kerajaan menyegerakan satu *blue print* yang *comprehensive* terutamanya *commitment* negara kita terhadap WTO serta tekanan-tekanan globalisasi yang akan kita hadapai untuk tahun-tahun yang akan datang. Adalah perlu agar kerajaan dalam konteks ini, saya juga mencadangkan agar pihak kerajaan membatalkan terus semua, dengan izin, *economical in defensible project*, seperti empangan Bakun, lebuhraya yang menghubungkan Genting Highlands ke Cameron Highlands melalui Bukit Fraser dan juga cadangan Kensai Tak Artificial Airport yang pernah dicadangkan di negeri Kedah.

Dalam rangka usaha untuk menentukan bahawa ekonomi negara kita terus mampan, adalah perlu difikirkan dan diambil kira langkah-langkah keselamatan dan perancangan jangka masa panjang untuk menutup sebarang peluang kepada manipulasi, spekulasi, penyelewengan, sabotaj dan tipu daya. Saya ingin menyarankan agar pihak kerajaan menumpukan kepada langkah-langkah berikut:

- (i) menubuhkan Majlis Perundangan Syariah dan Tenaga Pakar;
- (ii) menubuhkan Lembaga Hisbah untuk menjamin keadilan agar tidak tergugat serta memastikan penyelewengan tidak bermaharajalela;
- (iii) memerangi gejala rasuah secara berterusan. Kerajaan hendaklah mengambil langkah segera membasmi rasuah di semua peringkat dan lebih bersikap *accountable* dan *transparent* terutamanya dalam menguruskan apa yang berlaku di negara kita; dan
- (iv) membuka ruang perbincangan terbuka atau *public discourse*. Ruang bagi perbincangan umum perlu dibuka agar semua lapisan masyarakat dapat memberikan pandangan, kritikan serta cadangan terhadap apa yang berlaku di negara kita tanpa ada perasaan *the politic of fear*.

Tuan Yang di-Pertua, saya berkeyakinan bahawa kepentingan kebendaan yang menjadi matlamat utama dasar ekonomi negara maka selama itulah kita akan terus gagal untuk mencari penyelesaian kepada kemelut yang berlaku.

Timbalan Yang di-Pertua [Datuk Lim Si Cheng]: Yang Berhormat, sila gulung, masa sudah cukup.

Dr. Syed Azman bin Syed Ahmad Nawawi: Ya. Pengalaman kemelut yang ada inilah yang perlu kita memberikan perhatian dalam konteks apa yang berlaku di negara kita.

Tuan Yang di-Pertua, sebagai akhirnya sama-samalah kita renungkan ingatan yang diberikan oleh Almarhum Tunku Abdul Rahman pada 9 Februari 1989 mengenai apa yang dia sebut mengenai ‘mampus’nya bangsa ini. Beliau menyatakan antara lain, keadilan tidak ada, semua mahkamah diperintah oleh seorang diktator, akhbar-akhbar, media massa semua bercakap bahasa dia dan ikut kehendak dia. Dalam pilihan raya apa yang paling buruk dan kotor sekali ialah semua dakyah kerajaan dikeluarkan dalam TV, radio dan akhbar dan ikut kehendak mereka. Segala cakap dan tuduhan-tuduhan oleh pihak kerajaan terhadap pihak pembangkang semuanya dikeluarkan sepenuhnya dalam media. Di manakah keadilan? Sekiranya ditetapkan juga pemerintahan ini dengan kehendak rakyat jelata, itulah yang saya katakan ataupun Tunku katakan, kita akan ‘mampus’.

Tuan Yang di-Pertua, dengan izin, *‘like any other authoritarian leaders, he has been tempted to overstay his welcome.’* Sekian, terima kasih.

Timbalan Yang di-Pertua [Datuk Lim Si Cheng]: Lumut.**3.01 ptg.**

Tuan Kong Cho Ha [Lumut]: Tuan Yang di-Pertua, terima kasih. Saya hendak membangkitkan beberapa perkara dalam perbahasan saya.

Tuan Yang di-Pertua, sejak Parlimen mula bersidang pada bulan Disember yang lepas sehingga sekarang, banyak telah dibangkitkan dan dibahaskan berkenaan dengan pihak SPR dan pilihan raya yang telah diadakan pada bulan November yang lepas. Tuduhan-tuduhan dan aduan-aduan dibuat terhadap pihak SPR terutamanya oleh pihak pembangkang, segala tuduhan-tuduhan itu ingin menceritakan bahawa pihak SPR, menyebelahi pihak Barisan Nasional. Kita di Barisan Nasional juga ada aduan-aduan terhadap SPR.

Di kawasan saya iaitu Parlimen Lumut, pegawai SPR, dengan izin, *Returning Officer*, meletak jawatan pada saat-saat yang akhir dan bertanding sebagai calon Barisan Alternatif. Cuba bayangkan keadaan semua polling clerk dan pekerja-pekerja pilihan raya disusun oleh beliau, semuanya rakan sepejabatnya. Jadi, tidak patutlah dituduh bahawa pihak SPR menyebelahi Barisan Nasional, kalau pegawai SPR pun boleh jadi calon Barisan Alternatif. Kalau hendak jadi calon, janganlah terima lantikan sebagai pegawai SPR.

Tuan Yang di-Pertua, Angkatan Tentera Malaysia telah memainkan peranan yang penting untuk memelihara keselamatan dan kedaulatan negara. Kita rakyat Malaysia mesti menghargai perkhidmatan Angkatan Tentera kerana telah banyak berjasa kepada negara kita dan sanggup berkorban demi keselamatan dan kedaulatan negara. Untuk memupuk kesetiaan di dalam Angkatan Tentera, kerajaan mestilah memastikan bahawa kebajikan dan hal ehwal kehidupan mereka tidak mengganggu mereka menjalankan tugas masing-masing. Oleh kerana itu, mereka seharusnya diberi gaji yang tinggi dan elaun yang mencukupi.

Saya berharap cadangan yang dikemukakan oleh Menteri Pertahanan baru-baru ini untuk membayar pelbagai elaun kepada anggota tentera dapat dilaksanakan secepat mungkin. Kawasan saya mempunyai 15,000 pengundi pos yang terdiri daripada pihak Tentera Laut Diraja Malaysia. Saya faham tentang masalah yang dihadapi oleh mereka, ada pegawai yang menjadi penjaja pada waktu malam, ada yang menjual barang-barang di pasar malam, banyak lagi menjadi mangsa kepada peminjam wang haram. Saya berjuang demi kebajikan Angkatan Tentera tidak kira undi pos saya menang ataupun kalah. [*Tepuk*] Mana yang patut diperjuangkan seharusnya saya perjuangkan.

Tuan Yang di-Pertua, anggota tentera yang berpangkat rendah ada yang berkhidmat 15 tahun, ada yang berkhidmat 17 tahun dan lainnya ada yang berkhidmat 21 tahun. Kebanyakannya mula berkhidmat pada umur 18 atau 19 tahun. Mereka akan bersara pada umur sebelum 40 tahun. Pada usia ini mereka mempunyai anak-anak muda yang masih bersekolah rendah ataupun pengajian tinggi dan perbelanjaan pada masa itu tinggi.

Dengan pertukaran kerjaya pada detik yang genting ini, masalah-masalah akan timbul sering kali melonggarkan hubungan ahli-ahli keluarga. Apa lagi mereka tidak ada pengalaman dengan pekerjaan yang lain. Oleh itu, Angkatan Tentera mesti membuat persediaan supaya anggota mereka dapat mengatasi masalah ini. Jika tidak, mereka yang bersara tidak dapat menyesuaikan diri dengan kehidupan baru mereka.

Saya mencadangkan langkah-langkah yang berikut untuk mengatasi masalah tersebut:-

- (i) memanjangkan tempoh perkhidmatan mereka ;
- (ii) memberi jawatan di dalam jabatan kerajaan yang lain bila mereka bersara ;

- (iii) mengadakan kursus penyesuaian yang lebih berkesan sebelum mereka bersara supaya mempunyai kebolehan untuk mencari rezeki;
- (iv) di antara kursus latihan tentera termasuklah kursus Pengurusan Kewangan Peribadi (*Personal Financial Management*) supaya mereka lebih mahir dengan pelaburan. Antara yang lain supaya anggota tentera boleh melabur dalam skim Amanah Saham Nasional, Amanah Saham Bumiputera dan lain-lain untuk masa depan yang lebih terjamin.

Tuan Yang di-Pertua, banyak telah dibangkitkan berkenaan dengan pengeluaran makanan yang tidak mencukupi di negara kita. Negara kita banyak mengimport makanan dari negara lain. Bil import makanan sangat tinggi. Kita mesti mengambil tindakan dari sekarang untuk mengatasi masalah ini, kalau tidak pada masa yang akan datang negara kita akan dipengaruhi oleh negara-negara dari mana kita mengimport makanan.

Keselamatan dan kedaulatan negara juga akan terjejas. Pengeluaran beras yang mencukupi sangat penting untuk jangka masa panjang dan saya faham bahawa subsidi harga padi menjadi beban kepada kerajaan. Negara kita masih mempunyai banyak lagi tanah yang boleh dimajukan untuk pengeluaran makanan. Negeri-negeri seperti Sarawak dan Terengganu mempunyai tanah yang luas untuk tujuan tersebut.

Untuk pengeluaran beras yang mencukupi tanpa bayaran subsidi, saya cadangkan bahawa kerajaan negeri beri tanah kepada pengusaha ladang kelapa sawit dengan syarat di mana sebahagian tanah itu diwajibkan menanam padi tanpa bayaran subsidi dari kerajaan. Contohnya, kalau 20,000 ekar tanah diberi, 15,000 ekar ditanam dengan kelapa sawit dan 5,000 ekar yang lain diwajibkan menanam padi tanpa subsidi. Dengan cara ini harap dapat mengatasi masalah kekurangan pengeluaran beras negara kita.

Saya juga bercadang bahawa kerajaan semua negeri membuka lebih tapak untuk tanaman sayur-sayuran dan buah-buahan. Dengan demikian rakyat dapat menikmati harga berpatutan untuk sayur-sayuran dan buah-buahan tempatan. Walaupun kerajaan menggalakkan rakyat untuk makan sayur-sayuran dan buah-buahan tempatan tetapi banyak buah-buahan tempatan ini lebih mahal dari buah-buahan yang diimport.

Tuan Yang di-Pertua, supaya belia kita akan menghindarkan diri daripada dadah dan gejala-gejala sosial buruk yang lain, kerajaan mesti membina kemudahan sukan dan taman rekreasi yang mencukupi untuk rakyat. Pada satu ketika dahulu bandar Lumut mempunyai sebuah padang bola sepak, padang ini telah diswastakan dan kini rumah kedai pula dibina di tapak tersebut. Sekarang bandar Lumut langsung tidak mempunyai padang bola sepak.

Tuan Yang di-Pertua, bandar Lumut, Sri Manjong, Sitiawan, Pulau Pangkor dan bandar-bandar yang lain di kawasan Parlimen Lumut tidak mempunyai kemudahan sukan untuk orang awam. Hanya mengadakan satu kompleks sukan di dalam pengkalan Tentera Laut Diraja Malaysia. Saya berharap Kementerian Belia dan Sukan dapat bekerjasama dengan Kementerian Perumahan dan Kerajaan Tempatan untuk membina kompleks sukan yang komprehensif di bandar Sitiawan dan Sri Manjong.

Tuan Yang di-Pertua, dari segi taman rekreasi, Ipoh mempunyai Taman Dr. Senivasagam, Taiping mempunyai *Lake Gardens*, dengan izin, Sitiawan pula tidak mempunyai sebarang taman rekreasi. Saya bercadang pihak Kementerian Perumahan dan Kerajaan Tempatan mengambil langkah-langkah untuk mengatasi kekurangan yang diperlukan oleh rakyat.

Tuan Yang di-Pertua, kawasan Lumut merupakan salah satu destinasi pelancongan yang terkenal di Malaysia, di kawasan ini terdapat pantai yang indah dan

bersih, Pulau Pangkor juga merupakan salah satu pulau yang terkenal di dunia. Kerajaan negara kita telah membawa banyak kemudahan asas ke kawasan Lumut untuk memajukan industri pelancongan. Oleh itu, pengusaha-pengusaha hotel, kedai cenderamata, restoran dan pemandu teksi khususnya di Pulau Pangkor telah banyak mendapat manfaat dari industri pelancongan.

Saya bagi pihak rakyat kawasan Lumut mengucapkan terima kasih kepada pihak penganjur *Le Tour de Langkawi 2000* kerana memilih Lumut dan Sitiawan sebagai salah satu tempat permulaan dan penghabisan untuk perlumbaan tersebut pada tahun ini. *Le Tour de Langkawi* telah membawa wartawan dari 24 buah negara asing ke Lumut dan ini adalah satu promosi destinasi pelancongan yang sangat berkesan. Sekarang kapal peranginan Star Cruise juga datang ke Lumut dua kali seminggu. Saya berharap kerajaan akan teruskan usahanya untuk memajukan lagi kawasan pelancongan ini.

Tuan Yang di-Pertua, rakyat Malaysia sepatutnya bersyukur kepada kerajaan negara kita kerana telah banyak membangunkan negara kita dan juga mempunyai langkah-langkah jangka masa panjang untuk menjamin masa hadapan yang cerah untuk anak-anak muda kita semua. Tuan Yang di-Pertua, dengan kata-kata ini saya turut menyokong. Terima kasih.

Timbalan Yang di-Pertua [Datuk Lim Si Cheng]: Bachok.

3.15 ptg.

Tuan Wan Nik bin Wan Yussof [Bachok]: Terima kasih Tuan Yang di-Pertua. Assalamualaikum wr. wb. dan salam sejahtera.

Seorang ahli: Tuan Pengerusi...Tuan Yang di-Pertua....

Timbalan Yang di-Pertua [Datuk Lim Si Cheng]: Ya, Bachok.

Tuan Wan Nik bin Wan Yussof: Saya mohon maaf. Laluan untuk saya, selepas ini untuk Yang Berhormat. Terima kasih sekali lagi. Belanjawan yang telah dibentang oleh pihak Menteri Kewangan telahpun memberi suatu pengharapan besar kepada kerajaan Barisan Nasional untuk meraih keyakinan rakyat dalam menguruskan kepentingan rakyat. Pada kami daripada pihak pembangkang bukan untuk membangkang dan untuk menilai sesuatu dari sudut keburukan tetapi semata-mata untuk mencari penyelesaian terbaik kepada menjalankan amanah yang diberikan oleh rakyat itu.

Sehubungan dengan itulah peruntukan di tempat di dalam Belanjawan itu sebanyak RM78.3 billion adalah suatu yang harus dimanfaatkan sebaik mungkin supaya segala urusan dalam pentadbiran dan pengurusan kerajaan itu sendiri memenuhi hasrat sebenar rakyat dan mencetus sesuatu yang bersifat keadilan untuk semua tanpa mengira persoalan politik ataupun kroni dan seumpamanya.

Sebenarnya apa yang hendak dibangkitkan oleh rakyat lebih-lebih lagi di luar bandar ialah segala apa yang digembar-gemburkan oleh semua pihak tentang krisis kepimpinan berlaku dalam negara di ambang pilihan raya umum dan selepas pilihan raya umum.

Datuk Yang di-Pertua, sebenarnya kepimpinan Barisan Nasional dan Barisan Alternatif sama-sama memikul tanggungjawab dalam melaksanakan tugas untuk rakyat. Persoalannya ialah atau persoalannya sedarkah kita semua betapa amanah itu seharusnya dijaga dan dilaksanakan. Kalau dari sudut pendekatan Islam, Nabi s.a.w. telahpun memberi suatu peringatan dalam Sabdanya [*membaca sepotong hadis*], dengan izin, yang memberi kefahaman kepada kita betapa setiap kamu adalah pemimpin dan setiap pemimpin itu akan dipersoalkan di hari akhirat kelak di atas kepimpinan yang kamu tunjukkan di atas segala apa yang kamu pertanggungjawabkan itu.

Bermaknanya di sini ialah setiap kita lebih-lebih lagi yang beragama Islam akan menghadapi kematian dan saat kematian nanti kita akan disaksikan oleh Allah

s.w.t. dalam menguruskan segala amanah yang kita laksanakan. Justeru itulah pandangan daripada pihak kerajaan khususnya Yang Berhormat yang berucap mewakili kerajaan yang menilai pembangkang ini semata-mata untuk membangkang, itu sebenarnya tidak tepat sebab masing-masing mempunyai amanah yang jelas.

Ada yang mengatakan pihak pembangkang hanya sedap bercakap untuk mengatakan betapa kerajaan gagal dalam menguruskan ekonomi negara. Tetapi yang penting untuk kita lihat ialah realistik ataupun kenyataan sebenar yang berlaku. Walaupun pihak Menteri Kewangan ada mengatakan bahawa negara kita sekarang di ambang pemulihan ekonomi tetapi yang jelas statistik dan perangkaan yang ditunjukkan dari sudut pencapaian ekonomi yang ada sebagaimana yang disebutkan pada 26 Februari 1997 di antara track record pasaran saham yang terbaik pernah dicapai pada masa itunya ialah kedudukan nilai mata di bursa sahamnya ialah 1,278. Tetapi apa yang kita lihat pada hari ini misalnya pada pagi semalam ialah Indeks Komposit ditutup pada paras 944 mata, jauh mencapai kepada tahap yang cemerlang pada tahun 1997. Perkara ini seharusnya kita sedar betapa pemulihan ekonomi dalam proses perjalanan menuju kepada kemuncak sekiranya keyakinan rakyat dan keyakinan semua pihak dari sudut perjalanan ekonomi berjalan dengan baik.

Datuk Haji Mohamad bin Haji Aziz [Sri Gading]: *[Bangun]*

Timbalan Yang di-Pertua [Datuk Lim Si Cheng]: Yang Berhormat bagi Sri Gading bangun.

Tuan Wan Nik bin Wan Yussof: Minta ringkas sangat, boleh?

Datuk Haji Mohamad bin Haji Aziz: Terima kasih. Yang Berhormat Tuan Yang di-Pertua. Setiap sahabat-sahabat saya daripada parti pembangkang, apabila membahaskan dalam ucapan Belanjawan ini akan mempertikaikan tentang pemulihan keadaan ekonomi yang telah kita rasai hari ini. Saya tak dapat nak menelaah bagaimana sebenarnya fikiran rakan-rakan saya dari pembangkang, suasana yang kita hadapi hari ini tahun 1998, kita punya bursa saham jauh menjunam, hari ni naik dan adalah turun naik dan sebagainya. Suasana ekonomi rakyat yang begitu mewah, bulan Ramadhan hari itu, puasa, Aidilfitri yang kita hadapi, Raya Cina yang kita hadapi, rakyat berbelanja dengan begitu mewah, penjualan kereta yang meningkat dan berbagai-bagai lagi...

Timbalan Yang di-Pertua [Datuk Lim Si Cheng]: Yang Berhormat, Yang Berhormat hendak berucapkah?

Datuk Haji Mohamad bin Haji Aziz: Saya hendak bertanya *[Ketawa]* Jadi apakah ini tidak menunjukkan pertumbuhan dan kesegaran ekonomi setelah kita mengalami kejatuhan sedikit masa pada dua tahun yang lalu. Dalam Islam juga kita wajib bersyukur ke hadrat Allah s.w.t. Apakah sahabat saya daripada Bachok tidak bersyukur atas nikmat yang dianugerahkan oleh Allah s.w.t. kepada kita? Ini persoalannya, apakah Yang Berhormat tidak bersyukur dengan kebaikan nikmat yang diturunkan oleh Allah s.w.t. kepada kita. Terima kasih.

Tuan Wan Nik bin Wan Yussof: Terima kasih. Dalam persolan yang dibangkitkan saya tidak ada percanggahan sedikit pun daripada pihak Yang Berhormat bagi Sri Gading sebab kenyataan saya tadi saya mengakui proses ekonomi menuju kepada pemulihan. Tidak berbangkit persoalan yang dibangkitkan itu dan saya bersetujulah dengan apa yang disebutkan. Yang penting untuk kita hayati bahawa menyingkap kepada amanah kepimpinan tadi, track record yang dibuat oleh Kerajaan Barisan Nasional jelas sekali dirasai dan juga dicapai oleh semua pihak tetapi isu yang berbangkit ialah seharusnya kita mengambil perhatian. Sejarah telah membuktikan bahawa sesuatu yang harus kita ambil perhatian pertama sekali betapa negara kita pernah kehilangan Singapura daripada rumpun pentadbiran negara kita sendiri. Betapa negara juga telah mengalami peristiwa yang paling kita tidak kehendaki pada 13 Mei 1969.

Harus juga kita mengambil peringatan kehilangan wang negara dalam krisis yang berlaku ekoran daripada BMF sebanyak RM2.5 billion. Begitu juga harus kita menginsafi juga pada catatan di atas kertas didakwa bahawa Bank Negara pernah kehilangan berbillion ringgit dalam tempoh tahun 1992 sehingga 1994. Demikian juga harus kita insafi lebih daripada 500,000 belia kita diancam dengan penagihan dadah. Penting juga kita ingati bahawa perpecahan kepimpinan parti yang menerajui negara kita iaitu UMNO harus juga kita insafi bersama dalam rekod perjalanan untuk mengurus negara kita ini tahun 1987 sehingga berpecahnya menubuh satu parti baru. Yang penting juga kita insafi dan kita sedari ialah gejala sosial yang telahpun sama-sama merunding pemikiran kita untuk mencari penyelesaian terbaik betapa kerana buang bayi begitu bertambah dari sehari ke sehari dan tidak lengang daripada laporan-laporan daripada akhbar.

Demikian yang paling menyayat hati lagi ialah proses penderaan kepada pembantu-pembantu rumah yang memalukan negara di mata dunia. Semua ini ialah suatu keinsafan yang harus kita ambil untuk meletakkan garis panduan untuk menuju kepada alaf baru dan sekarang kita telahpun memasuki alaf baru. Jadi, gambaran dan suasana begini saya mengingatkan suatu kenyataan yang telahpun ataupun telah dibuat oleh suatu konvensyen Melayu dalam pembangunan yang pernah diadakan di Universiti Kebangsaan pada 23 dan 24 Ogos 1997 yang di antara lainnya mengungkapkan bahawa akhir-akhir ini suasana politik kita mula merosot sehingga semangat kebangsaan yang dulunya menjadi asas perjuangan kemerdekaan negara sekarang nyata kian terhakis dan diganti pula oleh semangat materialistik dan pergelutan merebut kuasa dan kedudukan. Apakah semua persoalan yang saya sebut dari sudut sejarah tadi berpunca daripada semangat ini telahpun tumbuh dalam diri sebagai seorang pemimpin yang menerajui negara hari ini.

Oleh kerana itulah secara spesifiknya saya hendak sebut beberapa perkara dalam masa yang paling singkat ini. Pertama sekali, seharusnya kita mengambil perhatian isu bahasa sebagaimana yang disebut oleh Yang Berhormat bagi Batang Sadong yang telah membangkit suatu perkara yang perlu diinsafi sama. Cuma pendekatan yang dibawa oleh Yang Berhormat bagi Batang Sadong itu ialah di sudut linguistiknya, tetapi saya hendak melihat dari sudut perundangan dan dari sudut dasar negara itu sendiri.

Dasar Pendidikan Kebangsaan telahpun meletakkan Bahasa Melayu atau Bahasa Malaysia sebagai pengantar utama di sebahagian besar sekolah, itulah dipraktikkan. Tetapi yang penting untuk kita lihat sekarang ini telahpun ratusan ribu pelajar dalam negara kita malah mencapai angka juta yang melalui proses pendidikan negara, tetapi yang penting ekoran daripada perubahan Dasar Pendidikan Negara yang telahpun membenarkan juga IPTS ataupun institut pengajian tinggi swasta dan IPTA ini telahpun memberi suatu ruang baru untuk diperbahaskan dan perlu dinilai oleh kerajaan sendiri.

Pertama sekali ialah melihat kepada perkembangan IPTS yang melibatkan pindaan Akta Pendidikan 1996 yang menyentuh Fasal 17(1) - memberi suatu kelonggaran untuk kita nilai dan perlu dikaji untuk diperkembangkan. Pihak Kementerian Pendidikan khususnya perlu buat satu penilaian baru. Bahasa Kebangsaan sebagaimana yang disebut dalam Fasal 17(1) bahawa Bahasa Kebangsaan hendaklah menjadi bahasa pengantar utama di semua institusi pendidikan dalam sistem pendidikan kebangsaan kecuali sekolah jenis kebangsaan ditubuhkan di bawah Seksyen 28 atau mana-mana institusi pendidikan lain yang dikecualikan oleh menteri daripada subseksyen ini. Yang perlu diambil perhatian lagi ialah bila merujuk kepada Akta IPTS 1996 di bawah Fasal 41 iaitu membenarkan penggunaan Bahasa Inggeris sebagai bahasa pengantar di IPTS yang kesannya akan mewujudkan dua sistem bahasa pengajaran dalam negara kita di pusat-pusat pengajian tinggi.

Satunya ialah menggunakan bahasa pengantar Melayu dan satunya ialah bahasa pengantarnya bahasa Inggeris. Jadi persoalan, ini sudah pasti akan mengalami suatu polemik baru bahasa bila kita melihat kepada identiti sebenar bahasa bagi negara

kita. Jadi persoalan identiti ini perlulah kita jawab kerana telahpun kita tahu di ambang tahun 2000 ini telah wujud 591 IPTS seluruh negara, yang pelajar sedang belajar ialah 219,850 orang pelajar di seluruh negara yang kita yakin penyertaan pelajar-pelajar Melayu bumiputera dalam IPTSnya lebih paling-paling ramainya ialah 15% sahaja kerana peluang yang ada kita dapati pelajar-pelajar bukan Melayu memang berpendapatannya daripada ibu bapa yang berpendapatan tinggi yang kemampuannya ada maka mereka lebih ramai di IPTS dan sudah pasti mereka ini akan melalui proses pembelajaran di dalam bahasa Inggeris.

Ini suatu nilai yang perlu kita wujudkan dalam membentuk suatu identiti negara yang lebih lagi berdasar kepada bahasa pendidikan dan bahasa yang akan dipertuturkan di peringkat praktikal sebenar sebagai ahli dalam sebuah negara yang merdeka.

Sehubungan dengan itulah apabila melihat kepada peluang IPTS yang sebegitu akan menjadi kesannya, bagaimana pula dasar IPTA itu sendiri dalam menyokong dan mengukur dasar nasional yang ada khususnya dalam bab pendidikan dan bahasa itu sendiri. 43 tahun telah kita merdeka, IPTA telahpun dikumandangkan sebagai dasar pengkorporatan.

Di bawah dasar pengkorporatan ini, Tuan Yang di-Pertua, ialah kejujuran Kerajaan Barisan Nasional - banyak pihak meraguinya sama telah pula rakyat yang begitu daif dari sudut peluang untuk mencapai pendidikan apabila institusi pendidikan tinggi ini diswastakan ataupun dikorporatkan kerana kita yakin dan pihak Yang Berhormat daripada Barisan Nasional semuanya telah maklum kesan daripada pengkorporatan ini yang tidak perlu saya ulaskan di sini.

Yang penting lagi ialah berteraskan kepada budaya dan adat dan nilai-nilai yang wujud apabila IPTA ini dikorporatkan dan apabila pendidikan ini diperdagangkan sudah pastilah tekanan hidupnya semakin meningkat dan di situlah kita yakin peluang untuk menikmati pendidikan tinggi akan tersekat-sekat dan di situlah rakyat akan terus untuk menagih segala peluang yang ada untuk ke pusat pengajian tinggi dengan berbagai biasiswa, pinjaman dan sebagainya dan sudah pasti menekan lagi peluang untuk ke pusat pengajian tinggi.

Secara ringkas saya sebutkan perkara ini untuk diambil perhatian oleh pihak kementerian berkenaan. Rumusnya ialah dari sudut pendidikan. Ingatkah kita betapa kecelaruan dasar yang ada dalam negara pada peringkat pengamatan saya sebenarnya boleh memberi sesuatu penyelesaian sekiranya keseriusan daripada kepimpinan memerintah hari ini mengambil satu jalan yang pintas atau jalan yang dekat untuk menyelesaikan masalah ini. Lebih-lebih lagi kami di Kelantan yang sebahagian besar daripada belia-belia generasi baru melalui proses pendidikan di sekolah agama.

Isu yang terbaru di sebalik sekolah agama ialah wujudnya satu sijil, Sijil Tinggi Agama Menengah. Sekolah-sekolah Menengah Agama dikehendaki mengambil suatu Sijil Tinggi Agama Malaysia untuk belajar ke Universiti Al-Azhar dan Univesiti Al-Azhar diperakukan. Hanya mereka yang mengambil sijil ini sahaja - lulus sijil ini sahaja layak diterima masuk. Sedangkan amalan yang telahpun ada sebelum ini pelajar-pelajar daripada sekolah-sekolah agama seluruh negara khususnya di Kelantan, cukup untuk memasuki Universiti Al-Azhar dengan hanya lulus STU (Sijil Tinggi Uagama).

Dalam perkara ini kita melihat ...

Timbalan Yang di-Pertua [Datuk Lim Si Cheng]: Yang Berhormat, Yang Berhormat perlu habiskan dalam satu minit.

Tuan Wan Nik bin Wan Yussof: Dalam satu minit. Cadangan saya ini ialah pihak kementerian seharusnya mempertegaskan keadaan, iaitu menerimapakai dasar lama iaitu cukup untuk pelajar-pelajar sekolah agama ke Universiti Al Azhar

dengan kelayakan STU sahaja tidak perlu kepada sijil tinggi agama yang dimaksudkan tadi.

[Timbalan Yang di-Pertua (Dato' Haji Muhamad bin Abdullah) *mempengerusikan Mesyuarat*]

Dalam perkara yang penting untuk kita perhatikan lagi dalam peluang yang ada ini ialah pembudayaan hidup masyarakat dengan budaya IT. Itu tajuk akhir saya Yang Berhormat, Tuan Yang di-Pertua.

Pembudayaan IT seharusnya dihayati s emaksimum mungkin kerana di sebalik IT, kebbaikannya lebih. Lebih-lebih lagi ialah di peringkat institusi pentadbiran kerajaan itu sendiri seharusnya pembudayaan IT dipertingkatkan dan diperkembangkan. Laporan yang saya terima ialah dari sudut untuk mendapatkan sijil-sijil kelahiran - kesan daripada pembudayaan IT ini, masih lagi di tahap lama.

Timbalan Yang di-Pertua [Dato' Haji Muhamad bin Abdullah]: Masa Yang Berhormat sudah habis, Yang Berhormat.

Tuan Wan Nik bin Wan Yussof: Terima kasih. Akhir sekali saya menggulung, iaitu [*Ketawa*] saya hendak menggulung sedikit sahaja, boleh? Minta maaf.

Timbalan Yang di-Pertua [Dato' Haji Muhamad bin Abdullah]: Sedikit, gulung.

Tuan Wan Nik bin Wan Yussof: Okay. Pengalaman daripada Rompin.

Timbalan Yang di-Pertua [Dato' Haji Muhamad bin Abdullah]: Dia tidak kesudahan, tidak jadi, ya?

Tuan Wan Nik bin Wan Yussof: Ah, okay.

Timbalan Yang di-Pertua [Dato' Haji Muhamad bin Abdullah]: Tergantung.

Tuan Wan Nik bin Wan Yussof: Akhir sekali Tuan Yang di-Pertua, pembudayaan IT ini seharusnya dipertingkatkan bukan setakat untuk pengajian-pengajian tinggi, pelajar-pelajar tetapi semua peringkatlah. Oleh kerana itu saya menyokong dari sudut usaha kerajaan untuk mengembangkan MSC tetapi pandangan daripada Yang Berhormat bagi Jeli harus diberi perhatian yang serius oleh pihak kerajaan.

Sekian, terima kasih.

Timbalan Yang di-Pertua [Dato' Haji Muhamad bin Abdullah]: Terima kasih. Rompin.

3.32 ptg.

Dato' Dr. Haji Jamaludin bin Dato' Mohd. Jarjis [Rompin]: Ada kawan dengan Jeli, ya.

Timbalan Yang di-Pertua [Dato' Haji Muhamad bin Abdullah]: Terus, terus Rompin. Masa tak.....

Dato' Dr. Haji Jamaludin bin Dato' Mohd. Jarjis: Jeli dia bimbang, bila saya bangun dia hendak balik dah. Bukan apa, anak murid kadang-kadang jangan lupa juga apa ni, budi bicara cikgu.

Terima kasih Tuan Yang di-Pertua, memberikan peluang kepada saya untuk mengambil kesempatan bersama-sama menyertai Perbahasan Belanjawan bagi tahun 2000. Oleh kerana masa tidak banyak, saya mengambil kesempatan pada peringkat awal ini turut bersama mengucapkan ucapan tahniah kepada Yang Berhormat Menteri Kewangan, kepada kerajaan kerana mampu sekali lagi mengemukakan satu belanjawan yang cukup cemerlang, cukup baik - yang sebelah sana memang tidak setuju. Apa yang kita buat semuanya tidak baik, itu biasalah. Pertumbuhan ekonomi berbanding

dengan pengucupan 7.5% 1998 dapat satu tahap yang sungguh baik pada tahun lalu, iaitu pertumbuhan kira-kira 5.4%.

Kalau kita lihat juga dari segi Tuan Yang di-Pertua, sepintas lalu dari segi indikator-indikator utama kejayaan pemulihan ekonomi negara sudah jelas, banyak sudah diperbincangkan Tuan Yang di-Pertua, itu dari segi BSKL naik sampai 1,000 pada satu masa dua minggu yang dahulu, penggabungan bank, lepas itu lebihan dagangan eksport amat tinggi sekali yang tertinggi dalam sejarah.

Sepintas lalu, banyak kita bincangkan dalam Dewan yang mulia ini, tentang isu-isu yang kita akan berhadapan di masa akan datang. Negara yang rakyat Malaysia terpaksa berhadapan - dunia yang global, dunia yang tiada sempadan, banyak diperkatakan tentang perkara ini di mana isu globalisasi yang disebut oleh Edwin 'Eshawer' apabila beliau menulis mengatakan, *the world is in the process of becoming a single mass of global community*. Ini kita semua tahu bahawa dunia akan datang akan bergantung pada IT, sumber ekonomi bukan lagi sumber asli tetapi bergantung kepada sumber ilmu.

Ini saya hendak sebut sedikit Tuan Yang di-Pertua, ini kalau kita jelas, kita semua tahu sebagai orang Islam - sebelah sana hendak menunjukkan dia sahaja yang memperjuangkan Islam, yang sebenarnya Barisan Nasional juga memperjuangkan Islam. Allah S.W.T telah dengan jelas memberikan pengiktirafan kepada golongan yang berilmu. Seperti yang difirmankan dalam surah Az-Zumar, ayat 9:

"...katakanlah apakah sama orang-orang yang berilmu dengan orang-orang yang tidak berilmu" dan di dalam surah Al-Mujaadilah, ayat 11 ada menyatakan juga "...nescaya Allah akan meninggikan orang-orang yang beriman antara kamu dan orang-orang yang diberi ilmu beberapa darjat ketinggian".

Jelas dalam Islam bahawa ilmu itu merupakan satu intisari yang penting dalam pembelaan di dunia dan di akhirat.

Satu lagi perkara saya ingin sedikit sahaja

Tuan Haji Ismail bin Noh: Minta laluan sedikit.

Dato' Dr. Haji Jamaludin bin Dato' Mohd. Jarjis: Biar saya habis dulu, untuk saya

Tuan Haji Ismail bin Noh: Tak, nak perbetulkan ayat Al-Quran tadi.

Dato' Dr. Haji Jamaludin bin Dato' Mohd. Jarjis: Bagi saya habis, bagi saya habis, selepas habis bangkitkannya.

Timbalan Yang di-Pertua [Dato' Haji Muhamad bin Abdullah]: Ya, ya. Tidak boleh.

Dato' Dr. Haji Jamaludin bin Dato' Mohd. Jarjis: Yang Berhormat hendak memperjuangkan

Tuan Haji Ismail bin Noh: [Bangun]

Dato' Dr. Haji Jamaludin bin Dato' Mohd. Jarjis: Hendak cakap giliran Yang Berhormat tunggu. Kuasa modal ini penakrifan. Yang Berhormat sebagai PAS memang cuba memperjuangkan Yang Berhormatlah Islam, orang lain tidak. Yang Berhormat ini dalam Dewan yang mulia, bukan di kampung, Yang Berhormat. Kita juga Islam, kita perjuangkan, kita juga mengikut Al-Quran dan sunnah-sunnah Nabi. Tetapi hanya PAS yang menunjukkan bahawa merekalah Islam, kita sini sekular. Ini modal di luar kampung Yang Berhormat boleh jual, ini di Dewan yang mulia - tolong.

Tuan Taib Azamudden bin Md. Taib [Bangun]

Timbalan Yang di-Pertua [Dato' Haji Muhamad bin Abdullah]: Dia minta penjela san.

Dato' Dr. Haji Jamaludin bin Dato' Mohd. Jarjis: Saya, saya tidak beri.

Tuan Taib Azamuddin bin Md. Taib: Bagi laluanlah.

Dato' Dr. Haji Jamaludin bin Dato' Mohd. Jarjis: Saya tidak beri.

Tuan Taib Azamuddin bin Md. Taib: Bagi laluanlah, bagi kita tengok.

Dato' Dr. Haji Jamaludin bin Dato' Mohd. Jarjis: Saya tidak beri. Sebab kaedah Yang Berhormat begitu.

Timbalan Yang di-Pertua [Dato' Haji Muhamad bin Abdullah]: Dia tidak bagi Yang Berhormat.

Dato' Dr. Haji Jamaludin bin Dato' Mohd. Jarjis: Biar saya habis, masa saya ini hendak habis ini. Kuasa modal

Timbalan Yang di-Pertua [Dato' Haji Muhamad bin Abdullah]: Dia tidak bagi Yang Berhormat.

Dato' Dr. Haji Jamaludin bin Dato' Mohd. Jarjis: Kita....

Seorang Ahli: Jangan kelentong banyak.

Timbalan Yang di-Pertua [Dato' Haji Muhamad bin Abdullah]: Dia tidak bagi Yang Berhormat.

Dato' Dr. Haji Jamaludin bin Dato' Mohd. Jarjis: Hak saya Yang Berhormat.

Tuan Haji Mahfuz bin Haji Omar: Takkan standard Ketua Backbancher tidak mahu dibagi.

Dato' Dr. Haji Jamaludin bin Dato' Mohd. Jarjis: Hak saya. Tetapi kalau tanya Yang Berhormat

Timbalan Yang di-Pertua [Dato' Haji Muhamad bin Abdullah]: Jangan bercakap, duduklah Yang Berhormat.

Dato' Dr. Haji Jamaludin bin Dato' Mohd. Jarjis: Tetapi kalau cara yang baik, saya boleh beri, tiada masalah.

Timbalan Yang di-Pertua [Dato' Haji Muhamad bin Abdullah]: Yang Berhormat masa kita tidak

Dato' Dr. Haji Jamaludin bin Dato' Mohd. Jarjis:Yang baik saya akan beri. Kalau tunjuk ajarnya tidak begitu baik, saya minta maaf.

Kita tahu kita menguruskan ekonomi kita dengan baik. Kita menguruskan Barisan Nasional [*Disampuk*] Saya tidak berhajat hendak keluar ini, saya akan keluar sekarang. Mengurus ekonomi, kewangan dengan baik. Kegawatan ekonomi kita telah atasi, ketelusan yang tinggi. Tapi saya hendak tengok sedikit Yang Berhormat apa *track record* Kelantan. Ini kata kerajaan sepuluh tahun hendak mentadbir dengan baik. Ini audit laporan tahun 1997, Tuan Yang di-Pertua. 1997 boleh dapat laporan ini kemudian. Laporan audit 1997 lapan daripada anak syarikat Kelantan rugi. RM25 juta kerugian terkumpul – RM25 juta. Ini ada buku bukan saya kata ini.

Laporan Ketua Audit Negara, Negeri Kelantan 1997. Satu lagi saya hendak bawa. Sebab apa saya kata sebab dia kata dia menuduhkan kita. Tidak mengurus dengan baik, tidak cara yang telus, kewangan pengurusannya tidak baik. Banyak lagi. Ini saya hendak tengok negara yang diuruskan oleh Kerajaan PAS sendiri di Kelantan bagaimana. Ini fakta, bukan saya buat cerita ini. Pelabur satu lagi ini dia melabur Tuan Yang di-Pertua, untung rugi saham PKINK pada 31 Disember 1997. Kos pelaburan Tuan Yang di-Pertua RM12 juta. Tetapi nilai 1997 tinggal RM2 juta. Mana ada syarikat Kuala Kedah, Kuala Kedah hendak sebut saya boleh sebut. Saham-sahamnya Min Ho, Ang Kong, MISC, Asas, Leader semua ada, Jettop pun ada. 52 syarikat yang dilabur anak syarikat Kerajaan Kelantan kosnya RM12 juta tinggal RM2

juta. Ini pelaburan pengurusan Kerajaan Kelantan yang bijak ini. Hendak beritahu sikit. Tidak percaya Yang Berhormat saya boleh bagi lepas ini saya boleh bagi selepas ini saya boleh bagi. Ini satu lagi

Tuan Haji Muhyidin bin Haji Abd. Rashid: Minta laluan, penjelasan sikit.

Dato' Dr. Haji Jamaluddin bin Dato' Mohd. Jarjis: ..tuduhan kononnya keadaan ...

Timbalan Yang di-Pertua [Dato' Haji Muhamad bin Abdullah]: Ada yang berdiri Yang Berhormat.

Dato' Dr. Haji Jamaluddin bin Dato' Mohd. Jarjis: Biar saya habis dahulu.

Tuan Haji Muhyidin bin Haji Abd. Rashid: Boleh tolong baca yang Terengganu sama.

Timbalan Yang di-Pertua [Dato' Haji Muhamad bin Abdullah]: Dia tidak beri Yang Berhormat.

Dato' Dr. Haji Jamaluddin bin Dato' Mohd. Jarjis: Bagilah saya cakap dahulu. Bagi saya cakap dulu sampai habis.

Timbalan Yang di-Pertua [Dato' Haji Muhamad bin Abdullah]: Dia tidak bagi, duduklah Yang Berhormat. Dia kasi satu-satulah.

Dato' Dr. Haji Jamaluddin bin Dato' Mohd. Jarjis: Sebab yang bawah Kelantan ini diurus oleh parti PAS. Parti yang menuduh kita tidak telus, parti yang mengurus kita Kerajaan Barisan Nasional mentadbir dengan tidak baik. Ini saya tunjuk satu fakta. Kita kena konsisten saya kata. Hendak tuduh satu jari tiga pada diri kita. Inilah tiga yang saya sebut tadi ini. Satu lagi ini dia tuduh tentang balak ini. Hutan. Mana saya ada hutan ini. Mana saya tanda hutan. Sedap cerita hutan ini. Ha, ini dia hutan. Dalam ini dia kata bahawa secara tendernya yang dikeluarkan 34 ribu hektar yang ditender. Yang tidak ditender 43 ribu hektar. Lebih daripada separuh. 70% kawasan hutan Kelantan tidak ditender itu satu. Lepas itu yang sedap ini Yang Berhormat sekalian daripada 34 ribu hektar tanah yang dikeluar tender premium hasilnya RM100 juta.

Tetapi yang tidak ditender tadi dibagi begitulah. Ini mestilah bagi geng-geng sama sendiri dalam PAS ini. Ya, dia kata UMNO buat begitu depa buat lebih lagi. Kita tender di Pahang, kita tender. Tidak ada lagi balak ini diberi-beri. Tidak ada lagi. Johor adakah? Ditender belaka kan? Kelantan tidak diberi sama dialah. Dia beri sama dia. Lepas itu yang sedap Tuan Yang di-Pertua 34 ribu yang ditender itu hasil premium pada kerajaan RM100 juta. Yang ditender 34 ribu hasilnya RM100 juta. Yang beri sesama sendiri ini 43 ribu hektar dapat RM12 juta sahaja. Yang ditender 34 ribu hektar dapat RM100 juta premium yang diberi sesama sendiri ini lebih besar kawasannya 40 ribu dapat hasil RM12 juta sahaja. Ini dalam rekod ini.

Timbalan Yang di-Pertua [Dato' Haji Muhamad bin Abdullah]: Ada yang berdiri Yang Berhormat.

Dato' Dr. Haji Jamaluddin bin Dato' Mohd. Jarjis: Kena bagilah sikit, geng.

Tuan Shaziman bin Abu Mansor: Hendak tanya Yang Berhormat, Yang Berhormat ini mahirkah fasal hutan ini. Fasal hutan ini jenis-jenis kayu pun ada. Mungkin kayu-kayu yang tidak ditender itu mungkin kayu-kayu yang tidak sesuai untuk dieksport ataupun tidak boleh perabot. Mungkin sesuai untuk buat *tooth pick* dan sebagainya dengan izin. Yang Berhormat kena faham istilah hutan ini.

Dato' Dr. Haji Jamaluddin bin Dato' Mohd. Jarjis: Ya, betul. Mungkin yang ditender ini kayu tidak bagus. Yang dibagi sama sendiri ini kayu yang tidak ada yang dibagi ini kayu-kayu yang baik-baik belaka. Ini saya tidak tahulah sebab saya tidak hendak hujah macam itu.

Timbalan Yang di-Pertua [Dato' Haji Muhamad bin Abdullah]: Pendang.

Dato' Dr. Haji Jamaluddin bin Dato' Mohd. Jarjis: Ini Ketua Pembangkang saya kena bagilah.

Dato' Haji Fadzil bin Md. Noor: Yang Berhormat Tuan Yang di-Pertua, saya telah merujuk perkara ini kepada pihak Kelantan sebab saya juga baca buku laporan itu dan penjelasan yang diberi bahawa kawasan yang tidak ditender itu ialah kawasan yang sudah pun dikeluarkan balak daripada kawasan itu. Yang tinggal itu ialah kawasan saki baki. Daripada ianya dibuang begitu sahaja maka ianya diberi secara perundingan. Sebab itulah hasil diperolehi adalah sedikit sesudah kawasan itu diterokai dan dikeluarkan balak-balak peringkat awal yang dibuat secara tender. Jadi ini yang tidak dinyatakan dalam Laporan Audit Negara. Saya harap wakil daripada Rompin boleh check semula perkara ini supaya tidaklah menjadikan laporan Juruaudit negara itu sebagai bahan propaganda murah dalam Dewan ini. Terima kasih.

Dato' Dr. Haji Jamaluddin bin Dato' Mohd. Jarjis: Saya yakin kalau Dato' Ketua Pembangkang Menteri Besar Kelantan dia tidak begini. Sebab dia Menteri Besar orang lain. Kalau Ketua Pembangkang sendiri Menteri Besar saya yakin perkara ini tidak akan berlaku. *[Ketawa]*. Sebab apa. Ya betul. PAS ini ada juga geng Kelantan, geng Kedah ini berbeza. Sebab itu Yang Berhormat Kuala Kedah, Mohamad Sabu, minta maaf tersebut nama, Kuala Kedah daripada Kelantan terpaksa bawa balik ke Kedah menyelamatkan Yang Berhormat. Sebab Yang Berhormat ini orang Ketua Pembangkang. *[Ketawa]*. Betul.

Saya tidak menilai dari segi keupayaan Yang Berhormat Ketua Pembangkang, saya tidak persoalkan. Saya tidak menyalahkan kepada Ketua Pembangkang sebab ini bukan bawah kerajaan Ketua Pembangkang. Ini bawah kerajaan PAS Kelantan. Saya mempersoalkan PAS Kelantan. Ini yang banyak bising pun PAS Kelantan. PAS Kedah tidak begitu sangat. Betul tidak. Biar orang Kelantan pertahan dengan orang Kelantan. Sebab dalam rekomen di sini dia kata Ketua Audit Negara kata menasihatkan supaya jangan berlaku lagi bagi tender sebab kerajaan negeri yang lain tidak begitu lagi. Tetapi PAS tetap juga dengan cara mereka.

Sebab itu saya kata tadi janganlah tuduh. Kita perbuktikan di negeri yang kita tadbir dahulu. Sebagai contohnya barulah kita ambil iktibar. Betul Yang Berhormat ya. Macam Yang Berhormat Tasik Gelugor dia Timbalan Ketua Menteri Pulau Pinang. Dia menguruskan dengan baik. Sebab itu terus naik pangkat ke federal sekarang ini. *[Ketawa]*. Ini Kelantan betul. Ini Dato' Ketua Pembangkang kacau tadi.

Satu lagi. Inilah syarikat-syarikat ini. Syarikat-syarikat ini lapan daripada sebelas rugi. Ini yang diuruskan oleh PAS Kelantan. Saya hendak beza dengan PAS Kedah. PAS Kedah saya tidak boleh menuduh mereka sebab mereka ini belum dapat peluang untuk menguruskan Kerajaan Negeri Kedah. Saya kat sini lambatlah menunggunya. Ya, Kedah tidak mungkin akan jatuh kepada PAS. Oh, tidak, tidak. Perlis pun kita ambil balik Arau. Itupun kita hantar wanita sahaja ambil alih. Belum hantar orang lelaki lagi. Inilah Yang Berhormat saya tadi ini masa pun bahawa jelas dalam contoh kalau kita lihat *track record* Barisan Nasional baik tetapi *track record*.

Tuan Mohamad bin Sabu: Boleh saya mencelah sikit?

Dato' Dr. Haji Jamaluddin bin Dato' Mohd. Jarjis: Ya.

Tuan Mohamad bin Sabu: Boleh saya mencelah sikit?

Dato' Dr. Haji Jamaluddin bin Dato' Mohd. Jarjis: Masa sudah...

Tuan Mohamad bin Sabu: Sikit, sikit sahaja, sekejap sahaja. Yang Berhormat bagi Rompin, kalau nampak ada penyelewengan berlaku di Kelantan, buat *report* kepada BPR dan minta siasat, dan kami tidak akan lindungi sesiapa yang menyeleweng termasuk Pegawai Hutankah, Excokah, kalau dia menyeleweng minta buat *report* BPR dan siasat sepenuhnya. Tetapi kita tak mahu macam kita buat *report*

kes Menteri Perdagangan Antarabangsa dan Industri. Dia jalan tadbir yang ini, buat kalau ada penyelewengan.

Dato' Dr. Haji Jamaluddin bin Dato' Mohd. Jarjis: Yang Berhormat, saya tak ada menuduh, kata menyeleweng

Tuan Mohamad bin Sabu: Kalau ada penyelewengan, buat *repot*.

Dato' Dr. Haji Jamaluddin bin Dato' Mohd. Jarjis: Okay, saya setuju. Biar kita, Yang Berhormat pun akan diberi kepercayaan oleh PAS duduk dalam PAC kita boleh berbincang, saya tidak kata menyeleweng. Saya kata pengurusan yang kecekapan tidak cekap dan kalau kita boleh putuskan dalam PAC kalau ada unsur penyelewengan seperti kita putuskan seperti biasa, Yang Berhormat sedia maklum, kita serahkan kepada BPR. Yang Berhormat sendiri tahu pendekatan kita, selalu dalam PAC kita bersama dalam keputusan kita. Tetapi saya cuba membuktikan bahawa yang tuduhan ramai yang sebelah sana tuduh kita tidak menguruskan ekonomi kita dengan baik, dengan cemerlang.

Saya hendak mengambil contoh di Kelantan, 10 tahun. Kita tengok pula nanti lima tahun akan datang bagaimana. Tetapi Yang Berhormat tahulah Yang Berhormat cuba hendak membela Kelantan, sebab Kelantan PAS pun tidak membela Yang Berhormatlah. *[Ketawa]*. Betul, kalau membela Yang Berhormat mengapa dipindahkan Yang Berhormat ke Kedah. Ha... *[Ketawa]*

Timbalan Yang di-Pertua [Dato' Haji Muhamad bin Abdullah]: Jangan buat macam ni. Tak usahlah buat macam ini, tak elok. Teruskan Rompin.

Dato' Dr. Haji Jamaluddin bin Dato' Mohd. Jarjis: Terima kasih. Dia terpaksa mempertahankan, ini pun bekas setiausaha politik dia tak ada, hanya ketua pemuda. Ini Ketua Pemuda PAS, dia tahu siapa yang dia sokong ini. MB Kedahkah, MB Kelantankah atau Ketua Pembangkang? *[Ketawa]* Cakap betul-betul.

Tuan Haji Mahfuz bin Haji Omar: Tuan Yang di-Pertua....

Timbalan Yang di-Pertua [Dato' Haji Muhamad bin Abdullah] Ya, Yang Berhormat bagi Pokok Sena.

Tuan Haji Mahfuz bin Haji Omar: Ini *standard* ketua darjah, darjah enam sahaja ini.

Timbalan Yang di-Pertua [Dato' Haji Muhamad bin Abdullah]: Janganlah cakap macam itu.

Dato' Dr. Haji Jamaluddin bin Dato' Mohd. Jarjis: Itu benda betul....

Timbalan Yang di-Pertua [Dato' Haji Muhamad bin Abdullah]: Cakap macam itu tidak mempunyai makna.

Dato' Dr. Haji Jamaluddin bin Dato' Mohd. Jarjis: Saya pun tahu juga cerita dalam politik PAS ini.

Timbalan Yang di-Pertua [Dato' Haji Muhamad bin Abdullah]: Berbalah-balah macam tu, kita keluar senang, tak usah buat dalam Dewan ini. Yang Berhormat Rompin, sila gulung.

Dato' Dr. Haji Jamaluddin bin Dato' Mohd. Jarjis: *[Ketawa]* Ini satu perkara yang saya ingin bawa sedikit tentang ekonomi luar bandar, Tuan Yang di-Pertua. Kerajaan Barisan Nasional semenjak merdeka lagi, sebagai perkara terakhir saya bawa pada hari inilah, sudah menjadi agenda pembangunan ekonomi luar bandar semenjak lagi kita merdeka. Kalau kita lihat dari segi perjuangan UMNO, pada ketika itu Perikatan, selepas itu Barisan Nasional, pada mulanya kita wujudkan RIDA untuk membela masyarakat luar bandar, lepas itu kita wujudkan MARA.

Selepas itu komitmen kerajaan Barisan Nasional untuk membela orang luar bandar, masyarakat luar bandar kita wujudkan pula RISDA, FELCRA dan FELDA. Kita menyanjung tinggi usaha agensi-agensinya ini seperti macam FELDA yang

membuka hutan belantara dan memberi satu lambaran hidup yang baru. Ramai kira-kira 250,000 anggota keluarga yang baru, yang tiada tanah, yang tiada masa depan diberikan satu potensi hidup yang baru. Alhamdulillah, kita lihat FELDA sudah menjadi satu perancangan pembangunan luar bandar yang amat berjaya sekali.

Namun demikian, dengan dekad baru 2000 ini dunia tiada sempadan, sumber yang penting bukan lagi sumber yang asli, tetapi sumber ilmu, saya ada sentuh sedikit tadi oleh kerana masa tidak ada, dunia yang IT, pasaran dunia yang bertambah mencabar, saya ingin mencadangkan kepada kerajaan kerana menteri pun ada, menteri tokoh muda yang baru, apa salahnya kalau dalam merancang strategi pendekatan yang baru untuk terus membela masyarakat luar bandar ini kita kaji kembali tentang peranan agensi-agensi ini iaitu peranan MARA, RISDA, FELCRA dan FELDA ini. Tetapi saya bukan mengatakan bila mencadangkan supaya dilihat kembali dari segi *mission statement*nya, strateginya, semestinya mesti kerajaan menarik diri - tidak. Saya mencadangkan supaya kalau boleh ditambahkan lagi peruntukannya supaya kerajaan terus kekal untuk membela masyarakat luar bandar. Kaji kembali..

Timbalan Yang di-Pertua [Dato' Haji Muhamad bin Abdullah]: Yang Berhormat, masa sudah cukup.

Dato' Dr. Haji Jamaluddin bin Dato' Mohd. Jarjis: Sikit sahaja, nak habiskan point ini, penting orang luar bandar, Dato' pun daripada Maran, luar bandar juga, penting benar. Kaji kembali tentang peranan agensi-agensi ini, saya bimbang sedikit

Timbalan Yang di-Pertua [Dato' Haji Muhamad bin Abdullah]: Sikit saja.

Dato' Dr. Haji Jamaluddin bin Dato' Mohd. Jarjis: Sikit sahaja, saya bimbang sedikit dalam suasana.....

Dato' Mahadzir bin Mohd. Khir: Sikit sahaja Yang Berhormat. Saya tak kacau Yang Berhormat, saya minta laluan sikit sahaja. Oleh kerana dalam penjelasan Yang Berhormat Rompin telah lakukan tadi nampaknya kerajaan negeri Kelantan gagal mengurus dan mentadbir. Jadi kita rasa boleh tak, kalau saya katakan bahawa pilihan raya yang akan datang supaya pengundi di Kelantan pusing balik undi Barisan Nasional supaya Barisan Nasional dapat mengurus dan mentadbir negeri Kelantan dan juga kerajaan Kelantan gagal untuk mengadakan sebarang rancangan tanah untuk anak-anak Kelantan. Betul tak, Yang Berhormat?

Dato' Dr. Haji Jamaluddin bin Dato' Mohd. Jarjis: Terima kasih, ini anak bapak menteri kita dahulu ya.

Timbalan Yang di-Pertua [Dato' Haji Muhamad bin Abdullah]: Masa Yang Berhormat dah habis, Yang Berhormat.

Dato' Dr. Haji Jamaluddin bin Dato' Mohd. Jarjis: Allah, [*Ketawa*] saya hendak habis sedikit sahaja. Nak habis sikit, saya malas kacaulah. Sebenarnya depa ni dahulu, dia protes saya pula, gunakan isu 46, sebab itu dia menang. Lepas itu isu yang dewasa ini isu Anwar Ibrahim, sebenarnya dia yang menang. ADIL ini digunakannya seperti dia gunakan 46 dahulu, dia guna ADIL sekarang, itu kita bahas isu lainlah.

Saya nak balik menutup. Saya bimbang sedikit, saya setuju dengan Yang Berhormat tadi mengatakan kita tidak boleh bergantung kepada pasaran untuk membela rancangan luar bandar. Kerajaan perlu terus memainkan peranannya untuk membela masa depan, kualiti hidup orang-orang luar bandar. Saya bimbang desa-desa sekarang ini, kita bimbang ada kita dengar agensi-agensi yang sepatutnya membela masyarakat luar bandar pergi buat ladanglah, pelaburan di luar negara.

Timbalan Yang di-Pertua [Dato' Haji Muhamad bin Abdullah]: Cukup Yang Berhormat.

Dato' Dr. Haji Jamaluddin bin Dato' Mohd. Jarjis: Sikit nak habis kalau boleh, sebab PAS pun setuju. Tadi dia bela luar bandar juga. Yang ini dia setuju, saya rasa tak yakin yang PAS tak bersetuju kita bela orang di luar bandar.

Timbalan Yang di-Pertua [Dato' Haji Muhamad bin Abdullah]: Dia setuju, cukup Yang Berhormat.

Dato' Dr. Haji Jamaluddin bin Dato' Mohd. Jarjis: Setuju pun saya nak sikit saja nak habis, penutup sikit saja.

Timbalan Yang di-Pertua [Dato' Haji Muhamad bin Abdullah]: Cukuplah Yang Berhormat.

Dato' Dr. Haji Jamaluddin bin Dato' Mohd. Jarjis: Sikit sahaja, tolong Dato'.....

Timbalan Yang di-Pertua [Dato' Haji Muhamad bin Abdullah]: Masa dah lebih banyak saya bagi.

Dato' Dr. Haji Jamaluddin bin Dato' Mohd. Jarjis: Sikit sahaja, seminit lagi, boleh?

Timbalan Yang di-Pertua [Dato' Haji Muhamad bin Abdullah] Tak boleh, Yang Berhormat. Seminit tak boleh.

Dato' Dr. Haji Jamaluddin bin Dato' Mohd. Jarjis: Baiklah.

Timbalan Yang di-Pertua [Dato' Haji Muhamad bin Abdullah]: Dah lebih banyak saya bagi.

Dato' Dr. Haji Jamaluddin bin Dato' Mohd. Jarjis: Tapi DAP suruh saya teruskan.

Timbalan Yang di-Pertua [Dato' Haji Muhamad bin Abdullah]: Tak boleh, dia bukan pengerusi [*Ketawa*], kalau begitu senanglah ikut cakap dia sajalah.

Dato' Dr. Haji Jamaluddin bin Dato' Mohd. Jarjis: Saya bagi....

Timbalan Yang di-Pertua [Dato' Haji Muhamad bin Abdullah]: Ya, ada apa ni Ketua Pembangkang. Yang Berhormat Pendang ada apa, nak minta penjasankah atau apa ni?

Dato' Haji Fadzil bin Md. Noor: Tuan Yang di-Pertua....

Timbalan Yang di-Pertua [Dato' Haji Muhamad bin Abdullah]: Nak minta penjelasan ke apa ini? Boleh, dia nak minta penjelasan.

Dato' Dr. Haji Jamaluddin bin Dato' Mohd. Jarjis: Boleh, Ketua Pembangkang saya bagi.

Timbalan Yang di-Pertua [Dato' Haji Muhamad bin Abdullah]: Ha, biar.

Dato' Haji Fadzil bin Md. Noor: Sepatutnya Presiden *Backbancher* ini dengarlah arahan Tuan Yang di-Pertua, yang tak sempat diucap tu, pulang berucap di Rompin [*Ketawa*] atau balik berucap di Sanggang ke, di mana ke.

Timbalan Yang di-Pertua [Dato' Haji Muhamad bin Abdullah]: Ha cukup, cukup, cukup. Cukuplah Yang Berhormat Rompin. Cukup, dalam Jawatankuasa nanti pun boleh sentuh.

Dato' Dr. Haji Jamaluddin bin Dato' Mohd. Jarjis: Saya nak jawab Ketua Pembangkang sahaja. Kalau saya tak dapat jawab Ketua Pembangkang, nanti marah anak buah dia pula.

Timbalan Yang di-Pertua [Dato' Haji Muhamad bin Abdullah]: Tak apa, dia tak marah.

Dato' Dr. Haji Jamaluddin bin Dato' Mohd. Jarjis: [*Ketawa*]

Timbalan Yang di-Pertua [Dato' Haji Muhamad bin Abdullah]: Tak marah saya percaya, cukuplah tu Rompin.

Dato' Dr. Haji Jamaluddin bin Dato' Mohd. Jarjis: Saya mohon menyokong.

Timbalan Yang di-Pertua [Dato' Haji Muhamad bin Abdullah] Terima kasih. Yang Berhormat bagi Batu.

3.53 ptg.

Tuan Ng Lip Yong [Batu]: Terima kasih, Tuan Yang di-Pertua, terlebih dahulu saya ingin mengucapkan terima kasih kepada Tuan Yang di-Pertua di Dewan yang mulia ini kerana telah diberi peluang untuk bersama-sama membahaskan Belanjawan 2000. Seperti yang kita ketahui Yang Berhormat Menteri Kewangan telah membentangkan Belanjawan 2000 buat kali pertama pada 29 Oktober tahun lepas. Sungguhpun cadangan awal masih dikekalkan, saya mengucapkan tahniah kepada kerajaan Barisan Nasional kerana telah memasukkan insentif baru atau tambahan yang akan mempertingkatkan pertumbuhan ekonomi dan membina asas yang kukuh untuk meneruskan pertumbuhan di masa akan datang.

Tuan Yang di-Pertua, hala tuju Belanjawan 2000 adalah jelas. Teras utamanya adalah untuk menghidupkan semula pertumbuhan ekonomi yang terbantut akibat krisis ekonomi yang melanda pada tahun 1997. Malaysia sedang pulih dari krisis itu melalui tindakan berani dan unorthodox yang diambil oleh kerajaan Barisan Nasional di bawah pimpinan Perdana Menteri, Yang Amat Berhormat Dato' Seri Dr. Mahathir Mohamad. Seperti yang kita masih ingat ketika itu pengkritik kerajaan amat meragui tindakan kerajaan itu dan ada juga di kalangan mereka yang mengutuk negara ini kerana mengambil langkah-langkah tersebut.

Sejarah akan menjadi penentu kepada sebarang tindakan. Tindakan kerajaan sekarang telah disahkan sebagai wajar dan para pengkritik telah mengakui bahawa kritikan mereka adalah melampau dan silap. Pada tahun 1998 kerajaan telah menubuhkan Majlis Tindakan Ekonomi Nasional (MTEN) untuk memantau aliran, mengumpulkan maklumat-maklumat ekonomi dan menggariskan tindak balas dasar yang bersesuaian. MTEN memainkan peranan yang sangat penting dalam pemulihan ekonomi negara kita.

Saya ingin mengambil kesempatan ini untuk mengucapkan ribuan terima kasih kepada mereka yang terlibat dengan MTEN terutamanya mereka yang bekerja di belakang tabir tanpa mempunyai sebarang objektif lain selain dari melihat negara ini dapat keluar dari kemelut ekonomi. Pentingnya MTEN telah membawa saya kepada satu kesimpulan iaitu kita patut menjadikannya satu badan tetap. Saya dengan ini ingin membuat satu cadangan supaya kerajaan tidak membubarkan MTEN tetapi sebaliknya memberikan badan ini pengiktirafan yang sepatutnya. Kita akan menghadapi pelbagai risiko baru dan halangan-halangan memandangkan globalisasi dan liberalisasi akan terus memberikan tekanan ke atas negara ini. Kita perlulah sebuah badan seperti MTEN supaya kita dapat membuat tindak balas yang pantas kepada cabaran-cabaran ini.

Tuan Yang di-Pertua, beberapa langkah telah dicadangkan untuk memperkuatkan daya saing dan daya tahan negara terhadap risiko-risiko luaran. Kita perlu mengambil ruang untuk bergerak ataupun *breathing space*, dengan izin, yang diberikan oleh kawalan modal terpilih untuk membentuk dan memperkuatkan sistem kewangan dan juga budaya korporat kita. Sebarang sikap berpuashati ekoran dari peningkatan ekonomi akan bermakna serangan ke atas ekonomi kita di masa hadapan akan membawa akibat yang lebih buruk. Dalam hal ini saya ingin menyarankan supaya satu jawatankuasa khas ditubuhkan untuk mengawasi daya saing ekonomi negara kita khasnya kos menjalankan perniagaan.

Tuan Yang di-Pertua, pendidikan membentuk 67.2% atau lebih kurang RM12 bilion dari perbelanjaan mengurus dari keseluruhan jumlah yang diperuntukkan untuk

perkhidmatan sosial dan 51% atau RM3.7 bilion dari perbelanjaan untuk perkhidmatan sosial. Maka jumlah peruntukan pendidikan ialah RM15.7 bilion atau lebih kurang 20% dari keseluruhan peruntukan Belanjawan 2000. Ini mungkin bahagian yang terbesar dalam Belanjawan 2000.

Sistem pendidikan negara selalu dikritik sebagai tidak berkesan, dengan itu ia mesti diperhatikan dengan teliti supaya kita dapat nilai yang setimpal dengan wang yang dikeluarkan atau dengan izin, *value for money*. Lebih penekanan harus diberikan untuk memperbaiki pendidikan di peringkat rendah dan menengah untuk memberikan *in-put* yang betul di peringkat pengajian tinggi. Kebolehan berbahasa selain Bahasa Malaysia terutamanya Bahasa Inggeris akan membuka dunia pengetahuan kepada penuntut-penuntut kita dalam dunia yang saling berhubungan dan tanpa sempadan atau dengan izin, *connected and borderless world*.

Buat masa ini kita tidak mencapai sasaran atau target untuk mempunyai nisbah 60:40 bagi pelajar sains kepada pelajar sastera. Nisbah yang sebenarnya mungkin 40:60. Dalam usaha untuk mencapai status negara maju kita mesti mempunyai satu populasi yang berfikiran sains dan teknologi. Oleh sebab itu sains dan teknologi harus dijadikan satu cara hidup dan diperkenalkan pada umur yang masih muda.

Tuan Yang di-Pertua, rakyat adalah aset kita yang paling bernilai. Adalah amat mengembirakan bahawa dalam Belanjawan 2000 had pinjaman Tabung Pengajian Tinggi Nasional telah dinaikkan. Semua pelajar institusi pengajian tinggi adalah layak mendapat pinjaman tanpa mengira mereka dari institusi awam (IPTA) atau swasta (IPTS). Pinjaman bagi pelajar di IPTS telah dinaikkan sebanyak RM500 bagi kedua-dua bidang sastera dan sains. Bagi mereka di IPTA mereka akan menerima wang pendahuluan RM1,000-1,500 untuk yuran pendaftaran. Ini merupakan bukti yang jelas bahawa Kerajaan Barisan Nasional amat memahami keperluan para pelajar dan akan memberikan sebarang bantuan yang boleh untuk memastikan mereka tidak dinafikan tempat atau peluang untuk mendapat pengajian tinggi disebabkan kewangan yang tidak mencukupi.

Tuan Yang di-Pertua, dengan kematangan industrialisasi lebih penekanan harus diberikan untuk mengubah perkhidmatan atau *services*, dengan izin, kepada sektor perkembangan ekonomi yang utama. Dalam proses perubahan dari p-ekonomi atau ekonomi pengeluaran kepada k-ekonomi, ekonomi berasaskan ilmu pengetahuan, sumber manusia yang berpengetahuan dan mahir menjadi lebih penting dari sebelumnya. Kita kekurangan tenaga manusia mahir di dalam bidang teknologi maklumat. Dalam hal ini saya mengalu-alukan insentif baru yang diperkenalkan oleh Yang Berhormat Menteri Kewangan yang menyatakan bahawa syarikat-syarikat tersenarai tempatan kini akan diberi pengecualian had 25% bagi perolehan harta intelek dan syarikat-syarikat milik rakyat Malaysia yang berdaftar di luar negara.

Dilaporkan terdapat sekurang-kurangnya 30,000 warganegara Malaysia bekerja di dalam bidang teknologi maklumat di negara jiran. Insentif-insentif baru seperti ini akan menyokong perkembangan teknologi maklumat di Malaysia dengan menggalakkan pengembalian harta intelek dan pengeluarannya ke negeri ini. Saya sekali lagi ingin mendesak pihak kerajaan supaya mengambil langkah-langkah segera untuk mengelakkan kehilangan tenaga pakar atau *brain drain*, dengan izin, kerana ia membawa kesan yang merugikan perkembangan industri teknologi maklumat di Malaysia.

Teknologi maklumat muncul tidak hanya sebagai industri kepunyaan perseorangan atau dengan izin, *propriety industry*. Ia merupakan kuasa yang amat berkesan yang dapat membentuk kembali keseluruhan kuasa pasaran atau dengan izin, *it is a potential that could reshape the entire market forces*, contohnya dalam pasaran kewangan. Hari ini hanya dengan menekan button boleh mencetuskan keruntuhan serantau, satu fenomena serangan pada tahun 1997 ke atas mata wang serantau.

Tuan Yang di-Pertua, masa hadapan akan menjadi masa *digital, the future is digital*, dengan izin. Semasa memasuki abad ke-21 banyak isu-isu utama dari rangkaian peristiwa yang saya lihat, di mana semuanya membawa makna yang besar kepada masyarakat kita dan intradinamikinya. Saya ingin berucap mengenai kesan dan implikasi teknologi maklumat dan minat golongan muda kepada dunia digital. Tahun-tahun 90-an telah melahirkan satu generasi net atau *net generation*, dengan izin, yang merupakan generasi pertama yang mempunyai pengetahuan yang lebih mengenai teknologi berbanding dengan ibu bapa mereka. Ini meletakkan golongan ini sebagai peneraju utama Internet dan perkara-perkara yang berkait dengan IT. Di Malaysia kini kita boleh dapati generasi net ini semakin berkembang dengan kadar yang menakjubkan. Perubahan ini dan kesanggupan golongan muda untuk menerima IT sebagai sebahagian dari kehidupan mereka menunjukkan kemampuan golongan ini.

Tuan Yang di-Pertua, pelbagai inisiatif yang telah diambil oleh Kerajaan Barisan Nasional untuk menggalakkan pengetahuan mengenai komputer atau dengan izin, *computer literacy* adalah sesuatu yang harus dibanggakan. Tambahan pula, dengan insentif baru yang diberikan seperti kebenaran mempercepatkan elaun modal untuk membeli peralatan komputer, pemberian taraf perintis dan elaun cukai pelaburan, langkah-langkah itu akan mempercepatkan lagi perkembangan industri-industri berasaskan teknologi tinggi. Dana khas RM500 juta yang diumumkan pada bulan Oktober tahun lalu sebagai sokongan kepada industri berisiko tinggi adalah amat dialu-alukan.

Walau bagaimanapun di mana dunia yang sentiasa berubah ini sokongan dana sahaja tidak akan membuat kita lebih berdaya saing. Kita juga harus mempertingkatkan sumber manusia kita. Adakah kita ahli Parlimen sebagai pembuat dasar bersedia untuk *trend ultrapantas* dan perubahan ini. Kita perlu membuat strategi dan membuat balasan atau *response*, dengan izin, yang bersesuaian supaya kita tidak ketinggalan kemajuan dan peluang untuk menjadi ahli yang relevan kepada masyarakat net atau *net community*, dengan izin, yang lebih besar.

Inisiatif kerajaan untuk memperkenalkan sistem *wireless in local loops* untuk menyediakan kemudahan telekomunikasi di kawasan luar bandar adalah usaha bersama untuk menghalang ketidaksamaan yang semakin luas di antara pelajar bandar dan pelajar luar bandar yang secara tradisinya serba kekurangan. Pada satu cubaan 120,000 pelanggan di kawasan luar bandar dan di pedalaman akan mendapat laluan kepada ilmu pengetahuan yang sebelumnya tidak boleh diperolehi oleh mereka. Ini adalah salah satu langkah bagaimana kerajaan Barisan Nasional yang bertanggungjawab meningkatkan kepentingan rakyat luar bandar.

Tuan Yang di-Pertua, seperti tahun-tahun sebelumnya Kerajaan Barisan Nasional yang penyayang sedang memperbanyakkan lagi program-program sosial untuk kesejahteraan rakyat. Pembinaan rumah-rumah kos rendah atau flat terus diberikan keutamaan. Saya yakin hasrat untuk membina 26 projek perumahan rakyat bersepadu yang mengandungi 34,892 unit flat kos rendah di Kuala Lumpur akan berjaya disiapkan mengikut rancangan.

Timbalan Yang di-Pertua [Dato' Haji Muhamad bin Abdullah]: Sila gulung Yang Berhormat.

Tuan Ng Lip Yong: Walau bagaimanapun, unit-unit ini hanya untuk disewa. Ramai setinggan yang tinggal di kawasan sekitarnya telah menyuarakan hasrat mereka untuk membeli unit-unit ini. Saya merayu kepada pihak kerajaan supaya menyediakan sejumlah kecil flat-flat ini untuk dijual kepada setinggan tempatan yang mampu. Jumlahnya tidak besar dan tidak akan menghalang usaha kerajaan untuk menjadikan Kuala Lumpur sebuah bandaraya yang bebas dari setinggan menjelang tahun 2005.

Akhirnya, Tuan Yang di-Pertua, sebagai tambahan di mana pembangunan semula kawasan bandar dijalankan, kita juga mesti menjaga kebajikan penghuni yang sedia ada. Sebagai contoh, pembangunan semula Flat Jalan Pekeliling di Kuala Lumpur yang melibatkan lebih kurang 3,000 buah unit, walaupun 404 pemilik flat

telah diberi pilihan untuk membeli flat kos rendah alternatif di kawasan lain penyewa flat tidak diberi pilihan sedemikian. Saya menggesa kerajaan untuk mempertimbangkan memberi tawaran flat kos rendah lain untuk dibeli oleh penyewa yang telah tinggal di flat tersebut lebih sepuluh tahun.

Sekian, saya mengucapkan sekali lagi berbilang-bersang terima kasih kepada Tuan Yang di-Pertua, saya mohon menyokong.

Timbalan Yang di-Pertua [Dato' Haji Muhamad bin Abdullah]: Okay, terima kasih. Ini...pasir, Pasir Mas. Sila.

4.10 ptg.

Tuan Haji Ismail bin Noh [Pasir Mas]: Assalamualaikum wr. wb. dan salam sejahtera.

Tuan Yang di-Pertua, terima kasih kerana telah memberi kesempatan kepada saya sama untuk berkongsi pandangan dan pendapat dalam perbincangan budget negara dan sebagaimana yang telah dibentangkan oleh Yang Berhormat Menteri Kewangan pada hari Jumaat yang lalu.

Tuan Yang di-Pertua, tidak syak dan tidak ragu bahawa negara kita memiliki kekayaan dari zaman berzaman. Sejak dari zaman penjajah ke zaman kita hari ini dengan hasil bumi yang begitu banyak yang dijadikan oleh Allah s.w.t. Bumi kita memiliki segala keperluan yang diperlukan. Kalau ianya dapat dibangunkan dengan sebaik-baik, kita miliki emas, perak, bijih, getah dan sekarang ini kelapa sawit, petrol dan dibantu dengan kesuburan bumi sebagaimana bumi pertanian yang boleh menghasilkan pertanian yang mencukupi keperluan rakyat negara ini tanpa memerlukan kepada bantuan negara-negara lain. Tetapi malangnya, walaupun sumber-sumber asas yang begitu banyak tetapi negara masih memerlukan bahan import yang begitu besar dari negara-negara lain seperti beras, daging dan lain-lain. Ini menunjukkan bahawa kita tidak bertindak cergas dan berkesan di dalam mengambil kesempatan yang tersedia ada.

Tuan Yang di-Pertua, sebagaimana yang kita maklumi bahawa Belanjawan yang dikemukakan baru-baru ini jangan dipisahkan sekali-kali daripada dua perkara yang utama. Pertama untuk membangun negara dan yang kedua untuk kesejahteraan rakyat. Kedua-dua ini hendaklah tercakup dan tidak boleh diabaikan di antara satu sama lain. Dan ramai berpendapat bahawa kalau negara membangun maka sudah pasti kesejahteraan rakyat terjamin. Begitulah yang dikehendaki tetapi kadang-kadang sebaliknya. Negara membangun tetapi rakyat dalam keresahan. Rakyat tidak merasa sejahtera dan aman di dalam kehidupan mereka. Apalagi kalau negara itu gagal untuk dibangunkan.

Tuan Yang di-Pertua, pembangunan tidak sukar untuk dilaksanakan oleh mana-mana pihak bila mana kita atau negara memiliki syarat-syarat kebendaan yang cukup dan usaha-usaha yang gigih yang disertakan oleh keupayaan yang ada pada pemimpin dan rakyat di sesebuah negara itu dan masing-masing jujur untuk melihat negara itu membangun dalam semua aspek pembangunan. Di sini tidak benar kalau orang mengatakan sekiranya parti pembangkang memerintah, mereka tidak dapat meneruskan pembangunan-pembangunan yang telah tersedia ada ini. Adalah dimaklumi bahawa saiz muka bumi kita Senenanjung Malaysia, Sabah dan Sarawak tidak begitu besar kalau kita bandingkan dengan negara-negara Asia yang lain.

Ditambah dengan bekalan asas yang dijadikan oleh Allah s.w.t. memudahkan pemimpin di negara kita menyelenggarakan pembangunan di seluruh negara dengan tidak menunggu ataupun mengambil masa yang begitu panjang. 42 tahun negara kita merdeka, kita masih mendengar sungutan-sungutan dari ramai Yang Berhormat bahawa di kawasannya tidak mempunyai bekalan elektrik, bekalan air bersih dan jalan kluatan yang begitu payah dan sukar sekali. Apakah kita memerlukan 42 tahun lagi bagi membangun negara kita ini? Kepada siapa hendak kita persalahkan. Hendak persalahkan kepada penjajah, penjajah sudah kembali lama meninggalkan negara kita.

Tuan Yang di-Pertua, sudah barang tentu negara kita akan menikmati pembangunan yang sewajarnya dengan tidak menunggu masa yang begitu lama kerana negara kita mempunyai aset-aset yang begitu banyak kalau kita bandingkan dengan negara-negara jiran kita. Rakyat akan merasai hasil pembangunan ini di semua negeri tanpa mengira negeri diperintah oleh parti kerajaan ataupun di sebaliknya. Tetapi sayang sebagaimana yang berlaku di Kelantan ini. Sepatutnya Kerajaan Pusat menyalurkan bantuan-bantuan kepada kerajaan negeri lebih awal. Tidak sebagaimana yang berlaku sekarang ini kerana dasar demokrasi yang diamalkan di negara ini sepatutnya menjamin kelangsungan politik dan kebebasan bersuara dan sekaligus menjamin keselarasan pembangunan yang seharusnya berlaku.

Tuan Yang di-Pertua, tidak dapat dinafikan oleh sesiapa bahawa negara kita yang sebegini strategik, baik dari segi geografi ataupun ekonomi ditambah dengan tenaga kerja yang ramai pasti memudahkan pelaksanaan pembangunan negara kita, boleh berjalan dengan lancar dan jayanya kalau semua mengambil tanggungjawab dan sikap prihatin kepada usaha yang dilakukan ini. Konsep *ubudiah*, *mas'uliah* dan *ithqan*, dengan izin mesti digarapkan di semua halangan yang terlibat daripada pemimpin sampai kepada rakyat jelata.

Di dalam ertikata bahawa hendaklah semua yang bertanggungjawab dalam melaksanakan urusan negara menanamkan sikap pengabdian diri kepada Allah s.w.t. yang kita sebutkan tadi sebagai *ubudiah* dan begitu juga mempunyai rasa tanggungjawab sepenuhnya kepada setiap apa yang dilakukan akan dipersoalkan balik kemudiannya nanti. Sebagaimana yang dibaca oleh sahabat-sahabat kita, sabda Rasulullah s.a.w [*Membaca sepotong Hadis*]

“Setiap kamu adalah pemimpin dan kamu akan ditanya tentang kepimpinamu”.

Begitu juga mempunyai sikap kesungguhan bekerja sebagaimana yang disebut oleh Rasulullah s.a.w [*Membaca sepotong Hadis*] bermaksud:

“Sesungguhnya Allah suka kepada seseorang apabila ia bekerja, ia melakukan kerjanya dengan bersungguh-sungguh”.

Konsep ini hendaklah diterapkan kepada semua peringkat sehingga kewangan negara yang begitu banyak yang diamanahkan kepada kita dan kepada negara dapat diselenggarakan dengan baik dan semua pembangunan dapat dicapai dengan jayanya dan rakyat terbanyak dapat menikmati pembangunan negara yang sedang diperkatakan ini. Pembangunan negara bukan bererti bangunan besar yang mencakar langit kemudiannya ia tertumpu kepada tempat-tempat tertentu sahaja.

Tetapi pembangunan sebenar ialah pembangunan yang dapat memberi kesejahteraan, kemudahan kepada rakyat terbanyak walaupun di dalam bentuk yang sederhana sahaja. Apalah erti pembangunan sekiranya ia hanya dinikmati oleh kumpulan orang-orang tertentu tetapi kehidupan rakyat begitu miskin. Di setengah-setengah tempat dan ada di kalangan mereka yang tinggal di tempat-tempat yang tidak munasabah diduduki oleh manusia. Rumah-rumah setinggalan yang kelihatan di mana-mana. Bangunan yang begitu daif yang tidak harus wujud di zaman yang serba maju dan mewah ini.

Tuan Yang di-Pertua, walaupun kita telah mendengar *budget* negara begitu banyak dari setahun ke setahun tetapi kita masih mendengar rakyat di banyak negeri di Malaysia ini dikira miskin, masih di tahap kais pagi makan pagi dan kais petang makan petang sedangkan khazanah dan aset-aset negara begitu banyak sekali. Di manakah janggalnya sehingga ia boleh berlarutan sedemikian rupa. Apakah fahaman kapitalis yang bermaharajalela di Barat mula meresap masuk sedikit demi sedikit ke negara dan sudah menjadi semacam amalan biasa tanpa mengira golongan terendah ataupun *simak* (sifat tamak haloba) sehingga kita tidak menghiraukan golongan-golongan yang kurang bernasib baik ataupun miskin. Sabda Nabi Muhammad s.a.w [*Membaca sepotong Hadis*] bermaksud:

“Bukan daripada kami, mereka tidur dalam keadaan kenyang perutnya dan jiran-jirannya berada dalam keadaan kelaparan”.

Islam melarang sifat dan sikap sedemikian dengan wujudnya golongan yang senang-lenang dan tidak mengambil tanggungjawab kepada golongan yang lemah ini. Justeru itu Islam melarang keras bnggokan harta kepada seorang individu ataupun kumpulan tertentu sahaja dan tidak dirasai sama oleh golongan-golongan lain sehingga wujudnya jurang perbezaan yang begitu meluas di antara individu dengan individu yang lain sehingga menimbulkan rasa benci dan hasad dengki yang ketara. Allah s.w.t. berfirman [*Membaca sepotong ayat Al-Quran*] Suratul Hasyr ayat yang ketujuh, bermaksud:

“Supaya harta itu tidak berlegar-legar di antara orang-orang kaya di kalangan kamu sahaja”.

Tuan Yang di-Pertua, kemis kinan di kalangan petani-petani, nelayan-nelayan dan penoreh-penoreh getah sangat ketara di negara kita ini. Pendapatan yang mereka perolehi tidak cukup membiayai keperluan hidup mereka sehari-hari. Apalagi mereka dibebankan dengan yuran persekolahan anak-anak yang begitu tinggi. Sekiranya anak mereka ke pusat pengajian tinggi akhirnya anak-anak mereka masuk ke kilang, ganti pusat pengajian tinggi yang mereka tidak mampu untuk membiayainya.

Saya memuji Kerajaan Negeri Kelantan tidak membuka kepada kilang-kilang masuk di negeri Kelantan begitu banyak. Bilamana kilang tidak banyak di Kelantan, maka anak-anak di negeri Kelantan terus-menerus dengan pelajarannya walaupun sekali-sekala mereka gagal dalam peperiksaan, mereka tidak mencari kilang sebagai tempatnya. Akhir sekali, mereka berjaya dalam pelajaran dan kita melihat betapa ramai anak-anak daripada negeri Kelantan yang berada di pusat-pusat pengajian tinggi baik di dalam negeri ataupun di luar negara.

Tuan Yang di-Pertua, nasib petani, nelayan dan penoreh getah masih berada di tahap lama walaupun negara kita sudah lama merdeka. Memang mereka tidak membajak sawah dengan menggunakan kerbau, tidak bersampan ke laut untuk menangkap ikan dan tidak berjalan kaki memikul getah ke pasar. Tetapi berapa harga padi mereka, berapa harga ikan mereka dan berapa pula harga getah mereka? Jawapannya tidak cukup untuk membiayai kehidupan seisi keluarga. Apalagi bila mereka dibebankan dengan keperluan-keperluan lain. Bayaran ke pusat pengajian tinggi menghantui mereka. Anak-anak mereka ditarik di pertengahan jalan – diberhentikan dari bersekolah. Bak kata orang, sudah jatuh ditimpa tangga. Mereka jauh daripada menikmati ekonomi global dan pasaran saham yang dikatakan melonjak ini.

Satu perkara lagi yang harus difikir bersama oleh kita tentang masa depan generasi kita sekarang ini kerana kepada merekalah hendak kita serahkan negara, tanahair dan agama ini. Kita pasti tidak dapat bertahan lama, barangkali lima tahun ataupun sepuluh tahun. Kemudian kita akan kembali ke rahmatullah. Soalnya di dalam keadaan sekarang ini, apakah generasi-generasi ini layak memikul tanggungjawab dan amanah yang serba berat ini. Kalau kita keluar sahaja daripada bangunan ini, kita akan menemui banyak ragam dan corak generasi kita. Ada yang melepak, ada yang tidak menentu hala dan berbagai-bagai lagi.

Ini belum dikira mereka yang berada di pusat-pusat Serenti, ‘Pusat Serentak Berhenti’ tetapi bukan serentak berhenti, serentak masuk. [*Ketawa*] Puluhan ribu di seluruh negara. Berapa banyak wang negara dibelanjakan untuk mereka, ditambah dengan pengidap-pengidap penyakit AIDS yang sudah meresap di seluruh negara. Kesemuanya ini kalau tidak ditangani dengan bersungguh-sungguh, maka negara kita akan menyaksikan suatu keruntuhan bukan keruntuhan bangunan yang dibuat tetapi keruntuhan manusia itu sendiri dan akhir sekali runtuhlah budaya, akhlak dan agama.

Untuk itu kerajaan mesti berusaha dari sekarang dengan segala keupayaan yang ada bagi menyelamatkan generasi kita sekarang ini dan akan datang supaya mereka terselamat daripada malapetaka yang bukan menimpa mereka sendiri tetapi

menimpa negara, bangsa dan agama. Usaha pendidikan mesti digembelngkan dan semua tenaga mesti dikerahkan. Pendidikan bukan hanya berada di bilik-bilik sekolah semata-mata tetapi hendaklah digarapkan sama melalui alat sebaran am, TV, radio, surat khabar dan sebagainya. TV, surat khabar dan majalah-majalah hendaklah berhenti serta-merta daripada menyiar suatu yang boleh merosakkan akal dan spiritual anak-anak muda.

Filem-filem berunsur keganasan, seks dan sebagainya dan memuat sesuatu yang tidak baik yang boleh merosakkan akhlak dan budaya anak-anak muda hendaklah dibanteraskan dan diganti dengan perkara-perkara yang boleh membangun, membentuk minda dan keupayaan mereka. Cukuplah apa yang dirasai oleh Barat sekarang ini. Mereka sedang berhadapan dengan suatu keruntuhan yang amat dahsyat. Anak-anak mereka tidak lagi suka tinggal di rumah-rumah mewah mereka. Mereka meninggalkan ibu bapa mereka, tidak ada kasih sayang di antara anak dengan bapa dan seterusnya.

Dan kalau ibu bapa mereka sudah tua maka mereka dihantar ke rumah orang-orang tua. Dan bila orang tua mereka sudah meninggal dunia, anak-anak mereka hanya sekadar menelefon sahaja kepada pihak-pihak yang terbabit menanyakan berapa harga pengurusan kematian ibu bapa mereka. Barat betul membangun dan ini tidak dapat dinafikan oleh sesiapa tetapi nampaknya bentuk yang dibangunkan oleh Barat tidak dapat dipertahankan lama. Mereka dapat membangun kebendaan semata-mata tetapi di waktu yang sama mereka mengabaikan pembangunan manusia itu sendiri.

Timbalan Yang di-Pertua [Dato' Haji Muhamad bin Abdullah]: Sila gulung Yang Berhormat.

Tuan Haji Ismail bin Noh: Ya.

Timbalan Yang di-Pertua [Dato' Haji Muhamad bin Abdullah]: Ya, sila.

Tuan Haji Ismail bin Noh: Hasil daripada itu kita lihat berbagai-bagai kejadian berlaku pembunuhan, rompak, rogol, anak-anak haram dan saya melihat di Amerika bagaimana anak-anak haram di luar nikah ini ada satu kelas di waktu ibunya mengikuti kelas di universiti. Ada kelas untuk anak-anak yang tidak berbapa di waktu itu. Apakah keadaan ini akan berlaku di negara kita sekiranya keadaan ini dibiarkan? Kita tidak hairan kalau berlaku di sana kerana mereka mengamalkan dasar kebendaan tanpa sempadan dan perkara yang disebut itu boleh berlaku juga di sini kalau kita melihat benda itu adalah segala-galanya, sebagaimana yang berlaku sekarang ini. Itulah yang diajar kepada generasi mereka.

Penyakit ini mula menular dalam masyarakat kita dan anak-anak kita. Oleh itu semua kita hendaklah bertanggungjawab menjaga generasi kita dengan membekalkan mereka dengan pembangunan mental, akhlak dan nilai-nilai murni sehingga mereka layak menanggung amanah bangsa, agama dan seterusnya tanah air.

Di negara kita ini adalah suatu yang begitu pelik iaitu begitu banyak sekolah yang kita bina dengan ratusan juta wang yang telah dibelanjakan dan begitu ramai anak-anak ke sekolah tetapi di waktu yang sama makin banyak dan makin ramai penagih-penagih dadah. Makin banyak pusat-pusat serenti diwujudkan, sepatutnya sebuah sekolah dibuka, maka sebuah pusat serenti ditutup tetapi sebaliknya barangkali kalau keadaan ini terus berlaku, boleh jadi sebuah sekolah dibuka, dua buah pusat serenti juga mesti diadakan.

Timbalan Yang di-Pertua [Dato' Haji Muhamad bin Abdullah]: Masa Yang Berhormat sudah habis, Yang Berhormat.

Tuan Haji Ismail bin Noh: Yang paling janggal lagi di mana peserta-peserta yang dibaik pulih di pusat serenti yang sudah bertahun-tahun lamanya mereka di sana tetapi bila mereka keluar sahaja dari pusat tersebut mereka kembali menagih lagi dan kembali kepada keadaan yang lebih dahsyat lagi daripada sebelumnya. Oleh itu, program-program dan agenda-agenda pemulihan ini hendaklah dikaji dari masa ke semasa supaya keberkesanan dapat dilihat dan perbelanjaan negara dapat diselamatkan.

Timbalan Yang di-Pertua [Dato' Haji Muhamad bin Abdullah]: Cukup Yang Berhormat. Cukup.

Tuan Haji Ismail bin Noh: Sedikit lagi. Satu minit untuk sudah satu halaman, sikit saja.

Timbalan Yang di-Pertua [Dato' Haji Muhamad bin Abdullah]: Seminit tak boleh Yang Berhormat, setengah minit, setengah minit.

Tuan Haji Ismail bin Noh: Setengah minit?

Timbalan Yang di-Pertua [Dato' Haji Muhamad bin Abdullah]: Ya.

Tuan Haji Ismail bin Noh: Ramai di kalangan kita yang hanya melihat bahawa Islam itu hanya sembahyang, puasa, zakat, haji semata-mata, tidak lebih daripada itu, sedangkan sebenarnya itu mengandungi akidah, ibadah, akhlak, muamalah ataupun dengan sebutan lain Islam itu sebagaimana yang disebut oleh Al-Imam Hassan Al-Banna [*Membaca kata-kata dalam bahasa Arab*], dengan izin, bermaksud:

“Islam itu iaitu agama way of life iaitu suatu cara hidup dan negara. Ia mempunyai akhlak dan mempunyai kekuatan, ia mempunyai usaha dan kekayaan dan ia mempunyai jihad untuk meningkatkan agama dan dakwah.”

Dari apa yang boleh kita fahamkan di sini bahawa Islam itu tidak boleh dipisahkan dengan pentadbiran negara ataupun dengan perkataan lain Islam tidak boleh dipisahkan dengan siasah ataupun politik. Ini disangkal oleh setengah-setengah orang, malah ada orang yang mengatakan kalau kita hendak ke masjid kita tinggalkan politik di pagar masjid dan jangan bawa masuk ke dalam masjid.

Timbalan Yang di-Pertua [Dato' Haji Muhamad bin Abdullah]: Cukup, Yang Berhormat.

Tuan Haji Ismail bin Noh: Barangkali betul bagi politik sekular tetapi dalam Islam

Timbalan Yang di-Pertua [Dato' Haji Muhamad bin Abdullah]: Cukup Yang Berhormat.

Tuan Haji Ismail bin Noh: ...tidak boleh dipisahkan di antara satu sama lain.

Timbalan Yang di-Pertua [Dato' Haji Muhamad bin Abdullah]: Minta maaf Yang Berhormat, cukup Yang Berhormat ya.

Tuan Haji Ismail bin Noh: Sekian, terima kasih.

Timbalan Yang di-Pertua [Dato' Haji Muhamad bin Abdullah]: Bintulu..

4.28 ptg.

Dato' Tiong King Sing [Bintulu]: Tuan Yang di-Pertua, Bintulu ingin mengucapkan terima kasih kerana telah diberikan peluang di dalam perbahasan Belanjawan 2000.

Dalam perbahasan Belanjawan ini, saya ingin menyentuh sedikit mengenai tugas-tugas jabatan-jabatan di bawah Kementerian Dalam Negeri. Pertamanya, ialah tentang masalah gantian kehilangan pasport oleh pemegang pasport antarabangsa. Saya sedar pasport adalah sejenis dokumen yang sangat penting dan mesti sentiasa disimpan dan dijaga dengan baik. Tambahan pula dokumen ini mudah dijual dan kononnya mempunyai nilai yang tinggi disebabkan terdapat sindiket menjual pasport kepada penjenayah atau lain-lain orang yang mahu memasuki ke negara lain secara tidak sah.

Pada masa yang sama, kita jangan lupa terdapat ‘pembangkang’...oh, minta maaf...[*Ketawa*] pemegang pasport yang kehilangan pasportnya disebabkan sesuatu

bencana seperti kebakaran, banjir atau kemalangan dan juga ada yang kehilangan kerana beg-beg yang menyimpan pasport telah dicuri walaupun dijaga dengan baik. Pendek kata ini adalah kes-kes yang kurang.

[Tuan Yang di-Pertua *mempengerusikan Mesyuarat*]

Sebagai Ahli Dewan Rakyat, ramai telah berjumpa saya memberitahu bahawa pasport yang telah hilang atau musnah oleh sebab kebakaran atau kecurian, masih tertunggu-tunggu mendapatkan pasport gantian walaupun telah membuat permohonan dua hingga tiga tahun lamanya.

Tuan Yang di-Pertua, saya minta penjelasan daripada Yang Amat Berhormat Menteri Dalam Negeri, mengapakah pihak Imigresen mengambil masa terlalu lama untuk bertindak untuk mengeluarkan pasport gantian yang baru dan berapa ramai lagi kes-kes macam ini yang masih belum mendapat gantian pasport yang telah hilang atau musnah.

Saya juga turut difahamkan ramai yang kehilangan pasport tidak dapat ke luar negara untuk urusan perniagaan, menziarahi anak-anak yang melanjutkan pelajaran dan lain-lain lagi walaupun telah mengemukakan permohonan pasport baru dua hingga tiga tahun lamanya. Saya berharap Jabatan Imigresen dapat mengikut jejak langkah Jabatan Pendaftaran Negara yang mana proses untuk mendapatkan gantian kad pengenalan dapat dibuat dengan jangka masa yang pendek walaupun dokumen kad pengenalan juga sangat penting dan berharga.

Menyentuh mengenai Jabatan Pendaftaran Negara, saya juga berharap pihak Jabatan Pendaftaran Negara dapat segerakan gerakan, dengan izin, *mobile unit* untuk mendaftarkan penduduk-penduduk yang tinggal di kawasan pedalaman dan rumah-rumah panjang di luar bandar seperti di kawasan saya. Difahamkan pihak KDN telah berjanji untuk melaksanakan gerakan ini, akan tetapi Bintulu berpendapat ianya berjalan agak lambat dan tidak agresif. Saya pun minta Kementerian Kewangan, kalau boleh tambahlah peruntukan untuk Kementerian Dalam Negeri untuk menjalankan tugas-tugas disebut tadi.

Tuan Yang di-Pertua, seperkara lagi menyentuh mengenai Kementerian Dalam Negeri ialah mengenai isu mendapatkan *status citizenship*, dengan izin, oleh pemegang status penduduk tetap. Saya amat sedar isu *citizenship*, dengan izin, adalah sesuatu yang sangat sensitif. Ia merupakan suatu *national pride*, dengan izin, kepada sesebuah negara yang merdeka dan berdaulat. Walau bagaimanapun, bagi kes-kes yang asli kita harus memberikan pertimbangan yang adil. Dalam kawasan saya sebagai contoh, masih terdapat begitu ramai berstatus penduduk tetap yang beribu-ribu tahun lamanya telah memohon mendapatkan status kerakyatan tetapi telah ditolak permohonannya sehingga tiga kali. Juga apakah dasarnya dan syarat-syarat dalam kes ini? Bintulu berpendapat KDN hendaklah memberikan keutamaan kepada permohonan-permohonan yang telah berusia lanjut seperti 60 tahun ke atas. Saya ingin mencadangkan agar pihak KDN dapat published, dengan izin, satu dasar mengenai penduduk tetap yang layak untuk mendapat status kerakyatan supaya tidak mengelirukan semua pemohon.

Bintulu juga ingin mengesyorkan kepada pihak KDN terus menyiarkan satu polisi mengenai permohonan penduduk tetap. Kita mestilah proaktif terhadap permohonan oleh mereka yang ingin membawa pelaburan ke negara kita serta kes-kes yang *genuine*, dengan izin, dengan tidak perlu mengambil masa yang terlalu panjang.

Saya dengan ini menyokong Belanjawan 2000 ini. Sekian, terima kasih.

Tuan Yang di-Pertua: Bukit Mertajam.

Puan Chong Eng [Bukit Mertajam]: Terima kasih, Tuan Yang di-Pertua, kerana memberi peluang untuk mengambil bahagian di dalam perbincangan Belanjawan 2000.

Dalam ucapan Menteri Kewangan, beliau menyatakan:

“kini sudah sampai masanya kita bertindak berani mengubah paradigma daripada ekonomi berteraskan pengeluaran p-ekonomi kepada ekonomi berteraskan pengetahuan k-ekonomi selaras dengan usaha-usaha negara untuk memesatkan pembangunan industri berteknologi tinggi serta menjadikan IT sebagai pemangkin pertumbuhan di alaf ke-21.”

Tuan Yang di-Pertua, sekiranya kita tidak membuat perubahan paradigma kepada bidang yang lain tidak mungkin kita akan capai matlamat ini kerana untuk menggunakan IT dan juga teknologi tinggi dikatakan kita juga mesti mengadakan keadaan yang *condusive* untuk *free flow of information* atau maklumat yang bebas seperti yang dikatakan oleh seorang peserta *Second Global Knowledge Conference* yang sedang berjalan di Kuala Lumpur. Beliau adalah seorang Executive Director of Southern Africa NGO Network and Association for Progressive Communication, beliau mengatakan, dengan izin,

‘providing excess to information through the use of information and communication technology, would be quiet useless unless it was use in a context where there was freedom of expression. Citizen have to be engaged in freedom of expression for ICT to be of any use’.
Anita Aster Hason.

Dan dia terus bercakap,

‘need to have the rights and political empowerment that would unable them to freely express themselves’.

Dan dia teruskan,

explaining, she said, ‘they also have to be a culture of sharing information with one another and these have to take place between all parties involve, governments, private organization, NGO’s and the community enlarge. Government especially need to have more political world view about using ICC to disseminate information’s by extending rights to citizen that would allow them to freely express themselves. Government can start by introducing policy day cover issues such as the right of citizen to access information and dissimulation of government information. The obligation of government to share information and the right of citizens to demand for information.’

Tuan Yang di-Pertua, sekiranya kita ingin membangunkan IT dalam negara kita maka kita mesti menghapuskan akta-akta seperti ISA dan OSA, Akta Hasutan dan Printing and Publication Act kerana semua akta ini telah memberi sekatan yang begitu ketat kepada *free flow information* dan juga kita perlu mengadakan perubahan paradigma kepada mentality pemimpin-pemimpin kerajaan kerana pada tempoh hari baru berlakunya iaitu Timbalan Menteri Dalam Negeri mengumumkan bahawa permit *Harakah* akan ditarik balik sekiranya versi elektroniknya dikemaskinikan lebih dari 2 kali sebulan. Dulu *Harakah* dikeluarkan 2 kali seminggu, sekarang dihadkan kepada 2 kali sebulan.

Ini telah bercanggah dengan matlamat yang hendak dicapai yang dikatakan dalam ucapan Menteri Kewangan dan juga kita sekarang mendengar bahawa ada Ahli Yang Berhormat mengatakan mesti mengkaji semula permit *ASTRO*, kononnya ini *ASTRO* sekarang telah banyak menyiarkan unsur-unsur yang tidak bersesuaian dengan negara kita. Tetapi bukankah *ASTRO* ini untuk meluaskan minda rakyat? Dan sekiranya kita hendak sekatkan semua maklumat ini, bagaimana kita akan mencapai satu matlamat bahawa kita akan mengadakan satu penduduk yang berinovatif. Maka,

Tuan Kerk Kim Hock : *[Bangun]*

Dato' Dr. Haji Jamaluddin bin Dato' Mohd. Jarjis : *[Bangun]*

Puan Chong Eng: Sini dulu, sini dulu. *[Ketawa]*

Dato' Dr. Haji Jamaluddin bin Dato' Mohd. Jarjis: Yang Berhormat Setiausaha Agung dulu.

Puan Chong Eng: Tentu.

Tuan Kerk Kim Hock: Terima kasih, mengenai seruan supaya dasar langit terbuka itu dikaji semula oleh kerajaan, adakah Yang Berhormat bagi Bukit Mertajam bersetuju bahawa selalunya menjelang pemilihan atau kongres UMNO, taktik-taktik sedemikian digunakan iaitu menghangatkan isu komuniti dan di dalam isu ini ada orang yang mengatakan bahawa terdapat 4 stesen Cina dan juga Tamil akan mempengaruhi fikiran orang Cina atau Tamil. Ini adalah satu anggapan yang tidak berasas, yang tidak adil dan sebenarnya ia cuma adalah taktik kotor pemimpin-pemimpin UMNO.

Puan Chong Eng: Tuan Yang di-Pertua, memang saya bersetuju dengan Ahli Yang Berhormat bagi Kota Melaka. Inilah taktik kotor yang selalu digunakan, bukan semasa pilihan raya UMNO tetapi pilihan raya umum pun selalu dipakai.

Dato' Dr. Haji Jamaluddin bin Dato' Mohd. Jarjis: Bukit Mertajam terima kasih, bukan sahaja Yang Berhormat berprinsip demokratik tetapi Yang Berhormat juga demokratik, sekurang-kurangnya dalam Dewan inilah. Tetapi tentang *ASTRO* ini PAS setuju, PAS tidak setuju kemasukan kebudayaan kuning. Cuba tanya di sebelah belakang itu, Adil, semua PAS bersetuju belaka. Adakah Yang Berhormat tahu ini konflik dalam angkatan Yang Berhormat sendiri, pandangan Yang Berhormat ini.

Puan Chong Eng: Sudah. Okay. *[Ketawa]* Tuan Yang di-Pertua, kalau budaya kuning memang semua orang bantah, kita pun bantah, budaya kuning memang *[Tepuk]* *[Disampuk]* tetapi kalau itulah yang ditayangkan *ASTRO* mestilah ditunjukkan mana satu program dan unsur yang lebih spesifik, jangan mengadakan kerana secara general dia akan memberi satu gambaran yang tidak baik, seolah-olah ia menentang kepada dasar yang dikatakan oleh Menteri Kewangan. Kita mahu mencapai satu matlamat di mana ada pembangunan IT tetapi pembangunan IT tidak boleh diadakan sekiranya kita menyekat maklumat seperti *ASTRO*.

Tuan Chow Kon Yeow Penjelasan, Yang Berhormat.

Tuan Yang di-Pertua: Yang Berhormat ada 15 minit sahaja, Yang Berhormat.

Puan Chong Eng: Tidak apalah, tidak apa.

Tuan Chow Kon Yeow: Tidak apalah, dia bagi. Setujukah Yang Berhormat bagi Bukit Mertajam bahawa bagi orang-orang yang membuat bantahan terhadap 4 saluran Cina dan satu saluran Tamil dalam *ASTRO* kerana membawa terlalu banyak program berunsur Cina. Bukankah lebih baik bagi orang-orang ini kalau tidak puas hati dengan jumlah rancangan dalam bahasa-bahasa yang lain membuat tuntutan kepada *ASTRO* untuk menambah siaran dalam bahasa berkenaan, mengadakan lebih banyak program-program dalam bahasa berkenaan dan bukan membuat cadangan untuk menyekat satu kebebasan untuk mendapat maklumat bagi setengah-setengah kaum di negara ini supaya maklumat dapat digunakan untuk membuat keputusan dalam seharian sama ada perniagaan atau lain-lain bidang seperti yang digalakkan sebagai k-ekonomi. Sekian.

Datuk Ahmad Zahid bin Hamidi: *[Bangun]*

Tuan Yang di-Pertua: Ada yang bangun. Yang Berhormat ada 15 minit lagi.

Puan Chong Eng: Tuan Yang di-Pertua, nanti saya tidak cukup masalah, tadi

Datuk Ahmad Zahid bin Hamidi: Tuan Yang di-Pertua, tadi saya bercakap saya beri peluang. Saya kata *ladies first*, ini apa pula? *[Ketawa]*

Saya tadi sembahyang sekejap, saya dengar Yang Berhormat Kota Melaka minta penjelasan kepada Yang Berhormat Bukit Mertajam mengenai ada agenda tersembunyi kononnya menjelang Perhimpunan Agung UMNO ini, maka taktik-taktik kotor diizinkan untuk dibangkitkan di Dewan ini.

Saya ingin supaya Yang Berhormat buat penjelasan benar-benar, kalau tidak saya gunakan ini, Perkara 36(6) ini. Jadi, saya minta perkara ini saya maksudkan bukan hendak menyekat siaran atau saluran Cina atau India, yang saya maksudkan ialah content, isi daripada mana dan saya bersetuju kalau bahan-bahan itu digunakan berdasarkan budaya, unsur-unsur tempatan menggunakan bahasa Cina, India pun okay. *[Bercakap bahasa Cina]* dengan izin. *No problem*.

Puan Chong Eng: Tuan Yang di-Pertua, baguslah kalau beliau begitu, saya tidak tahu adakah Yang Berhormat Bagan Datoh ini boleh baca surat khabar atau tidak, walaupun boleh bertutur sedikit dalam Mandarin kerana sekiranya beliau tahu, saya tidak perlu penjelasan di sini. Mereka tahu apa perasaannya masyarakat di luar Dewan ini.

Tuan Yang di-Pertua, ucapan Yang Berhormat Menteri Kewangan juga mengatakan kita perlu lebih ramai pakar IT, tetapi baru-baru ini Timbalan Presiden Parti KeADILan Dr. Chandra Muzaffar telah digugurkan namanya dari senarai Majlis Teknologi Maklumat Nasional yang dipengerusikan oleh Yang Amat Berhormat Perdana Menteri sendiri.

Pada masa penubuhannya, NITC dihuraikan oleh pihak kerajaan sebagai satu forum untuk membincangkan dan memajukan dasar IT yang menjangkau batasan kepentingan politik. NITC yang komited untuk memajukan agenda IT nasional adalah bertujuan untuk memupuk idea masyarakat madani. Bagaimanakah kita boleh harapkan wujudnya sebuah masyarakat yang aktif dan bertenaga sekiranya pandangan yang berbeza tidak diberi peluang yang sewajarnya untuk turut wujud dan menyumbang ke arah kemajuan negara yang lebih seimbang.

Itu adalah masalah yang besar dalam negara ini terutamanya di dalam Barisan Nasional. Mereka selalunya melihat pandangan yang berlainan itu sebagai pandangan yang tidak baik, pandangan yang berlainan sebagai pandangan anti kerajaan. Bahkan kadangkala dikatakan ini adalah *traitor*, ini adalah tidak betul, kerana ini hendak dikatakan di masyarakat demokrasi memang ada pandangan yang berlainan dan tidak boleh mengatakan kita mempunyai pandangan yang lain maka pandangan kita tidak baik. Sepatutnya kalau Barisan Nasional adalah sebuah parti atau kerajaan yang matang mereka patut berterima kasih kepada pandangan yang berlainan kerana ada pandangan yang baik.

Tuan Yang di-Pertua: Yang Berhormat minta gulung.

Puan Chong Eng: Tuan Yang di-Pertua, tadi Timbalan Menteri di Jabatan Perdana Menteri mengatakan bahawa Kerajaan Barisan Nasional memang memberi penghormatan yang tertinggi kepada kaum wanita. Tetapi beberapa hari yang lalu saya ada terbaca dalam surat khabar bahawa ada seorang ibu, beliau mengadu, apakah telah berlaku kepada negara kita ini. Saya seorang ibu tetapi tidak boleh memohon pasport untuk anak dia, tetapi ayahnya yang bukan seorang warganegara boleh memohon pasport untuk anaknya yang seorang warga Malaysia, mana ada hormat untuk kaum ibu dan siapakah ibu yang mengadu ini, dia ialah anak kepada Perdana Menteri kita yang kita semua cintai dan hormati yang dikatakan oleh ahli UMNOlah ini. *[Ketawa]*

Tuan Yang di-Pertua: Cukuplah Yang Berhormat, masa sudah cukup Yang Berhormat. Cukuplah itu.

Puan Chong Eng: Setengah minit sahaja.

Tuan Yang di-Pertua: Setengah minit ya.

Puan Chong Eng: Iaitu Datuk Paduka Marina Mahathir, beliau juga mengatakan di mana pemimpin-pemimpin wanita, apakah mereka telah buat untuk wanita dan hari ini ialah Hari Wanita Sedunia saya hanya ingin mengingatkan Ahli-ahli Yang Berhormat di dalam Dewan ini khasnya wakil wanita supaya kita betul-betul berjuang untuk rakyat dan juga wanita dan bukan cakap sahaja, hanya *lip service* sahaja. Terima kasih.

Tuan Yang di-Pertua: Kapit.

16.50 ptg.

Tuan Alexander Nanta Linggi [Kapit]: Tuan Yang di-Pertua, terima kasih kerana memberi saya peluang untuk membahaskan Rang Undang-undang Perbekalan 2000. Terlebih dahulu saya ucapkan tahniah kepada Yang Berhormat Tun Menteri Kewangan dan pihak kerajaan kerana dapat meletakkan asas terhadap pemulihan ekonomi negara.

Tuan Yang di-Pertua, dengan pertumbuhan ekonomi yang begitu memberangsangkan kebelakangan ini, beberapa sektor perniagaan telah turut memperlihatkan peningkatan yang positif. Usaha-usaha kerajaan untuk memulihkan kegawatan ekonomi jelas menampakkan hasilnya. Jika dibandingkan dengan keadaan ekonomi pada dua tahun yang lalu, kini jelas menunjukkan peningkatan dalam taraf penghidupan rakyat Malaysia. Beberapa projek infrastruktur dan kemudahan awam telah kembali beroperasi. Kadar inflasi telah dikurangkan, juga jumlah pengangguran pekerja dapat dibendung.

Kita mengalu-alukan pengumuman beberapa langkah kerajaan ke arah pemulihan ekonomi yang telah dibuat oleh Menteri Kewangan. Belanjawan negara tahun 2000 adalah satu belanjawan berhemah yang menjurus kepada penggalakan pertumbuhan ekonomi negara.

Boleh dikatakan semua tahap rakyat jelata baik pekerja-pekerja di sektor swasta, pegawai-pegawai kerajaan, individu-individu seperti pekedai runcit, suri rumah tangga, pelajar-pelajar juga ahli korporat, anggota polis dan tentera dan pesara dapat menikmati beberapa insentif dari Belanjawan tersebut. Kita berharap kerajaan dari masa ke semasa akan mengumumkan beberapa insentif lagi bagi menggalakkan pemulihan ekonomi, justeru akan melahirkan negara yang harmonis dan dinamik di alaf baru ini.

Tuan Yang di-Pertua, setelah meneliti dan memahami apa yang telah diterangkan oleh Yang Berhormat Menteri Kewangan berkenaan dengan perlunya kita mesti mempertingkatkan usaha kita dalam memesatkan pembangunan industri baru iaitu industri teknologi maklumat yang berasaskan teknologi tinggi, saya ingin menyatakan di sini bahawa saya menyokong penuh tindakan menubuhkan tabung khas berjumlah RM500 juta. Tindakan ini amatlah mencerminkan keprihatinan dan kesungguhan pihak kerajaan terhadap perkara-perkara yang patut kita ambil berat untuk memperkukuhkan ekonomi kita.

Tuan Yang di-Pertua, saya amat tertarik kepada keputusan oleh pihak kerajaan yang telah membenarkan pencarum KWSP menggunakan wang caruman untuk membeli komputer. Langkah sebegini sudah tentu akan memberi peluang bagi lebih ramai lagi rakyat Malaysia dapat menikmati kegunaan komputer. Yang lebih penting adalah langkah ini akan mendedahkan rakyat kita terhadap betapa pentingnya kegunaan serta penguasaan *information technology*.

Kesedaran di kalangan semua lapisan masyarakat negara kita terhadap *information technology* amatlah penting dan perlu memandangkan kerajaan telah mengisytiharkan bahawa pembangunan industri baru berasaskan teknologi tinggi menjadi jentera penggerak ekonomi negara.

Tuan Yang di-Pertua, di samping jumlah sebanyak RM78 bilion diperuntukkan bagi Belanjawan 2000 sebanyak RM53.35 bilion diperuntukkan bagi sektor perbelanjaan mengurus dan RM24.67 bilion untuk perbelanjaan pembangunan.

Pada pendapat saya, cadangan-cadangan mestilah disusun untuk mengurangkan peratusan bagi sektor perbelanjaan mengurus supaya lebih besar peruntukan dapat dikhaskan untuk pembangunan.

Saya agak terkejut perbelanjaan mengurus tidak dapat dikurangkan memandangkan banyak program penswastaan telah dijalankan di dalam negara kita. Sepatutnya penswastaan sesebuah agensi kerajaan sudah tentu meringankan bebanan kewangan untuk kerajaan.

Tuan Yang di-Pertua, oleh kerana saya adalah wakil rakyat kepada kawasan yang jauh di pedalaman di Sarawak, kawasan Kapit. Tun pun sudah berpeluang untuk datang ke Kapit beberapa tahun yang lalu. Adalah wajar bagi saya menyentuh beberapa perkara yang berkaitan dengan kehidupan seharian penduduk ataupun pengundi-pengundi saya khususnya.

Tuan Yang di-Pertua, pada persidangan Dewan ini saya ingin menyeru kementerian-kementerian berkenaan supaya mengambil langkah yang positif mengenai perkara-perkara yang saya bangkitkan kali ini. Perkhidmatan Penerbangan Malaysia (MAS) menggunakan Twin Otter dari Sibu ke Kapit telah ditamatkan semenjak dua tahun yang lalu dengan alasan kekurangan penumpang dan ke kurangan sambutan.

Tuan Yang di-Pertua, mengikut tinjauan umum, jadual perkhidmatan MAS dari Sibu ke Kapit tidak mendapat sambutan kerana jadual penerbangan ini kerap kali dibatalkan. Oleh yang demikian, saya mengesyorkan supaya MAS mengadakan perkhidmatan ke Kapit semula tetapi dari Kuching ke Kapit. Penerbangan dari Kuching ke Kapit mungkin mengambil masa dua jam sahaja. Perjalanan menggunakan penerbangan dari Kuching ke Kapit sudah pasti menjimatkan masa kerana menggunakan bot ekspres dari Sibu ke Kapit dan mengambil masa kira-kira tiga jam. Selain daripada orang-orang tempatan, pelancong-pelancong juga akan mengambil kesempatan masa perjalanan yang singkat untuk pergi ke Kuching, pergi ke Kapit dari Kuching menggunakan perkhidmatan penerbangan.

Tuan Yang di-Pertua, Dasar Pendidikan Negara telah memajukan pencapaian pelajar-pelajarnya. Jumlah mereka yang buta huruf adalah di peringkat yang paling minimum. Usaha Kementerian Pendidikan Malaysia untuk mengadakan satu sesi memanglah dialu-alukan. Walau bagaimanapun, pencapaian keseluruhan pelajar kaum bumiputera masih menampakkan jurang perbezaannya. Beberapa faktor yang menjadi puncanya ini termasuklah peranan ibu bapa, latar belakang keluarga, budaya dan alam persekitaran. Kerajaan telah memperuntukkan berbagai bantuan untuk merapatkan lagi jurang perbezaan ini seperti biasiswa, pinjaman dan sebagainya.

Walaupun negara mengalami kegawatan ekonomi namun kebajikan pelajar tidak sama sekali diabaikan. Antara kelemahan para pelajar bumiputera ialah pencapaian akademik. Salah satu faktor yang menjadi punca ialah kurang guna tenaga pengajar yang berpengalaman di kawasan pedalaman. Di samping itu juga kemudahan infrastruktur seperti asrama-asrama dan sebagainya.

Tuan Yang di-Pertua, saya syorkan di sini bahawa lebih banyak lagi insentif seperti elaun diberikan kepada guru-guru yang berkhidmat di kawasan pedalaman. Bukan itu sahaja, kebajikan para guru seperti tempat tinggal dan kemudahan pengangkutan patut diberi keutamaan. Kita lihat ramai guru yang terlatih banyak bertumpu kepada kawasan bandar yang pada hakikatnya mempunyai berbagai macam kemudahan. Jika diberi lebih insentif bagi menggalak guru ini berkhidmat di kawasan pedalaman sudah semestinya mereka akan rela ditugaskan di kawasan berkenaan.

Seperkara lagi ialah kemudahan asrama. Saya syorkan di sini bahawa para pelajar di kawasan pedalaman yang mempunyai bakat dan semangat tinggi ditempatkan di asrama-asrama. Oleh yang demikian, kaedah pembelajaran dan kebajikan para pelajar yang berkenaan akan menjadi lebih berkesan dan teratur. Justeru itu, para pelajar ini diberikan galakan untuk ke institusi pengajian tinggi dengan kerajaan memainkan peranan seperti memberikan biasiswa dan sebagainya. Setelah tamat pengajian, sama ada mereka akan pulang ke kampung dan menyumbangkan

tenaga mereka di sana atau mengisi pekerjaan yang kosong yang terdapat di bandar-bandar.

Tuan Yang di-Pertua, sepertimana yang kita sedia maklum bahawa kerajaan telah memperuntukkan banyak wang untuk membaiki rumah kediaman guru dan sekolah khususnya sekolah-sekolah yang terletak di pedalaman. Di Sarawak, sebilangan besar sekolah-sekolah di pedalaman khususnya di bahagian Kapit masih menghadapi masalah rumah kediaman guru, bilik darjah, dewan makan dan sebagainya dalam keadaan uzur dan buruk. Sehubungan ini, saya ingin menarik perhatian Kementerian Pendidikan oleh sebab keadaan bangunan-bangunan sekolah di luar bandar itu amat teruk sekali ia menghasilkan kesan tidak baik dan merugikan kaum kita bumiputera sebab anak-anak sekolah banyak tercicir dari bilik darjah. Mereka enggan serta tidak tahan mengalami keadaan yang tidak selesa. Ini amatlah mendukacitakan kita semua.

Kontraktor-kontraktor yang telah dilantik oleh kerajaan untuk membaiki pulih sekolah-sekolah setakat ini hanya menjalankan kerja-kerja membaiki pulih terhadap sekolah-sekolah yang berdekatan dengan bandar manakala sekolah-sekolah di luar bandar, ia lebih perlu dibaik pulih kerana belum berubah wajah dan masih menghadapi masalah yang sama. Memang tidak dapat dinafikan bahawa kerajaan sentiasa mengambil pelbagai langkah untuk meningkatkan kemudahan infrastruktur dan fizikal, namun begitu perkara-perkara yang telah saya bangkitkan ini adalah merupakan masalah yang perlu diambil perhatian khususnya kementerian yang berkenaan.

Tuan Yang di-Pertua, bandar Kapit adalah merupakan satu-satunya yang tidak ada jalan raya menghubungi bandar ini dengan bandar-bandar utama di negeri Sarawak. Oleh yang demikian, saya ingin merayu kepada Kementerian Kerja Raya supaya menimbang untuk membina jalan raya yang boleh menghubungi bandar Kapit dengan bandar-bandar lain di Sarawak seperti jalan dari Kapit ke Tatau, ke Bintulu ataupun ke Sibu pada Rancangan Malaysia Kelapan ini.

Saya juga ingin merayu kepada Kementerian Pembangunan Luar Bandar supaya memberi peruntukan tambahan tahunan kepada kawasan Kapit untuk membina jalan-jalan kampung memandangkan kawasan Kapit tidak mempunyai jalan raya yang sedia ada. Syarat dan justifikasi jalan kampung di kawasan ini harus dilonggarkan iaitu dari tiga kilometer had panjang jalan kampung sekarang kepada enam kilometer dan juga jalan kampung yang dibenarkan tidak harus hanya menghubungkan kampung, klinik, sekolah dan sebagainya dengan jalan raya yang sedia ada tetapi untuk juga menghubungkan kampung, rumah panjang, klinik, sekolah dan jalan raya syarikat balak yang berhampiran kerana di kawasan ini jalan raya syarikat balak telah menjadi laluan utama penduduk setempat khususnya kampung-kampung yang terletak di pedalaman.

Di Sarawak, syarikat balak telah banyak membina jalan raya dan banyak juga telah ditinggalkan tetapi penduduk setempat masih menggunakan jalan raya tersebut. Oleh yang demikian, saya mencadangkan supaya kerajaan meninjau dan mengenal pasti jalan-jalan pembalakan yang sesuai untuk digunakan oleh penduduk setempat dan seterusnya mengambil alih jalan-jalan tersebut untuk dibaik pulih.

Tuan Yang di-Pertua, kerajaan persekutuan menerusi Dasar Ekonomi Baru telah melahirkan satu golongan usahawan yang berjaya terutama dari masyarakat Melayu yang telah ramai memainkan peranan penting dalam dunia korporat. Adalah amat mengembirakan bila Yang Amat Berhormat Perdana Menteri mengumumkan bahawa langkah untuk membantu masyarakat Melayu dalam bidang perniagaan masih menjadi dasar kerajaan. Saya ingin mengambil kesempatan ini untuk memohon kepada kerajaan persekutuan untuk membantu usahawan bumiputera dari masyarakat Dayak dalam bidang perdagangan dan industri, kita agak jauh ketinggalan. Jikalau Dasar Ekonomi Baru tidak dilaksanakan dengan lebih teratur, usahawan bumiputera dari masyarakat Dayak sudah tentu tidak dapat mengambil bahagian dalam golongan masyarakat perindustrian dan perdagangan.

Tuan Yang di-Pertua, oleh sebab ini adalah ulung kali saya berpeluang berucap di Dewan yang mulia ini, saya hanya bertumpu kepada isu-isu yang tepat kena mengena dengan kawasan saya dan pembangunan di luar bandar. Banyak isu terkini yang amat menarik serta relevan seperti k-ekonomi, industri teknologi tinggi, buruh asing dan sebagainya. Tetapi saya rasa biarlah saya turut serta membahaskan tajuk-tajuk itu di masa akan datang nanti.

Tuan Yang di-Pertua, saya telah menyentuh beberapa perkara yang saya percaya amat penting dalam usaha kita hendak mengurus dan memajukan negara yang kita cintai ini. Saya berharaplah pihak kementerian dan kerajaan mengambil perhatian yang serius dalam hal-hal yang telah saya sebut tadi. Dengan itu Tuan Yang di-Pertua, saya turut menyokong.

Tuan Yang di-Pertua Ya..

Beberapa Ahli: [Bangun]

5.08 ptg.

Tuan Haji Muhyidin bin Haji Abd. Rashid [Hulu Terengganu]: Hulu Terengganu, Tuan Yang di-Pertua. Hulu Terengganu lama dah Tuan Yang di-Pertua.

Tuan Yang di-Pertua: Sekejap. Ada lima orang orang ya, enam. Yang Berhormat, kita ada enam. Ya, Yang Berhormat saya boleh sambungkan sehingga 5.45 petang, jadi 40 minit ya. Kalau dibahagi dengan enam, 7 minit seorang. Adakah Yang Berhormat setuju? [Ketawa] Ya, kalau tidak ada saya terpaksa tinggal setengah yang tidak boleh berucap oleh kerana besok Menteri-menteri akan menggulung, ya. Setuju tak saya minta 7 minit seorang.

Tuan Haji Muhyidin bin Haji Abd. Rashid [Hulu Terengganu]: Sehingga pukul 6.00 petang.

Tuan Yang di-Pertua: Ya?

Tuan Haji Muhyidin bin Haji Abd. Rashid [Hulu Terengganu]: Tambah hingga pukul 6.00 petang.

Tuan Yang di-Pertua: Tidak boleh Yang Berhormat, kerana mengikut Peraturan Mesyuarat ia dibenarkan menyambung hanya 15 minit sahaja.

Dr. Tan Seng Giaw: Tuan Yang di-Pertua, besok pagi bagilah mereka peluang sedikit. Mungkin seorang 10 minit dan kita boleh selesaikan semua. 10 minit bagi semua, kita selesaikan, kita jaga orang-orang semualah.

Seorang Ahli: Kempunan mari jauh, Tuan Yang di-Pertua.

Tuan Yang di-Pertua: Semua ada berapa orang? Ada tujuh, ya.

Seorang Ahli: Mari jauh, Tuan Yang di-Pertua.

Tuan Yang di-Pertua: Ada empat orang sahaja? Lima, enam, enam orang 40 minitlah. Kita ada Usul minta sehingga pukul 6.00 petang, bolehkah Yang Berhormat membuat satu Usul Yang Berhormat pada hari ini tidak ditangguhkan hingga jam 6.00 petang ya. Tolong. Ya, sila Yang Berhormat. Sila buat satu Usul, ya. Sila, ya.

USUL

WAKTU MESYUARAT DAN URUSAN DIBEBASKAN DARIPADA PERATURAN MESYUARAT

Timbalan Menteri Pendidikan [Dato' Hon Choon Kim]: Tuan Yang di-Pertua, saya mohon mencadangkan:

“Bahawa mengikut Peraturan Mesyuarat 12(1) Majlis Mesyuarat pada hari ini tidak akan ditangguhkan sehingga jam 6.00 petang ini”.

Timbalan Menteri Luar Negeri [Datuk Dr. Leo Michael Toyad]: Tuan Yang di-Pertua, saya mohon menyokong.

Tuan Yang di-Pertua: Ahli-ahli Yang Berhormat, masalahnya ialah:

“Bahawa mengikut Peraturan Mesyuarat 12(1) Majlis Mesyuarat pada hari ini tidak akan ditangguhkan sehingga jam 6.00 petang ini”.

Hendaklah disetujui.

Usul dikemuka bagi diputuskan, dan disetujui.

[Majlis Mesyuarat disambung semula]

Tuan Yang di-Pertua: Ya, Yang Berhormat bagi....

Dato' Zulhasnan bin Rafique : Wangsa Maju.

Tuan Yang di-Pertua: Wangsa Maju ya. Semua orang akan berucap, ya.

Dato' Zulhasnan bin Rafique: Terima kasih.

Tuan Yang di-Pertua: Jika boleh mintalah 10 minit, ya.

5.09 ptg.

Dato' Zulhasnan bin Rafique [Wangsa Maju]: Lebih sedikitlah, Tuan Yang di-Pertua.

Bismillahi Rahmanir Rahim, terima kasih Tuan Yang di-Pertua, kerana memberi saya peluang berucap. Saya bangun pada hari ini di Dewan Rakyat yang mulia ini untuk turut serta membahaskan serta sokongan saya terhadap pembentangan Belanjawan negara tahun 2000 oleh Yang Berhormat Menteri Kewangan Malaysia, Tun Dato' Daim Zainuddin pada 25 Februari 2000 yang lalu.

Tuan Yang di-Pertua, setelah lapan hari perbincangan mengenai belanjawan negara ini, kita telahpun mendengar banyak perkara-perkara dan juga isu-isu yang menarik yang disentuh oleh Ahli-ahli Yang Berhormat di Dewan yang mulia ini. Hari ini saya hendak menumpukan kandungan ucapan saya mengenai satu atau dua perkara yang bersangkutan dengan angkatan tentera dan hal ehwal bekas anggota tentera yang membabitkan peranan pihak kerajaan, agensi-agensi yang terbabit dan juga persepsi masyarakat terhadap mereka.

Pertahanan negara dan hal ehwal tentera di negara ini amatlah penting. Sebagai seorang bekas anggota tentera, saya rasa terpanggil untuk memperjuangkan nasib rakan-rakan seperjuangan saya yang berada dalam perkhidmatan tentera dahulu, tetapi hari ini mereka sudahpun bergelar askar pencen. Lantaran itu, saya merasakan jika terdapat pihak-pihak yang memandang remeh dan meminggirkan masalah bekas anggota tentera dari arus pembangunan negara, maka golongan itu adalah golongan yang tidak berjiwa patriotik.

Tuan Yang di-Pertua, tidak ada pekerjaan yang lebih mulia daripada pekerjaan mempertarungkan nyawa untuk membela nusa, bangsa dan negara. Hanya segelintir manusia sahaja, iaitu tentera yang mewakili 0.22% dari seluruh rakyat Malaysia yang berani menghadapi peluru dan periuk api untuk mencari nafkah hidup untuk menyara keluarga mereka.

Tuan Yang di-Pertua, perkhidmatan Angkatan Tentera atau *Armed Forces* dengan izin, di negara ini merupakan antara perkhidmatan awam yang terkandung di dalam Perlembagaan Persekutuan (*Federal Constitution*) yang saya ada di sini. Artikel 132(1)(a) yang menyebut dengan izin, saya rujuk kepada perlembagaan:

“For the purpose of this constitution, the public services are:

- (a) *The Armed Forces;*
- (b) *Judicial and legal service;*

- (c) *General public service of the Federation;*
- (d) *Police Force; e, f g, and h."*

Ini bermakna perkhidmatan Angkatan Tentera yang diletakkan teratas sekali, merupakan jenis perkhidmatan yang istimewa atau *special service* dengan izin, sebagaimana yang termaktub di dalam Perlembagaan Persekutuan tersebut. Apa tidaknya, perkhidmatan tenteralah yang akan terlibat dalam upacara-upacara dan istiadat rasmi Draja, angkatan tentera jugalah yang dikerahkan untuk menjaga keamanan dan keselamatan negara, semuanya melibatkan persediaan 24 jam pada setiap hari.

Semangat, keupayaan dan dedikasi seorang bekas tentera juga terbukti apabila Yang Amat Berhormat Perdana Menteri telahpun memberi kepercayaan dan tanggungjawab bekas Panglima Angkatan Tentera General Tan Sri Hashim Ali menerajui dan....., Tuan Yang di-Pertua pun tahu dan setuju, berjaya melaksanakan Sukan Komanwel pada tahun 1998 dengan cemerlang.

Tuan Yang di-Pertua, Pasukan Keselamatan Negara atau Angkatan Tentera Malaysia bermula di Malaya ini pada tahun 1933 dengan bilangan anggotanya dari kalangan anak watan hanya seramai 25 orang dengan lain-lain pangkat. Hanya pada tahun 1937, baru 6 orang pegawai yang ditauliahkan ke dalam Askar Melayu Malaya. Kini, Angkatan Tentera Malaysia mempunyai hampir 8,000 pegawai dan 90,000 anggota lain-lain pangkat.

Sejak penubuhannya pada 9 Mac 1933, Angkatan Tentera Malaysia telah berkembang dari segi peranannya, dari membanteras ancaman komunis antara 1948 sehinggalah komunis dari Thailand menyerah diri pada Disember 1989. Angkatan Tentera Malaysia juga telah berjaya mengatasi konfrantasi Indonesia pada tahun 1963. Kemudian peristiwa PBB di Congo, selepas itu Namibia begitu juga kita telah menghantar misi semasa peperangan Iran-Iraq dan tentera kita juga terlibat di Kemboja, Somalia, Bosnia dan kini tahun 2000 sebagai PBB (Interfet) di Timor Timur.

Dari segi perkhidmatan istimewa atau dengan izin, *special service* di dalam perkhidmatan tentera, jika dibandingkan dengan negara-negara jiran, keistimewaan yang diperolehi oleh tentera mereka jauh lebih menarik daripada keistimewaan yang diterima oleh anggota tentera kita di sini.

Sebagai contoh, kadar gaji mereka lebih tinggi yakni di antara 10% hingga 20%, gaji orang-orang awam. Begitu juga dari segi pengambilan anggota baru adalah terdiri daripada mereka yang mempunyai pencapaian akademik yang agak baik.

Oleh sebab itu, saya mohon mencadang bahawa pihak kerajaan mengekalkan elemen *special service* kepada anggota angkatan tentera dan tidak membandingkannya dengan perkhidmatan yang lain apabila hendak menentukan kemasukan anggota tentera baru dari segi gajinya, elaun serta lain-lain syarat perkhidmatan, termasuk syarat-syarat persaraan.

Tidak dapat kita nafikan pun juga bahawa tiap-tiap anggota tentera telah mengorbankan 21 tahun di dalam angkatan tentera dengan izin, *the best part of prime life in the armed forces*. Apakah jasa-jasa mereka itu hilang begitu sahaja setelah mereka bersara?

Tuan Yang di-Pertua, sebahagian besar bekas tentera merasa terpinggir setelah mereka menamatkan perkhidmatan dan kebanyakan tidak mengetahui cara mana dan kepada siapa mereka boleh menyalurkan masalah seterusnya membela soal kebajikan keluarga mereka selepas mereka bersara.

Saya cadangkan sebuah bangunan yang tersergam indah untuk menjaga kebajikan bekas tentera ini dan masing-masing dengan nostalgia sendiri mengenangkan detik-detik semasa berkhidmat dalam angkatan tentera. Nasib mereka ini sudah sama sahaja dengan masyarakat awam sedangkan ada di antaranya yang sudah hilang upaya, cacat anggota dan sebagainya semasa mereka memegang senjata di dalam

perkhidmatan tentera. Padahal mereka ini sebenarnya mampu menjadi aset yang berguna kepada pembangunan negara.

Tuan Yang di-Pertua, saya mencadangkan supaya kadar pencen bagi golongan bekas tentera yang kurang upaya ini supaya elaunnya dikaji semula sejajar dengan jasa-jasa yang telah mereka curahkan untuk negara.

Tuan Yang di-Pertua, kebajikan bekas-bekas tentera ini juga menghadapi masalah tempat tinggal selepas tamat perkhidmatan. Ada pula yang berminat untuk menceburi dalam lapangan perniagaan tetapi mereka jarang diberikan peluang memperolehi kontrak dengan kerajaan. Kontrak-kontrak Kementerian Pertahanan juga tidak diberikan peluang seluas-luasnya untuk mereka sertai.

Oleh yang demikian, saya mencadangkan agar 30% daripada kontrak perniagaan yang terdapat di Kementerian Pertahanan diberi kuota kepada usahawan bekas tentera ini. Di dalam bidang pendidikan pula, anak-anak anggota tentera yang sedang berkhidmat diberi keutamaan dan kuota bagi memasuki MRSM Kem Terendak Melaka dan Maktab Tentera Diraja Sungai Besi. Mereka juga diberi keutamaan memasuki IPT Awam.

Justeru itu, saya mencadangkan supaya peluang kemasukan anak-anak bekas anggota tentera yang cemerlang dalam bidang akademik diberikan juga keutamaan sebagaimana yang dikecapi oleh anggota tentera. Kalau tidak mencukupi, tidaklah salah rasanya saya ingin mengesyorkan agar pihak kerajaan dapat menambahkan lagi peruntukan untuk membina sebuah lagi MRSM, kali ini biarlah di sebelah utara.

Tuan Yang di-Pertua, sehingga hari ini lebih daripada 380,000 bekas tentera terdapat di negara ini. Jika dijumlahkan dengan isteri dan tanggjawab mereka menjadilah lebih satu juta orang yang terbabit dalam kancah kehidupan sebagai masyarakat awam. Agensi yang terbabit untuk membantu bekas-bekas tentera ini ialah Persatuan Bekas Tentera Malaysia (PBTM) yang hanya bertaraf NGO begitu juga terdapat sebuah Perbadanan Hal Ehwal bekas Anggota Tentera atau PERHEBAT,

Memang benar PERHEBAT merupakan agensi yang diberikan tanggjawab untuk membantu hal ehwal bekas anggota tentera, namun PERHEBAT yang telah diswastakan sejak 30 Ogos 1994 ini masih boleh diperhebatkan lagi operasi mereka. Fungsi PERHEBAT janganlah sekadar untuk mengadakan kursus-kursus peralihan bagi warga Angkatan Tentera Malaysia yang akan bersara sahaja, malah daripada itu dapat menempatkan mereka ini di syarikat-syarikat swasta yang sehaluan dengan tugas bekas anggota tentera semasa dalam perkhidmatan.

Peruntukan kerajaan kepada PERHEBAT setiap tahun untuk membantu bekas anggota tentera hendaklah ditumpukan kepada meningkatkan taraf kehidupan mereka supaya mereka dapat menjalani kehidupan bersama masyarakat dengan lebih selesa. Jika PERHEBAT tidak memperhebatkan aktiviti yang menjurus kepada kepentingan masa depan sosio ekonomi anggota bekas tentera ini, saya bimbang anggota-anggota bekas tentera ini akan hilang kepercayaan terhadap PERHEBAT.

Tuan Yang di-Pertua: Yang Berhormat minta gulung ya.

Dato' Zulhasnan bin Rafique: Oleh yang demikian, saya mohon mencadang supaya kos pengurusan dan pentadbiran tidak diambil dari peruntukan kerajaan kepada PERHEBAT. Juga saya mencadangkan supaya PERHEBAT melibatkan diri secara aktif di dalam sektor ekonomi dan juga perdagangan dan saya juga mencadangkan supaya 50% pegawai dan juga kakitangan PERHEBAT hendaklah diambil dari bekas anggota tentera yang berkelayakan. Dua paragraph lagi ya. Ini penting ini.

Tuan Yang di-Pertua, fungsi Lembaga Tabung Angkatan Tentera (LTAT) sebagaimana yang termaktub di dalam Akta Tabung Angkatan Tentera, juga hendaklah menjurus kepada menjaga dan menjana kepentingan anggota-anggota tentera keseluruhannya. Anak-anak syarikat yang berada di bawah struktur LTAT seperti Perwira Niaga Sdn. Bhd. ataupun PERNAMA yang sering dikaitkan dengan

perniagaan pasarayanya di kalangan anggota tentera, kini juga tidak terlepas dari rungutan oleh warga angkatan tentera. Persoalannya ialah, kenapakah PERNAMA tidak begitu prihatin kepada hak-hak keistimewaan yang sepatutnya diberikan kepada anggota tentera, begitu juga kepada bekas anggota tentera, bagi mendapat harga yang lebih murah daripada pasaraya yang lain? Sepatutnya LTAT menyalurkan bantuan subsidi kepada PERNAMA supaya harga barangan di pasaraya tersebut dapat diturunkan dan bukan sebaliknya di mana PERNAMA membuat keuntungan untuk LTAT.

Tuan Yang di-Pertua: Yang Berhormat cukup Yang Berhormat. Masa Yang Berhormat sudah lebih Yang Berhormat cukuplah Yang Berhormat.

Dato' Zulhasnan bin Rafique: Terima kasih Tuan Yang di-Pertua, oleh kerana masa tidak ada saya amat berterima kasih kerana memberikan kesempatan juga kepercayaan untuk menyentuh persoalan hidup yang dihadapi oleh bekas-bekas anggota tentera ini dan itu saja. Terima kasih.

Tuan Yang di-Pertua: Ya, Hulu Terengganu.

5.20 ptg.

Tuan Haji Muhyidin bin Haji Abd. Rashid: Assalamualaikum wr. wb.

Tuan Yang di-Pertua, terlebih dahulu saya mengucapkan berbanyak terima kasih kepada Tuan Yang di-Pertua kerana memberi peluang kepada saya untuk turut sama membahaskan Belanjawan 2000 yang dibentangkan oleh Yang Berhormat Menteri Kewangan pada 25 Februari 2000 yang lalu, walaupun dalam masa yang begitu amat singkat.

Yang Berhormat Menteri Kewangan telah mencadangkan sebanyak RM201 juta disediakan untuk RISDA bagi melaksanakan program tanaman semula getah yang melibatkan 45 ribu hektar pada tahun 2000. Selain daripada itu sebanyak RM 80 juta diperuntukkan secara pinjaman kepada RISDA untuk memperkenalkan dan menggalakkan pekebun kecil menggunakan kaedah sistem alat torehan kekerapan rendah. Selain daripada itu sebanyak RM1 bilion disediakan untuk disalurkan kepada RISDA untuk projek tanam semula getah secara komersial.

Persoalan yang timbul sekarang siapakah yang sebenarnya mendapat manfaat daripada peruntukan-peruntukan yang disebutkan itu. Saya mendapat maklumat ada usaha yang bersungguh-sungguh sedang dijalankan oleh golongan tertentu untuk mendapatkan hak penswastaaan RISDA. Satu kertas kerja sedang disiapkan dan sedang menunggu masa yang sesuai untuk dibentangkan ke Mesyuarat Kabinet untuk diluluskan.

Ini bermakna sekiranya penswastaaan RISDA diluluskan pada tahun ini maka semua peruntukan yang telah disebutkan tadi akan menjadi bantuan percuma kepada syarikat yang akan memiliki RISDA itu nanti. Selain daripada itu, kegelojohan golongan ini telah terserlah apabila belum pun sempat penswastaaan ini diluluskan para pekebun kecil telah mula ditekan dengan berbagai cara supaya menyerahkan tanah mereka kepada pihak RISDA ataupun anak syarikat RISDA yang sekarang ini telahpun ditubuhkan yang diberi nama RISDA Small Holder Plantation Sdn Bhd (RS PSB). Ini dilakukan bagi memastikan setelah diswastakan kelak, RISDA mempunyai tanah yang cukup luas untuk diusahakan.

Tuan Yang di-Pertua, mulai 1 Januari 1999, berbagai cara telah dilakukan bagi menekan dan menindas rakyat demi untuk mendapatkan hak mengurus tanah rakyat tersebut di antaranya ialah....

Tuan Chow Kon Yeow: Peraturan Tuan Yang di-Pertua..

Tuan Yang di-Pertua: Ya, ya, ya.

Tuan Chow Kon Yeow: 13(1). Tidak cukup korum.

Tuan Yang di-Pertua: Yang Berhormat, ini tidak cukup korum jangan salah sayalah jika Yang Berhormat tidak boleh berucap ya. Cuba bilang, Yang Berhormat cuba bilang ya. Tidak patut ya dibangkitkan perkara itu [*Ketawa*].

Tuan Muhyidin bin Abdul Rashid Tuan Yang di-Pertua, saya bilang cukup lagi itu.

Yang pertama mana-mana pekebun kecil getah...

Tuan Yang di-Pertua: Nanti sekejap, nanti sekejap. Jika ada orang mengatakan tidak cukup korum, pegawai kita kena bilang ya. Tolong bilang sekejap.

[*Ahli-ahli dikira: Kurang 26 Ahli hadir*]

Ya, 23 tidak cukup korum. Cuba bunyi loceng dua minit ya.

[*Loceng dibunyikan*]

Cukuplah. Cuba bilang semula. 32 sudah cukup korum. Yang Berhormat bagi Hulu Terengganu sila teruskan ya.

Tuan Haji Muhyidin bin Haji Abd. Rashid: Terima kasih Tuan Yang di-Pertua. Inilah yang kita sedih dalam sesi Parlimen kita, walaupun Barisan Nasional menang banyak tetapi tidak sanggup hadir dalam mesyuarat yang begini baik.

Di antaranya Tuan Yang di-Pertua,

Raja Dato' Ahmad Zainuddin bin Raja Haji Omar: Point of order 3(6), sangkaan jahat tidak boleh. Orang sebelah sana pun keluar juga

Seorang Ahli: Yang keluar pun sana juga.

Raja Dato' Ahmad Zainuddin bin Raja Haji Omar: Jangan buat tuduhan macam itu.

Seorang Ahli: Sudah melampau.

Raja Dato' Ahmad Zainuddin bin Raja Haji Omar: Minta tarik balik, minta tarik balik Tuan Yang di-Pertua, point of order. Minta tarik balik.

Tuan Yang di-Pertua: Yang itu bukan *unparliamentary* Yang Berhormat, Ya. Yang Berhormat sudah kata juga, dia orang pun serupa juga ya. Ya, sila teruskan.

Tuan Haji Muhyidin bin Haji Abd. Rashid: Ya, terima kasih Tuan Yang di-Pertua.

Yang pertama di antara langkah yang telah dikenakan kepada para pekebun kecil getah yang pertama, mana-mana pekebun kecil getah yang ingin menanam semula getah mesti menjual pokok getah tua kepada anak syarikat RISDA yang jika tidak bantuan tanaman semula tidak akan diluluskan.

Yang kedua, mana-mana pekebun kecil getah mesti menyerahkan kepada pihak RISDA untuk memilih kontraktor yang akan membersihkan kebun getah mereka walaupun terdapat banyak kontraktor luar yang sanggup membersihkan tapak tanah pekebun dengan harga yang lebih murah.

Dan yang ketiga, yang lebih dashyat lagi pekebun kecil getah mestilah menyerahkan hak mengurus dan mentadbir tanah tersebut kepada RISDA selama antara 12 sehingga 25 tahun. Jika tidak bantuan tanaman semula tidak akan diluluskan. Selain daripada itu, pihak RISDA akan menyediakan charge tertentu sepanjang tempoh penyerahan tanah tersebut. Di antara *charge* yang dikenakan ialah yang pertama, yuran pengurusan sebanyak RM8.30 seekor sebulan.

Yang keduanya potongan sebanyak 1.5% daripada nilai jualan hasil yang akan dikeluarkan kelak.

Dan yang ketiga 1% daripada nilai input pertanian seperti baja, racun dan sebagainya.

Kami telah mengadakan beberapa siri dialog dengan pihak RISDA kenapa hal ini mesti dipaksakan kepada pekebun-pekebun. Alasan yang diberikan ialah untuk memastikan pekebun akan berjaya dalam usaha mereka memiliki kebun yang sempurna dan berhasil.

Apa yang menjadi masalah sekarang kenapa sekarang baru timbul kesedaran pihak RISDA untuk memastikan pekebun berjaya dalam usaha tanaman mereka setelah semua pekebun telah mahir dengan teknik-teknik baru yang telah diperkenalkan. Selain daripada itu, jika benar RISDA ingin melihat pekebun berjaya dan dapat meningkatkan taraf hidup mereka sendiri kenapa perjanjian penyerahan pengurusan ini tidak membenarkan pihak pekebun kecil menebus balik tanah mereka setelah tanaman mula mengeluarkan hasil.

Tanah hanya boleh diurus semula oleh pekebun kecil sebaik sahaja hutang telah langkas atau tamat tempoh perjanjian yang mana satu berdasar kepada yang mana lebih lama dan apa akan jadi sekiranya selepas 15 tahun atau tamat tempoh perjanjian dan hutang hampir habis dan tiba-tiba pihak RISDA menambah perbelanjaan dengan membaiki jalan-jalan dan sebagainya yang menyebabkan hutang bertambah kembali dan proses ini akan menyebabkan pekebun hilang hak mereka ke atas tanah mereka buat selama-lamanya.

Justeru itu saya merayu kepada pihak kerajaan agar mengkaji semula cadangan untuk menswastakan RISDA. Saya memohon supaya dikembalikan semula bantuan tanaman semula kepada pekebun-pekebun kecil seperti sedia kala. Tindakan kerajaan membatalkan cadangan ini akan melegakan 400,000 keluarga pekebun kecil getah yang rata-ratanya sangat miskin. Janganlah kerana beberapa kerat manusia yang berminat untuk mendapat keuntungan daripada penswastakan RISDA itu sehingga kita sanggup menganiayai lebih 400,000 pekebun kecil yang miskin ini. Biarlah kekalahan Menteri Pembangunan Luar Bandar yang lalu menjadi isyarat yang sangat berguna bahawa rakyat menolak penswastakan yang dicadangkan itu [*Tepuk*].

Tuan Yang di-Pertua, satu perkara lagi yang ingin saya sentuh ialah berhubung dengan bantuan pendidikan, Yang Berhormat Menteri Kewangan dalam pembentangan Belanjawan 2000 juga mencadangkan kenaikan pinjaman IPTS daripada RM12,000 kepada RM12,500 bagi aliran sastera dan RM16,000 kepada RM16,500 bagi aliran sains. Selain itu kadar biasiswa tajaan MARA dan Jabatan Perkhidmatan Awam dinaikkan di antara 10% hingga 65%.

Saya juga mencadangkan kepada pihak kerajaan supaya jumlah pendahuluan yang diberikan kepada pelajar untuk melanjutkan pelajaran dinaikkan kepada jumlah pendaftaran yang ditetapkan oleh pihak universiti. Ini adalah kerana banyak kes di kawasan saya terutamanya, di mana ibu bapa terpaksa membatalkan hasrat anak-anak untuk melanjutkan pelajaran kerana tidak cukup wang untuk pendaftaran di hari pertama di universiti.

Tuan Yang di-Pertua, selain daripada itu saya suka mencadangkan kepada kerajaan agar cara pemberian biasiswa dikaji semula. Apa yang dilakukan sekarang di mana hanya pelajar yang cemerlang sahaja pinjaman mereka akan ditukar menjadi biasiswa. Sebaliknya pelajar yang miskin yang daripada sekolah rendah, menengah lagi berada di dalam keadaan yang serba kekurangan sama ada dari segi mereka mendapatkan buku rujukan yang lebih baik kelas-kelas tuisyen, guru-guru yang baik, tidak diperolehi. Justeru itu tentulah pencapaian mereka akan terjejas, dan hal ini berdasarkan latar belakang pelajar ini sedikit sebanyak akan mempengaruhi pencapaian mereka di universiti kelak.

Jadi jika pemberian biasiswa diasaskan kepada kecemerlangan semata-mata maka sampai bilakah mereka yang miskin ini dapat membela keluarga mereka setelah mereka keluar daripada universiti kelak. Satu kes yang dirujuk kepada saya, daripada beberapa kes yang datang kepada saya, seorang pelajar daripada kawasan pedalaman di Hulu Terengganu yang mendapat pinjaman dan berjaya melanjutkan pelajaran ke luar negeri. Beliau melanjutkan pelajaran selama dua tahun di United

Kingdom, oleh kerana keputusan peperiksaan tidak mencapai tahap kecemerlangan yang dikehendaki beliau terpaksa membayar balik pinjaman yang dibuat yang berjumlah RM 107,678.55 sen.

Tuan Yang di-Pertua: Yang Berhormat minta gulung ya.

Tuan Haji Muhyidin bin Haji Abd.Rashid: Dengan hutang sebanyak itu bagaimanakah kita dapat mengharapkan pelajar ini dapat membela ibubapa mereka keluarga mereka serta masyarakatnya yang telah dilanda kemiskinan begitu lama. Jesteru itu saya merayu supaya dikaji balik cara pemberian biasiswa agar ianya dapat membantu keluarga miskin mengubah nasib hidup mereka.

Tuan Yang di-Pertua, satu perkara lagi yang ingin saya sentuh ialah berkenaan dengan satu arahan pertukaran anggota polis secara besar-besaran beberapa hari sebelum pembubaran Parlimen 1999 baru lalu. Pada 4 November 1999, satu surat arahan telah dikeluarkan oleh Ketua Polis Negara kepada Ketua Polis Negeri-negeri supaya menghantar senarai nama mereka yang akan ditukarkan yang mana ia akan membabitkan sejumlah 29,780 orang anggota daripada semua peringkat.

Pertukaran ini dipercayai melibatkan perbelanjaan berjuta-juta ringgit dari wang negara. Persoalannya, apakah motif sebenar arahan pertukaran ini. Apakah ia mempunyai kaitan dengan suasana politik pada ketika itu yang dilihat tidak memihak kepada parti pemerintah. Mungkin dengan arahan ini diharap anggota-anggota polis akan bertindak dengan lebih keras dan tegas terhadap parti-parti pembangkang dalam masa pilihan raya. Saya bimbang sekiranya cara ugutan pertukaran ini menjadi trend baru kepada parti pemerintah dan seterusnya menjadi tradisi setiap kali pilihan raya untuk mengugut anggota keselamatan supaya mengekalkan pemerintah yang sedia ada. Maka kita akan lihat suatu hari nanti rakyat tidak akan menghormati lagi polis sebagai pihak yang berkecuali dalam melaksanakan tugas mereka.

Tuan Yang di-Pertua: Ya, Yang Berhormat, masa Yang Berhormat sudah cukup Yang Berhormat.

Tuan Haji Muhyidin bin Haji Abd.Rashid: Sikit lagi Tuan Yang di-Pertua, nak habis sikit sahaja.

Tuan Yang di-Pertua: Jika bagi, yang kebelakangan ini tak cukup masa.

Tuan Haji Muhyidin bin Haji Abd.Rashid: Berhubung dengan kebajikan anggota polis yang telah bersara. Anggota-anggota polis yang mencapai umur 45 tahun atau cukup tempoh perkhidmatan 25 tahun adalah layak untuk memohon persaraan. Apabila seorang anggota polis itu bercadang untuk bersara beliau akan diberi peluang berkursus untuk memulakan hidup baru sebagai anggota masyarakat awam. Soalannya ialah, setelah menamatkan kursus dan bersara, mereka tidak mendapat sebarang kemudahan untuk mengusahakan apa yang dipelajari semasa sebelum bersara dan menjadi satu kesukaran kepada mereka untuk mendapat pinjaman di bank-bank atau agensi kerajaan kerana mereka tidak mempunyai pengalaman, cagaran dan sebagainya.

Justeru itu saya mencadangkan supaya kerajaan memperuntukkan sejumlah wang untuk pinjaman kepada mereka bagi memulakan kehidupan baru terutama mereka yang berpangkat rendah.

Tuan Yang di-Pertua: Ya, cukuplah Yang Berhormat.

Tuan Haji Muhyidin bin Haji Abd.Rashid: Ya, terima kasih banyak Tuan Yang di-Pertua.

Tuan Yang di-Pertua: Ha, Yang Berhormat bagi Lubok Antu.

17.29 ptg.

Tuan Jawah anak Gerang [Lubok Antu]: Tuan Yang di-Pertua, setelah berdiri beberapa kali saya ucapkan terima kasih kepada Tuan Yang di-Pertua kerana

memberi peluang untuk membahaskan Belanjawan 2000. Oleh kerana kesuntukan masa saya akan cakap terus kepada apa kementerian yang saya nak cakap.

Pertama, berkenaan dengan pendidikan. Tidak boleh dinafikan bahawa saya rasa sistem pendidikan di negara kita adalah sudah tidak sesuai lagi kerana saya rasa pendidikan adalah seperti kilang yang melahirkan sesuatu produk. Apa yang kita tengok sekarang budak-budak sekolah yang telah dilahirkan oleh sistem sekolah kita sekarang tidaklah begitu semacam kita dahulu. Dahulu apabila Tingkatan Lima atau Tingkatan Enam seseorang itu sudah fasih juga bertutur dalam Bahasa Inggeris, cekap juga menulis dan sistem pendidikan kita sekarang saya rasa tidak begitu cekap. Oleh yang demikian saya mencadangkan haruslah kita merombak sistem pendidikan yang kita ada sekarang oleh kerana kalau tidak, saya amatlah takut sekali, banyak sekarang kita tengok pelepak-pelepak di Banda Raya Kuala Lumpur.

Tengok sahaja hari Sabtu, ramai yang memakai motosikal yang saya tidak tahu kenapa sistem pendidikan boleh menghasilkan budak-budak seperti ini. Kita tengok sahaja telefon awam, di kawasan saya dari Sri Aman ke Lubok Antu banyak telefon awam juga sudah dibagi oleh kerajaan, tetapi tidak satu pun dapat digunakan kerana dirosakkan oleh budak-budak sekolah ataupun budak-budak tidak sekolah yang tiada kerja. Inilah hasil sistem pendidikan sekarang. Jadi saya rasa Kementerian Pendidikan haruslah melahirkan insan yang bermoral. Sistem pendidikan kita sekarang tidak begitu mampu, jadi kita harus membuat sesuatu.

Tajuk yang kedua Tuan Yang di-Pertua, saya hendak katakan di sini ialah berkenaan dengan pertanian. Bidang pertanian ini amatlah bidang yang paling penting sekali. Kita tahu kerajaan sekarang telah mengadakan Dasar Pertanian Ketiga. Jadi, oleh sebab saya sendiri adalah wakil rakyat dari luar bandar dan juga hampir 70% rakyat saya di Lubok Antu adalah melibatkan diri dalam sektor pertanian. Apa yang terjadi sekarang ialah mereka bertani dengan sistem secara tradisional. Pertanian secara ini tidak menghasilkan produktiviti begitu rendah. Saiz ladang juga kecil dan mereka kurang juga menggunakan jentera ataupun lebih menggunakan otot. Itu dikatakan oleh Perdana Menteri kita.

Jadi, oleh sebab demikian ramai penduduk di luar bandar telah dikatakan berada dalam kemiskinan. Jadi, kalau kerajaan hendak juga mengurangkan atau menghapuskan kadar kemiskinan di negara ini, haruslah kita menumpukan dalam bidang pertanian. Apa yang pelik Tuan Yang di-Pertua, kerajaan telah memberikan banyak pertolongan kepada petani-petani di luar bandar dan juga petani saya tengok pun rajin bekerja. Tiap-tiap hari turun bekerja dan mereka juga mempunyai tanah begitu luas sekali dan yang paling sedih ialah masih juga mereka berada di dalam keadaan kemiskinan, apa yang salah?

Kita telah membelanjakan berjuta-juta ringgit kepada petani. Saya hendak soal di sini sama ada bantuan ataupun pertolongan yang kita berikan kepada petani-petani tersebut sampaiakah kepada mereka atau ada kesankah langkah-langkah yang dijalankan oleh kerajaan selama ini. Kalau tidak bolehlah kita berfikir balik, haruslah berbuat sesuatu, apa yang salah? Saya amat kluatir sekali...

Tuan Yang di-Pertua: Ada yang bangun Yang Berhormat.

Tuan Jawah anak Gerang: ...takkan petani-petani yang mempunyai tanah yang begitu luas harus berada dalam kemiskinan.

Tuan Yang di-Pertua: Hendak minta penjelasan? Tidak, ya.

Tuan Jawah anak Gerang: ...hendak keluar.

Tuan Yang di-Pertua: Bukan minta penjelasan.

Tuan Jawah anak Gerang: Saya amat kluatir rakyat di luar bandar mempunyai tanah begitu luas, mereka rajin bekerja tetapi masih juga miskin dan kerajaan juga beri pertolongan. Yang penting ialah Tuan Yang di-Pertua, jangan beri pertolongan ini kepada sebarang orang. Kajilah dahulu apakah masalah yang dihadapi oleh petani berkenaan iaitu berkenaan dengan sikap kerana sikap petani adalah penting.

Kalau petani tersebut tidak begitu ingin hendak maju dan kerajaan beri juga pertolongan kepada petani tersebut maka rugilah kerajaan.

Saya lebih percaya Tuan Yang di-Pertua, kalau seseorang petani itu tidak dapat diajar kita memancing ikan, jangan kita cuba mengajar petani tersebut memancing ikan, kalau kita cuba mengajar dia memancing ikan wang kita akan habis, kalau dia tidak pandai memancing ikan cuba berilah dia ikan, suruh dia makan ikan. Macam itu kita tidak membazirkan wang kita. Ada contoh di kawasan saya, petani-petani telah diberikan pertolongan yang begitu banyak berjuta-juta ringgit dan wang hampir dua juta telah diberikan untuk petani-petani di bukit-bukau dan wang itu kehilangan begitu sahaja.

Oleh kerana sikap petani di kawasan itu tidak memahami tujuan kerajaan. Mereka tidak ada niat sekalipun hendak maju, orang itu janganlah diberi pertolongan, berilah kepada saya yang ingin maju, berilah kepada orang-orang yang ingin maju. Kalau begitu kita tidak buang bantuan yang diberikan oleh kerajaan. Jadi, sikap petani-petani, sikap rakyat yang ingin maju haruslah dikaji sebelum memberi pertolongan kepada mereka. Jadi, kita tidak juga membazir wang kerajaan, ini adalah pendapat saya, Tuan Yang di-Pertua.

Jadi, di kawasan saya juga Tuan Yang di-Pertua, oleh kerana saya datang dari luar bandar dan kawasan saya banyak juga tanah dan kalau diberi peluang untuk membasmikan kemiskinan di kawasan saya adalah lebih senang. Kita sudah ada nucleus centre iaitu kilang di Marindon, di mana kelapa sawit boleh dijual kepada kilang tersebut dan apa yang hendak saya katakan di sini ialah orang-orang yang tidak terlibat di dalam kilang, dalam SELCRA, dalam ladang tersebut iaitu di luar ladang tersebut haruslah digalakkan menanam kelapa sawit di tanahnya sendiri, kalau orang itu tidak pandai menanam kelapa sawit kerajaan boleh berikan panduan, boleh juga membuat jalan, boleh beri dengan benih kelapa sawit supaya mereka ini boleh digalakkan untuk menanam kelapa sawit dengan sendiri dan juga menjualnya kepada kilang tersebut.

Oleh yang demikian, orang-orang yang mempunyai tanah dapat juga keuntungan daripada nucleus-nucleus ataupun pusat-pusat (*centres*) yang kita sudah bina. Jadi, contoh ini amatlah sesuai sekali supaya hasrat kita kalau hendak menghabiskan ataupun mengurangkan kemiskinan, rakyat-rakyat yang ada tanah haruslah digalakkan membangunkan tanah-tanah mereka walaupun mereka sedang terlibat dalam pertanian yang tradisional.

Jadi, saya amat percaya di kawasan saya sekiranya tiap-tiap petani ataupun tiap-tiap keluarga di kawasan saya diberikan benih sawit dan diberi pertolongan oleh kerajaan sekiranya 500 pokok tiap-tiap pintu, mereka akan tidak lagi berada dalam kemiskinan. Inilah pendapat saya. Jadi....

Tuan Yang di-Pertua: Cukuplah Yang Berhormat, masa sudah cukup.

Tuan Jawah anak Gerang: Satu perenggan lagi Tuan Yang di-Pertua, okay sekian terima kasih. [*Ketawa*]

Tuan Yang di-Pertua: Tumpat.

5.43 ptg.

Dato' Kamarudin bin Jaffar [Tumpat]: Tuan Yang di-Pertua, saya ucapkan terima kasih kepada Tuan Yang di-Pertua kerana memberi peluang kepada saya untuk hanya beberapa minit sahaja turut berbahas berkaitan dengan Belanjawan 2000 yang dibentangkan beberapa minggu yang lalu.

Tuan Yang di-Pertua, sebagaimana yang kita semua dengar dan lihat dan baca ucapan yang dibacakan oleh Yang Berhormat Menteri Kewangan semasa membentangkan Belanjawan 2000 yang lalu, salah satu perkara yang beliau nyatakan untuk membuktikan bahawa ekonomi Malaysia telahpun pulih ialah kenyataan beliau bahawa pasaran saham negara, indeks Bursa Saham Kuala Lumpur telah melonjak naik

kepada angka lebih daripada 1,000 mata. Hari ini saya tidak tahu, saat ini tetapi semalam harga indeks tutup BSKL telah turun lebih kurang 100 mata daripada ketika beliau berucap itu.

Tuan Yang di-Pertua, ini menandakan bahawa kita tidak boleh dengan mudah menyatakan bahawa ekonomi kita sudah pulih dan oleh itu kita telah dapat bekerja dan bergerak dan bertindak seperti sebuah kerajaan yang mana ekonomi kita telah pulih sepenuhnya. Sebaliknya saya ingin menyarankan kepada kerajaan supaya sentiasa waspada dan sentiasa mendengar pandangan-pandangan daripada ahli-ahli ekonomi yang lain, ahli-ahli parti politik yang lain supaya ekonomi kita benar-benar dapat bangkit bangun dengan suburnya dan tidak lagi bergantung kepada beberapa fakta yang hanya difikirkan oleh pemimpin-pemimpin tertentu sahaja daripada Barisan Nasional sebagai betul dan tidak mahu mendengar pandangan daripada pihak-pihak yang lain.

Tuan Yang di-Pertua, salah satu point yang besar yang diutarakan oleh Yang Berhormat Menteri Kewangan dalam membenteng Belanjawan yang lalu ialah berkaitan dengan k-ekonomi. Saya rasa kita boleh bersetuju dengan konsep yang ingin diketengahkan ini. Saya sekadar ingin mengambil kesempatan ini untuk menyebut bahawa keekonomi ini tidak boleh kita bangunkan dengan baik, subur dan berjaya hanya dengan memberi penekanan kepada sudut ekonomi sahaja. Saya ingin menyarankan bahawa keekonomi akan hanya maju dan berjaya dalam konteks ke masyarakat, ke-politik dan ke-mentaliti dalam seluruh gerak kerja kerajaan dan masyarakat kita. Maknanya bukan ekonomi sahaja yang *knowledge-based* tetapi masyarakat kita kena *knowledge-based*, sistem politik kita kena *knowledge-based*, perjalanan masyarakat kita pun kena *knowledge-based*.

Jadi, saya ingin mencadangkan, cadangan pertama saya ialah bahawa untuk kita memastikan bahawa masyarakat 'k' kita ini akan berjaya ialah kita mula di Parlimen dahulu. Sekali lagi walaupun saya telah sebutkan dalam sidang Penggal Pertama dahulu berkaitan dengan perlunya masa persidangan Dewan Rakyat ini diperbanyakkan, dipertingkatkan, saya ingin mengulangi cadangan supaya sidang-sidang Parlimen ini, masa yang diperuntukkan bukan sahaja untuk membincangkan Belanjawan negara tetapi atas isu-isu dan akta-akta dan usul-usul yang lainnya dilanjutkan.

Saya tahu dan saya berterima kasih bahawa Tuan Yang di-Pertua sentiasa memberi peluang untuk kita terus menambah masa seperti hari ini untuk membahaskan usul-usul tetapi saya merayu supaya untuk masa-masa yang akan datang, kita membuat perancangan untuk meningkatkan dan menambahkan masa perbahasan supaya benar-benar ke-ekonomi, ke-masyarakat, ke-politik ini kita mula daripada Dewan ini dahulu.

Keduanya, saya ingin menyebut bahawa dalam kita hendak menuju kepada masyarakat ke-ekonomi ini ada beberapa perkara yang saya sering perhatikan khususnya dalam kita membaca laporan-laporan dalam akhbar-akhbar. Beberapa minggu yang lalu misalnya, pada suatu hari saya buka surat khabar, baca bahawa terdapat Ahli-ahli Parlimen Barisan Nasional mengkritik Ketua Pembangkang di atas ucapan Ketua Pembangkang. Ada laporan yang menunjukkan seorang lagi ahli Barisan Nasional mengkritik Ketua Pembangkang di atas ucapan Ketua Pembangkang. Tetapi di muka akhbar itu, saya tidak dapat baca pun apa yang disebutkan berkaitan dengan ucapan Ketua Pembangkang itu. Ini sudah tentu tidak adil. Ini sudah tentu tidak sihat untuk kita mewujudkan masyarakat 'k' – masyarakat dan ekonomi atau ke-ekonomi yang kita kehendaki ini.

Jadi, cadangan saya Tuan Yang di-Pertua ialah supaya Parlimen sendiri, Tuan Yang di-Pertua sendiri dan unit Parlimen sendiri yang diberikan tugas untuk membuat laporan yang diwajibkan untuk disiarkan dalam Radio Televisyen Malaysia yang dipunyai oleh kerajaan, dalam laporan Bernama yang dipunyai oleh kerajaan supaya maklumat-maklumat yang tepat dapat disampaikan kepada masyarakat supaya kita

dapat menuju kepada suatu masyarakat 'k' yang sesuai untuk kita mencapai matlamat k-ekonomi kita ini.

Cadangan saya yang ketiga Tuan Yang di-Pertua ialah dalam ucapan yang diberikan oleh Yang Berhormat Menteri Kewangan, beliau telah menyebut bahawa telah diwujudkan di Kementerian Kewangan satu *think tank* untuk mengkaji berkaitan dengan pelaksanaan ekonomi tadi. Selari dengan cadangan dan pandangan saya bahawa k-ekonomi ini dapat dicapai melalui kita melihatnya secara keseluruhan – k-masyarakat, k-politik, k-mentaliti dan sebagainya, maka saya ingin mencadangkan kepada Kementerian Kewangan khususnya kepada *think tank* yang ditugaskan untuk membincang dan memberi cadangan-cadangan untuk melaksanakan ekonomi ini supaya dalam usaha-usaha dan tugas-tugas mereka itu mereka memperhatikan juga berkaitan dengan bagaimana hendak mendekati persoalan ekonomi ini dari sudut yang meluas dan tidak hanya menumpukan kepada fakta-fakta ekonomi sahaja. Ini adalah amat relevan kerana banyak orang yang menganggap bahawa kerajaan Barisan Nasional yang ada hari ini terlalu banyak menu mpu kepada perniagaan dan ekonomi sahaja dan agak kurang menumpu kepada aspek-aspek lain kehidupan masyarakat kita ini.

Perkara yang keempat yang saya ingin cadangkan ialah bahawa dalam perdebatan yang dilakukan dua minggu ini terdapat tuduhan juga khususnya daripada Yang Berhormat bagi Tambun yang mengatakan bahawa Yang Berhormat Ketua Pembangkang dalam ucapan beliau tidak menyebut berkenaan dengan statistik-statistik yang sah.

Beliau mengatakan bahawa Ketua Pembangkang sekadar membaca teks sahaja tetapi tidak merujuk kepada statistik-statistik. Ini adalah tuduhan yang agak berat. Saya dapat membuktikan bahawa ada statistik-statistik khususnya berkaitan dengan kadar kemiskinan khususnya berkaitan dengan betapa luasnya jurang antara kaya dengan miskin berlaku dalam masyarakat kita akhir-akhir ini. Kajian-kajian ekonomi menerusi statistik-statistik yang dipetik daripada laporan-laporan kerajaan telah menunjukkan walaupun kerajaan berjaya untuk merapatkan jurang antara kaya dengan miskin dalam dekad 1970-an tetapi dalam dekad 80-an terutamanya dalam dekad 90-an, jurang antara yang kaya dengan miskin telah menjadi bertambah besar.

Ini adalah sesuatu yang dapat kita lihat daripada fakta-fakta statistik. Tetapi apa yang saya ingin cadangkan Tuan Yang di-Pertua, di Dewan ini ialah untuk kita mengelakkan daripada terdapatnya pertikaian di kalangan kita berkaitan dengan fakta-fakta dan statistik-statistik ini.

Kami ingin mencadangkan supaya dijadikan satu undang-undang yang mewajibkan jabatan statistik mengeluarkan statistik-statistik secara berkala – sekali sebulan, sekali dua bulan, sekali dalam tiga bulan atau enam bulan atau setahun sekali bersesuaian dengan statistik-statistik. Berkaitan misalnya dengan kadar pengangguran, berkaitan dengan misalnya dengan jurang antara kaya dengan miskin, berkaitan dengan perdagangan antarabangsa, berkaitan dengan perdagangan dalam negeri. Biarlah statistik-statistik ini dikeluarkan mengikut undang-undang supaya masyarakat Malaysia menjadi tinggi pengetahuannya berkaitan dengan statistik supaya tidak timbul lagi pertikaian di antara kita berkaitan dengan statistik ini.

Yang terakhirnya, Tuan Yang di-Pertua saya hendak maklumkan bahawa sebagai matlamat kita untuk mencapai k-ekonomi dan k-masyarakat ini, kerajaan mestilah menyelaraskan dasar-dasarnya untuk tidak menyekat penyebaran maklumat iaitu 'k' – knowledge kepada masyarakat. Saya ingin ulangi apa yang disebutkan oleh ahli-ahli pembangkang yang lainnya berkaitan dengan dasar kerajaan sebagai contoh menyekat penyebaran, pengeluaran dan penerbitan *Harakah* daripada 2 kali seminggu, melarangnya dan hanya membenarkannya 2 kali sebulan. Ini sudah tentu menyalahi banyak prinsip – prinsip k-ekonomi, prinsip k-pengetahuan, prinsip hak asasi ahli-ahli parti politik sesama mereka untuk mengetahui maklumat, *information knowledge*

daripada partinya melalui saluran akhbar nya tidak harus disekat oleh mana-mana pihak sekalipun terutama sekali pihak kerajaan.

Tetapi berkaitan dengan *Harakah* ini, selain daripada k-ekonomi yang menjadi satu masalah yang besar yang mengejutkan kita ialah dengan menghalang penyebaran dan pengeluaran *Harakah* daripada 2 kali seminggu kepada hanya 2 kali sebulan. Ini sebenarnya satu usaha membunuh usahawan ekonomi bumiputera yang telah berjaya mengeluarkan akhbar yang mana jualan nya bermula dengan 15,000 akhir-akhir mencapai hampir 400,000 jualan nya – satu kejayaan ekonomi bumiputera yang patut nya kita bangga tetapi disekat oleh kerajaan, dibunuh oleh kerajaan dengan caranya mengehadkan [*Tepuk*] pengeluarannya hanya kepada 2 kali sebulan.

Jadi, saya ingin mengesyorkan kepada pihak kerajaan, kaji baliklah dasar itu. Benarkanlah balik *Harakah* untuk dikeluarkan pada kadar 2 kali seminggu. Tuan Yang di-Pertua, terima kasih.

Tuan Muhamad bin Mustafa: [*Bangun*]

Tuan Yang di-Pertua: Ya, Yang Berhormat ada hanya 5 minit sahaja dibagi Yang Berhormat. Boleh? Sila.

5.54 ptg.

Tuan Muhamad bin Mustafa [Peringat]: Bismillahir-Rahmanir-Rahim. Assalamualaikum wr. wb. dan salam sejahtera.

Tuan Yang di-Pertua, terima kasih diucapkan kerana diberi peluang kepada saya untuk turut serta berucap dalam membahar usul-usul Belanjawan tahun 2000 dalam Dewan yang mulia ini. Oleh kerana kesuntukan masa jadi saya harap semuga apa yang dibahaskan di dalam Dewan ini diberka ti Allah s.w.t dan membuahkan suatu hasil yang baik untuk membantu rakyat. Kita harap agar Belanjawan ini akan membawa suatu perubahan kepada kehidupan rakyat secara realistik dan berprinsip.

Kita tidak mahu Belanjawan ini hanya begitu sahaja tetapi tidak membawa apa-apa perubahan yang bermakna kepada rakyat. Di Dewan ini kita dengar banyak rintihan-rintihan yang disampaikan oleh wakil-wakil rakyat mengenai masalah asas yang sepatutnya sudah lama selesai tetapi tidak dapat diselesaikan.

Tuan Yang di-Pertua, suka juga saya mengingatkan bahawa kita adalah sebuah negara yang sudah merdeka dianugerah oleh Allah s.w.t. pelbagai kekayaan, sebuah negara yang berdaulat dan diberi pelbagai kemudahan oleh Kerajaan Allah s.w.t. supaya kerajaan yang memerintah negara ini dapat melaksanakan fungsinya dengan baik dan saya harap semoga kerajaan ini dapat melaksanakan tanggungjawabnya dengan sebaik-baiknya.

Suatu perkara yang saya hendak cadangkan di sini ialah mengenai masalah kejatuhan nilai manusia. Di akhir-akhir ini kita perhatikan kejatuhan nilai manusia ini adalah sangat-sangat teruk walaupun ia tidak ada indeks macam saham tetapi kejatuhan ini adalah sangat merbahayakan masyarakat jika kita biarkan. Kalau masalah kejatuhan nilai ringgit kita dapati pihak kerajaan begitu bersungguh untuk menaikkan atau menjaga nilai ringgit ini tetapi kejatuhan nilai manusia tidak ada satu usaha yang bersungguh-sungguh dari pihak kerajaan bagaimana hendak menjaganya atau hendak memulihkannya. Oleh kerana itu saya cadangkan semoga ada satu dasar pembangunan insan negara supaya nilai insan ini dapat dipertahankan dan manusia sebagai aset negara yang paling mahal dan berharga itu dapat dipertahankan dengan sebaik-baiknya.

Tuan Yang di-Pertua, dalam kesempatan ini juga saya ingin mencadangkan kepada pihak keselamatan di dalam negeri supaya mengambil berat tentang unsur-unsur yang mengancam keselamatan negara, bukan sahaja dari segi gerakan-gerakan yang dianggap oleh pihak keselamatan sebagai mengancam keselamatan tetapi gejala-gejala yang meruntuhkan akhlak, maksiat dan sebagainya merupakan unsur-unsur yang juga mengancam keselamatan.

Imam Azzahabir Rahimahullah telah menyenaraikan tujuh puluh dosa besar dan dosa besar ini dianggap sebagai perkara yang mengancam negara. Dalam tujuh puluh dosa besar itu, dosa besar yang paling besar sekali ialah, yang pertama ialah 'assyirkubillah' – mensyiriki Allah yakni menduakan Allah baik dari segi ibadah, dari segi syariah dan undang-undang. Yang kedua, menderhakai dua ibu bapa dan dosa besar yang paling besar yang ketiga ialah saksi palsu atau orang yang menjadi saksi palsu di mahkamah. Ini merupakan dosa yang paling besar, yang ketiga besar selepas amalan syirik dan derhaka kepada dua ibu bapa.

Tuan Yang di-Pertua, negara kita berada di dalam suasana aman dan keamanan ini perlu kita pertahankan. Walau bagaimanapun, keamanan sesebuah negara itu mempunyai hubungan yang rapat dengan keimanan. Apabila rakyat sesebuah negara itu sudah hilang keimanannya, maka ia akan mengancam keamanan negara. Demikian juga mengenai masalah penyeksaan terhadap orang-orang tahanan di bawah Akta Keselamatan Dalam Negeri. Kita telah dengar banyak cerita tentang penyeksaan yang dilakukan terhadap orang-orang tahanan dan ini yang tidak diketahui oleh umum.

Oleh itu saya mencadangkan kepada pihak kerajaan supaya orang-orang di bawah tahanan ISA ini dijaga dengan baik dan diberi hak mereka. Baru-baru ini kita sudah digempar dengan suatu isu yang sangat mencabar ia di mana bekas Timbalan Perdana Menteri ditumbuk dan dipecahkan muka dengan begitu dahsyat.

Tuan Yang di -Pertua: Yang Berhormat, Yang Berhormat, perkara itu tidak boleh disentuh kerana akan dibicara dalam mahkamah.

Tuan Muhamad bin Mustafa: Jadi, oleh kerana itu saya harap semoga rakyat-rakyat biasa juga diberi hak mendapat perlindungan dan tidak disiksa dengan begitu rupa. Seorang ulama dari Kelantan *ditorture* sehingga gila akhirnya. Jadi, ini merupakan satu penyeksaan yang luar daripada batas-batas kemanusiaan. Orang-orang di bawah tahanan ISA juga mempunyai hak asasi manusia yang mesti ditunaikan.

Dan seterusnya Tuan Yang di-Pertua, saya juga mencadangkan kepada pihak kerajaan supaya jangan mendakwa kes-kes orang Islam di mahkamah – kes-kes Mahkamah Syarak supaya tidak didakwa di Mahkamah Sivil. Ini juga adalah hak orang Islam. Setiap orang Islam mempunyai hak untuk hidup dengan Islam dalam segala sistem hidupnya termasuklah sistem kehakiman dan keadilan. Sudah lama pihak rakyat meminta supaya pihak kerajaan memberi kuasa penuh kepada Mahkamah Syarak untuk menjalankan fungsinya untuk melaksanakan tuntutan fardu kifayah yang disebut-sebut oleh kerajaan. Selama mana kita tidak melaksanakan fardu kifayah ini selama itulah beban dan risikodosa ditanggung oleh semua rakyat Islam di Malaysia ini.

Tuan Yang di-Pertua: Ya, Yang Berhormat, masa sudah cukup, Yang Berhormat.

Tuan Muhamad bin Mustafa: Sekian, terima kasih.

Tuan Yang di -Pertua: Ahli-ahli Yang Berhormat, mesyuarat ditangguhkan hingga jam 10.00 pagi besok.

Dewan ditangguhkan pada pukul 6.00 petang.